

YUGU' SALMO

1

¹ Bica' ba bönni' biti' runë', ca naca le ta'gú'u yöl-la'
lë' nupa tu'cá'ana Dios,
en biti' ridálenë' tsözxön nupa tun dul-la',
en biti' runë' tsözxön le tun nupa ta'zí' quidza'
Dios.

² Le raza ládxë'ë nácagaca xibá naguixjë' Xanru',
en ca nácagaca xibá na' rëla, en te dza rulaba
ládxë'ë.

³ Bönni' ni náquië' ca tu yaga dxe' ga naca ra' nisa,
le ribía sizxöni cate' ridxín dza que,
en biti' ca' rizóa gubá'ayisö.
Yúgu'të le runë' ta'rúaj dxi'a.

⁴ Biti' raca caní quégaca nupa tuá' dö'.
Nácagaca ca bëbu zxe café ruá' le bö'.

⁵ Que lë ni na' biti' ulu'rúajë' tsahui' bönni' tu'ë dö'
cate' Dios uchi'a usöröë' quégaquië',
en biti' ila'cu'ë bönni' dul-la' ga tu'dubë' bönni'
tsahui'.

⁶ Rapa chi'ë Xanru' Dios nöza ga ta'dë' bönni'
tsahui' na',
pero uniti tsaz nu ridá gapa ta'dá nupa tuá' dö'.

2

¹ ¿Bizx que tu'tsatsa bönachi yugu' yödzo
en tu'pá'a nítisö le ilúngaca?

² Bönni' ta'nná bë'ë luyú ta'dá'baguë'ë Dios.
Tun tuz xtídza'gaca nupa dë lu ná'agaca
para ila'dá'baga' Xanru', en Nu na' nabö cazë' para
inná bë'ë,

3 ta'nná: “Uzxuzxaj uquínnajru' le ta'nná bé'enë
rë'u,

en chú'unaru' yugu' le tu'zenë' bach rë'u.”

4 Dios na' zoë' yehua' yubá uzxídxisë'.

Xanru' Dios utitaj cazë' léguequi.

5 Ní'irö lu yöl-la' rilé queë' güi'ilenë' léguequi didza',
en lu yöl-la' ridzá'a queë' uzenë' bach léguequi.

6 Innë': “Nuzóa caza' bönni' nabö caza' xilatjë' ga
inná bë'ë.

Inná bë'ë lu Guí'a Sión, le naca guí'a lá'ayi quia'.”

7 Quíxjöi'ida' libí'ili' didza' nuzöë' tsaz Dios.

Xanru' Dios gudxi cazë' neda': “Li' nacu' Zxí'ina'.

Na'a dza nuzóa caza' Li'.

8 Gunábini neda', ate' guna' ga ilequi quiu' yugu'
yödzö.

Guequi ca' quiu' idútë yödzölió.

9 Quitsju' léguequi len tu xiyaga guíë.

Uzxuzxju' léguequi ca run nu rilá'a tu zxiga'
yö'öna.”

10 Que lë ni na', libí'ili' na' rinná bë'ëli', guli'tséajni'i.
Guli'sedi cuinli', nülöli' ruchi'a rusöröli' le raca
luyú.

11 Lu yöl-la' ba'a ladxi' queëli' guli'gún xichinë'
Xanru'.

Lu yöl-la' rixxizi queëli' buli'sí' xibë'.

12 Guli'gún bal Zxí'inë' Dios para cabí ilétenë',

en para cabí udxi queëli' la' nöza.

La' ilentë yöl-la' rilé queë'.

¡Bica' ba yúgu'të nupa tu'zxöni ladxi' Lë'!

3

1 Xan, chinayángacada' nupa ta'lé neda'.

Zián nupa ta'dá'baga' neda'.

² Zián nupa ta'nné quia', ta'nná:

“Biti' usölé' Dios lé'.”

³ Pero Li', Xan, run chí'itica'su' neda'.

Nacu' yöl-la' ba quia', en Nu rutipa neda'.

⁴ Bë'a zidzaj didza', bulidza'-në' Xanru',

ate' Lë' biyönnë' chí'a ga na' zoë' lataj lá'ayi queë'.

⁵ Neda' rata', en rasia',

ate' rubana', tu' nazöntica'së' Xanru' Dios neda'.

⁶ Biti' gádxida' gayuá' gayuá' bönachi,

nupa na' nagú'ugaca neda' lé'ajlö.

⁷ ¡Guyasa, Xan! ¡Busölá neda', Dios quia'!

Budxía huë' xága'gaca nupa tu'dí'i neda',

en buquínnajda' nupa nácagaca xihui'.

⁸ Xan, rusölá cazu' bönachi quiu'.

Ben ga gaca dxi'a quégaca bönachi quiu'.

¡Ca' gaca!

4

¹ Bubí'i didza' cate' rulidza' Li', Dios.

Nacu' Nu ruchi'a rusöró le raca quia'.

Cate' gurö'a böniga, bida cazu' Li' ga zoa', en gúcalenu' neda'.

Ruhuéchi' ladxi' neda', en ruzé nagu' le rinábida' Li'.

² Rnnë' Dios: “Libí'ili', bönachi, ¿gáca'xte ulidza dítajli' neda'?

¿Gáca'xte caz idxí'ili' le cabí nazaca', en güí'i ládxi'li' le cabí naca?”

³ Guli'tsöjné nabö cazë' Xanru' nu radxi Lë',

ate' riyönnë' neda' cate' rulidza'-në'.

⁴ Guli'gadxi Lë', en bíti'rö gunli' dul-la'.

Guli'sá' ladxi' ca naca lë ni cate' dëli' ga ráta'li', en
guli'sóa dxisö.

⁵ Guli'cú'u lahuë' Xanru' le naca dxi'a,
en buli'zxöni ladxi' Lë'.

⁶ Zián nupa ta'nná: “¿Nuzxi caz gun ga gaca dxi'a
queëru?”

Lu yöl-la' dxi'i ladxi' quiu' buyú netu', Xan.

⁷ Runu' ga rudzëjade'eröda'
ca tu'dzeja nupa tu'zí' xibé zxoá' za guizxi yu, en
xisi lubá uva.

⁸ Cate' rata', la' rásitia' lu yöl-la' riböza dxi ladxi'
quia',
tu' run cazu' Li', Xan, ga riböza' dxi'a tsáhui'do'.

5

¹ Ruzë nagu' didza' ruá'a, Xan.

Buyú ca rinnëda' ládxa'a lu yöl-la' ruhuí'ini quia'.

² Dios quia', Nu rinná be'e neda', ruzë nagu' cate'
rinábida' Li'
gácalenu' neda', na' güi'ilena' Li' didza'.

³ Yugu' zila yönnu' chi'a.

Zílado' idxina' lo', en cöza' didza' ubi'u.

⁴ Nacu' Li' Dios biti' raza ládxi'u le cabí naca,
en biti' ru'u lataj ibiga' ga zu' nu ruá' dö'.

⁵ Biti' ru'u lataj nupa tun ba rahui ila'dxín lo',
en biti' rilé'enu' dxi'a nupa nácagaca xihui'.

⁶ Rusunítu' dërö nupa ta'zí' ye'e luzë'eguequi,
en biti' rilé'enu' dxi'a nupa tuti bönachi, en ta'zí'
yë'.

⁷ Gaca tsu'a neda' lu yu'u lidxu', tu' nadxí'ide'enu'
neda'.

Lu yöl-la' ba'a ladxi' quia' tsu'a ga naca yudo' lá'ayi
quiu', en tseaj ládxa'a Li'.

8 Tu' nacuá' zían nupa ta'lé neda', buluí'i neda' le
naca dxi'a ré'ënu' guna', Xan.

Busëdi neda' para gaca guna' ca ré'ënu' Li'.

9 Biti' gaca nu tseajlé' didza' tuí'i nupa na' ta'lé
neda'.

Nácagaca xihui' icja ládxi'do'guequi.

Naca ruá'agaca ca tu yeru ba nayalaj,

en lu yöl-la' rizi' yë' quéguequi tuí'i yulaj didza'.

10 Ben léguequi xiguia', Díos.

Ben ga bití' udxín xtídza'guequi.

Gurú'una léguequi tu' túntica'sö dul-la',

en tu' ta'dá'baga' xtídz'u.

11 Ulu'dzeja nupa tu'zxöni ladxi' Li'.

Lu yöl-la' rudzeja quéguequi gül-lagaca quiu' tu'
rácalenu' léguequi.

Tu'zi' xibó' nupa nadxí'igaca Li'.

12 Run cazu' Li' ga raca dxi'a quégaca nupa tun ca
rnna xtídz'u, Xan.

Lu yöl-la' dxi'i ladxi' quiu' run chi'u léguequi.

6

1 Biti' uzenu' bach neda' lu yöl-la' rilé quiu', Xan.

Biti' gunu' neda' xiguia' lu yöl-la' ridzá'a quiu'.

2 Buéchi' ladxi' neda', Xan, tu' rudú ládxa'a.

Bun neda', Xan, tu' riguí'i rizáca'a.

3 Rö'ö böniga idútë le naca'.

¿Gáca'xte caz gaca caní, Xan?

4 Gudá dusöló' neda', Xan.

Tu' nadxí'inu' neda', busölá neda' lu yöl-la' guti.

5 Lu lataj chul-la cuntu nu tsöjné Li'.

Cuntu nu zoa ni' nu gaca cu'u Li' yöl-la' ba.

6 Rudú ládxa'a tu' rinnética'sö ládxa'a.

Yugu' dzö' ribisa le ráti'da' len nisa ribödxí quia'.

Rusubisa' xcúgua' len nisa ribödxi quia'.
 7 Rö'ö gui guiöj lahua' tu' ribödxtica'sa'.
 Biti' gaca ilé'eda' tu' nözigaca nupa tu'dí'i neda'.

8 Guli'cuíta ga zoa', libí'ili', ruá'ali' dö',
 tu' riyönnë' Xanru' ribödxa' neda'.
 9 Ruzé naguë' le rulidza', ráta'yua' lahuë',
 en rubi'ë didza' cate' bi rinábida' Lë'.
 10 Ulu'tuí'i nupa tu'dí'i neda', en ila'bö' böniga.
 Lu yöl-la' rutuí'i quéguequi ulu'biga' ga zoa'.

7

1 Ruzxöni ládxa'a Li', gácalenu' neda', Xana' Dios.
 Busölá neda' lu ná'agaca nupa ta'bía no neda', en
 gúcalen neda'
 2 para cabí soa nu cuéaj neda' ca runba' bëdxi
 guixi',
 en para cabí usuniti neda' ga cuntu nu zoa gácalen
 neda'.
 3 Xana' Dios, channö caní nuna':
 Channö nabága'a xigua',
 4 o channö bubi'a dö' que nu gúcalen neda',
 o channö bi'a dö' que nu bití' bi ben quia' lu bití'
 rilé'e neda' dxi'a,
 5 bë' lataj soa regu' neda' nu na' bití' rilé'e neda'
 dxi'a, en ucul-la neda'.
 Bë' lataj nu na' quin neda' lu yu,
 en ucá'ana neda' cá'asö.
 6 Lu yöl-la' rilé quiu' guyasa, Xan.
 Gudá'baga' nupa na' lu yöl-la' ridzá'a quéguequi
 tá'baga' neda'.
 Guyasa, gúcalen neda' tu' nacu' Nu ruchí'a rusörö
 le raca quia'.
 7 Ben ga ulu'dubi quiu' yúgu'të bönachi,

en gunná be'e léguequi ga ni' zu' xitsá'tërö.

⁸ Ruchi'a rusöröu' quéguequi yúgu'të bönachi, Xan.
Bubéaj neda' tsahui', Xan, tsca naca le tsahui'
nuna', en tu' naca' idú tsahui'.

⁹ Ben ga udxi que le xihui' tun nupa tuá' dö',
pero buzóa tsutsu nupa tun le naca dxi'a,
tu' nacu' Li' idú tsahui', Dios, en ruchi'a rusöröu'
le ta'zá' ládxi'gaca bönachi, en le ta'guínnaj
ícjaguequi.

¹⁰ Naca cazë' Dios Nu run chi'i neda'.
Rusölë' nupa nácagaca idú ladxi'.

¹¹ Dios ruchi'a rusöröë' queëru' ca naca le naca
tsahui',
en richúgutica'së' quégaca nupa tuá' dö'.

¹² Channö cabí ulu'bí'i ladxi' bönachi, utuchë' guíë
tuchi' queë'.

Chinucözë' uxiti' yaga queë'.

¹³ Chinupë'ë yugu' le rudí'inë' lu gudil-la,
en nudxië' lu du uxiti' yugu' yaga túchi'do' zoa guí'
láhuiguequi.

¹⁴ Buyútsöca', riguínnaj icjë' bönni' ru'ë dö' le xihui'
gunë'.

Ruí'i ládxië' le naca dö', en rizí' yë'ë.

¹⁵ Nachö'önë' ga rë' tu yeru zxön ga nu ibixi,
pero lë cazë' yöjbixë' lu yeru na' guchö'önë'.

¹⁶ Budxín la' queëzë' dö' na' bi'ë,
en dxíë' huë' ca naca xiguia' nabáguë'ë.

¹⁷ Guía'-në' Xanru': "Xclenu" tu' náquië' tsahui',
en gul-la' yöl-la' ba que Lë' Xanru', Nu
nayëpisëtërö.

8

- ¹ ¡Xana' Dios,
 bica' ba Lo' idútë yödzölió!
 ¡Xitsá'tërö ca lúxiba nayëpisu' Li'!
² Túl-labi' bí'ido', enca' bi'i huë'enido' yöl-la' zxön
 quiu'
 sal-la' nacuá' nupa ta'dá'baga' Li'.
 Uzóa dxíu' nupa na' biti' ta'lé'e Li' dxi'a, enca' nupa
 ta'dá'baga' Li'.
³ Cate' ruyúa' lúxiba quiu', le nunu' len xibön
 na'zu',
 enca' beu', en yugu' böljaj bení' nuzú' xilátjaguequi,
⁴ ní'iró rnnía': ¿Bizxi caz bönni', tu' röjné cazu' lë'?
 ¿Bizxi caz nu naca bönáchisö, tu' ru'i ládxi'u Li' nu
 na'?
⁵ Nunu' ga naquië' bönni' ia'lati' cuidi' ca naca
 cazu' Li'.
 Nuzú' queë' yöl-la' ba quiu', en yöl-la' run bal ca
 tu le néquini oro dxía icjë'.
⁶ Nunu' ga rinná bé'enë' yugu' le nun cazu' Li'.
 Yúgu'të nuzú' xini'ë lë'.
⁷ Nuzú' xini'ë yúgu'tëba' bö'cu' zxila', en yúgu'tëba'
 bëdxi,
⁸ en lës caní' nunu' ca' quégacaba' biguínnido',
 en quégacaba' böla dzö'öba' nísado',
 enca' quégacaba' yúgu'tëba' böa' ta'dödiba' lu
 nísado'.
⁹ ¡Xana' Dios,
 bica' ba lo' idútë yödzölió!

9

- ¹ ¡Idú ládxa'a rigu'a Li' yöl-la' ba, Xan!
 ¡Usiyönda' bönachi ca naca yúgu'të yöl-la' huáca
 nunu'!

- 2 ¡Udzéjada', en uzi'a xibó'!
 ¡Gul-la' yöl-la' ba que Lo', tu' nayépisëtëru'!
 3 ¡Ta'zxunnaj nupa ta'dá'baga' neda'!
 ¡Ta'dzö'ö, en tu'niti lo' Li',
 4 tu' nubéaju' tsahui' le naca dxi'a runa'!
 ¡Rö'u ga rinná bë'u, en ruchi'a rusöröu' queëtu' ca
 naca le naca tsahui'!
 5 Bulidza zi'u yugu' yödzö, en busunítu' nupa tuá'
 dö'.
 Tsaz busulu' lu guichi quiu' gapa gula'zúaj
 láguequi.
 6 Chigula'niti nupa gula'dá'baga' Li'.
 Tsaz naguínnajgaca gapa gula'cuá'.
 Busunítu' yugu' yödzö gapa na' gula'cuá',
 ate' cuntu nu zoa röjné yugu' yödzö na'.
 7 Zóatica'së' Xanru' Dios.
 Naguixjë' tsaz lataj ga rö'ë rinná bë'ë en ruchi'a
 rusöröë' quégaca bönachi.
 8 Uchi'a usöröë' quégaca bönachi yödzölió lu le naca
 tsahui'.
 Uchi'a usöröë' quégaca yugu' yödzö lu le nácatë.
 9 Gun chi'ë Xanru' Dios nupa nácgaca yechi'.
 Gácalenë' léguequi cate' nu gun léguequi zi'.
 10 Ulu'zxöni ladxi' Li' nupa núnbë'gaca Lo'.
 Caní gaca, Xan, tu' cabí nusán ládXu'u nupa
 tu'guilaj Li'.
 11 Guli'gul-la yöl-la' ba queë' Xanru', zoë' ga na'
 nazí'i le Sión.
 Buli'siyón bönachi yugu' yödzö ca naca yugu' le
 nunë'.

12 Biti' ral-la ládxe'ë nupa ta'guí'i ta'zaca' cate'
tu'lidza Lë',
tu' röjné léguequi Nu na' ruzí' lëbi nu ruti bönachi.

13 Buéchi' ladxi' neda', Xan.
Buyú ca tun neda' zi' nupa tu'dí'i neda'.
Ruchisu' Li' neda' cate' chirequi gátia'

14 para gaca usiyönda' bönachi yöl-la' ba quiu' Li'.
Ga naca ga nu tsaza yödzö quiu' nazí'i le Sión,
udzédada' tu' nusöló' neda'.

15 Yöjbíxigaca bönachi yugu' yödzö lu yeru
gula'chö'öna ga tsöjbíxigaca luzé'eguequi.
Bila'röli ni'aguequi lu yöxaj bulu'cachi' para
ila'zön léguequi.

16 Chinunë' Xanru' Dios ga núnbë'gaca bönachi Lë'
tu' buchi'a busöröë' quéguequi.

Lu lë na' nun nu ruá' dö' zön la' cuinsi.

17 Ila'yaza lataj chul-la nupa tuá' dö',
yúgu'të nupa na' nal-la ládxi'gaca Dios.

18 Calëga tsaz ulu'gá'ana cá'asö nupa ta'yadzaj
ta'yudxi,
en biti' initi tsaz yöl-la' run löza quégaca nupa
nácagaca yechi'.

19 Guyasa, Xan.

Biti' gu'u lataj tsépisë nu naca bönáchisö.

Buchi'a busörö quégaca bönachi yugu' yödzö.

20 Buxös léguequi, Xan.

Ben ga ulu'únbë' le nácgaca, tu' nácagacasö bönachi.

10

1 ¿Bizx que zu' zi'tu', Xan?

¿Bizx que rucachi' lo' cate' bi raca quia'?

² Lu yöl-la' run ba rahui quégaca nupa tuá' dö' ta'bía no nupa nácagaca yechi'.

Ben ga ila'zön du yalaj na' nucáchi'gaca la' léguequisö.

³ Run ba zxön cuinë' bönni' ru'ë dö' ca naca le xihui' rizé ládxë'ë.

Bönni' ruhuídi'në' rulidza ditjë' luzë'ë, en ruzóë' Dios tsölá'alö.

⁴ Lu yöl-la' run ba zxön cuinë' bönni' huía' dö' biti' ru'i ládxë'ë Dios.

Rizá'asö ládxë'ë, rnnë': Biti' ca' zoa Dios.

⁵ Ruzi'ë xibé yúgu'të le runë'.

Biti' ca' réquibe'enë' zoë' Dios Nu ruchi'a rusörö quégaca bönachi.

Ruzóë' tsölá'alö nupa biti' ta'lé'e lë' dxi'a.

⁶ Rë' la' cuinsë': "Gatga ichíxida'.

Catu caz bi gaca quia'."

⁷ Didza' ru'ë nácagaca le rudxía dö', enca' le rizi' yë', en le rudidza' yudxi yugu' luzë'ë.

Ruí'itica'së' didza' le cabí nácatë, en le naca xihui'.

⁸ Rucachi' cuinë' yugu' lu yödzö.

Bagáchi'sö rútië' nupa biti' bi nabága'gaca.

Ruyúlanë' nu bi gaca gun que.

⁹ Ribözë' ga na' nucachi' cuinë' ca runba' bëdxi guixi'.

Ribözë' nu gaca sönë'.

Rizönë' bönni' yechi' lu du yalaj queë', en rá'ayöjë' lë' ga nagachi' queë'.

¹⁰ Riguinë' luyú nu na' nazönë'.

Zián nupa rucul-lë' len në'ë nal-la.

¹¹ Rë' la' cuinsë': "Nal-la ládxë'ë Dios.

Nucachi' lahuë', en biti' ca' rilé'enë' le runa'."

12 ¡Guyasa, Xan!

¡Gulís no'ó, Dios!

¡Biti' gal-la ládXu'u nupa ta'guí'i ta'zaca'!

13 ¿Bizx que bönni' na' ru'ë dö' nuzöë' Dios tsölá'alö?

Gudxë' la' cuinsë': Biti' uzi' lë' Dios neda'.

14 Li' bilé'e quézinu' lë ni, Xan.

Ruí'i ládXu'u nu riguí'i rizáca', en nu risëbi ladxi',
en zóatica'su' gácalenu' léguequi.

Nu naca bayechi' rigú'u cuini lu no'ó, Xan,

tu' zóatica'su' gácalenu' nu riyadza riyudxi.

15 Bugúa yöl-la' unná bë' quégaca nupa tuá' dö', en
nácagaca xihui'.

Bubí'i quéguequi ca naca xiguia' nabága'gaca.

16 Inná bë'tica'së' Xanru' Dios.

Nupa tu'béaj ícaguequi Xanru' ulu'niti tsaz lu xiyú
cazë'.

17 Ruzë nagu', Xan, le ta'nábini Li' nupa nácagaca
do' ladxi'.

Rutipu' ládxi'guequi, en ruzë nagu' chí'iguequi.

18 Ruchi'a rusöróu' quégaca nupa nácagaca uzëbi,

en nupa zoa nu ribía no léguequi,

para cabirö ulu'xösa bönachi yödzölió ni
luzë'eguequi.

11

1 Ruzxöni ládxa'a Xanru' gácalenë' neda'.

¿Naru' guíëtso' neda':

“Buzxúnaj lu guí'a ca runba' biguínnido”?

2 Buyútsöca', zöngaca nupa tuá' dö' yaga uxiti'.

Nuzóagaca yágado' lahui tuchi' lu du rusé,

para ilútië' bagáchi'sö nupa nácagaca dxi'a.

- 3 Channö ila'guínnaj yugu' le tu'zóa tsutsu le naca dxi'a,
 ¿bizxi caz gaca gun nu naca tsahui'?
- 4 ¡Zoa cazé' Xanru' yudo' lá'ayi queé'!
 Yehua' yubá zoa ga rö'ë rinná bë'ë Xanru' Dios.
 Rilé'e guiöj lahuë' para uyúe' le tun bönachi.
- 5 Rizí' bë'ë Xanru' nu naca tsahui'.
 Biti' rilé'enë' dxi'a nu ruá' dö', en nu raza ladxi'
 ta'dá'baga' yúlahui'.
- 6 Gunë' ga sáca'gaca nupa tuá' dö' le usuniti léguequi.
 Ubi'ë quéguequi guí', en le ruquéla' guí', en tu bö' régui.
- 7 Caní gunë' Xanru' tu' náquië' tsahui', en nadxí'inë' le naca tsahui'.
 Nupa tun le nácatë ila'lé'e lahuë'.

12

- 1 Busölá neda', Xan, tu' cabirö zoa nitú nu naca dxi'a,
 en biti' gaca nu idzöli nitú nu run ca rnna xtídza'a.
- 2 Ta'zí' ye'e yúgu'të bönachi luzé'eguequi.
 Lu yöl-la' rizí' yë' quéguequi tu'ilen luzé'eguequi didza' yúlajdo'.
- 3 Xan, buzóa dxisö nupa na' tu'i didza' yúlajdo',
 en buzaga' ru'ígaca nupa tun ba zxön cuínguequi.
- 4 Ta'nná: "Güi'iru' didza' ca rizësö ládxi'ru',
 ate' cuntu nu tá'baga' rë'u.
 ¿Nuzxi caz inná be'e rë'u ca naca didza' ru'iru'?"
- 5 Rnnë' Xanru': "Na'a guída' tu' nacuá' nupa tun zi'
 nupa ta'yadzaj ta'yudxi,
 ate' rinnë ládxi'gaca nupa ni tu' zoa nu ribía no léguequi.

Ca ta'zësö ládxi'gaca, la' guídatea' dusölá' léguequi."

⁶ Huáca uzxöni ládxi'ru' didza' ru'ë Xanru'.

Nácagaca ca guíë plata ba nequi,
le nudxi'a gadxi luzuí tu lu guí lálë'e.

⁷ Li' caz, Xan, gun chi'u léguequi,
en usöló' léguequi lu ná'agaca nupa tuá' dö' na'a
dza.

⁸ Gátí'tës nacuá' nupa tuá' dö',
cate' tun zxön bönachi le ruá' dö'.

13

¹ ¿Gáca'xte caz gal-la ládxi'u neda', Xan?

¿Naru' tsaz gal-la ládxi'u neda'?

¿Gáca'xte caz ucache' cuinu' lahua'?

² ¿Gáca'xte caz gun bayudxi guá' ilena' le réquida'
zi'?

¿Gáca'xte caz huí'inida' rëla, en te dza?

¿Gáca'xte caz ucúl-lágaca neda' nupa ta'dá'baga'
neda'?

³ Buyú neda', Xan, en bubí'i didza'.

Butipa ládxa'a para cabí gátia'.

⁴ Ní'irö bití' gaca ila'nná nupa ta'dá'baga' neda',
bití' ila'nná: "Bucúl-laru' lë'."

Bití' gaca ulu'dzeja tu' nőtjada' ládxa'a neda'.

⁵ Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

⁶ Gul-la' queë' Xanru',
tu' benë' quia' le naca dxi'a.

14

¹ Lu icja ládxi'da'ahuë' rnnë' bönni' tu' canöz,
rnnë': Bití' zoa caz Dios.

Nachixi nanítigaquië' bönni' caní, en tunë' le cabí
rilé'enë' dxi'a Dios.

Cuntu nu zoa nu run le naca dxi'a.

² Ga zoë' Dios yehua' yubá buyúë' luyú ni ga nacuá'
bönnachi

para ilé'enë' channö zoa nu réajni'i, nu na' riguilaj
Dios.

³ Yúgu'të' nadödigaquië' tsölá'alö.

Nachixi nanítigaquië' tu tuë'.

Cuntu nu zoa nu run le naca dxi'a, nitú bönnachi.

⁴ ¿Naru' cabí ta'yéajni'i nupa tuá' dö'?

Le tun nupa na' naca tscá tagu bönnachi quia' ca nu
ragu yöta.

Biti' ca' tu'lidza neda', Xángaca bönnachi.

⁵ Lu yöl-la' radxi ridzöbi quéguequi ta'zxizi

tu' ta'lé'e Xanru' Dios, en zóalenë' bönnachi tsahui'.

⁶ Tu'titaj xtídza'gaca nupa nácgaca yechi',

pero nupa ni tu'zxöni ladxi' gácalenë' Xanru'
léguequi.

⁷ Raca ládxa'a irúaj Sión Nu usölá bönnachi Israel.

Cate' gunë' Xanru' ga ulu'dxín bönnachi queë'
nadzúngaca xilátjaguequi,

ulu'dzeja zxí'ini xi'sóë' Jacob, bönnachi Israel, en
ulu'zí' xibë' Dios.

15

¹ ¿Nuzxi caz bönnachi tsöjsóa xilatju', Xan?

¿Nuzxi caz tsöjsóa ga naca lá'ayi quiu'?

² Nu na' naca idú ladxi', en run le naca tsahui',
en lu icja ládxi'da'ahui ruí'i didza' le nácatë.

³ Nu na' biti' rizí' quidza' bönnachi,
en biti' ruá' dö' que luzë'e,

en bití' ruzě naga nu rizi' quidza' luzě'e.

⁴ Nu na' bití' run bal nu ruá' dö',
pero run bal nupa tun zxön Dios,
en sal-la' bi uniti cate' chinún xtidza', bití' ca' rutsá'
didza' na'.

⁵ Nu na' bití' rizi' icja dumí cate' runödzej dumí que
tu chí'ido'sö,
en bití' rizi' dumí para si' yě' ca naca le nun nu bití'
nabaga' xigua'.

Nu na' run yúgu'tě le caní bití' ca' idzá' xilataj.

16

¹ Ben chí'i neda', Dios, tu' ruzxöni ládxa'a Li'.

² Lu icja ládxi'da' ahua' gudxa'-ně' Xanru':

“Li' nacu' Xana'.

Bíti'rö bi zoa quia' le naca dxi'a, pero tuzu' Li'.”

³ Riyaza ládxi'lēna' nupa nácagaca queě' Dios luyú
ni,

en nupa nácagaca idú ladxi'.

⁴ Ila'yán le ila'guí'i ila'zaca' nupa ta'yéaj ladxi'
yugu' dios izá'a.

Bití' ca' cu'a láhuiguequi rön ca tun bönachi na',

en bití' ulidza' lágaca dios na'.

⁵ Náquiě' Xanru' Dios Nu nabánida', en Nu ruzi'a
xibé.

⁶ Li', Xan, nuzú' xilatja'.

Lataj na' nuzú' quia' naca le ruzi'a xibé,

en lachi naca lataj na' nequi quia'.

⁷ Gul-la' yöl-la' ba queě' Xanru', Nu rigú'u yöl-la'
neda' le naca tsahui',

ga ridxintě ruzéajni'ině' neda' cate' ni' rasia'.

8 Chinuna' ga zóatica'së' Xanru' lahua'.
Tu' zoë' cuita' bití' bi utsá' neda'.

9 Que lë ni na' budzeja ládxa'a, en buzí' xibé
ládxi'da'ahua',
ate' gun löza le naca' cate' igácha'a yeru ba,
10 tu' cabí ucá'anú' neda' lataj chul-la,
en bití' gu'u lataj uniti nu nequi quez quiu'.
11 Nunú' ga núnbë'a nōza iché' neda' ga soa' ibana'.
Ga zu' Li' gata' quia' yöl-la' rudzeja idú,
ate' cuitu' Li' uzí'tica'sa' xibó'.

17

1 Ruzé nagu' neda', Xan.
Lu le naca tsahui' quia' rulidza' Li'.
Bë' ladxi' le rinábida' Li' tu' cabí ca' rizí' yë'a.
2 Buchi'a busörö quia'
tu' runu' Li' le naca tsahui'.
3 Núnbë'u Li' le yu'u ládxi'da'ahua'.
Ruyú' neda' chí'i dzö'ölö.
Guzxí' bë'u neda', ate' burúaja' tsahui'.
Bití' ca' ruá'a didza' le cabí naca idú dxi'a.
4 Runa' ca rinná bë' xibá quiu',
en bití' ca' ruá'a dö' ca tun bal-la bönachi.
5 Ridática'sa' la' nōza tsahui' quiu',
en bití' ca' ridöda' tsölá'alö.
6 Rulidza' Li', Dios, tu' rubi'u didza'.
Ruzé nagu' yugu' didza' ruá'a.
7 Buluí'i lahui yöl-la' dxi'i ladxi' quiu'.
Rusölá cazu' nupa tu'zxöni ladxi' Li'
lu ná'agaca nupa ta'dá'baga' léguequi.
8 Ben chí'i neda' ca run chí'u la' guiöj lo cazu'.
Bucachi' neda' cuitu' Li' ca runba' böra,
rucáchi'gacaba' bōrado' zxañ xílabá',

- 9 para cabí bi ilún quia' nupa tuá' dö',
 nupa na' ta'lé neda', en nagú'ugaca neda' lë'ajlö.
 10 Biti' ca' zóalen léguequi yöl-la' ruhuéchi' ladxi',
 ate' tuí'i didza' lu yöl-la' run ba zxön cuínguequi.
 11 Gátí'tës ga ridöda' ta'gú'u neda' lë'ajlö,
 en té'ëni ila'guín neda' luyú.
 12 Nácagaquië' ca yugu' bëdxi guíxi'do'.
 Té'ënë ulu'sunítië' neda'.
 Nácagaquië' ca yugu' bëdxi guixi'.
 Nucachi' cuíngaqueië' para ila'zönë' neda'.
 13 Gudá, Xan, gudá'baga' nupa ta'lé neda', en
 bucul-la léguequi.
 Busölá neda' lu ná'agaca nupa tuá' dö', ugunu'
 dxin guíë tuchi' quiu'.
 14 Lu yöl-la' huáca zxön quiu' busölá neda', Xan,
 lu ná'agaca nupa tu'zì' xibé na'a dza,
 nupa na' nuhuöläj nudzë'egaca yöl-la' tsahui'
 quiu'.
 Nayángacabi' zxí'inigaquië',
 ate' tu'cá'anë' lu ná'agacabi' le dë sizxöni
 quégaquië'.
 15 pero neda' ilé'eda' lo' tu' naca' tsahui',
 en tsaza ládxa'a gaca' ca nacu' Li' cate' ubana'.

18

- 1 ¡Nadxí'ide'eda' Li', Xan!
 ¡Li' rutipa cazu' ládxa'a!
 2 Ruzóë' Xanru' neda' tsutsu, en rapa chi'ë neda',
 en rusölë' neda'.
 Náquië' Dios quia', en Nu rutipa ládxa'a,
 ate' ruzxöni ládxa'a Lë'.

Rácalenë' neda' lu gudil-la: Rusölë' neda', en
rizönë' neda'.

³ Rulidza'-në' Xanru' Nu ral-la' cú'uru' yöl-la' ba,
ate' usölë' neda' lu ná'agaca nupa tu'dí'i neda'.

⁴ Ia'láti'sö la' gútia',
ate' yöjbaga' neda' le usuniti neda', le ben ga
gúdxida'.

⁵ Ia'láti'sö la' yöjtsu'a lataj chul-la que yöl-la' guti,
tu' la' gútitia'.

⁶ Lu le guca quia' bulidza'-në' Xanru'.
Bulidza'-në' Dios quia' para gácalenë' neda'.
Ga na' zoë' lataj lá'ayi queë' biyönnë' chí'a.
Buzë' naguë' le gunabi yúdxida' Lë'.

⁷ Ní'irö gudödi budó' zxu', en guzxizi luyú.
Guzxízida' xilíbigaca yugu' guí'a sibi.
Guzxízigaca tu' gulénë' Lë'.

⁸ Birúaj dzön zxínë'ë,
ate' birúaj guí' ru'ë le buzegui le dë idú gásibi'ilë',
ate' buguela' guí' yugu' bo' yalaj.

⁹ Benë' ga bötaj lúzxiba, en bötajë' Lë cazë',
ate' guzóa znan ni'ë le naca chul-la.

¹⁰ Gudödë' lu bö'ös dxíë' tu le nayëpisë nazí'i le
querubín.

Carelö gudödë' tu lu bö' budunu'.

¹¹ Busubaga' cuinë' le naca chúl-lasö.
Lë na' naca böaj gasaj le richë'lë'e nisa.

¹² Lu le rëpi yösa queë' lu böaj gasaj na'
bila'rúaj bo' yalaj, en guiöj bögui' yöla sunna.

¹³ Gunnë guziú' que chí'ë Xanru' lúzxiba xitsá'.
Biyön chí'ë Dios nayëpisëtërë',
lu dzön, en yugu' lu bo' yalaj, en lu guiöj bögui' yöla
sunna.

14 Gusöl-lë'ë yugu' yaga lahui tuchi' queë', en
bësilásië' nupa na' tu'dí'i neda'.
Gusöl-lë'ë yugu' yösa queë' yugu' le bulu'cul-la
léguequi.

15 Ní'irö bilá' lahui le zoa zzan nísado',
ate' bilá' lahui xilibi yödzölió,
cate' buzenu' bach nupa biti' ta'l'é'e Li' dxi'a, Xan,
en lu yöl-la' rilé quiu' bulidza zi'u léguequi.

16 Bötjë' zaca' xitsá'alö, en gudélé'ë neda'.
Bubéajë' neda' lu nisa zili.

17 Busölë' neda' lu na' nu biti' rilé'e neda' dxi'a, en
nál-latërö,
enca' lu ná'agaca nupa tu'dí'i neda', en nál-
lágacatërö ca neda'.

18 Cate' ni' chizóa inítia' gula'zóa régu'ë neda',
pero Xanru' gúcalenë' neda'.

19 Bubéajë' neda', en buzóë' neda' tu lu lataj zxön.
Busölë' neda' tu' guyaza ládxë'ë neda'.

20 Bubi'ë Xanru' quia' tsca le tsahui' naca',
en benë' quia' le naca dxi'a tu' cabí nabága'a
xigua',

21 tu' runa' ca naca le rusëdinë' Xanru' neda',
en biti' ca' ridá'baga'a Lë'.

22 Runa' ca ta'nná xibá nunë' Xanru',
en biti' ridá'baga'a le rinná bë' naguixjë' Lë'.

23 Biti' bi le naca dö' nabága'a lahuë' Lë',
ate' ben chi'a le innía' para cabí gu'a dö'.

24 Que lë ni na' bubí'ë Xanru' quia' tsca le tsahui'
naca',
en tu' cabí nabága'a xigua' lahuë' Lë'.

25 Ruhuéchi' ládXu'u nupa tu'huechi' ladxi'
 luzé'eguequi,
 en nacu' idú dxi'a len nupa náCagaca idú dxi'a.

26 Ruluí'i cuinu' idú ladxi' len nupa náCagaca idú
 ladxi',
 pero ridá'bagu'u nupa ta'dá'baga' xtíDzu'u.

27 Rusöló' nupa ta'guí'i ta'zaca',
 pero ruzötju' nupa tun ba rahui.

28 Ruquéla' cazu' guí' quia', Xana' Dios,
 en rigú'u quia' bení' cate' ridá' ga chul-la.

29 Lu yöl-la' huáca queë' Dios rucul-la' bönni' guizxi
 yu röjácië' gudil-la.

Tu' zóalenë' Dios quia' neda',
 rixítí'a ribixa' lu zö'ö run chí'i léguequi.

30 Idú dxi'a náCagaca le runë' Dios.

Nurúaj tsahui' xtíDzë'ë.

Rapa chí'ë yúgu'të nupa ta'nábini Lë' gácalenë'
 léguequi.

31 ¡Tuzë' Xanru' náquië' Dios!

¡Tuzë' Dios rapa chí'ë rë'u!

32 Dios ni ruzalë' neda',
 en runë' ga naca' idú ládxa'a.

33 Runë' ga náCagaca ní'a ca ní'agacaba' bidxina'
 guixi',

en ruzóë' neda' yugu' lu guí'a zXön.

34 Rusédinë' neda' para gaca tseja' gudil-la,
 en para gaca uguna' dxin uxiti' yaga néquini guíë
 bronce.

35 Lu yöl-la' rusölá quiu' run chí'u neda'.

Len no'o nál-la rizönu' neda',

en lu yöl-la' dxi'i ladxi' quiu' nunu' ga
nayëpisëtëra'.

³⁶ Ruchi'u nöza ga ral-la' töda',
en runu' ga biti' cuila'.

³⁷ Guzóa régu'a nupa tu'dí'i neda', en bucul-la'
léguequi.

Biti' buécja' ga bidxintë busunítia' léguequi.

³⁸ Gudina' léguequi luyú, ate' biti' guca ulu'huóása.
Gula'dzö'ö zخان ni'a.

³⁹ Benu' neda' nál-la para tseja' gudil-la,
en benu' ga bucul-la' nupa gula'dá'baga' neda'.

⁴⁰ Benu' ga bulu'zxunnaj lahua' nupa biti' ta'lé'e
neda' dxi'a,
ate' busunítia' nupa na' bulu'dí'i neda'.

⁴¹ Bulu'lidza nu gácalen léguequi,
pero cuntu nu zoa usölá léguequi.

Bulu'lidza ca' Xanru', pero biti' bubi'ë didza'.

⁴² Buzzuxzja' léguequi ca bëchtö yu nachë' lu bö'ös.
Buliba' léguequi ca ruliba' guna' la' nöza.

⁴³ Busöló' neda' lu ná'agaca nupa ta'dá'baga',
en nunu' ga rinná bé'eda' bönachi zián yödzö.

Tun ca rnna xtídza'a bönachi biti' núnbë'a zí'alö.

⁴⁴ Cate' ta'yöni neda', la' tun ca rnna xtídza'a.
Tadxi neda' bönachi zián yugu' yödzö izá'a.

⁴⁵ Ta'cuidi' ladxi', en lu yöl-la' rizzizi quéguequi
ta'rúaj yugu' lu yödzö tsutsu quéguequi.

⁴⁶ ¡Zoë' nabanë' Xanru'!

¡Yöl-la' ba Nu na' run chi'i neda'!

¡Guli'gún zxön Dios Nu rusölá neda'!

⁴⁷ Náquië' Dios Nu rizí' la nupa tu'dí'i neda',

en runë' ga tadxi bönachi guizxi yu neda'.

⁴⁸ Rusölë' neda' lu ná'agaca nupa biti' ta'lé'e neda' dxi'a.

Le nácatë runë' ga rucul-la' nupa ta'dá'baga' neda',
en rusölë' neda' lu na' bönni' ridzá'a.

⁴⁹ Que lë ni na' guía' Li': Xclenu' Xan, lógaca bönachi
zián yödzö,

en gul-la' yöl-la' ba que Lo' La'ayi.

⁵⁰ Rusölá cazë' Xanru' bönni' rinná bë'ë uláz queë',
en nadxí'ítica'së' nu na' nabö cazë',
nu na' naca David, en yugu' zxí'ini xi'sóë' ga idx-
inrö dza udxi.

19

¹ Yugu' le nacué' lúzxiba tu'luí'i lo yöl-la' zxön queë'
Dios,

ate' yugu' le raca lu bö'ös náagaca bë' le nunë'.

² Yugu' dza tu'zéajni'i,
en yugu' dzö' tu'luí'i lo yöl-la' réajni'i.

³ Biti' zoa didza' tuí'i, en biti' riyön tu le ta'nná.
Biti' riyön chí'iguequi.

⁴ Le tu'zéajni'i ridxín ga naguéla'të luyú,
en le tu'sedi ridxín idútë yödzölió.

Ga na' nacué' nuzóë' Dios xilataj gubidza,

⁵ le naca ca tu bönni' utsaga në'ë rirúajë' yu'u,
en naca ca' ca tu bönni' nál-la rudzéjanë' cate' zéajë'
carelö lu huitaj.

⁶ Ga naguela' lúzxiba rilén gubidza,
en ridödi ga ridxintë ga ribía.

Biti' bi zoa le cabí rutsë'e gubidza na'.

7 Tsahui' naca ca rinná bē'ē Xanru', en run ga huöáca ládxi'ru'.

Idútē li naca didza' nuzóë' Xanru', le run ga réajni'i nu naca nöxaj ladxi'.

8 Tsahui' nácgaca xibá queë' Xanru', le tun ga rudzeja ládxi'ru'.

Nácgaca idú dxi'a le gunná bē'ē Xanru', en ta'gú'u bení' icja ládxi'do'oru'.

9 Dxí'ado' naca gádxiru'-nē' Xanru', para sóatica'siru'.

Idú li naca ca ruchí'a rusöröë' Xanru' bönachi, en idú tsahui'.

10 Nazáca'gacatërö didza' na' ca oro, enca' ca oro ba nequi.

Nácgacatërö zxixi ca bidxina' buz, en ca le zxixi queë'ba'.

11 Didza' na' tu'zējajni'i neda', huen dxin queë'.

Uzítërö xibé nu run ca rnna xtídzē'ē na'.

12 ¿Nuzxi caz gaca inöz channö richixi rinigui?

Busölá neda' lu dul-la' nuna' le cabí gúquibe'eda' bena'.

13 Ben chí'i neda' para cabí udödi cuina' lu dul-la', para cabí inná be'e neda' lē na' naca dul-la'.

Ní'irö ugá'ana' tsahui', en bití' ibága'a xiguaia'.

14 Ben ga ilaca didza' ruá'a, en le rizá' ládxa'a ca raza ládxi'u Li'.

Nacu' Xana' ruzú' neda' tsutsu, en ruhuöá'au' neda'.

20

1 Rinábida'-nē' Xanru' uzē naguë' li' cate' idxín dza qui'i sacú'u.

Dios queë' Jacob gácalenē' li'.

2 Rinábida'-në' isöl-lë'ë le gácalen li' le irúaj lataj
lá'ayi queë'.

Lë na' irúaj Sión gun ga gacu' tsutsu.

3 Rinábida'-në' tsöjnenë' yúgu'të le gulú'u queë',
en si' lu në'ë le buzégui'u lahuë'.

4 Rinábida'-në' gunnë' quiu' tsca naca le rizë
ládxi'u,
en gunë' ga gácatë yúgu'të le rizá' ládxi'u.

5 Udzéjatu' cate' usölë' li',
en uchísatu' le gaca bë' rulidztu'-në' Dios queëru'.
Rinábida'-në' Xanru' gunnë' quiu' yúgu'të le
rinábinu' Lë'.

6 Na'a nözda' rusölë' Xanru' nu nabö cazë'.
Riyönnë' nu na' naböë' ga ni' zoë' yehua' yubá
la'ayi queë'.

Isöl-lë'ë yöl-la' huáca idú queë' le usölá nu na'.

7 Nacuá' nupa tu'zxöni ladxi' yugu' carreta que
gudil-la,
ate' nacuá' bönachí yúbölö tu'zxöni ladxi' yugu'
böa',
pero rë'u ruzxöni ládxi'ru' Lë' Xanru' Dios.

8 Ta'cuídí'në' nupa na', en ta'dzö'ë,
pero rë'u ni zuíru', en zóaru' tsutsu.

9 Busölá netu', Xan, tu' nacu' Nu rinná be'e netu'.
Rinábitu' Li' uzë' nagu' netu' cate' ulídzatu' Li'.

21

1 Rudzéjanë' bönni' rinná bë'ë tu' zóalen lë' yöl-la'
huáca quiu' Li', Xan.

Tu' busöló' lë', yënni'tërö rudzéjanë'.

2 Bunödzju' queë' le rizë ládxi'ë.
Biti' gudá'bagu'u le gunábinë' Li'.

³ Tu' raza ládxi'u lë' ruzú' queë' yugu' le naca dxi'a.
Nudxiú' icjë' tu le néquini oro idú.

⁴ Gunábinë' Li' gu'u queë' yöl-la' na'bán, ate' bë'u le queë'.

Nunu' ga sóatica'së' ibanë' yugu' dza si' zaca.

⁵ Zxöntë naca yöl-la' zxön queë' tu' nusöló' lë'.

Nunu' lë' bal, en nunu' ga nayëpisë'.

⁶ Zóatica'sö le naca dxi'a nuzú' queë'.

Runu' ga rudzëjade'enë' tu' zóalenu' lë'.

⁷ Caní raca queë' bönni' na' rinná bë'ë tu' ruzxöni
ládxi'ë Xanru'.

Biti' bi' utsá' lë' tu' ruhuéchi' ládxi'ë Dios
nayëpisëtëre' lë'.

⁸ Huadeli' no'o ga nacuá' yúgu'të nupa ta'dá'baga'
Li'.

Huadeli' no'o ibëla ga nacuá' nupa tu'dí'i Li'.

⁹ Cate' idxín dza usiúdxu' léguequi gaca quéguequi ca
tu guí' ruzegui bla'do'.

Usunítu' léguequi, Xan, lu yöl-la' rilé quiu',
ate' tséguiguequi tu lu guí' zxön.

¹⁰ Ucuítu' yugu' zxí'ini xi'sóagaca nupa na' luyú ni,
en ubéaju' yugu' zxí'iniguequi ládjagaca bönachi.

¹¹ Caní gunu' tu' gulë'ë'niguequinë' ilu'ë dö' quiu'.

Gulún xtídza'gaquië' bi ilunë', pero bití' gaca ilunë'
ca rna xtídza'gaquië',

¹² tu' gunu' Li' ga ulu'zxúnnajë'.

Ichisu' uxiti' yaga quiu', en gunu' léguequi huë'.

¹³ Len yöl-la' huáca quiu', Xan, uxicju' lu gudil-la.

Gúl-latu', en cú'utu' yöl-la' ba que yöl-la' huáca
quiu'.

22

¹ Dios quia', Dios quia', ¿bizx que nusán no'o neda'?
¿Bizx que biti' riyönnu' le rinnëda' ládxa'a, en biti'
rácalenu' neda'?

² Dios quia', idú dza rulidza' Li', pero biti' bi didza'
rubi'u.

Idú yëla rulidza', en biti' ca' rasia'.

³ Lá'ayi nacu' Li'.

Zu' ga riyön yöl-la' ba ta'gú'u bönachi Israel Li'.

⁴ Bulu'zxöni ládxe'ë xuz xtó'otu' Li'.

Bulu'zxöni ládxe'ë Li', ate' busöló' légaquië'.

⁵ Bulu'lidzë' Li', ate' gúcalenu' légaquië'.

Bulu'zxöni ládxe'ë Li', en biti' bulu'tuí'inë'.

⁶ Naca' neda' ca tuba' bëla guna', en calëga bönni'.

Tu'dí'i bönachi neda', en tu'cá'ana neda' cá'asö.

⁷ Yúgu'të nupa ta'lé'e neda' tu'titaj neda'.

Ta'salaj ru'iguequi lu yöl-la' rutitaj, en tu'tá
ícjaguequi, ta'nná:

⁸ "Lë' buzöni ládxe'ë Xanru' para usölë' lë'.

Xanru' usölë' lë' channö tsaza ládxe'ë lë'."

⁹ Nacu' Li' Nu guléaj neda' lé'ënu xiná'a.

Benu' ga ruzöni ládxa'a Li'

cate' ni' gúdxá'a luchú'unu xiná'a.

¹⁰ Nagá'ana' lu no'o Li' ga gudéla'të gulja'.

Ga gudéla'të buzóanu xiná'a neda' nacu' Dios quia'.

¹¹ Biti' su' zi'tu' ga ni zoa', tu' zoa gagu le gun neda'
zi',

ate' cúnturö nu zoa nu gácalen neda'.

¹² Gula'gu'ë neda' lë'ajlö ca tunba' yugu' bëdxi.

Ca yugu' bëdxi que yödzö Basán gula'bía di'ë neda'.

¹³ Ta'salaj ru'ágaquië' lahua' neda'

ca runba' bëdxi guixi', ridunba', en ribödxi'aba'.

14 Nuhuöáca' ca nisa nalalaj luyú, ate' nazángaca
bëch dxita quia'.

Nuhuöáca ládxi'da'ahua' ca bidxina' buz la lu lë'a.

15 Nacuidi' yöl-la' huáca quia' ca tu rö'ö nalá'a,
ate' da' lúdxá'a chichja'.

Nuzú' neda' lu bëchtö yu que yöl-la' guti.

16 Ta'gu'ë neda' lë'ajlö ca tunba' yugu' bö'cu'.

Nagú'ugaquië' neda' lë'ajlö bönni' tu'ë dö'.

Nuzóagaquië' yeru blaga na'a, en ni'a.

17 Nalá'gaca yúgu'të dxita néquinida'.

Ta'në'ë neda', en tu'yú yénnië' neda'.

18 Ta'guísië' zxa' que queëgaquië',
en tu'yúë' le gaca bë' lahui lari' rixóa cúdza'a.

19 Biti' gá'anú' zì'tu', Xan.

Gúcalentë neda', Li', Nu naca yöl-la' huáca quia'.

20 Busölá neda' lu guíë tuchi'.

Busölá yöl-la' na'bán quia' lu ruá'agacaba' bö'cu'.

21 Busölá neda' lu ruá'agacaba' bëdxi guixi',
en lu lúzugacaba' bëdxi gú'una.

Li' riyön quézinu' chí'a.

22 Usiyönda' yugu' böchi' luzá'a ca naca Lo'.

Gatsaj láhui'lö ga na' tu'dubi bönachi lo' cu'a Li' yöl-
la' ba.

23 ¡Guli'cu'ë Xanru' yöl-la' ba, libí'ili' na' rádxili'-në'!

¡Guli'gun zxön Lë', yúgu'tëli' xzí'ini xi'sóë' Jacob!

¡Guli'gadxi Lë', yúgu'tëli' xzí'ini xi'sóë' Israel!

24 Caní ral-la' gunli' tu' cabí bucá'anë' cá'asö,
en bití' budí'inë' nupa gula'guí'i gula'zaca',
en bití' bucachi' lahuë' para cabí ilé'enë' léguequi,
pero cate' bulu'lidza Lë', biyönnë' léguequi.

25 Cu'a Li' yöl-la' ba ga tu'dubi bönachi guizxi yu lo'.

Lógaca nupa tadxi Li' usudxina' le guzxi' lu na'a guna' quiu'.

26 Ilágugaca nupa nácagaca nōxaj ladxi', en ulu'huōlaj ulu'dzē'e.

Nupa ta'guilaj Xanru', en ta'gú'u Lē' yōl-la' ba ulu'zítica'sō xibé'.

27 Bönachi idütē yōdzölió tsöjnégaca Xanru', en ulu'huōáca queé'.

Bönachi yúgu'tē yōdzö luyú ila'gú'u Lē' yōl-la' ba.

28 Caní gaca tu' dē lu nē'ē Xanru' inná bē'ē.

Inná bé'enē' yúgu'tē bönachi luyú.

29 Yúgu'tē nupa dē lu ná'agaca luyú ni ilágugaca, en ila'gú'u Lē' yōl-la' ba.

Yúgu'tē nupa ila'niti ulu'zechu zxíbigaca lahuē' Lē', nupa na' bití' ca' gaca ilún chí'i yōl-la' na'bán quéguequi.

30 Zxí'ini xí'sóali' ilún xichiné'.

Ila'guixjō' lē ni ca naca queé' Xanru' para ila'yōni nupa tsöjsétégaca luyú ni.

31 Ilidē', en ulu'lu'ínē' lahui náquiē' Xanru' tsahui'. Ulu'siyōnnē' ca' nupa ral-la' ilalaj ca naca yugu' le benē' Lē'.

23

1 Ruyú cazē' Xanru' Dios neda' ca tu nu ruyú bö'cu' zxíla'.

Bití' bí riyádzjada'.

2 Runē' ga ruzí' ládxa'a ca túngacaba' bö'cu' zxíla' tu'zít ládxi'ba' gapa dēda' le iláguba'.

Ga naca ra' nisa rizá' tsahui' ládxi'do' richē'ē neda'.

3 Runē' ga ruhuōáca ládxa'a.

Richē'ē neda' ga naca nöza tsahui' tu' nadxí'inē' neda'.

⁴ Sal-la' ridá' ga zoa bönadxi gátia',
biti' bi gádxida' tu' zóalen cazu' neda', Dios.
Len xiyaga quiu', en no'o rutipu' ládxa'a.

⁵ Ga nacuá' nupa ta'zóa regu' neda', ni' rucú'u quia'
le gahua'.

Rigú'u icja' le za rilá' zxixi, en ruliru' le guí'jada'.

⁶ Le nácatë dusóalengaca neda' le naca dxi'a,
en yöl-la' dxi'i ladxi' queë' yúgu'të dza soa' ibana',
ate' lu yu'u lidxë' Xanru' sóatica'sa'.

24

¹ Nequi queë' Xanru' Dios luyú ni, en yúgu'të le dë
lahui.

Nequi queë' yödzölió, en yúgu'të nupa nacuá' ni'.

² Naguixjë' le lahui nísado' rö'ö zxánilö,
en nuzóë' xilibi luyú ga rë' zzan nísado'.

³ ¿Nuzxi caz bönni' dë lu në'ë cuenë' guí'a lá'ayi
queë' Xanru'?

¿Nuzxi caz gaca tsaza lu lataj lá'ayi queë'?

⁴ Huáca bönni' na' naca dxi'a ca runë', en ca rizá'
ládxë'ë,

bönni' na' biti' runë' bal budó' guiöj budó' yaga,
en biti' rizí' yë'ë cate' rizí' lu në'ë bi gunë'.

⁵ Gunë' Xanru' ga gaca dxi'a queë' bönni' na'.

Caní gunnë' Dios, Nu rusölá lë', en náquië' tsahui'.

⁶ Caní nátagaca nupa ta'dxín lahuë' Dios,
nupa na' ta'biga' lahuë' Dios quégaca zxí'ini xi'sóë'
Jacob.

⁷ Guli'salaj ga nu riyaza yödzö la'ayi.

Guli'salaj ga nu riyaza xilatjë' Dios le nuzóë' tsaz,
ate' tsázië' Bönni' unná bë' nayëpisëtëre'.

⁸ ¿Nuzxi caz Bönni' unná bē' nayēpisētērē' na'?
 Náquiē' Xanru' nál-latērē', en nápatērē' yöl-la'
 huáca,
 Lē', Xanru', Nu rideli' lu gudil-la.

⁹ Guli'salaj ga nu riyaza yödzo la'ayi.
 Guli'salaj ga nu riyaza xilatjē' Dios le nuzóē' tsaz,
 ate' tsáziē' Bönni' unná bē' nayēpisētērē'.

¹⁰ ¿Nuzxi caz Bönni' unná bē' nayēpisētērē' na'?
 Náquiē' Xanru' Dios quéguequi ni'a nē'ē guizxi yu.
 Lē' náquiē' Bönni' unná bē' nayēpisētērē' na'.

25

¹ Idú ládxa'a rulidza' Li', Xan.

² Ruzxöni ládxa'a Li', Dios quia'.

Ben ga cabí utuí'ida',
 en cabí ulu'dzeja nupa biti' ta'lé'e neda' dxi'a.

³ Biti' ila'bō' böniga nupa tun löza Li',
 pero ulu'tuí'i nupa ta'dá'baga' xtídz'u.

⁴ Buluí'i neda' le rē'ēnu' guna', Xan,
 en buzéajni'i neda' le raza ládxa'u Li'.

⁵ Busedi neda' para guna' ca naca le naca idútē li
 quiu'.

Tu' nacu' Dios, Nu rusölá neda'
 gúntica'sa' löza Li'.

⁶ Yöjné ca naca yöl-la' dxi'i ladxi' quiu', Xan,
 en yöl-la' ruhuéchi' ladxi' quiu', yugu' le
 nacuá'tica'sö.

⁷ Buniti lo neda' ca naca dul-la' bena',
 en le gudá'baga'a Li' cate' ni' zoa' iz cuidi' quia'.
 Lu yöl-la' ruhuéchi' ladxi' quiu',
 en yöl-la' dxi'i ladxi' quiu' yöjné neda', Xan.

8 Náquië' Xanru' dxi'a tsahui', en li ladxi'.
Que lë ni na' ruluí'inë' nupa tun dul-la' le ral-la'
ilún.

9 Ca naca le naca tsahui' richë'ë Dios nupa nácagaca
nõxaj ladxi',
en ruluí'inë' nupa nácagaca do' ladxi' le rë'ënë' ilún.

10 Lu yöl-la' ruhuéchi' ladxi' queë', en yöl-la'
rusudxín didza' queë',
richë'ë Xanru' nupa tun ca rinná bë' xibá
naguixjë',
en ca naca didza' rucá'ana tsahui' nunë'.

11 Tu' nacu' dxi'i ladxi', Xan,
buniti lo neda' ca naca dul-la' nuna', le naca dul-la'
zxõn.

12 Nupa tun bal Xanru'
uluí'iquézinë' léguequi le naca dxi'a le ral-la' ilún.

13 Ulu'zí' xibé le naca dxi'a gunnë' quéguequi,
ate' guequi quégacabi' zxí'ini xi'sóaguequi luyú ni.

14 Xanru' zóaléntica'së' nupa tun ca rnna xtídzë'ë,
en ruzéajni'inë' léguequi ca naca didza' rucá'ana
tsahui' nunë'.

15 Ruyútica'sa' guídë' Xanru' gácalenë' neda',
tu' usölë' neda' lu na' nu rë'ëni sön neda'.

16 Buécja quia', Xan, en buéchi' ladxi' neda',
tu' zoa' tuza', en nacuídi'da'.

17 Nayán le tu'quí'i tu'saca' neda'.
Busölá neda' lu le ruúbi ruguí'i ládxi'da'ahua'.

18 Buyú ca riguí'i rizáca'a, en rudú ládxa'a.
Buniti lo neda' ca naca yugu' dul-la' nabága'a.

19 Buyú ca nayán nupa tun neda' zi'.
Buyú ca tu'dí'i neda'.

- 20 Ben chi'i neda', en busölá neda'.
 Biti' gu'u lataj utuí'ida' tu' ruzxöni ládxa'a Li'.
 21 Ben ga ilún chi'i neda' le naca idú ladxi',
 en le naca li ladxi', tu' runa' löza Li'.
 22 Buá'au' bönachi Israel,
 Dios lu yugu' le raca quéguequi.

26

- 1 Guléaj neda' tsahui', Xan, tu' runa' le naca dxi'a,
 en idú ládxa'a ruzxöni ládxa'a Li'.
 2 Buyú lu icja ládxi'da'ahua', Xan, en guzxí' bē
 neda'.
 Buyú le rizá' ládxa'a, en le ribequi icja',
 3 tu' richě' yöl-la' dxi'i ladxi' quiu' neda',
 ate' runa' ca naca le naca idútě li quiu'.
 4 Biti' runa' tsözxön nupa ta'zí' yě',
 en biti' ridálena' nupa tu'luí'isö cuínguequi tsahui'.
 5 Biti' raza ládxa'a udúbilena' nupa tuá' dö',
 en biti' guna' tuz didza' len nupa nácgaca xihui'.
 6 Richisa na'a lo' Li', Dios, cabí dxía dö' na'a,
 en idú ládxa'a ribíga'a lo bucugu quiu', Xan,
 7 para gul-la' le guía' Li': "Xclenu"
 en usiyönda' bönachi ca nácgaca le zxön nunu'.
 8 Nadxí'ida' yu'u lidxu' ga na' zu', Xan,
 enca' lataj ga na' yu'u bení' lá'ayi quiu'.
 9 Biti' usunitiu' neda' tsözxön len nupa tun dul-la',
 en biti' gútiu' neda' len nupa tuti bönachi,
 10 nupa na' ta'yaza ladxi' tuá' dö',
 en nacuá'tica'sö ila'guizxaj dumí para ulu'rúaj
 tsahui'.
 11 Gúntica'sa' neda' le naca dxi'a.
 Buzá' ladxi' quia', en buá'uö neda'.
 12 Nuzóé' Dios neda' ga zoa' tsutsu ladja bönachi
 guizxi yu

nudúbigaca queë' para cu'a-në' yöl-la' ba Xanru'.

27

¹ Náquië' Xanru' Dios bení' quia', en Nu rusölä neda'.

¿Nuzxi caz ral-la' gádxida'?

Rapa chi'ë Xanru' Dios caz yöl-la' na'bán quia'.

¿Nuzxi caz gaca gun ga gadxi idzöbida'?

² Cate' gula'dá'baga' neda' nupa tuá' dö' para iluti neda',

nupa na' bití' ta'lé'e neda' dxi'a, en tu'dí'i neda',
yöjchégu'gaca, en yöjbíxigaca.

³ Sal-la' ila'dá'baga' neda' bönachi guizxi yu,

bití' ca' tsaza yöl-la' radxi ládxi'da'ahua'.

Sal-la' ila'díl-lalen bönachi neda',

naca' neda' tsutsu ladxi'.

⁴ Tu le rinaba' lahuë' Xanru' Dios, lë na' gü'i ládxi'sa',

le naca para sóatica'sa' lidxë' Xanru' yúgu'të dza soa' ibana',

para gaca uyúa' yöl-la' lachi queë' Xanru' Dios,

en para sa' ládxa'a ca naca queë' lu yu'u lá'ayi queë'.

⁵ Cate' idxín dza soa bönadxi quia', ucáchë'ë Lë neda' lu yu'u lidxë'.

Ga nagachi' lu yu'u lidxë' ucáchë'ë neda'.

Uzóë' neda' tsutsu ca tu lu guiöjto'o.

⁶ Gunë' ga ucul-la' nupa tu'dí'i neda',

ate' lu yöl-la' rudzeja quia' cödxí'atica'sa'

cate' bi unödza' queë' lu yu'u lidxë'.

¡Gul-la' queë'! ¡Ön, gul-la' queë' Xanru' yöl-la' ba!

⁷ Buzë nagu', Xan, cate' ulidza' Li'.

Buzá' ladxi' quia', en bubí'i didza' ca naca le
inábida' Li'.

⁸ Cate' Li' gudxu' neda': "Buguilaj neda'",
idú ládxa'a bubí'a didza', gunnía': Uguilja' Li', Xan.

⁹ Biti' ucachi' lo' lahua' neda'.

Biti' ta'bagu'u neda' lu yöl-la' rilé quiu'.

Li' nacu' Nu rácalen neda'.

Biti' ucá'anú' neda', en bití' usán no'o neda'.

Nacu' Dios, Nu rusölá neda'.

¹⁰ Huáca ulu'sán ládxe'ë xuz xiná'a neda',
pero uzí' cazë' Xanru' Dios neda'.

¹¹ Busedi neda' para guna' ca rë'ënu' Li', Xan.

Bulu'í neda' para guna' le naca tsahui',

tu' nacuá' nupa ta'dá'baga' neda'.

¹² Biti' usanu' neda' lu ná'agaca nupa bití' ta'lé'e
neda' dxi'a

para cabí ilún quia' le tē'ëni.

Ta'dá'baga' neda' nupa ta'zí' yē',

en nupa tē'ëni iluá' dö' quia'.

¹³ Guzxí' lu në'ë Xanru' Dios gunë' ga ilé'eda' le
naca dxi'a,

en le naca tsahui' queë' ga nacuá' nupa nabángaca.

La'tu' cabí réajl'a lë ni, chiböaj ládxa'a.

¹⁴ ¡Guli'gún lözë' Xanru'!

¡Guli'gaca tsutsu, en bulí'tipa ládxi'li'!

¡Ön, guli'gún lözë' Xanru'!

28

¹ Rulidza' Li', Xan.

Nacu' Guiöj le ruzóa neda' tsutsu.

Ruzé nagu' chi'a, tu' channö usayju' ru'u,
gaca' ca tu bönni' razië' lataj chul-la.

² Ruzé nagu' le rulidza' Li' cate' rinábida' Li'
gácalenu' neda',

cate' richisa' na'a zaca' Lataj Lá'ayi ga na' zu'.

³ Biti' ichë'u neda' tsözxön len nupa tuá' dö',

en tsözxön len nupa nácgaca xihui',

nupa na' tuí' didza' dxi'a lahui' lógaca dzaga yu'u
quéguequi,

pero yu'u ládxi' do' guequi le cabí naca tsahui'.

⁴ Bubí' i quéguequi tsca naca le tun, en tsca naca dö'
ru'igaca.

Bubí' i quéguequi tsca naca le tun nē'eguequi.

Bubí' i quéguequi tsca ral-la' gaca quéguequi.

⁵ Caní gaca quéguequi tu' cabí tun bal le nunē'
Xanru',

en biti' tun bal le nun nē'ë.

Uquínajë' léguequi, en biti' ca' uchisë' léguequi.

⁶ ¡Yöl-la' ba Xanru',

tu' riyönnë' cate' rinábida' Lë' gácalenë' neda'!

⁷ Xanru' caz náquië' yöl-la' huáca quia', en le run
chi'i neda'.

Ruzxöni ládxa'a Lë', ate' rácalenë' neda'.

Que lë ni na' ruzí' xibë' ládxi'da'ahua',

ate' gul-la' le guía' Lë': "Xclenu'."

⁸ Naca cazë' Xanru' yöl-la' huáca quéguequi bönachi
queë',

en náquië' ca' Nu run chi'i Bönni' na' bubéajë' quez
queë' para inná bē'ë.

⁹ Busölá bönachi quiu', Dios, en ben ga gaca dxi'a
 quéguequi nupa néquiguequi quiu'.
 Ben chi'i léguequi ca run tu nu ruyú bö'cu' zxila', en
 guchě'tica'sö léguequi.

29

¹ ¡Guli'cu'ë yöl-la' ba Xanru', libí'ili', nácali'
 zxl'inigaquië' bönni' nayépisëgaquië'!
 ¡Guli'cu'ë yöl-la' ba Xanru', en guli'guíë': "Napu'
 yöl-la' huáca idú!"

² ¡Guli'cu'ë yöl-la' ba Xanru' le ral-la' gata' que Lë'
 tu' náquië' lá'ayi!
 ¡Guli'gún bal Xanru', tu' naca lachi le naca lá'ayi
 queë'!

³ Riyön chi'ë Xanru' lu nísado'.
 Riyön chi'ë Xanru' nayépisë' ca riyön guziú' rinnë.
 Riyön chi'ë Xanru' lu nísado'.

⁴ Nál-latërö naca chi'ë Xanru'.
 Nayépisëtërö chi'ë Xanru'.

⁵ Chi'ë Xanru' rilá'a yugu' yaga zxön.
 Ön, chi'ë Xanru' riguitsaj yugu' yaga lu gu'a
 Líbano.

⁶ Runë' Xanru' ga ta'xiti' gu'a ca tunba' bëdxido'.
 Ta'xiti' gu'a Líbano, en gu'a Siriön ca tunba' bëdx
 gu'a.

⁷ Chi'ë Xanru' run ga rëpi yösa.

⁸ Ruxizi chi'ë Xanru' la' guixi' ga dë lataj.
 Ruxizi chi'ë Xanru' la' guixi' nazí'i le Cades.

⁹ Chi'ë Xanru' run ga ta'béquiiba' bidxina' guixi' böa'
 huë'ënido' quégacaba',
 en run ga ta'guínnaj yúgu'të laga' dxíagaca yugu'
 yaga.

Lu yudo' queë' tu'i didza' yúgu'të le nacuá', ta'nná:
 "¡Yöl-la' ba Lë'!"

¹⁰ Gurö'ë gunná bē'ë Xanru' cate' gurö'ö nisa lu
 idútë yödzülió.

Ön, rö'ë rinná bē'tica'së' Xanru'.

¹¹ Rutipë' Xanru' ládxi'do'gaca bönachi queë'.

Gunë' Xanru' ga gaca dxi'a quégaca bönachi queë',
 en gunë' ga ila'böza dxi'a tsáhuí'do'.

30

¹ Guna' Li' zxön, Xan, tu' buchisu' Li' neda',
 en biti' bē'u lataj bi ilún quia' nupa biti' ta'lé'e
 neda' dxi'a.

² Rigu'a Li' yöl-la' ba, Xana' Dios,
 tu' bulidza' Li' gácalenu' neda', ate' bunu' neda'.

³ Bubéaju' yöl-la' na'bán quia' lu yeru ba, Xan.
 Runu' ga zoa' nabana', para cabí tsu'a lataj chul-la
 ga dzö'ö nupa nátigaca.

⁴ ¡Guli'gul-la yöl-la' ba queë' Xanru', libí'ili' néquili'
 quez queë'!
 ¡Guli'guíë': "Xclenu'" ca naca Lë' le naca lá'ayi!

⁵ Tu chí'isö rilenë',
 pero ruzá' ládxi'tica'së' queëru'.
 Channö cödxiru' tu yëla,
 lu yöl-la' rudzeja queëru' cödxí'aru' itö yu.

⁶ Cate' guca dxi'a quia', ní'irö gunniá':
 "Gatga bi utsá' neda'."

⁷ Tu' buzá' ládxi'u' quia', Xan, buzú' neda' ga zoa'
 tsutsu,
 en cate' bucachi' lo', gurö'a böniga.

⁸ Bulidza' Li', Xan,

en gúta'yua' lo'.

⁹ ¿Bizxi xibé uzi'tso' channö gátia', en tsöjtsázia'
lataj chul-la ga dzö'ö nupa nátigaca?

¿Naru' huácatsö cu'a Li' yöl-la' ba channö huóáca'
bëchtö yu?

¿Naru' huácatsö ulu'a lo le naca idú quiu'?

¹⁰ Ruzé nagu', Xan, en ruzá' ládxa'u quia'.

Gúcalen neda', Xan.

¹¹ Buí'nida', ate' benu' ga buyá'a lu yöl-la' rudzeja
quia'.

Bugú' lari' cá'asö gúcua', en bugacu' neda' le ruzi'a
xibé.

¹² Bil-la bö' naca caza' yöl-la' ba quiu', en biti' soa
dxisö.

Guiética'sa' Li': "Xclenu", Xana' Dios.

31

¹ Ruzxöni ládxa'a Li', Xan.

Biti' gu'u lataj utuí'ida'.

Tu' nacu' tsahui', busölá neda'.

² Ruzé nagu' quia', en rusöló' neda'.

Gacu' ca tu guiójtö'o ga soa' tsutsu,
en ca tu ga soa' dxi'a tsáhuí'do' lu gudil-la.

³ Nacu' Li' guiójtö'o ga zoa' tsutsu, en le run chí'i
neda'.

Para gaca yöl-la' ba que Lo' guchě' neda', en buluí'i
neda' le dxi'a guna'.

⁴ Ubéaju' neda' lu du yalaj nucáchi'gaquié' bönni'
tu'ë dö',

tu' nacu' Li' yöl-la' nál-la quia'.

⁵ Rigu'a lu no'o bö' naca caza'.

Böá'au' neda', Xan, Dios idú.

⁶ Biti' rilé'eda' dxi'a nupa tun zxön budó' guiójtö'
budó' yaga,

pero neda' ruzxöni ládxa'a Li', Xan.

⁷ Udzéjada', en uzi'a xibé yöl-la' dxi'i ladxi' quiu',
tu' bilé'e quézinu' le gudí'i guzxáca'a.
Nöz quézinu' yugu' le raca quia'.

⁸ Biti' bucá'anu' neda' lu na' nu bití' rilé'e neda'
dxi'a,
pero nuzú' neda' tu lataj ga zoa' tsutsu.

⁹ Buzá' ladxi' quia', Xan, tu' zoa tu le raca quia'.
Lu yöl-la' ruhuí'ini quia' ribödxá', en rudú ládxa'a.

¹⁰ Riyechi' dza quia' tu' ruhuí'inide'eda',
en tu' rinně ládxa'a, en riyechi' iz quia'.
Rudú ládxa'a tu' nözi dö' nu'a,
ate' nadxita idútě le naca'.

¹¹ Tu' nözi le gulún nupa ta'dá'baga' neda'
naca' tu le run gadxi yugu' dzaga yu'u quia',
ate' nupa núnbě'gaca neda' tadxi neda'.

Nupa ta'lé'e neda' la' nöza ta'zxunnaj ga rizá'a.

¹² Nál-la ládxi'gaca neda' ca nál-la ládxi'gaca nupa
chinátigaca.

Naca' ca tu rö'ö nayuzxaj naguinnaj.

¹³ Biyönda' didza' zi' ta'nně bönachi zían quia'
bagáchi'sö.

Gátitěs zoa le run gadxi neda'.

Tun xtídza'gaca bi ilún quia'.

Ta'zá' ládxi'gaca nacxi iluti neda',

¹⁴ pero neda' ruzxöni ládxa'a Li', Xan.

Rnnía' nacu' Dios quia'.

¹⁵ Yú'ugaca lu no'o yúgu'tě dza soa' ibana'.

Busölá neda' lu ná'agaca nupa bití' ta'lé'e neda'
dxi'a,

en lu ná'agaca nupa ta'zóa regu' neda'.

¹⁶ Lu yöl-la' ruzá' ladxi' quiu' buyú neda', huen
dxin quiu'.

Lu yöl-la' dxi'i ladxi' quiu' busölá neda'.

¹⁷ Biti' gu'u lataj utuí'ida', Xan, tu' rulidza' Li'.

Ben ga ulu'tuí'i nupa tuá' dö'.

Ben ga ila'cuá' dxisö lu yeru ba.

¹⁸ Ben ga bití' gaca bi inná nu rizi' yë',

nu na' rinnë zi' queë' bönni' tsahui',

en run ba zxön cuini, en rulidza ditaj luzë'e.

¹⁹ ¡Bica' zxön yöl-la' dxi'i ladxi' quiu',

lë na' napu' para gácalenu' nupa tadxi Li'!

Runu' caní quégaca nupa tu'zxöni ladxi' Li'

lógaca nupa tun ba zxön cuíniguequi.

²⁰ Rucáchu'u légaquië' ga na' zu' bagáchi'sö,

ga bití' gaca idxín nu bönni' xihui'.

Run chí'u légaquië' bagáchi'sö ga bití' gaca idxín

didza' bizxaj.

²¹ ¡Yöl-la' ba Xanru' Dios,

tu' buluí'inë' neda' ca nadxí'inë' neda' cate' ni' zoa'

tu yödzö

ga nagú'ugaquië' lë'ajlö bönni' tu'tíl-lalenë' neda'!

²² Lu yöl-la' radxi ridzöbi quia' gunnía': "Ilútië'

neda' lo' Li', Xan",

pero biyönnu' le gunábida' Li', cate' ni' bulidza' Li'.

²³ ¡Guli'dxí'i-në' Xanru', libí'ili' néquili' queë'!

Rapa chí'ë Xanru' nupa ta'yéajlë' Lë',

en rubi'ë ca sa'yéaj queë' bönni' run ba zxön cuinë'.

²⁴ ¡Guli' gaca tsutsu, en buli'tipa ládxi'li',

yúgu'téli' na' runli' löza Xanru' Dios!

32

¹ ¡Bica' ba bönni' na' Dios buniti lahuë' lë' ca naca
dö' bi'ë,

en bugüë' dul-la' queë'!

² ¡Bica' ba bönni' na' Dios rnnë' bití' nabáguëë
xiguia',
en bití' zóalen lë' yöl-la' rízí' yë'!

³ Cate' guzóa' dxisö ca naca dul-la' quia',
budú ládxa'a tu' gunnética'sö ládxa'a.

⁴ Rëla, en te dza buquí'i busácu'u neda', Dios.

Budú ládxa'a ca raca cate' rö' böchila.

⁵ Ní'irö guxóalëpa' dul-la' nabága'a lo' Li',
en bití' bucácha'a le xihui' bena'.

Gunnía': "Ixóalëpa' dö' bi'a lahuë' Xana",
ate' buniti lo' neda' ca naca xiguia' gubága'a.

⁶ Que lë ni na', núti'tës nu nunbë' Li', Dios, ral-la'
ulidza Li'
cate' dë lataj gü'ílen Li' didza'.

Cate' rö' nisa bach luyú ni, bití' ca' ideli' idxín ga
zoa nu na'.

⁷ Li' nacu' ga gaca ucachi' cuina' cate' zoa bönadxi
quia'.

Li' caz gun chí'u neda' para cabí bi gaca quia'.

⁸ Li' gunu' ga gúl-latica'sa' quiu' Li' tu' rusöló' neda'.
Rnnë' Dios: "Neda' uzéajni'ida' li', en uluí'ida' li' le
ral-la' gunu'.

Usédida' li', en uyútica'sa' li'.

⁹ Bití' gacu' ca tu böa' o tu mula cabí ta'yéajni'iba'.
Ral-la' cu'u guié en du rú'ugacaba' para inná
bé'enu' légacaba'."

Channö cabí gunu' caní, bití' ca' ilunba' ca rë'ënu'.

¹⁰ Zián le tun ga tu'huí'iniguequi nupa tuá' dö',
pero bönni' ruzxöni ládxe'ë Xanru' ilé'enë' yöl-la'
dxi'i ladxi' queë'.

11 Buli'dzéjalenë' Xanru', en buli'sí' xibë', libí'ili' nácali' tsahui' lahuë' Lë'.
Lu yöl-la' rudzeja queëli' guli'cödxí'a, libí'ili' nácali' idú dxi'a.

33

1 Lu yöl-la' rudzeja queëli' guli'gul-la lahuë' Xanru', libí'ili' nácali' tsahui' lahuë' Lë'.
Nupa nácgaca tsahui' ral-la' ila'gú'u Lë' yöl-la' ba.

2 Guli'guíë' Lë': "Xclenu", quínnili' lë'e bihuél-la.
Guli'gul-la yöl-la' ba queë', quínnili' le zë chi du que.

3 Guli'gul-la queë' tu le rul-la cubi.

Guli'quinnaj dxi'ado', en lu yöl-la' rudzeja queëli' guli'cödxí'a.

4 Xtídzë'ë Xanru' naca idú tsahui',
ate' idú ládxë'ë runë' yúgu'të bi runë'.

5 Nadxí'inë' le naca dxi'a, en le naca tsahui'.

Nalá' lahui yöl-la' dxi'i ladxi' queë' Xanru' iduté yödzülió.

6 Len didza' bë'ësë' Xanru', benë' lúzxiba,
en benë' yúgu'të böljaj bení' len bö' rirúaj ru'ë.

7 Rutubë' nisa rö'ö nísado' para gaca ca tu guí'a.
Napa chi'ë nisa rö'ö zili ga na' nupë'ë xilataj.

8 Yúgu'të bönachi ral-la' ila'dxí'i Xanru'.

Bönachi iduté yödzülió ral-la' ila'cuá' nöxaj lahuë' Lë'.

9 Bë'ësë' didza' Xanru', ate' la' gúcatë ca na' gunnë'.

10 Gunná bë'ë, ate' guca tsutsu le nunë'.

Runë' Xanru' ga tu'huóaca cá'asö didza' túngaca bönachi yugu' yödzü.

Runë' ga bití' ilaca le tē'ëni ilúngaca bönachi.

11 Sóatica'sö tsutsu didza' nunë' Xanru'.

Le rizá' ládxe'ë ulu'gá'anatica'sö quéguequi zxi'ini
xi'sóaru'.

12 Bica' bágaca bönachi yödzö na' náquië' Xanru'
cazë' Dios quéguequi,

bönachi na' nabö cazë' Dios para ilaca quez queë'.

13 Zoa cazë' Xanru' yehua' yubá, ruyüë' ga zóaru'.

Rilé'enë' le tun yúgu'të bönachi nacua' iduté
yödzölió.

14 Ga na' zoa cazë' ruyüë' idú gásibi'ilö,

en rilé'enë' yúgu'të nupa nacua' iduté yödzölió ni.

15 Nun cazë' Lë' ládxi'do'gaca yúgu'tëguequi.

Réajni'i quézine' ca naca yúgu'të le túngaca.

16 Biti' ca' ulé' bönni' unná bë' nacua' queë' bönni'
guizxi yu röjáquië' gudil-la.

Biti' ulé' bönni' zoë' gudil-la tu' nál-latërë'.

17 Biti' nazaca' gunru' löza böa' para idéli'ru' lu
gudil-la,

tu' cabí gaca usölabá' nu bönni' tu' nál-latëröba'.

18 Buli'yú, ruyútica'së' Xanru' nupa tadxi Lë',

nupa na' tun löza yöl-la' dxi'i ladxi' queë',

19 para usölë' léguequi lu yöl-la' guti,

en para ugahuë' léguequi cate' tsu'u gubín.

20 Idú ládxi'ru' runru' löza Lë' Xanru'.

Rácalen cazë' rë'u, en rapa chi'ë rë'u.

21 Rudzeja ládxi'lenru' Lë',

en uzxöni ládxi'ru' Lë', tu' náquië' lá'ayi.

22 Lu yöl-la' dxi'i ladxi' quiu' gúcalen netu', Xan,

tu' runtu' löza Li'.

34

1 ¡Innética'sa' queë' Xanru' náquië' dxi'a!

¡Cú'utica'sa' Lë' yöl-la' ba!

² Bö' naca caza' gun zxön Xanru'.

Nupa náçagaca nöxaj ladxi' ila'yöni lë ni, en ulu'dzeja.

³ Guli'güi' zxönë' Xanru' tsözxön len neda', en tsözxön usiyönru' bönachi ca naca Lë' La'ayi.

⁴ Bulidza'-në' Xanru', ate' bubí'ë didza' quia', en busölé' neda' lu yugu' le gúdxida'.

⁵ Nupa náçagaca queë' bila'dxín lahuë', en bulu'zí xibé'.

Bíti'rö caz ulu'tuí'i nupa na'.

⁶ Bulidza'-në' Xanru', ate' biyönnë' quia' neda', bönni' yechi',

en busölé' neda' lu yúgu'të le guca quia'.

⁷ Gubáz lá'ayi que ya'abá queë' Xanru' tapa chi'ë nupa tadxi Lë',

en tu'sölé' léguequi lu yúgu'të le raca quéguequi.

⁸ Guli'sí' bë'ë, ate' inözili' náquië' Xanru' dxi'a.

¡Bica' ba bönni' ruzxöni ládxë'ë Lë'!

⁹ Guli'gadxi Xanru', libí'ili' nácali' quez queë', tu' cabí bi ila'yadzaj nupa tadxi Lë'.

¹⁰ Ta'yadzaj ta'yúdxiba' bëdxi guixi', en ta'dunba', pero nupa tu'lidza Xanru' bití' ca' ta'yadzaj le naca dxi'a.

¹¹ Guli'dá libí'ili', bí'ido', en buli'zë nágalí' xtídza'a. Uzéajni'ida' libí'ili' para gádxili'-në' Xanru'.

¹² ¿Nuzxi caz bönni' ré'ënë' soë' ibanë', en ré'ënë' soë' iz zían para uzi'ë xibé le naca dxi'a?

¹³ Ben chí'i lúdxu'u para cabí gu'u didza' xihui', en para cabí si' yé'enu' luzó'o.

- 14 Bucá'ana le cabí naca tsahui', en ben le naca
dxi'a.
Bë' ladxi' cözu' dxi'a tsáhui'do',
en ben bayudxi gunu' yugu' lë ni.
- 15 Ruyútica'së' Xanru' nupa nácgaca tsahui',
en riyón quézinë' cate' tu'lidza Lë'.
- 16 Uzágüë'ë Xanru' xinözgaca nupa tuá' dö',
en gunë' ga cuntu nu tsöjné léguequi.
- 17 Nupa nácgaca tsahui' tu'lidza Xanru', ate'
riyönnë' quéguequi,
en rusölë' léguequi lu yugu' le raca quéguequi.
- 18 Xanru' zóalen cazë' nupa tu'hu'ini ladxi',
en rusölë' nupa nácgaca nöxaj ladxi'.
- 19 Zián le riguí'i rizáqueë'ë bönni' tsahui',
pero Xanru' rusölë' lë' lu yúgu'të lë na'.
- 20 Xanru' rapa chi'ë yúgu'të dxita yu'ë,
ate' bití' gatsaj nitú dxita queë'.
- 21 Le xihui' run nu ruá' dö' gun ga gati nu na',
ate' ila'baga' xigua' nupa bití' ta'lé'e dxi'a le naca
tsahui'.
- 22 Xanru' caz ruhuóá'uë' bö' nácgaca caz huen
dxin queë',
ate' bití' irugu que nitú nupa na' tu'zxöni ladxi' Lë'.

35

Tu le bil-lë' David

- 1 Xana' Dios, gudá'baga' nupa bití' ta'lé'e neda'
dxi'a.
Butíl-lalen nupa ta'díl-lalen neda'.
- 2 Guzxön le gun chi'i neda' lu gudil-la,
en gudá gácalenu' neda'.
- 3 Guzxön yaga tuchi' quiu' para uzagu'u
xinözguequi nupa ta'zóa regu' neda'.

Gudxi bö' naca caza' nacu' Li' Nu rusölá neda'.

⁴ Ben ga ulu'tuí'i, en ulu'gá'ana cá'asö nupa té'ëni
iluti neda'.

Ben ga ulu'huécaj, en ulu'gá'ana cá'asö nupa té'ëni
ilu'í' dö' quia'.

⁵ Ben ga ilaca ca bëbu zxe café zeaj lu bö'ös,
en ben ga ulaguë' gubáz lá'ayi que ya'abá quiu'
léguequi.

⁶ Ben ga gaca chul-la nöza yú'ugaca, en ga cuílagaca,
ate' soa régu'ë gubáz lá'ayi quiu' léguequi.

⁷ Bulu'cáchi' du yalaj le sön neda', en biti' bi nuna'
quéguequi.

Gula'chö'öna yeru ga tsöjbixa', en biti' bi nuna'
quéguequi.

⁸ Ben ga idxín quéguequi tsálido'os le usuniti
léguequi,
en ben ga du yalaj na' bulu'cáchi' sön la' cuínguequi
quez.

Ben ga ila'bixi lu yeru na' gula'chö'öna.

⁹ Udzeja ládxi'léna'-né' Xanru',
en uzi'a xibé yöl-la' rusölá queë'.

¹⁰ Ila'nná dxita néquinida': "Xan, ¿nuzxi caz naca ca
nacu' Li'?

Rusöló' nu riguí'i rizáca' lu na' nu nál-latëro ca le.

Rusöló' nu riguí'i rizáca', en riyadzaj riyudxi lu na'
bönni' ribané' le nequi que."

¹¹ Ta'dá'baguë'ë bönni' xihui' neda', en ta'nnë'
quia'.

Ta'nabi yúdxiné' neda' ca naca yugu' le cabí nözda'.

¹² Tu'bi'ë quia' le naca dö' cate' runa' le naca dxi'a,
ate' ruhu'í'inide'e ládxa'a.

¹³ Pero neda' gúcuca' lari' cá'asö cate' guláquië' huë'.

Bena' gubasa, en busaca' zi' bö' naca caza',
 en uláz quéguequi bulidza'-në' Dios zián luzuí.

14 Buí'inide'eda' tsca guca luzá'a o bi'i böchi' caza'
 nu na' guca huë'.

Gurödxí yecha'a ca huí'inide'eda' channö gátinu
 xiná' caza',

15 pero cate' guchixi guníguida' neda',
 bulu'dzéjade'e, en bulu'dubi tsözxön.

Yugu' bönni' na' bulu'cá'anë' neda' cá'asö
 bulu'dubë' para ilunë' ga cö'a baguí'i.

Yugu' bönni' na' biti' núnbë'a gulúnnatica'së' neda'.

16 Bulu'saca' zi'ë neda', en bulu'titjé' quia'.

Lu yöl-la' rilé quégaquië' neda' gulagu zxea
 láyi'gaquië'.

17 Xan, ¿gáca'xte caz uyú iná'asu' le tunë'?

Busölá neda' lu dö' tu'ë quia'.

Busölá neda' lu ná'agaquië' bönni' na' nácagaquië'
 ca yugu' bëdxi guixi'.

18 Guía' Li': "Xclenu" lógaca bönachi zián
 ulu'dúbigaca quiu'.

Cu'a Li' yöl-la' ba ga nudúbigaca ziantë bönachi.

19 Biti' gu'u lataj ulu'dzeja nupa ta'dá'baga' neda',
 en ta'z'í' yë',

en biti' gu'u lataj ulu'titaj quia', nupa na' tu'dí'i
 neda', en biti' bi nuna' quéguequi.

20 Catu caz tuí'i didza' le gun ga soa dxisö didza'
 bizxaj.

Lu yöl-la' rizi' yë' quéguequi ta'nnë' quégaca nupa
 ta'bö' dxi'a tsáhui'do' yödzölió ni.

21 Bulu'salaj ruí'iguequi, en gula'nnë' quia',
 gula'nná:

“¡Ön, bilé'e quézitu' le nunë'!”

22 ¡Bilé'e quézinu' Li' lë ni, Xan! ¡Biti' su' dxisö!

¡Biti' ucá'anú' neda', Xan!

23 ¡Guyasa, Xan! ¡Busubán ládxi'u, Xan, para uchi'a usöröu' quia'!

¡Gúcalen neda', Xana' Dios!

24 ¡Tu' nacu' tsahui', buchi'a busörö quia', Xana' Dios!

¡Biti' gu'u léguequi lataj ulu'dzeja ni'a que le raca quia'!

25 ¡Biti' gu'u léguequi lataj ila'nná:

“Ön, bidéli'ru' le guzé ládxi'ru'”!

¡Biti' gu'u lataj ila'nná: “Chibucúl-laru' lë”!

26 ¡Ben ga ulu'tuí'i, en ulu'gá'ana cá'asö nupa tu'dzeja cate' ruhuí'inida'!

¡Ben ga ulu'tuí'i, en ulu'gá'ana cá'asö nupa ta'dá'baga' neda'!

27 ¡Ben ga ila'bödxí'a lu yöl-la' rudzeja quéguequi, en ulu'zí' xibé nupa tuí'i ládxi'gaca urúaja' tsahui'!

¡Bë' lataj ila'nnática'sö: “Nayëpisëtërë' Xanru' Dios, tu' raza ládxi'ë gunë' ga gaca dxi'a quégaca huen dxin queë”!

28 Ní'irö guna' ba nalí quiu', innía': “¡Nacu' tsahui'!” en cu'a Li' yöl-la' ba idú dza.

36

1 Le naca xihui' ruí'ilen bönni' nucá'anë' Dios lu icja ládxi'da'ahuë'.

Biti' ca' rádxinë' Dios.

2 Tu' run ba zxön cuinë'

réquinë' bití' nözinë' Dios nabáguë'ë lë' dul-la', en bití' ichúguië' Dios queë'.

3 Ru'ë didza' xihui', en rizí' yë'ë.

Bití' réajni'inë', en bití' runë' le naca dxi'a.

4 Cate' ni' dë' lu le ráti'në' rizá' ládxe'ë ca naca le xihui' gunë'.

Ruí'i ládxe'ë gunë' le cabí naca dxi'a,
en bití' rusanë' runë' le naca xihui'.

5 Zxöntë'rö ca yehua' yubá naca yöl-la' dxi'i ladxi' quiu', Xan,
ate' gúntica'su' ca rnna xtídz'u, tsca zoa yehua' yubá.

6 Naca tsutsu le tsahui' nacu' ca nácgaca tsutsu yugu' gu'a zxön quiu'.

Ca ruchi'a rusöröu' naca ca naca nísado', tu' cabí gaca nu gúnbë'e le.

Run chi'i cazu' bönachi, en yugu böa' guixi', Xan.

7 Nazáca'tërö yöl-la' dxi'i ladxi' quiu', Dios.

Run chi'u yúgu'të bönachi ca runba' yöjede, run chí'iba' yugu' bórado' zcan xílaba'.

8 Tu'huölaj tu'dzë'e bönachi quiu' le nayánda' lu yu'u lidxu',

ate' rugui'ju' léguequi le naca yöl-la' dxi'i ladxi' quiu'.

9 Yúgu'të le nacuá' nabánigaca Li'.

Tu' naca cazu' bení' rilé'etu' bení'.

10 Bidxí'itica'sö nupa núnbë'gaca Li',

en ben le naca dxi'a quégaca nupa nácgaca tsahui'.

11 Bití' gu'u lataj bi ilún quia' nupa tun ba zxön cúnguequi,

en bití' gu'u nupa tuá' dö' lataj ulu'laga' neda'.

12 Nadzö'ögaca nupa tuá' dö'.

Déguequi luyú, en bití' ca' gaca ulu'huöása.

37

¹ Biti' ubi uguí'i ládxi'do'oli' tu' tu'zì'gaca xibé nupa tuá' dö'.

Biti' uzxé'eli' nupa bití' tun le naca dxi'a.

² Huadödité quéguequi ca raca que guixi' nacuadi, en udxi quéguequi ca raca quégaca guíxi'do' narúgugaca.

³ Buli'zxöni ládxi'ë Xanru', en guli'gún le naca dxi'a.

Buli'gá'ana luyú queë', en guli'cöz dxi'a tsáhui'do'.

⁴ Buli'sí' xibé' Xanru', ate' gunnë' queëli' le rizé ládxi'li'.

⁵ Buli'dödi cuinli' lu në'ë Xanru'.

Buli'zxöni ládxi'ë Lë', ate' gunë' le gácalen libí'ili'.

⁶ Gun cazë' Lë' ga urúajli' tsahui', en gácali' ca bení', en cate' uchi'a usöröë' queëli', gaca queëli' ca lahui' dza.

⁷ Guli'sóa dxisö lahuë' Xanru', en guli'cöza le gunë'.

Biti' cuéqui ícjali' tu' nözi bönni' ruzi'ë xibé, bönni' na' ru'ë dö'.

⁸ Bítí'rö leli', en buli'sán yöl-la' ridzá'a.

Biti' ubi uguí'i ládxi'do'oli' tu' gun lë ni ga guá'ali' dö'.

⁹ Dios caz uzáguë'ë xinözguequi nupa tuá' dö', pero nupa tu'zxöni ladxi' Xanru', guequi quéguequi luyú.

¹⁰ Ia'látí'sö xidzé, en bítí'rö soë' bönni' na' ru'ë dö'. Uguíljali' xilatjé', pero bítí'rö soë' ni'.

¹¹ Nupa nácgaca nöxaj ladxi', guequi quéguequi luyú,

ate' ulu'zì' xibé yöl-la' tsahui' que.

¹² Tun didza' nupa tuá' dö' bi ilúngaca quégaca nupa nácgaca tsahui',

en lu yöl-la' rilé quéguequi tagu zxea láyi'guequi.

13 Ruzzidxi cazë' Xanru' quéguequi,
tu' rilé'enë' dza udxì quéguequi.

14 Nupa tuá' dö' chigula'béaj guíë tuchi' quéguequi,
en nuá'gaca uxiti' yaga quéguequi
para ulu'xicja nupa ta'zaca' zì', en ta'yadzaj
ta'yudxi,

en para iluti nupa tun le naca dxi'a.

15 Guíë tuchi' quéguequi ila'chiza la'
ládxi'do'guequisö,
ate' ila'guítsaj uxiti' yaga quéguequi.

16 Dxi'atërö le do' dësö queë' bönni' tsahui'
ca le zían dë queë' bönni' ru'ë dö'.

17 Huayúzxjagaca ná'agaca nupa tuá' dö',
pero Xanru' caz rácalenë' nupa nácgaca tsahui'.

18 Ru'i ladxi' cazë' Xanru' nupa biti' bi xigua'
nabága'gaca,
ate' guéquitica'sö xiyúgaca quéguequi.

19 Biti' ca' ulu'tuí'i cate' idxín dza biti' gaca dxi'a,
en cate' tsu'u gubín, gáta'dëra le ilágugaca.

20 Ulu'niti tsaz nupa tuá' dö',
ate' nupa biti' ta'lé'e dxi'a Xanru' ilaca ca yöl-la'
lachi que guixi'.

La' tóditë quéguequi, en ilaca ca dzön le rinítitë.

21 Ta'nábini nu bi gunna quéguequi tu chí'sö, pero
biti' ca' ulu'bí'i lë na'.

Nu naca tsahui' ruzá ladxi' quéguequi, en runödzej
quéguequi.

22 Gaca luyú quégaca nupa run lá'ayë' Xanru',
pero ila'niti tsaz nupa rudxië' Lë' dö'.

23 Le runë' bönni' dxi'a naca le nulu'inë' Xanru' lë',
ate' raza ládxë'ë Lë' le runë' bönni' na'.

24 Cate' röjtsö'ë, biti' ca' röjtsö'ë tsaz,
tu' röjzönë' Xanru' caz bönni' na'.

25 Guca' ra'bando', pero na'a nagula',
 en catu caz bilé'eda' nusán nē'ë Dios bönni' tsahui',
 en catu caz bilé'eda' riyadzaj le ilágubi' zxi'inē'.

26 Yugu' dza ruzá' ládxe'ë bönni' tsahui' quéguequi
 luzě'ë
 en runödzjě' le ta'nábini lě' unödzjě' tu chí'isö,
 Nácagacabi' zxi'ini xi'sóë' tu le run ga raca dxi'a
 queëru'.

27 Buli'cá'ana le cabí nácatě, en guli'gún le naca
 dxi'a.

Channö caní gunli', sóali' tsaz,

28 tu' nadxí'ině' Xanru' nu run le naca tsahui',
 en catu caz usán nē'ë nupa néquiguequi quez queë'.
 Gun chí'tica'sě' léguequi,
 pero usunítie' zxi'ini xi'sóagaca nupa tuá' dö'.

29 Guequi luyú quégaca nupa nácagaca tsahui',
 ate' ila'cuá'tica'sö luyú na'.

30 Ru'ë bönni' tsahui' didza' le napa yöl-la' réajni'i,
 ate' raca yöl-la' ruchi'a rusörö ni'a que didza' na'
 ru'ë.

31 Yu'u icja ládxi'da'ahuë' le gunná bē'ë Dios.

Que lě ni na' catu caz ichixi iníguinë'.

32 Ruyuda' nu ruá' dö' le runě' bönni' tsahui',
 en riguilaj nacxi gaca guti lě'.

33 Xanru' biti' gu'ë nu na' lataj bi gun queë' bönni'
 tsahui' na',
 en biti' gu'ë lataj irugu queë' cate' nu uchi'a usörö
 queë'.

34 Buli'zxi'ni ládxe'ë Xanru', en guli'gún ca rě'eně'
 gunli',

ate' uchisě' libí'ili' para guequi queëli' luyú.

Cate' udxi quégaca nupa tuá' dö', hualé'e quézili' le.

35 Bilé'eda'-nē' bönni' huía' dö'.

Gúquië' ca tu yaga zxön, en buzí'de'enë' xibé.

³⁶ Ní'irö gudödi queë', en bíti'rö zoë'.

Yöjdilja' lë', pero bití' ca' guca udzöliða' lë'.

³⁷ Buli'yú ca náquië' bönni' tsahui'.

Cuntu nu gaca bi innë queë',

tu' ila'cuá'abi' xzí'ini xi'sóë' bönni' zxön ladxi'.

³⁸ Ulu'niti tsaz nupa tu' cá'ana le gunná bë'ë Dios.

Usiúdxë' Xanru' yugu' xzí'ini xi'sóagaca nupa tuá' dö',

³⁹ pero rusölá cazë' nupa náagaca tsahui'.

Rutipë' ládxi'guequi cate' bi raca quéguequi.

⁴⁰ Rácalenë' léguequi, en rusölë' léguequi.

Rubéajë' léguequi lu ná'agaca nupa tuá' dö', en rusölë' léguequi,

tu' tu'zxöni ládxi'guequi Lë'.

38

¹ Biti' ilenu' neda', Xan, en bití' uzenu' neda' bach.

Bití' gunu' neda' xigua' lu yöl-la' rilé quiu'.

² Ben zi'u neda', en budxíu' neda' huë'.

Nuzötju' neda' len no'o.

³ Yu'a yödzöhuë' zxön tu' rilenu' neda'.

Dxía huë' idütë le naca' tu' nözi dul-la' nabága'a.

⁴ Xigua' nabága'a naca ca tu nísado' ga ruchicja' nisa.

Naca ca tu yua' zi'i nabága'a neda'.

⁵ Tu' bena' yugu' le cabí naca dxi'a,

dxía' huë' le rilá' siguti, en rudzu'.

⁶ Narecji' cúdza'a, en nagá'ana' cá'asö.

Idú dza ruhuí'inide'eda'.

⁷ Idütë le naca' yú'uda'a xilá,

ate' nazxí xipëla'a.

⁸ Rudú ládxa'a, en ricuídi'da'.

Rinnëda' ládxa'a tu' ruúbi ruguí'i ládxi'da'ahua'.

⁹ Nöz quézinu' Li', Xan, le rizé ládxa'a,
en riyönnu' le rinnética'sö ládxa'a.

¹⁰ Richunchu ládxi'da'ahua', en ricuidi' ládxa'a,
ga ridxintë richul-la guiõj lahua'.

¹¹ Bítirö ta'dzaga neda' yugu' luzá'a, en yugu'
böcha'a, tu' nözi xihuë'a,
ate' tu'biga' di'a dza quia' ga zoa'.

¹² Nupa té'ëni iluti neda' ta'bequi le ila'zön neda',
ate' nupa té'ëni ulu'cul-la neda' tun xtídza'guequi
nacxi ulu'suniti neda'.

Idú dza ta'bequi ícjaguequi bi ilún quia'.

¹³ Naca' ca tu bönni' nacödzuë', en bítirö riyönda'.
Naca' ca tu bönni' narugu lúdxë'ë, en bití' risaljé'
ru'ë.

¹⁴ Naca' ca tu bönni' bítirö riyönnë',
en que lë ni na' bití' bi didza' rubi'ë.

¹⁵ Tuzu' Li' ruzxöni ládxa'a, Xan.

Ubí'i cazu' didza', Xana' Dios.

¹⁶ Bití' gu'u lataj ulu'dzeja ni'a que le raca quia'.
Bití' gu'u lataj ilún ba zxön cuínguequi tu' nagá'ana'
cá'asö.

¹⁷ Chizóa' tsöjbixa',
en zóaléntica'sö xihuë'a neda'.

¹⁸ Que lë ni na' rixóalëpa' xiguia' nabága'a,
en risëbida' ládxa'a tu' nözi dul-la' nabága'a.

¹⁹ Nacuá' dxi'a, en nál-lagaca nupa téqui neda' zi'.
Nayánda' nupa tu'dí'i neda', en bití' bi nuna'
quéguequi.

²⁰ Ta'dá'baga' neda' nupa tu'bí'i le cabí naca dxi'a
que nu run le naca dxi'a.

Caní tun tu' ruí'i ládxa'a guna' le naca dxi'a.

²¹ Bití' usán no'o neda', Xan.

Biti' ubigu' ga zoa', Dios quia'.

²² Gudáchi gácalenu' neda', Xan,
tu' naca cazu' Li' Nu rusölá neda'.

39

¹ Gunnía': Gun chi'i cuina' ca naca le runa',
en biti' guna' dul-la' ca naca didza' ruá'a.

Biti' bi didza' gu'a

cate' nacuá' nupa tuá' dö' gal-la' ga zoa'.

² Guzóa' dxisö, en biti' bë'a didza' ga bidxintë
biti' gunnía' le naca dxi'a, pero biyali' xihuë'a.

³ Bubi buguí'i ládxi'da'ahua',

en cate' guzá' ládxa'a que, guyegui gulá
ládxi'da'ahua'.

Que lë ni na' gunábida'-në' Xanru', gunnía':

⁴ Xan, ¿gáca'xte caz soa' ibana'?

Buluí'i neda' tsca iz soa' ibana'.

Ben ga inözda' channö chizóa' caz gátia'.

⁵ Nabábasö dza nuzú' quia' soa' ibana'.

Yugu' iz soa' ibana' biti' bi zeaj naca lo' Li'.

Le nácatë biti' bi nácgaca yúgu'të bönachi nacuá'
luyú ni.

⁶ Nácgacasö ca tu zxul-la rigú'u böaj.

Nítisö tu'úbi tu'guí'i ládxi'do'guequi, en tun dxin.

Tu'tubi yöl-la' tsahui', pero biti' nõzguequi nuzxi
guequi que.

⁷ ¿Bizxi caz gaca guna' löza, Xan?

Ruzxöni ládxa'a Li'.

⁸ Busölá neda' lu xiguia' nabága'a,

en biti' gu'u lataj ulu'titaj quia' nupa nácgaca
canöz.

⁹ Soa' dxisö, en biti' bi didza' gu'a,

tu' ben cazu' Li' ga rigu'í'i rizáca'a lë ni.

¹⁰ Bítí'rö gunu' neda' xigua'.

Chizóa gátia' tu' rusaca' zí'u neda'.

¹¹ Runu'-në' xigua' bönni' dul-la', en ruzenu' lë
bach.

Ca tu'töba' bëlado' que le yú'uba', rusunítíu' le ru'í'i
ládë'ë bönni' na'.

Biti' bi naca cazë' bönni' dul-la' na'.

¹² Buzë nagu' le rulidza' Li', Xan, en le rinábida' Li'.

Biti' su' dxisö cate' ribödxá' lo' Li',

en bití' gaca' ca tu bönni' zí'tu' lo' Li',

en ca tu bönni' ridasë' ca guláquië' xuz xtó'otu'.

¹³ Benna neda' lataj idipa ládxa'a

zí'alö ca uzá'a yödzölió ni, en bítí'rö soa'.

40

¹ Lu yöl-la' riböza zxön ladxi' quia' gulöza' gácalenë'
Xanru' neda'.

Ní'irö buzë naguë' quia', en biyönnë' le bulidza'-
në'.

² Bubéajë' neda' ca tu lu yeru ga rë', en lu guna' zili.

Buzöë' neda' tu lu guiöjto'o, en guléquië' neda'
tsutsu.

³ Busëdinë' neda' tu le cubi le rul-la' le naca yöl-la'
ba queë' Dios queëru'.

Zián nupa ila'lé'eni lë ni, en ilún Lë' zxön,

ate' ulu'zxöni ladxi'-në' Xanru'.

⁴ Bica' ba bönni' ruzxöni ládë'ë Xanru'.

Biti' runë' tsözxön nu run ba zxön cuini, nu na' run
zxön yugu' dios núngaca bönachi.

⁵ Ziántērō naca le nunu' queētu', Xana' Dios, yugu' le tun ga rubánitu'.

Ziántērō le yu'u icja ládxi'do'o ca naca le gunu' queētu'.

Biti' ca' gaca nu ulaba lo' Li' tsca nácagaca.

Channō gué'enda' nu usiyōnda' tsca nácagaca, nayántērō tsca le gaca ulaba'.

⁶ Biti' rě'ēnu' gútigaca'-ba' böa' guixi' lo', en calēga bi cu'a lo'.

Biti' rinabu' uzégui'gaca'-ba' böa' bēdxi lo',

en calēga tu le guna' lo' para ugúa dul-la',

pero gusalju' naga' para yōnda' le guío' neda'.

⁷ Que lē ni na' gunnía': Ni zoa caza' neda' quiu'.

Lu guichi lá'ayi quiu' nazúaj caz ca naca quia'.

⁸ Raza ládxa'a runa' ca rě'ēnu' Li', Dios quia'.

Nagu'a icja ládxi'da'ahua' xibá naguixju' Li'.

⁹ Ga tu'dubi bönachi guizxi yu quiu', Xan,

busiyōnda' léguequi nacu' tsahui'.

Biti' ca' guzóa' dxisö.

Nöz quézinu' lē ni, Xan.

¹⁰ Biti' bucáchi'za' icja ládxi'da'ahua' ca ruúnu' tsahui' bönachi.

Bulu'a lahui ca runu' ca rnno', en ca rusöló' bönachi.

Ga nudúbigaca bönachi quiu' biti' guzóa' dxisö,

pero bē'a didza' ca nacu' dxi'i ladxi', en ca ru'u didza' le nácatē.

¹¹ Biti' ugú' quia' yöl-la' dxi'i ladxi' quiu', Xan.

Yöl-la' dxi'i ladxi' quiu', en ca runu' ca rnna xtídzu'u ilún chí'itica'sö neda'.

¹² Zián le raca quia' nagú'ugaca neda' lě'ajlö, le cabí gaca nu ulaba.

Nabága'a yugu' dö' bi'a, en bíti'rō gaca ilé'eda'.

Nayanrö ca guitsa' icja', ate' rudú ládxa'a.

13 ¡Busölá neda', Xan!

¡Gudáchi gácalenu' neda', Xan!

14 Ben ga ulu'tuí'i, en ila'bó' baguí'i

nupa na' té'ëni ulu'suniti neda'.

Ben ga ulu'huécaj, en ulu'gá'ana cá'asö

nupa na' té'ëni gaca quia' le cabí naca dxi'a.

15 Ben ga ulu'dú ládxi'gaca tu' nabíxigaca

nupa na' tu'titaj neda', ta'nná: "¡Buyútsöca' le raca queë'!"

16 Ben ga ulu'dzeja, en ulu'zí' xibó' yúgu'të nupa tu'guilaj Li'.

Ben ga ila'nnática'sö nupa ta'dxí'i yöl-la' rusölá quiu',

ila'nná: "Nayépsëtëre' Xanru'."

17 Nacuídi'da', en bití' bi gaca guna',

pero ruí'i ladxi' cazu' Li' neda', Xan.

Naca cazu' Nu rácalen neda', en Nu rusölá neda'.

Bití' tsenu' guídu' quia', Dios quia'.

41

1 Bica' ba bönni' ruí'i ládxi'ë nupa nácgaca yechi'.

Xanru' gácalen cazë' bönni' na' cate' bi gaca queë'.

2 Xanru' Dios gun chi'ë lë', en gunë' ga soë' ibanë'.

Gunë' ca' ga uzi'ë xibé xiyú cazë'.

Bití' usán në'ë lë' lu ná'agaca nupa bití' ta'lé'e lë' dxi'a.

3 Xanru' utipë' ládxi'ë bönni' na' cate' ré'enë'.

Uchisë' lë' lu da'a le ráti'në', en gunë' ga soë' dxi'a.

4 Gunnía': Bena' dul-la' lo' Li', Xan.

Buéchi' ladxi' neda', en bun neda'.

⁵ Nupa biti' ta'lé'e neda' dxi'a ta'nně quia', ta'nná:
 “¿Bátaxi gátiě', en huáca gal-la ládxi'gaca bönachi
 lě'?”

⁶ Channö uduyúgaquiě' neda', ta'zı' yě'ě.

Ta'güě' didza' ca naca le raca quia',
 en cate' ta'rúajě', tu'siyönně' bönachi.

⁷ Tu'dubi nupa biti' ta'lé'e neda' dxi'a, en ta'nně
 quia'.

Ta'zá' ládxi'gaca zián le naca dö' le ilún quia'.

⁸ Ta'nně quia', ta'nná: “Yu'ě yödzöhuě' le guti lě'.
 Bítı'ró caz huóásě' ga na' dē' lu le deně'.”

⁹ Lěsca' canı'beně' böchi' luzá'a ruzxöni ládxa'a-ně'.
 Bönni' gudáguleně' neda' tsözxón ridá'baguě'ě
 neda'.

¹⁰ Buéchi' ladxı' neda', Xan, en bun neda',
 ate' ubı'ı' caza' quégaca nupa na' biti' ta'lé'e neda'
 dxi'a.

¹¹ Gácabe'eda' raza ládxi'u neda',
 tu' cabı'ulu'xicja neda' nupa biti' ta'lé'e neda' dxi'a.

¹² Gácıen cazu' neda' tu' runa' le naca dxi'a.
 Gunu' ga sóatica'sa' lo' Li'.

¹³ ¡Yöl-la' ba Xanru', Dios quégaca bönachi Israel!
 ¡Guli'cu'ě yöl-la' ba na'a dza, en yugu' dza sı' zaca!
 ¡Ca' gaca!
 ¡Ön, ca' gaca!

42

¹ Ca rizě ládxi'ba' bidxina' guixı' nisa yégudo',
 lěsca' canı' rizě ládxa'a Li', Dios.

² Ribidxi ládxa'a Li' cazu', Dios.

¿Bátaxi udxina' ga dē quia', en tsu'a le yúbölö yudo'
 lá'ayi quiu'?

³ Rëla, en te dza ribödxá', en bití' bi rahua'.
Yugu' dza nacua' nupa ta'nábini neda', ta'nná:
“¿Gazxi caz zoa Dios quiu'?”

⁴ Risëbi ládxa'a cate' röjneda' ca guca zí'alö,
cate' guzá'lena' bönachi guizxi yu, en yöjnörúa'
láhuilöguequi ra' yu'u queë' Dios.
Lu yöl-la' rudzeja queëtu' bíl-latu', en guyéaj
ládxi'tu'-në' Xanru', en bentu' laní.

⁵ ¿Bizx que risëbida' ládxa'a, en bizx que rö'a
böniga?
Uzxöni ládxa'a-në' Xanru' Dios, tu' huadxín dza
cu'a-në' yöl-la' ba le yúbölö.
Náquië' Nu rusölá neda', en náquië' Dios quia'.

⁶ Risëbida' ládxa'a, Dios quia'.
Que lë ni na' tsöjneda' Li' tsanni ni zoa', ridá'
rizxúnnaja' ra' yegu Jordán,
en tsanni ni ridá' lu guí'a Hermón, en lu guí'a
Mizar.

⁷ Ca tu guziú' rinnë lu nísado', en ca bö ruí'i tu
budoá' nísado' queë' Dios,
caní rinnë ladxi' bö' naca caza' lu yöl-la' risëbi
ladxi'.

⁸ Rinábida'-në' Xanru' huéchi' ládxe'ë neda' yugu'
dza.
Yugu' dzö' rul-la' yöl-la' ba queë' Lë',
en rulidza' Dios, ruí'lena'-në' didza', Nu na' runna
quia' yöl-la' na'bán.

⁹ Guía'-në' Dios, Nu ruzóa neda' tsutsu, innía': ¿Bizx
que nál-la ládxi'u neda'?
¿Bizx que run bayúdx quí'i sáca'tica'sa' lu ná'agaca
nupa bití' ta'lé'e neda' dxi'a?

10 Rutsaba yúgu'të dxita yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu'?"

11 ¿Bizx que risëbida' ládxa'a, en bizx que rō'a böniga?

Uzxöni ládxa'a-në' Xanru' Dios,
tu' huadxín dza cu'a-në' yöl-la' ba le yúbölö,
tu' náquië' Nu rusölá neda', en náquië' Dios quia'.

43

1 Guléaj neda' tsahui', Dios, en bë' didza' uláz quia' lógaca bönachi tuá' dö' quia'.

Busölá neda' lu na' nu rizi' yë', en biti' naca tsahui'.

2 Li' cazu' nacu' Dios, Nu rutipa ládxa'a. ¿Bizx que nusán no'o neda'?

¿Bizx que ruhu'ínida' tu' ta'bía no neda' nupa tu'dí'i neda'?

3 Gusöl-la' quia' bení' quiu', en le naca idútë li quiu' para ulu'lu'i neda' nöza.

Ben ga ila'chë' neda' ga naca lá'ayi quiu', ga na' zoa cazu' Li'.

4 Tsu'a ra' bucugu queë' Dios.

Ibíga' lahuë' Dios, Nu run ga rudzëjade'eda'.

Gúl-lalena' bihuël-la, cu'a Li' yöl-la' ba, Dios, nacu' Dios quia'.

5 ¿Bizx que risëbida' ládxa'a, en bizx que rō'a böniga?

Uzxöni ládxa'a-në' Xanru' Dios,
tu' huadxín dza cu'a-në' yöl-la' ba le yúbölö,

tu' náquië' Nu rusölá neda', en náquië' Dios quia'.

44

¹ Biyõn quézitu' le, Dios.

Bulu'siyõnnë' netu' xuz xtó'otu'
ca naca yugu' le zxõn benu' dza ni'te,
cate' ni' gula'cu'ë légaquië' luyú ni.

² Bulaga cazu' Li' bõnachi yugu' yõdzõ izá'a,
en bucuásu' légaquië' luyú ni.

Busaca' zi'u bõnachi izá'a na', en gurú'unu'
léguequi.

³ Biti' gula'déli'në' xuz xtó'otu' luyú ni rácasõ
quégaquië',

en biti' bulu'sölá la' cuíngacasë',
pero ben cazu' Li' lë na' len yõl-la' huáca zxõn quiu',
en lu yõl-la' zxõn que le naca cazu',
ate' bulú'u lahui ca nadxí'inu' légaquië'.

⁴ Naca cazu' Li' Dios quia', en Nu rinná be'e neda'.
Busölá bõnachi quiu', yugu' zxí'ini xi'sóë' Jacob.

⁵ Uguntu' dxin yõl-la' huáca quiu', uxícjatu' nupa
ta'dá'baga' netu',
ate' tu' zóalen cazu' netu', ucúl-latu' nupa biti' ta'lé'e
netu' dxi'a.

⁶ Biti' uzxõni ládxa'a uxiti' yaga quia',
en biti' uzxõni ládxa'a guíë tuchi' quia' para ilácalen
neda',

⁷ tu' rusölá cazu' Li' netu' lu ná'agaca nupa biti'
ta'lé'e netu' dxi'a,
en ruzõtju' nupa tu'dí'i netu'.

⁸ Cú'utica'stu' Li' yõl-la' ba,
en guíëtica'stu' Li': "Xclenu'."

⁹ Pero na'a nusán no'o netu', Dios, en bë'u lataj nu
buxicja netu'.

Bíti'rö réajlenu' bönni' queëtu' röjáquië' gudil-la.

10 Benu' ga buzxúnnajtu' lógaca nupa ta'díl-lalen netu',

ate' gula'güë' yugu' le nequi queëtu'.

11 Bë'u lataj gulútië' ziantu' ca nu rúti-gacaba' bö'cu' zxila'.

Bësilásiu' netu' ladjagaca yödzö izá'a.

12 Naca tsca bëti'u netu', en láti'do'os guzxi'u.

Biti' ca' buzi'u xibé tsca guzxi'u.

13 Bönachi yugu' dzaga yödzö queëtu' bila'lé'e lë na' benu' queëtu',

ate' tu'cá'ana netu' cá'asö, en tu'titaj netu'.

14 Benu' ga tu'didza' yudxi bönachi yugu' yödzö netu'.

Tu'tá ícjaguequi lu yöl-la' rucá'ana netu' cá'asö.

15 Yugu' dza rutuí'ida' ca raca queëtu',

en rö'a böniga lu yöl-la' rutuí'i quia',

16 tu' riyönda' nupa tu'didza' yudxi neda', en tu'cá'ana neda' cá'asö,

nupa na' biti' ta'lé'e neda' dxi'a, en tu'dí'i neda'.

17 Guca queëtu' yúgu'të lë ni sal-la' biti' nál-la ládxi'tu' Li',

en biti' nucá'anatu' didza' dzaga bënlenú' netu'.

18 Biti' ca' böaj ládxi'tu' ca réajlé'ëtu' Li',

en biti' gudá'baga'tu' le buluí'inu' netu' guntu'.

19 pero nusán na' cazu' netu' ladaj nupa nácacagaca ca yugu' böa' gui'a sínia',

en nucá'anú' netu' ga chizóa tseajtsázatu' lataj chul-la.

20 La'tu' gul-la ládxi'tu' Li', Dios queëtu',

o la'tu' guyéaj ládxi'tu' tu dios izá'a,

21 la' gáquibe'etënu' lë ni, Dios,

tu' nöz quézinu' le rizá' ládxi'tu'.

22 Tu' néquitu' quiu' Li' zóatica'sö nu guti netu'.
Nactu' ca yugu' bö'cu' zxíla'do' lo nu guti légacaba'.

23 ¡Bubán, Xan! ¿Bizx que rásitso' Li'?
¡Guyasa! ¡Biti' usán no'o netu' chadía chacanna!

24 ¿Bizx que nucachi' lo' lotu' netu'?
¿Naru' nál-la ládXu'u ca raca queëtu', en ca riguí'i
rizáca'tu'?

25 Naguíngaquië' netu' luyú.
Nadínitu' lu bëchtö yu.

26 ¡Gudáchi gácalenu' netu',
en lu yöl-la' dxi'i ladxi' quiu' busölá netu'!

45

1 Rizá' ládxa'a tu le naca dxi'a.
Ru'a didza' que le runë' bönni' rinná bë'ë.
Naca lúdxa'a ca le ruzúajlenë' bönni' nabé'ede'enë'
ru'ë didza'.

2 Nácatëru' Li' lachi ca yúgu'të bönachi.
Nabé'ede'enu' ru'u didza'.
Que lë ni na' nunë' Dios gaca dxi'a quiu' chadía
chacanna.

3 Bega' lë'u guíë tuchi' quiu', bönni' nayëpisë',
lu yöl-la' lachi quiu', en lu yöl-la' unná bë' quiu'.

4 Lu yöl-la' unná bë' quiu' idéli'nu' lu gudil-la,
ugunu' dxin le naca idútë li, en yöl-la' nöxaj ladxi',
en le naca tsahui'.

Yöl-la' huáca zxön quiu' gun ga ilá' lahui yugu' le
zxöntërö.

5 Natúchi'gacada' yaga lahui tuchi' quiu'.
Bönachi yugu' yödzö zi'tu' ta'dzö'ö lo', nupa na'
ta'díl-lalen li'.

Yugu' yaga lahui tuchi' quiu' nachöza'gaca
ládxi'do'guequi.

⁶ ¡Chadía chacanna naguixju' ga rö'u rinná bē'u,
Dios!
¡Ca naca le naca tsahui' rinná bé'enu' bönachi
quiu'!

⁷ Nadxí'inu' le naca tsahui', en biti' rilé'enu' dxi'a
le biti' nácatē.
Que lē ni na' Dios quiu' nabö cazē' li'.
Nachízirē' icja ládxi'do'o yöl-la' rudzeja ca le
nápaga ca ia'zica'rö bönachi.

⁸ Rilá' zixi lari' nacu' len zi' mirra, en zi' áloe, en
zi' casia.
Tunē' bönni' huil-la ga rudzéjanu' lu yu'u lidxu'
zxön.

⁹ Yugu' nigula zxí'inigaquiē' bönni' ta'nná bē'ē
nútsa'gacabi' bi'i nigula nacuá'abi' lidxu'.
Nigula quiu' rinná bé'enu' zuínu' cuitu' ibēla,
en náccunu le nazí'i biquitaj oro nazaca'.

¹⁰ Bē' ladxi' neda', nigúlado'.
Bē' ladxi' neda', en biyön xtídza'a.
Gul-la ladxi' bönachi yödzö quiu', en yugu' di'a dza
quiu'.

¹¹ Ní'irö sē ládxe'ē bönni' rinná bē'ē yöl-la' lachi
quiu'.
Buzóa zxibu' lahuē' tu' náquiē' xanu'.

¹² Ní'irö bönachi yödzö Tiro ila'dxín lo' nuá'gaca le
nazáca'da' le ilunna quiu'.
Yugu' bönni' ta'lé'enē' yöl-la' tsahui' ila'nábinē' li' bi
unödzu' quégaquiē'.

13 Yugu' bi'i nigula queë' bönni' rinná bē'ë
zóagacabi' lidxë', en nácatërögacabi' lachi.

Lari' nácubi' nadíalen du oro.

14 Ila' ché'ë-bi' lahuë' bönni' rinná bē'ë, nácubi' lari'
nazáca'da'.

Ila'dabi' yugu' bi'i nigula ra'bando' cúdzi'löbi',
ate' ila' ché'ë légacabi' lahuë' bönni' na' rinná bē'ë.

15 Lu yöl-la' rudzeja, en lu yöl-la' ruzi' xibé
quégacabi' ila'dxinbi',

en ila'yázabi' yu'u lidxë' bönni' na' rinná bē'ë.

16 Ila'cuá'abi' bi'i bönni' quiu' uláz quégaquië' xuz
xto'o.

Gunu' ga ila'nná bē'ëbi' idútë yödzölió.

17 Gunu' ga tsöjnégacatica'sö bönachi ca nacu' Li'.

Que lë ni na' yúgu'të bönachi ilë li' "Xclenu" yugu'
dza si' zaca.

46

1 ¡Náquië' Dios Nu run chi'i rë'u, en Nu ruzóa rë'u
tsutsu!

¡Zóatica'së' gácalenë' rë'u cate' bi raca queëru'!

2 Que lë ni na' biti' gádxiru' sal-la' izxizi idútë
yödzölió,

en ila'niti yugu' guí'a lu nísado',

3 en sal-la' chasa idxía, en tsu'u bö nísado' na',

en ila'zxizi guí'ado' tu' nözi le raca.

4 Zoa tu yegu le run ga tu'dzeja nupa nacuá' ladzë'
Dios,

ga na' rö'ö yudo' lá'ayi ga zoë' Dios nayëpisëtërë'.

5 Zoa cazë' Dios yödzö na', le catu caz initi.

Cate' ni' soa itö yu gácalenë' nupa nacuá' ni'.

6 Tadxi ta'dzöbi bönachi yugu' yödzö,

ate' ta'bö' baguí'i nupa ta'nná bē',

tu' ru'ë didza' Dios, ate' riniti luyú ni.

⁷ Xanru' nayëpisëtërë' zóalen cazë' rë'u.
Dios quégaca zxí'ini xi'sóë' Jacob rapa chi'ë rë'u.

⁸ Guli'dá ilé'eli' le nunë' Xanru'.
Buli'yú ca nusunítië' luyú ni.

⁹ Ruzóa dxië' gudil-la rácagaca idútë yödzölió.
Riguitsjë' yugu' uxiti' yaga,
en rusunítië' yugu' yaga lahui tuchi' que gudil-la.
Ruzégui'ë yugu' carreta que gudil-la tu lu guí' zxön.

¹⁰ Rnnë': "Guli'sóa dxisö, ate' guéquibe'eli' naca
caza' Dios.
Nayëpisëtëra' yugu' lu yödzö, en lu idútë yödzölió."

¹¹ Xanru' nayëpisëtërë' zóalen cazë' rë'u.
Dios quégaca zxí'ini xi'sóë' Jacob rapa chi'ë rë'u.

47

¹ ¡Lu yöl-la' rudzeja queëli' guli'capa' ná'ali',
bönachi yúgu'të yödzö!
¡Guli'cu'ë yöl-la' ba Dios, len yugu' le rúl-lalenli'!

² Ral-la' gunru' bal Xanru' Dios nayëpisëtërë'.
Náquië' Nu rinná bë' idútë yödzölió.

³ Benë' ga bidéli'ru' yugu' lu bönachi izá'a.
Benë' ga rinná be'eru' yugu' yödzö.

⁴ Guró cazë' luyú ga ni nuzóë' rë'u.
Naca tu luyú lachi quégaca zxí'ini xi'sóë' Jacob,
nupa na' nadxí'i quézinë'.

⁵ Len yöl-la' ba zxön ribenë' Dios ga rö'ë rinná bë'ë.
Le zían le tu'cödxë' cate' ribenë' Xanru' ni'.

⁶ ¡Guli'gul-la yöl-la' ba queë' Dios! ¡Guli'gul-la!
¡Guli'gul-la yöl-la' ba queë' Bönni' rinná bé'enë'
rë'u! ¡Guli'gul-la!

7 ¡Rinná bē'ē Dios idútē yōdzōlió ni!
 ¡idú ládxi'li' guli'gul-la yöl-la' ba queë'
 8 ¡Zoa cazē' Dios lataj lá'ayi queë' ga rō'ē rinná bē'ē!
 ¡Rinná bé'enē' bōnachi yúgu'tē yōdzō!
 9 Tu'dubi nupa ta'nná be'e yugu' yōdzō
 tsōzxōn len bōnachi queë' Dios queë' Abraham.
 10 ¡Nequi queë' Dios yöl-la' zxōn quégaca yúgu'tē
 yōdzō nacuá' yōdzōlió!

¡Nayēpisētērē' Lē'!

48

1 Nayēpisētērē' Xanru', ate' run bayudxi cú'uru'-
 nē' yöl-la' ba idú ládxi'ru'
 ga zoa lu yōdzō queë' Dios queëru' le zoa lu guí'a
 lá'ayi queë'.
 2 Lachi, en sibi naca guí'a lá'ayi na',
 ate' raza ládxi'gaca bōnachi idútē yōdzōlió ca naca.
 Caní naca guí'a Sión le rō'ō tsólá'alō ga za' bō
 ziaga.
 Lu yōdzō na' dē ga zoa Bōnni' Unná Bē' nayēpisē'.
 3 Rulu'ē lahui Dios sóaru' tsutsu cuitē' Lē'
 ga zoa lu yu'u lidxē'.
 4 Gula'dá'baga' nupa ta'nná bē' lu yu ni,
 en gula'bígui'ē ra' yōdzō lá'ayi na'.
 5 Cate' bila'lé'enē' yōdzō na' bulu'báinē'.
 Gula'bō'ē bōniga, en la' bulu'zxúnajtē'.
 6 Ra' yōdzō na' gula'zxíziē'.
 Gula'zaca' zī'ē ca raca queēnu nigula chizóa
 uzóanu-bi' bí'ido'.
 7 Risól-lē'ē Dios tu bō' budunu',
 le rusuniti yugu' barco zxōn que yōdzō Tarsis.
 8 Biyōnru' ca náragaca le zxōn benē' Dios,

ate' na'a rilé'e quéziru' le runë',
 lu yödzo lá'ayi queë' Dios quégaca ni'a në'ë guizxi
 yu,
 en náquië' ca' Dios queëru'.
 Tsaz naguixjë' yödzo na'.

⁹ Ga zoa lu yudo' quiu', Dios,
 röjnetu' ca naca yöl-la' dxi'i ladxi' quiu'.

¹⁰ Ca nayëpisëtëro Lo', Dios,
 ca' ta'gú'u Li' yöl-la' ba bönachi idütë yödzölió.
 Ca naca le naca tsahui' rinná bë'u.

¹¹ Ulu'dzeja bönachi nacuá' yödzo Sión.
 Ulu'zí'ínu xibé nigula zxí'ini xi'sóë' Judá
 tu' ruchi'a rusöröu' netu' ca naca le naca tsahui'.

¹² Guli'dá idú gásibi'ilö ga dë yödzo Sión,
 en buli'laba yugu' yu'u sibi tun chi'i yödzö na'.

¹³ Buli'yú ca naca zö'ö run chi'i yödzö na',
 en buli'yú ca' le nuzóagaca le tsutsu,
 para gaca quíxjöi'ili' zxí'ini xi'sóali' ca náquië' Dios
 zxön ni.

¹⁴ Tsaz náquië' Dios queëru', na'a dza, en dza si'
 zaca.
 Ulu'ínë' rë'u nöza tödi gátiru'.

49

¹ Guli'yöni lë ni, libí'ili', bönachi yúgu'të yödzö.
 Buli'zë nágalí', libí'ili', zóali' idütë yödzölió.

² Libí'ili', nayëpsëtëroli', en libí'ili', nácali' cá'asö.
 Libí'ili', dë yöl-la' tsahui' queëli', en libí'ili', nácali'
 yechi'.

³ Tsöjsá' ládxa'a ca naca le nápagaca yöl-la' réajni'i,
 en gu'a didza' le nápagaca yöl-la' raca yenni'.

⁴ Gü'i ládxa'a ca naca tu le rucudzu' didza',

en quíxjö'a ca nácagaca tsanni quinnia' lè'e bihuël-
la.

⁵ Biti' bi rádxada' cate' ridxín bi raca quia',
cate' ta'gu'ë neda' lë'ajlö bönni' tuá' dö' bití'
ta'lé'enë' neda' dxi'a.

⁶ Tu'zxöni ládxe'ë bönni' na' yöl-la' tsahui'
quégaquië',
en tun ba zxön cuíngaqië' ca nácagaca le dë
quégaquië'.

⁷ Biti' gaca huóá'uë' la' cuinsë' nitúë' bönni' na'.
Biti' gaca bi unödzejë' queë' Dios le gun ga usölë' lë',
⁸ tu' naca zxöntëro le huóá'u yöl-la' na'bán que nu
bönni',

ate' catu caz gaca nu bönni' quizzjë' ca naca,
⁹ para idéli'në' sóatica'së' ibanë',
en cabí tsázië' yeru ba ga yú'ugaquië' bönni' nati.

¹⁰ Rilé'enë' tatië' ca' bönni' ta'yéajni'inë',
en ta'nitië' tuz ca tati nupa bití' bi nözigaca, en
nupa bití' ta'yéajni'i,
ate' tu'cá'anë' yöl-la' tsahui' quégaquië' le ulu'zí'
xibé bönachi yúbölö.

¹¹ Téquinë' ila'cuá'tica'sö lídxigaquië' bönni' na',
ate' tsaz ila'cu'ë ni',
ate' ta'gu'ë lágaca xiyúgaquië' ca naca la' lágacasë'.

¹² Pero yöl-la' ba zxön napë' bönni' na' bití' gun ga
sóatica'së'.

Gati cazë' ca tátiba' böa' guixi'.

¹³ Caní naca le gaca quégaquië' bönni' tu'zxöni
ládxe'ë yöl-la' tsahui' quégaquië',
enca' quégaca zxí'ini xi'sóagaquië',
yugu' bi'i na' ta'yaza ládxi'gacabi' didza' gulu'ë
xúzgacabi' na'.

¹⁴ Ilátië' ca tátiba' bö'cu' zxila',

ate' yöl-la' guti gaca quégaquië' ca tu nu uyú bö'cu' zxila'.

Yugu' bönni' tsahui' ila'nná bé'enë' légaquië' cate' itö yu zila.

Ila'niti le guta' quégaquië', ate' ila'cuá'tica'së' lataj chul-la ga dzö'ö nupa nátigaca.

¹⁵ Huöá'u cazë' Dios yöl-la' na'bán quia' lu yöl-la' guti,

tu' ichë'ë neda' ga tsöjsóalena' Lë'.

¹⁶ Biti' gádxinu' cate' idéli'në' nu bönni' yöl-la' tsahui' zxön,

en cate' xön yöl-la' lachi que yu'u lidxë',

¹⁷ tu' cabí bi u'ë cate' gátië',

en bití tséajlen lë' yöl-la' lachi que le guta' queë'.

¹⁸ Sal-la' cate' ni' zoë' nabanë' buzí' xibé bö' naca cazë',

ate' gula'gú'u bönachi lë' yöl-la' ba cate' bidéli'në' yöl-la' tsahui' na'.

¹⁹ Tsázië' ga na' dzö'ë xuz xtá'ahuë',

en bítí'rö ilé'enë' bení'.

²⁰ Náquië' bönni' napë' yöl-la' zxön, pero riyádzjanë' yöl-la' réajni'i,

ca böa' guixi' tati cázaba'.

50

¹ Ru'ë didza' Xanru' Dios nayëpisëtërë'.

Nutubë' dërö nupa nacuá' yödzölió ga naguéla'të ga rilén gubidza ga ridxintë ga ribía.

² Lu yödzö Sión rigu'ë Dios bení'.

Napa yödzö na' yöl-la' lachi idú.

³ Zë'ë Dios queëru', en bití' soë' dxisö.

Tsöjnöru lahuë' tu guí' zxön,

ate' tsecja tu bö' budunu' idú gasibí'ilë'.

4 Ulidzë' lúzxiba xitsá', enca' luyú

cate' uchi'a usöröë' quégaca bönachi queë'.

5 Rnnë' Dios: "Guli'túbi nupa néquiguequi quez quia',

nupa na' gulunlen neda' didza' dzaga,

en bulu'lalaj rön lahua' le ben tsutsu didza' dzaga na'."

6 Naca bë' náquië' tsahui' Dios lúzxiba xitsá',

tu' uchi'a usöröë' Dios bönachi queë'.

7 Rnnë': "Buli'zë nágali', bönachi quia', ate' gu'a didza'.

Buli'zë nágali', bönachi Israel, ate' uzégua' libí'ili' didza'.

Naca caza' Dios.

Ön, naca' Dios queëli'.

8 Biti' uzégua' libí'ili' didza' ca naca le rúnnali' quia', en calëga ca nácagacaba' böa' bëdxi ruzégui'li'-ba' lahua'.

9 Biti' riquinda'-ba' bëdxi queëli',

en calëga chivo biguiú' nacuá'aba' queëli',

10 tu' néquigacaba' quia' yúgu'tëba' böa' guixi',

enca' böa'-bëdxi nacuá'aba' lu gayuá' gayuá' guí'ado'.

11 Néquigacaba' ca' quia' yúgu'tëba' böa' zoa xíligacaba',

enca' yúgu'të le zoa nabán la' guixi'.

12 La'tu' riduna' biti' guía' ca' libí'ili',

tu' nequi quia' yödzölió, enca' yúgu'të le nacuá' ni'.

13 ¿Naru' gágutsa' xipëla'gacaba' bëdxi,

o guí'jatsa' xichóngacaba' chivo?"

14 Le ral-la' unödzejali' queë' Dios naca yöl-la' rë Lë': "Xclenu"

ate' ral-la' gunli' lahuë' Dios nayëpisëtërë' ca naca
le guzxí' lu ná'ali' gunli'.

15 Rnnë' ca': "Ral-la' ulídzali' neda' cate' bi gaca
queéli'.

Gácalen caza' libí'ili', ate' gunli' neda' bal."

16 Dios rë' bönni' huía' dö', rnnë':

"¿Bizx que ru'u didza' ca ná'cagaca xibá naguixja?
¿Bizx que ru'u didza' ca naca didza' dzaga núnlena'
bö'nachi?

17 Biti' runnu' lataj usédida' li',

pero rucá'anú' cá'asö didza' ruá'a.

18 Cate' rilé'enu'-në' bönni' gubán rácalenu' lë',
en runu' tsözxön nupa ta'guitsaj xibá que yöl-la'
nutsaga na'.

19 Zóatica'su' gu'u didza' xihui',

en ru'ítica'su' didza' bití' ná'catë.

20 Zóatica'su' uzéguiú'-në' böchi' cazu',
en rudidza' yudxu' böchi'-zan cazu'.

21 Caní' benu', ate' bití' bi gunní'a',

ate' gú'quinu' naca' ca naca cazu' li',

pero na'a uzéguiá' li' didza', en ulu'a lahui le nunu'.

22 Buli'zë' ná'gali' didza' ni, núlöli' ruzóali' neda'
tsölá'alö.

Channö cabí, usunítia' libí'ili', ate' cuntú' nu gaca
usölá' libí'ili'.

23 Nu rë' neda': Xclenu', runna quia' le run neda'
bal,

ate' nu run ca rnna xtídza'a, usölá' caza' nu na'."

51

1 Dios quia', buzá' ladxi' quia' tsca naca yöl-la' dxi'i
ladxi' zxön quiu',

en tsca naca le zían le ruzá' ládxi'u quia', bugúa
yugu' le gudá'baga'a lo' Li'.

² Buguíbitica'sö neda' tsca naca dö' bi'a.

Buchi'a neda' lu dul-la' nuna'.

³ Nöz quézida' le gudá'baga'a,
en röjnétiqúi'sida' yugu' dul-la' nuna'.

⁴ Lo' Li' cazu' bena' dul-la',

en lo' Li' ca' bi'a dö'.

Naca bē' nacu' tsahui' cate' ru'u didza',
en idú dxi'a, en tsahui' nacu' cate' ruchí'a rusöröu'
queētú'.

⁵ Buyútsöca', nabága'a dö' cate' gusí lotë gulja',
en lu dul-la' zoa caza' cate' buzóanu xiná'a neda'.

⁶ Ré'ënu' soa le naca idútë li icja ládxi'do'otu'.

Guchiza icja ládxi'da'ahua' yöl-la' réajni'i.

⁷ Buchi'a neda' len le ruchí'aninu', ate' gaca' dxi'a.

Buguibi neda', ate' huóáca' zxíla'do'os.

⁸ Ben ga yönda' le naché' yöl-la' ruzí' xibé, en yöl-la'
rudzeja,

para huóáca ládxa'a lu le raca quia' tu' benu' ga
réquibe'eda' nabága'a dul-la'.

⁹ Biti' uyú' yugu' dul-la' nuna',

en busulu yúgu'të le naca dö' nabága'a.

¹⁰ Dios quia', bun dxi'a ládxi'da'ahua',

en guchiza neda' tu bö' cubi le nuzú' tsutsu.

¹¹ Biti' ucuítu' neda' ga zoa' lo' Li',

en biti' ugú' Dios Bö' Lá'ayi quiu' Nu zóalen neda'.

¹² Bunna quia' yöl-la' rudzeja que yöl-la' rusölá
quiu',

en ben ga guna' ca rnna xtídzu'u idú ládxa'a.

¹³ Ní'irö usédida' nupa ta'guitsaj xibá quiu' ca
nácagaca le ré'ënu' ilúngaca,

ate' yugu' bönni' dul-la' ulu'huécja quiu'.

14 Dios quia', benna neda' lataj cabí íbága'a xigua'.
Naca cazu' Dios, Nu rusölá neda'.

Lu yöl-la' rudzeja quia' gul-la' ca naca cazu' tsahui'.

15 Xana' Dios, gusalaj ruá'a,
ate' usiyönda' bönachi yöl-la' ba quiu'.

16 La'tu' raza ládXu'u-ba' böa'-bédxi gútitu'-ba' lo', la'
gúntea' caní.

Biti' raza ládXu'u-ba' nu böa' uzégui'tu'-ba' lo'.

17 Le rě'ëně' Dios le naca ca tu le cú'uru' lahuë'
naca bö' naca cáziru' le nõtaj nagula ladxi'.

Dios quia', biti' ucá'anu' cá'asö ládxi'do'otu'
le ruhuí'ini ladxi', en le naca nöxaj ladxi'.

18 Lu yöl-la' ruzá' ladxi' quiu' ben le naca dxi'a
quégaca bönachi yödzö Sión.

Buchisa zö'ö le run chi'i yödzö Jerusalén.

19 Ní'irö tsaza ládXu'u yugu' le cú'utu' lo' le naca idú
dxi'a,

yugu' böa' guíxi'do' gútitu'-ba' lo',
en yugu' böa'-bédxido' uzégui'tu'-ba' lo'.

Ní'irö ilútië'-ba' yugu' bédxi biguiú'do',
en ila'gu'ë-ba' lu bucugu quiu'.

52

1 ¿Bizx que run ba zXön cuinu' ni'a que dö' ru'u,
bönni' nál-la?

Zóatica'sö yöl-la' dxi'i ladxi' queë' Dios.

2 Len lúdxu'u rúnlenu' luzó'o didza' para usunítu'
bönachi.

Naca lúdxu'u, bönni' rizí' yě', ca tu guíë tuchi'.

3 Nadxí'irönu' le naca dö' ca nadxí'inu' le naca
dxi'a,

en nadxí'irönu' le cabí nácatë ca nadxí'inu' le naca
idútë li.

⁴ Nadxí'inu' yúgu'të didza' tun ditaj bönachi,
li' na', bönni' rizí' yë'ë.

⁵ Tsaz uzötaj cazë' Dios li'.

Sönë' li', en ubéajë' li' lu yu'u lidxu',
en ucuítë' li' ga nacuá' nupa nabángaca.

⁶ Yugu' bönni' tsahui' ila'lé'enë' lë ni, en iládxinë'
Dios.

Ulu'zxidxë' queë' bönni' na' rizí' yë'ë, ila'në':

⁷ “¡Buli'yútsöca! Bönni' ni bití' gú'unnë' uzxöni
ládxë'ë Dios,

pero buzxöni ládxë'ë yöl-la' tsahui' queë',
en le zían le guzé ládxë'ë le cabí bi nazaca.”

⁸ Naca' neda' ca tu yaga olivo ya'a le rö' ra' yu'u
lidxë' Dios.

Uzxöni ládxa'a yöl-la' dxi'i ladxi' queë' Dios yugu' iz
si' zaca.

⁹ Guíëtica'sa' Li': “Xclenu” tu' ben cazu' Li' ga naca
caní,
ate' guna' löza Lo' le naca dxi'a lógaca nupa
néquiguequi quez quiu'.

53

¹ Ta'zá' ládxë'ë bönni' canöz, ta'nne':

“Bití' ca' zoë' Dios.”

Nácagaquië' xihui' bönni' caní, en núngaquië' le
nácaterö xihui'.

Cuntu nu bönni' zoë' runë' le naca dxi'a.

² Ga na' zoë' Dios yehua' yubá ruyúë' gátí'tës,
en rilé'enë' bönachi nacuá' idútë yödzölió,

para inözinë' channö zoa nu réajni',
o channö zoë' nu bönni' ruí'i ládxë'ë Dios.

³ Yúgu'të bönachi sójáquië' ga yúbölö.

Yúgu'tè' nácagaquië' xihui'.
Cuntu nu zoa run le naca dxi'a, nitüë' bönni'.

⁴ ¿Naru' cabí nápagaquië' yöl-la' réajni'i bönni' na'
tu'ë dö'?
Tu'sunítië' bönachi quia' ca tu nu ragu yöta,
en biti' ca' tu'lidzë' neda'.

⁵ Tadxi ta'dzöbinë' bönni' caní, en biti' bi nuna'
quégaquië'.
Caní raca tu' rusunítië' Dios caz nupa ta'díl-lalen
libí'ili'.
Gunli' ga ulu'tuí'inë' tu' chigurú'unë' Dios
légaquië'.

⁶ Raca ládxi'ru' irúaj Sión Nu usölá bönachi Israel.
Cate' uchisa cazë' Dios bönachi queë' nadzúngaca,
ulu'dzeja xzí'ini xi'sóë' Jacob, en ulu'zí' xibé
bönachi Israel.

54

¹ Busölá neda', Dios, para gaca yöl-la' ba que Lo'.
Len yöl-la' huáca quiu' guléaj neda' tsahuí'.

² Ruzë nagu' le rulidza' Li', Dios.
Ruzë nagu' didza' ruá'a.

³ Ta'díl-lalen bönni' zi'tu' neda',
tu' té'ënë' bönni' zidzaj ilútië' neda'.
Biti' ca' tádxinë' Dios.

⁴ Buli'yútsöca', naca cazë' Dios Nu rácalen neda'.
Ruzóë' tsutsu Xanru' yöl-la' na'bán quia'.

⁵ Ubi'ë quégaca nupa ta'díl-lalen neda' le usuniti
léguequi.

Tu' runu' ca rnna xtídz'u, Dios, busuniti léguequi.

⁶ Idú ládxa'a gútia'-ba' böa'-bëdxi lo'.

Guía' Li': "Xclenu" Xan, tu' naca dxi'a Lo'.
 7 Busölá cazu' Li' neda' lu yugu' le guca quia',
 ate' rilé'eda' zeaj nanítitica'sö nupa ta'díl-lalen
 neda'.

55

1 Ruzé nagu' le rulidza' Li', Dios,
 en biti' tá'bagu' le rinábida' Li'.
 2 Ruzé nagu' neda', en rubí'u didza'.
 Rulidza yúdxida' Li', en rö'a böniga
 3 ni'a que chi'ë bönni' biti' rilé'enë' neda' dxi'a,
 en tu' tu'tsá' neda' nupa tuá' dö', en tu'saca' zi'
 neda',
 en lu yöl-la' rilé quéguequi ta'bía no neda'.
 4 Réqui zi' ládxi'da'ahua',
 ate' yöl-la' radxi que yöl-la' guti röjtsaza
 ládxi'da'ahua'.
 5 Chigula'yaza yöl-la' radxi, en yöl-la' rizzizi neda',
 ate' nabaga' yöl-la' radxi ridzöbi neda'.
 6 Gunnía': "Gaca ládxa'a gata' quia' xílaba' gu'dödo',
 para gaca töda' lu bö'ös, en idxina' tu lataj ga gaca
 uzí' ládxa'a.
 7 Raca ládxa'a tseja' zi'tu',
 en tsöjsóa' la' guixi' ga dë lataj.
 8 Uyija' carelö tu lataj ga tsöjsóa' tsutsu,
 para cabí bi gun quia' le naca ca bö' budunu'."
 9 Busuniti légaquië', Xan, en buxí ruá'agaquië',
 tu' bilé'eda' ta'dil-lë', en tu'tsatsë' lu yödzö.
 10 Rëla, en te dza ta'dödë' nöza lu yödzö.
 Tu'ë dö', en tunë' le xihui' idú gásibi'ilö yödzö.
 11 Tu'sunítië' le nacuá' ni'.
 Tu'saca' zi'ë bönachi, en ta'zí' yë'ë la' nöza que yödz.

12 Calëga bönni' biti' rilé'enë' neda' dxi'a nu
 rudidza' yudxi neda',
 tu' huáca guá' ilena' le gunë',
 en calëga bönni' rudí'inë' neda' nu ridíl-lalen neda',
 tu' huáca ucachi' cuina' lahuë',
 13 pero nacu' li', tu bönni' ca neda'.
 Nacu' böchi' luzá'a, en nacu' tuz len neda'.
 14 Lu yöl-la' dxi'i ladxi' queëru' gúcaru' tuz.
 Ladaj bönachi zían gударu', en bidxinru' lidxë'
 Dios.

15 Xana' Dios, bë' yöl-la' guti lataj idxín quégaquië'
 bagáchi'sö.
 Ben ga tsöjtsázagaquië' nabángaquië' lataj chul-la ga
 nacuá' nupa nátigaca,
 tu' yu'u le xihui' lídxigaquië', en lu yu'u ca' gapa
 tu'dubë'.

16 Pero neda' ulidza'-në' Dios,
 ate' usölá cazë' Xanru' neda'.
 17 Chi'i dzö'ölö, en zílado', en gatsaj dza ulidza
 yúdxida' Lë',
 en inné ládxa'a lahuë', ate' yön cazë' chi'a.
 18 Huöá'uë' yöl-la' na'bán quia' lu na' nupa ta'díl-
 lalen neda'
 en uzóë' neda' lataj ga cöza' dxi'a tsáhui'do',
 tu' nayánda' nupa ta'díl-lalen neda'.
 19 Huayön quézinë' Dios, en ubi'ë quégaquië'.
 Rö'ë rinná bë'tica'së' Lë'.
 Caní gunë' Dios tu' cabí tu'sanë' ca tunë',
 en biti' tádxinë' Dios.
 20 Bönni' ru'ë dö' ribía nahuë' nu riböza dxi'a
 tsáhui'do',
 en rucá'anë' cá'asö didza' dzaga nunë'.

21 Bë'ë didza' yúlado',
 pero yu'u icja ládxi'da'ahuë' yöl-la' ridzá'a.
 Bë'ë didza' zxíxido',
 pero didza' na' bë'ë gulaca ca guié tuchi'.

22 Gulú'u le nabágu'u lu në'ë Xanru', ate' utipa cazë'
 ládxi'u.
 Biti' gu'ë lataj iguínaj tsaz nu naca tsahui'.
 23 Chú'unë' bönni' tu'ë dö' na' lataj chul-la
 ga nacuá' nupa nátigaca ga na' ila'nítigaquië'.
 Biti' ila'cuá' gatsaj tsca ral-la' ila'cu'ë nabángaquië'
 bönni' tutië' bönachi,
 en bönni' ta'zí' yë'ë.

Pero neda' uzxöni ládxa'a Li'.

56

1 Buéchi' ladxi' neda', Dios, tu' ta'dá'baga' bönachi
 neda'.
 Yugu' dza nupa tu'dí'i neda' ta'bía no neda'.
 2 Yugu' dza nupa biti' ta'lé'e neda' dxi'a tuá' dö'
 quia'.
 Zián nupa ta'díl-lalen neda' lu yöl-la' run ba zxön
 cuínguequi.
 3 Cate' radxi ridzöbida', uzxöni ládxa'a Xanru'.
 4 Ruzxöni ládxa'a-në' Dios, en rigu'a yöl-la' ba
 xtídzë'ë.
 Ruzxöni ládxa'a-në', en biti' bi gádxida'.
 ¿Bizxi caz gaca ilún quia' bönachi?
 5 Yugu' dza tun nigui neda' nupa biti' ta'lé'e neda'
 dxi'a.
 Ta'zá' ládxi'tica'sö nacxi iluá' dö' quia'.

6 Tu'dubë' ga nagáchi'sö, en tu'yúlanë' yúgu'të le runa',

para gata' quégaquië' lataj ilútië' neda'.

7 Bubi'ë quégaquië', Dios, ca naca dö' tu'ë, en lu yöl-la' rilé quiu' busuniti légaquië'.

8 Nöz quézinu' Li' ca rö'a böniga.

Nurixu' Li' nisa ribödxi quia'.

¿Naru' cabí nuzú' léguequi lu guichi quiu'?

9 Cate' ulidza' Li', la' dza ná'asö ulu'huécja gúz cúdzu'lö nupa tu'dí'i neda'.

Nöz quézida' rácalen cazu' neda', Dios.

10 Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në' Xanru', en rigu'a yöl-la' ba xtídzë'ë.

11 Ruzxöni ládxa'a-në', en biti' bi gádxida'.

¿Bizxi caz gaca ilún bönachi quia'?

12 ¿Gunna' quiu', Dios yugu' le guxzí' lu na'a!

¿Cu'a Li' yöl-la' ba!

13 Busöló' neda' lu yöl-la' guti, en nuzú' neda' tsutsu.

Ridá caza' lo' Li', Xantu' Dios, lu bení ru'u quégaca nupa nabángaca.

57

1 ¿Buéchi' ladxi' neda', Dios!

¿Buéchi' ladxi' neda' tu' ruzxöni ládxa'a Li' gun chi'u neda'!

Guxóa no'o neda' ca runba' böra run chí'igacaba' bórado' zzan xílaba',

ga idxinrö tödi bönadxi raca quia'.

² Rulidza'-në' Dios nayëpisëtërë'.

Náquië' Dios Nu run ga raca dxi'a quia'.

³ Ga zoa cazë' yehua' yubá ubi'ë didza', en usölë' neda'.

Usölë' neda' lu na' nu ribía no neda'.

Lu yöl-la' dxi'i ladxi' queë', en yöl-la' idú ladxi' queë' gácalenë' neda'.

⁴ Naca quia' tsca zoa' ladjagacaba' bëdxi guixi'.

Yugu' bönni' zidzaj nagú'ugaquië' neda' lë'ajlö.

Nácagaca láyi'gaquië' ca yugu' yaga tuchi' que gudil-la,

ate' nácagaca lúdxigaquië' ca yugu' guíë tuchi'.

⁵ Dios quia', buluí'i lahui lúzxiba yöl-la' zxön quiu', en yödzülió ni buluí'i lahui yöl-la' bení' quiu'.

⁶ Nupa tu'dí'i neda' nucáchi'gaca du yalaj le sön neda'.

Rudú ládxa'a tu' rō'a böniga.

Gula'chǒ'önë' yeru ga tsöjbixa' neda',

pero gula'bixë' la' légacasë' lu yeru na'.

⁷ ¡Chinabá'a quia', Dios!

¡Chinabá'a quia'!

¡Gul-la' quiu', en cu'a Li' yöl-la' ba!

⁸ ¡Bubán, bö' naca caza'!

¡Guli'bán arpa, en bihuël-la!

¡Zílado' ubana',

⁹ en gul-la' quiu' Li', Xan, ladaj bönachi yugu' yödzü!

¡Cu'a Li' yöl-la' ba lógaca yúgu'të bönachi!

¹⁰ Zxöntëro naca yöl-la' ruhuéchi' ladxi' quiu', le ridxintë yehua' yubá,

ate' ridxintë yöl-la' idú ladxi' quiu' lúzxiba xitsá'.

11 Dios quia', bulu'í lahui lúzxiba yöl-la' zxon quiu',
en yödzölió ni bulu'í lahui yöl-la' bení' quiu'.

58

1 ¿Naru' ru'íli' didza' idútë li, libí'ili' na', rinná
bé'ëli'?

¿Naru' ruchi'a rusöröli' ca naca le naca tsahui'?

2 ¡Biti' ca! Rizá' ládxi'li' yugu' le xihui',
en rusaca' zí'ili' bönachi len yugu' le cabí nácatë
runli'.

3 Ta'dödi tsölá'alö nupa tuá' dö' ga gudéla'të
gúl'jagaca.

Ta'zí' yë' ga gudéla'të bulu'cuá'anu xiná'aguequi
léguequi.

4 Yu'u ru'iguequi le nachë' yöl-la' guti ca le dxía
láyi'gacaba' bëla s'inia'.

Nácagaca ca tuba' bëla s'inia' nacödzuba',

5 bëla na' bití' riyönba' chi'ë bönni' gudzá',
o le rul-lë' bönni' runë' gudzá'.

6 ¡Dios quia'! ¡Buzxuzxaj láyi'gaquië'!

¡Guladzu' yugu' layi' tuchi' quégaquië'

nácagaca ca layi' tuchi' quégacaba' bëdxi guixi'!

7 ¡Ben ga ila'nítië' ca raca que nisa yegu gubó'o cate'
ruhu'í!

¡Ben ga ila'cuádië' ca raca que guixi' rö'ö la' nöza!

8 ¡Ben ga ila'nítië' ca yugu' böruhuinna tu'únaba' lu
gubidza,

o ca tubi' bí'ido' nuzóanu-bi' nigula zí'alö ca ral-la'
gál'jabi', en chinátitëbi'!

9 Zí'alö ca gaca utsë'e yusu' tu guí' zxon,

ugüë' Dios légaquië' lu yöl-la' ridzá'a queë',

bönni' nabángaquië', en bönni' chizóa ilátië'.

¹⁰ Ulu'dzeja nupa nácgaca tsahui' cate' ila'lé'e
uzí' lëbë' Dios bönni' tu'ë dö' na'.

Ulu'zxinë' len ná'agaquië' xichöngaca nupa na'
tuá' dö'.

¹¹ Ila'nná bönachi: "Le nácatë zoa le rubi'ë Dios
quégaca nupa nácgaca tsahui'.

Le nácatë zoë' Dios Nu ruchi'a rusörö quégaca nupa
nacuá' yödzölió."

59

¹ Busölá neda', Dios, lu ná'agaca nupa ta'zóa regu'
neda'.

Buzóa neda' tsutsu ga biti' gaca ila'dxín nupa ta'díl-
lalen neda'.

² Busölá neda' lu ná'agaca nupa tuá' dö',
en guléaj neda' lu ná'agaca nupa tuti bönachi.

³ Buyútsöca', ta'bö' nísíë' neda' para ilútië' neda'.

Ta'zóa régu'ë bönni' zidzaj neda',
calëga tu' gudá'baga'a légaquië', o tu' ben zi'a
légaquië', Xan,

⁴ en calëga tu' bétia' bönachi, pero ta'zé'ë carelö
para tíl-lalenë' neda'.

Gudá gácalenu' neda', ate' ilé'enu' naca caní.

⁵ Xantu' Dios quégaca ni'a no'o guizxi yu,

en Dios quégaca bönachi Israel,
gudá dujenu' xiguaia' bönachi yúgu'të yödzö.

Biti' uzá' ládXu'u quégaca nupa tuá' dö' lu yöl-la' rizí'
yë' quéguequi.

⁶ Tu'dxinë' chi'i dzö'ölö, ta'bödxi yechë'ë ca runba'
bö'cu' ragu yéchi'ba' beo',
ate' ta'dödë' idú gásibi'ilö yödzö.

7 Buyútsöca', didza' tu'ë nácagaca ca le rëbigaquië'.
Nácagaca didza' tu'ë ca yugu' guié tuchi'.

Ta'nné': "¿Nuzxi caz yöni?"

8 Ruzxidxu' ca naca le tunë', Xan.

Rutitju' ca naca le tun bönachi yúgu'të yödzö.

9 Tu' nal-la cazu' Li' guna' löza Li'.

Nacu' Dios Nu run chi'i neda'.

10 Tu' náquië' Dios quia' dxi'i ladxi', dutságuië'
neda'.

Uxicja cazë' Dios nupa ta'díl-lalen neda'.

11 Biti' gútiu' nupa na' tuá' dö' para cabí ilal-la ladxi'
bönachi ladza'.

Lu yöl-la' huáca zxön quiu' bésilasi nupa tuá' dö',
en buzötaj léguequi luyú.

Naca cazu' Xantu', Nu run chi'i netu'.

12 Ben ga sön légaquië' yöl-la' run ba zxön
cuíngaquië'

tu' nözi dul-la' tunë' ca tu'isë' didza',
enca' tu' tu'dxië' dö' luzá'agaquië', en ta'zì yë'ë.

13 Lu yöl-la' rilé quiu' busuniti légaquië'.

Busuniti légaquië' tsaz para cabí ila'cuá'arë',
en para iléquibe'e bönachi Dios caz rinná bé'enë'

zxí'ini xi'sóë' Jacob,
ga ridxintë idútë yödzölió.

14 Tu'dxinë' chi'i dzö'ölö, ta'bödxi yechë'ë ca runba'
bö'cu' ragu yéchi'ba' beo',

ate' ta'dödë' idú gásibi'ilö yödzö.

15 Ta'dë' ta'guiljë' le ilahuë',

ate' ta'bödxi'ë channö cabí ulu'huölaj ulu'dzé'enë'.

16 Gul-la' neda' ca naca yöl-la' huáca zxön quiu'.

Yugu' zila gul-la' lu yöl-la' rudzeja quia' ca naca
 yöl-la' dxi'i ladxi' quiu',
 tu' naca cazu' Li' Nu run chi'i neda',
 en nacu' Nu rácalen neda' cate' bi raca quia'.

¹⁷ ¡Naca cazu' Li' Nu rutipa ládxa'a!
 ¡Gul-la' quiu' yöl-la' ba,
 tu' nacu' Li' Nu run chi'i neda', Dios, en Nu nadxí'i
 neda'!

60

¹ Nusán no'o netu', Dios, en nuzötju' netu'.
 Buécja queétu' na'a, en gúcalen netu'.
² Ben cazu' ga gudödi budó' xzu', en gualaj luyú.
 Bun luyú ni tu' chizóa iguínna.
³ Sizxöni busaca' zi'u bönachi quiu'.
 Le guca queétu' guca tsca bugui'ju' netu' xis uva
 nal-la
 le ben ga yöjchégu'tu' ca tu bönni' nazúdxinë'.
⁴ Bunödzu' quégaca nupa tadxi Li' tu lari' ulu' chisa,
 le söjácalen cate' bi raca quéguequi,
⁵ para ulu'lágaca nupa na' nadxí'i quézinu'.
 Len yöl-la' huáca zxön quiu' busölá netu', en bubí'i
 didza' cate' rulidztu' Li'.
⁶ Lu le naca lá'ayi queë' bë'ë didza' Dios, gunnë':
 "Uzi'a xibé, en quísia' xiyúgaca bönachi Siquem, en
 urixa' luyú dë cuita yegu Sucot.
⁷ Nequi quia' xiyúgaca bönachi Galaad, enca'
 xiyúgaca zxí'ini xi'sóë' Manasés.
 Naca ca tu le rusubín icja' xiyúgaca zxí'ini xi'sóë'
 Efraín.
 Xiyúgaca zxí'ini xi'sóë' Judá naca ga rinná bë'a.
⁸ Xiyúgaca bönachi Moab naca ca tu ga riguibi na'a,

ate' cu'a löla' uléaja' xiyúgaca bönachi Edom.
Cödxí'a tu' uxicja' bönachi Filistea."

⁹ ¿Nuzxi caz gaca iché' neda' lu yödzo zoa zö'ö idú
gásibi'ilö le run chi'i yödzo na'?

¿Nuzxi caz iché' neda' lu xiyúgaca bönachi Edom?

¹⁰ ¿Naru' cabí nusán ládxi'u netu', Dios?

¿Naru' cabí tséajlenu' bönni' queétu' rójáquié' gudil-
la?

¹¹ Gúcalen netu' cate' tíl-lalentu' nupa ridíl-lalen
netu',

tu' cabí gaca gácalen netu' nu naca bönáchisö.

¹² Len yöl-la' huáca queé' Dios idéli'ru'

tu' uxicja cazé' Lë' nupa ta'díl-lalen netu'.

61

¹ Ruzé nagu' le rulidza' Li', Dios.

Ruí'i ládxi'u le rinábida' Li'.

² Ga ni zoa' zi'tu' ga dë ladza' rulidza' Li' tu' rudú
ládxa'a.

Guché' neda' ga zoa Nu na' naca ca tu guiójtö'o, Nu
na' nál-latërö ca neda'.

³ Nacu' Li' Nu run chi'i neda'.

Nacu' Nu rácalen neda' cate' zoa nu ribía no neda'.

⁴ Bë' lataj sóatica'sa' ga zoa cazu' Li'.

Bë' lataj sóalena' Li', guna' neda' ca tunba' bórado'
ta'yázaba' zxañ xílaba' yöjede.

⁵ Biyön quézinu' Li' le guzxí' lu na'a guna' quiu' Li',
Dios.

Benu' ga nequi quia' le runödztu' quégaca nupa
tadxi Li'.

⁶ Gunu' ga soë' xidzé bönni' na' rinná bë'ë uláz
quiu'.

Zián iz soë' ibanë'.

7 Sóatica'sè' lo' Li', Dios.
Bè' queë' yöl-la' dxi'i ladxi', en le naca idútë li,
yugu' le ilún chi'i lë'.

8 ¡Gúl-latica'sa' yöl-la' ba que Lo',
para gaca guna' tu tu dza le guzxí' lu na'a!

62

1 ¡Tuzë' Dios ruzxöni ládxa'a, en rizë ládxa'a Lë'!
¡Lë cazë' rusölë' neda'!
2 ¡Tuzë' Lë' rapa chi'ë neda', en rusölë' neda'!
¡Ruzóë' neda' tsutsu, ate' biti' gaca nu uzötaj neda'!

3 ¿Gáca'xte caz güi'i ládxi'li' ucúl-lali' neda'?
Rë'ënisili' uzötjali' neda' ca tu zö'ö chizóa iguínnej,
o ca tu lë'aj yaga le chinatëbi.

4 Rë'ënisili' uzötjali' neda' ga ni tunë' neda' bal.
Ruzí'ili' xibé yugu' didza' biti' nácatë.
Ruí'ili' dxi'a didza' láchui'sö,
pero lu icja ládxi'do'oli' rudidza' yúdxili' neda'.

5 ¡Tuzë' Dios ruzxöni ládxa'a,
en runa' löza Lë'!
6 ¡Tuzë' Lë' rapa chi'ë neda', en rusölë' neda'!
¡Ruzóë' neda' tsutsu, ate' biti' gaca nu uzötaj neda'!
7 ¡Tuzë' Dios rusölë' neda', en runë' ga naca' bica'
ba!
¡Dios nuzóë' neda' tsutsu, en rapa chi'ë neda'!

8 Libí'ili', bönachi, buli'zxöni ládxe'ë Dios yúgu'të
dza.
Buli'siyönnë' yugu' le raca queëli', tu' run chi'i
cazë' rë'u.

9 Le nácatë nácgaca yúgutë bönachi ca tu bö
ridödisö,
en bití' bi nazáca'gaca nupa na' nadéli'gaca lataj lo.
Tu lu zxigóns bití' bi nál-lí'guequinë'.
Nácgacarë' dzá'asö ca tu bö' riguéla'siru'.

10 Bití' uzzöni ládxi'li' bi idéli'li' len yöl-la' nál-la
queézili'.

Bití' uzí'ili' xibé le cuanli'.
Channö gata' queéli' yöl-la' tsahui', bití' gü'i
ládxi'li' le.

11 Tu luzuísö bé'ë didza' Dios.
Chopa luzuí biyönda' ca naca lë ni rnna:

“Nápatërë' Dios yöl-la' huáca,

12 ate' zóatica'sö yöl-la' dxi'i ladxi' queë'.”

Ubí'i casu', Xan, quégaca bönachi tsca naca le
núngaca.

63

1 Dios, nacu' Dios quia', ate' idú ládxa'a ruguilja' Li'.
Ribidxi ládxa'a Li', ate' idútë le naca' rizë ladxi' Li'.
Zoa' tu luyú bidxi ga ni rudú ládxa'a, ate' bití' bi dë
nisa.

2 Ben ga ilé'eda' Li' lu lataj ga na' zoa casu',
para ilé'eda' yöl-la' huáca quiu', en yöl-la' bení'
quiu'.

3 Tu' nácatërö dxi'a yöl-la' dxi'i ladxi' quiu' ca yöl-la'
na'bán caz.

Que lë ni na' cu'a Li' yöl-la' ba.

4 Guía' Li': “Xclenu” tsanni ni zoa' nabana'.

Uchisa' na'a, en ulidza' Lo'.

5 Ruhüölaj rudzé'e icja ládxi'da'ahua' le nácatërö
dxi'a,

ate' lu yöl-la' rudzeja quia' rigu'a Li' yöl-la' ba.

6 Rōjneda' Li' cate' déa' lu le ráti'da'.

7 Rizá' ládxa'a ca nacu' cate' rina'sa' yēla.

Rácalen cazu' neda',
en tu' run chí'u neda', lu yöl-la' rudzeja quia' rul-la'
quiu'.

8 Nazōn cazu' Li' bö' naca caza'.

Rizōn cazu' Li' neda',

9 pero ila'yaza lataj chul-la
nupa té'ēni iluti neda'.

10 Ilátigaca lu guié tuchi'.

Ilágugaca bö'cu' zuga' léguequi.

11 Nu rinná bē' uláz queē' Xanru' udzeja ladxi'
lahuē' Dios.

Ulu'zí' xibé yúgu'tē nupa tu'zxōni ladxi' Lē',
tu' usayaj cazē' Lē' ruí'igaca nupa ta'zí' yē'.

64

1 Dios, buzē nagu' chí'a le rinabi yúdxida' Li',
para gun chí'u yöl-la' na'bán quia' tu' rádxida' bi
gun nu ridíl-lalen neda'.

2 Bucachi' neda' para cabí bi ilún quia' bagáchi'sō
nupa tuá' dō',

en para cabí ila'bía di'ē neda' bönni' tutiē bōnachi.

3 Nácagaca lúdxigaquiē' ca yugu' guié tuchi',
ate' nácagaca didza' zi' tu'ē ca yugu' yaga lahui
tuchi'.

4 Bagáchi'sō tu'zé yugu' yaga lahui tuchi' na'
para ilunē' huē' nupa bití' bi nabága'gaca.

Tsálido'os tu'zé léguequi, en bití' bi tádxinē'.

5 Bití' ca' tu'cá'anē' le naca dō' té'ēnē' ilunē'.

Tu'ē didza' ca gaca ulu'cáché'ē yugu' du yalaj
quégaquiē', ta'nnē':

“¿Nuzxí caz gaca ilé'e yugu' du na'?”

6 Tunë' didza' ca naca le naca dö' ilunë', ta'nnë':
 “Chinabá'a le gunru'.”

Tu'cáchi'gaquië' le ta'zá' ládxe'ë, en le ta'bequi icjë'.

7 Uzal-lë' Dios tu yaga lahui tuchi' le ideli' légaquië'.
 Tsálido'os gunë' légaquië' huë'.

8 La' didza' tu'isë' ilún ga tseajchégu'gaquië'.

Lu yöl-la' rubani quéguequi ulu'tá ícjaguequi nupa
 ila'lé'e légaquië'.

9 Ní'irö yúgu'të bönachi iladxi Dios,
 en ulu'siyön luzë'eguequi ca naca le nunë' Dios,
 en ila'zá' ládxi gaca ca naca lë na' nunë'.

10 Nu bönni' tsahui' uzi'ë xibë' Xanru', en gunë' löza
 Lë'.

Yúgu'të nupa nácagaca idú ladxi' ulu'zí' xibë'.

65

1 Dios, nupa nacua' yödzö Siön ila'gú'u Li' yöl-la' ba,
 en ilunna quiu' le gula'zí' lu në'eguequi,

2 tu' riyön quézinu' Li' cate' tu'lidza Li',
 ate' yúgu'të bönachi ila'dxín lo'.

3 Tun nigui neda' dul-la' nuna',
 pero runiti lo cazu' netu' ca naca le ridá'baga'tu'
 Li'.

4 Bica' ba nupa nabö cazu' quiu', en nulidzu' quiu',
 para ila'cuá' yugu' lataj lá'ayi quiu'.
 Huölaj udzé'etu' le nácagaca dxi'a yú'ugaca lidxu',
 enca' le yú'ugaca yudo' lá'ayi quiu'.

5 Tu' nacu' tsahui' rubi'u didza', en runu' yugu' le
 zxön le tácalen netu'.

Naca cazu' Dios Nu rusölá netu'.
 Nupa nacua' idútë yödzölió ulu'zxöni ladxi' Li',
 enca' nupa nacua' zi'tu' ia'tsölá'alö nísado'.

6 Len yöl-la' huáca quiu' nucú'u yugu' guí'a zxön,

le naca bé'gaca nál-latërö cazu' Li'.

⁷ Ruzóa dxíu' le riyasa ridxía lu nísado', en le ru'u bö que.

Ruzóa dxíu' bönachi cate' tu'tsatsa.

⁸ Bönachi idútë yödzölió tadxi Li' ni'a quégaca le zxön nunu'.

Le run cazu' Li' tun ga tu'dzeja bönachi idapa la'a yödzölió.

⁹ Ruí'i ládXu'u luyú, en risöl-lu'u nisa guiøj.

Runu' ga ruhuöáca yu ya'a.

Nucú'u luyú na' yugu' yegu yúdzugaca nisa zila, le run ga dética'sö zxa'-za, tu' caní raza ládXu'u Li'.

¹⁰ Risöl-lu'u nisa guiøj gapa dégaca na, en rusubisu' gapa chinadúz.

Ruúnu' yúludo' luyú zidzaj, en runu' ga ta'gula guixi' cuando'.

¹¹ Runu' ga rulá' yödx yana' le nadúz luyú ni tu iz tu iz,

en ga zóatica'sö le ilë'aj ilágugaca bönachi.

¹² Nacuá'aba' böa'-bëdxi la' guixi', ate' tu'dzeja bönachi yugu' lu guí'ado'.

¹³ Gapa naca lachi' nacué'aba' bö'cu' zxila', ate' dxíada' zxa' xtila la' yëla.

Lu yöl-la' rudzeja quéguequi ta'bödxí'a, en tul-la bönachi quiu'.

66

¹ ¡Guli'güi' zidzaj didza' lahuë' Dios lu yöl-la' rudzeja queëli' yúgu'tëli' zóali' yödzölió!

² ¡Guli'gul-la ca naca yöl-la' ba que Lë'!
¡Guli'cu'ë yöl-la' ba!

³ Guli'guië' Dios: "¡Zxöntërö nácagaca le nunu'

tu' naca zxöntөрө yöl-la' huáca quiu'!"
 Nupa biti' ta'lé'e Li' dxi'a ulu'luí'i cuini
 ca nupa tun ca rnna xtídz'u.

⁴Yúgu'tè nupa nacuá' yödzölió ilún Li' zxön,
 en ilúl-la yöl-la' ba quiu'.
 Ilúl-la yöl-la' ba que Lo'.

⁵Guli'dá ilé'eli' yugu' le nunë' Dios.
 Nayëpisëtërë' Dios lu le runë' quégaca bönachi.

⁶Benë' ga böáca ca luyú bidxi ga dë nísado'.
 Gula'dödë' gatsaj láhui'lö yegu, ta'zë'esö
 ní'agaquië'.

Ni' udzëjade'eru' ca náquië' Lë'.

⁷Len yöl-la' unná bë' queë' rinná bë'tica'së'.

Ruyútica'së' bönachi yúgu'tè yödzö.

Biti' ral-la' ilún ba zxön cuínguequi nupa ta'dá'baga'
 xtídzë'ë.

⁸¡Guli'gún zxönë' Dios queëtu', libí'ili' bönachi
 yúgu'tè yödzö,

en guli'cu'ë yöl-la' ba gáti'tës!

⁹¡Run cazë' Lë' ga zóaru' nabanru',

en biti' ru'ë lataj cuila ní'atu'!

¹⁰Guzxí' bë' cazu' netu', Dios.

Buchi'u netu' ca run nu ruchi'a guíë plata lu guí'.

¹¹Bë'u lataj bidzuntu' lu du yalaj.

Busubágu'u netu' tu yua' zi'i.

¹²Benu' ga gula'libë' icjtu' bönni' dxíagaquië'-ba'
 böa'.

Gudöditu' lu guí', en lu nisa,

pero guchë' cazu' netu' tu lataj ga böläj budzé'etu'.

13 Tsu'a lidxu', en cu'a-ba' lo' böa'do' uzégui'a-ba' lo'.

Guna' lo' Li' le guzxí' lu na'a guna',

14 lë na' bë'a didza' que,

le gunniá' cate' ni' riguí'i rizáca'a.

15 Cu'a-ba' lo' Li' böa'-bëdxi renni' uzégui'a-ba' lo', tsözxön len dzön quégacaba' chivo biguiú'.

Gútia'-ba' lo' yugu' bëdxi, en yugu' chivo biguiú'.

16 Guli'dá uzë nágali', yúgu'tëli' rádxili'-në' Dios, ate' usiyönda' libí'ili' yugu' le benë' le gulácalen neda'.

17 Len ruá' cuinsa' bulidza' Lë',

en bena' Lë' zxon len lúdxá'a.

18 Channö rucácha'a le naca dö' lu ládxi'da'ahua', bití' yönnë' Xanru' Dios didza' gu'a,

19 pero le nácatë biyönnë' Dios didza' bë'a.

Buzë naguë' cate' bulidza' Lë'.

20 ¡Yöl-la' ba Dios!

¡Bití' gudá'baguë'ë neda' cate' bulidza'-në',

en bití' bugúë' yöl-la' nadxí'i queë' neda'!

67

1 Xantu' Dios, buzá' ladxi' queëtu', en ben ga gaca dxi'a queëtu'.

Lu yöl-la' dxi'i ladxi' quiu' buyú netu',

2 para gaca bë' le ré'ënu' guntu' yödzölió ni,

en para ila'nözi bönachi yúgu'të yödzö ca naca yöl-la' rusölá quiu'.

3 Ral-la' ila'gú'u bönachi Li' yöl-la' ba, Dios.

Yúgu'të bönachi ral-la' ila'gú'u Li' yöl-la' ba.

4 Ral-la' ulu'dzeja bönachi yúgu'të yödzö,

en ilúl-la lu yöl-la' rudzeja quéguequi.
 Tu' uchi'a usöröu' bönachi ca naca le naca tsahui',
⁵ral-la' ila'gú'u Li' yöl-la' ba bönachi, Dios.
 Yúgu'të bönachi ral-la' ila'gú'u Li' yöl-la' ba.

⁶Yödxí yana' runödzej luyú ni.
 Dios queëru' runë' ga raca dxi'a queëru'.
⁷Runë' Dios ga raca dxi'a queëru',
 para iladxi Lë' yúgu'të nupa nacuá' yödzölió.

68

¹Raca ládxi'ru' chasë' Dios, en usulásië' nupa ta'díl-
 lalen Lë',
 en gunë' ga ulu'zxunnaj nupa bití' ta'lé'e Lë' dxi'a.
²Ca rulaga tu bö' recja dzön, ca' bulaga léguequi.

Ca na' ruúna' lu guí' quízxi'ba' buz,
 ca' ila'niti nupa tuá' dö' lahuë' Dios.
³Ulu'dzeja nupa nácgaca tsahui', en ulu'zí' xibë'
 Dios.
 Lu yöl-la' rudzeja quéguequi ulu'zí' xibë'.

⁴¡Guli'gul-la queë' Dios!
 ¡Guli'gul-la yöl-la' ba que Lë'!
 Bulí'pá'a nöza ga tödë' gapa dë lataj.
 ¡Nazí'i lë' Xanru'!
 ¡Bulí'dzeja lahuë' Lë'!

⁵Náquië' ca xúzgacabi' bi'i uzëbido',
 enca' Nu ruchi'a rusörö quégacanu nigula uzëbi.
 Caní náquië' Dios ga na' zoë' lataj lá'ayi queë'.
⁶Rucu'ë Dios nupa nagá'anagaca bayechi' tu yu'u.
 Rubéajë' nupa nadzúngaca, en runë' ga raca dxi'a
 quéguequi,

pero ulu' gá'ana tu luyú bidxi nupa ta'dá'baga' Lë'.

⁷ Yöjnöru cazu' lógaca bönachi quiu', Dios,
cate' guchë'u léguequi la' guixi' ga na' dë lataj.

⁸ Gudödi budó' zxu' dza ni'.

Lësca' gula guiöjsiu' lahuë' Dios.

Guzzizi guí'a Sinaí lahuë' Dios quégaca bönachi
Israel.

⁹ Benu' ga gulaj guiöjsiu', Dios.

Benu' ga böáca ya'a xiyú' ga ni' guca yu bidxi.

¹⁰ Yöjcuá' nupa néquiguequi quiu' luyú na'.

Lu yöl-la' dxi'i ladxi' quiu', Dios,

bucözu' le gácalen nupa nácagaca yechi' luyú na'.

¹¹ Bë' cazë' didza' Xanru' Dios.

Ta'guísinu nigula zían didza' dxi'a queë', ta'nnanu:

¹² "¡Ta'zxúnnajë'! ¡Ta'zxúnnajë' bönni' ta'nná bë'ë,
enca' bönni' röjáquië' gudil-la guizxi yu
quégaquië'!"

Nigula gula'bözanu lídxigacanu bulu'zí'inu xibé le
gutá' quégaquië'.

¹³ Sal-la' bucachi' loli' gapa tun chí'ili' bö'cu' zxila',
gáculi' le naca lachi ca nácagacaba' gu'dödo'
néquiguequiniba' guíë plata,

en xitúbigacaba' néquiguequini guíë oro.

¹⁴ Cate' bësilásië' Dios bönni' na' gula'nná bë'ë lu
guí'a Salmón,

benë' ga gula guiöj bögui' lu guí'a na'.

¹⁵ Nequi queë' Dios guí'a Basán.

Naca guí'a Basán na' tu guí'a zxön.

¹⁶ ¿Bizx que ruzxé'eli', yugu' guí'a zxön?

¿Bizx que ruzxé'eli' guí'a na' guzë lãdxë'ë Dios
tsöjsóë' ga na'?

Le nácatë tsaz soë' Dios ni'.

17 Gayuá', en gayuá' nácagaca carreta que gudil-la
queë' Dios.

Rizë'ë Xanru' lu guí'a Sinaí ga na' tseajtsazië' lataj
lá'ayi queë'.

18 Buëpu' yehua' yubá richë'u bönachi zían
gula'dzúngaca.

Nu'u yugu' le bulu'nödzej bönachi quiu',
en le gulunna quiu' nupa ta'dá'baga' Li',
para tsöjsóë' Dios ni' tsaz.

19 ¡Yöl-la' ba Dios, Nu ruá' sua'ru' tu dza tu dza!

¡Náquië' Dios Nu rusölá rë'u!

20 ¡Dios queëru' rusölë' rë'u!

¡Rusölë' Xanru' Dios rë'u lu yöl-la' guti!

21 Le nácatë Dios udxíë' huë' ícjagaca nupa
ta'dá'baga' Lë'.

Udxíë' huë' icjë' bönni' biti' gusanë' ca naca dö'
ru'ë.

22 Ru'ë didza' Xanru', rnnë': "Ubéaja' léguequi lu
guí'a Basán,

en ubéaja' léguequi lu nísado',

23 ate' ulíbili' léguequi ga idxintë irúaj rön quéguequi,
ate' ilë'ajba' zxículi' xichöngaca nupa ta'dil-lalen
libí'ili'."

24 Ta'lé'e yúgu'të bönachi nupa ta'dalen Li', Dios.

Lu yöl-la' run Li' zxön ta'dá lu lataj lá'ayi quiu', Dios
quia', Nu rinná be'e neda'.

25 Nupa tul-la, en nupa ta'guínnaj lë'egaca bihuël-la, ta'dá ni',
ate' bi'i nigula ra'bando' tunbi' léguequi tsözxön,
ta'gápabi' lë'egaca guídido'.

26 Buli'lidzë' Dios dxi'a tsáhui'do' gapa na' rudúbili' queë',
tu' náquië' Xanru', libí'ili' xzí'ini xi'sóë' Israel.

27 Nacu'ë xzí'ini xi'sóë' Benjamín ga na', bönni' gúcarë' cuidi', ate' ta'nná bë'ë.
Bönni' lo quégaquië' xzí'ini xi'sóë' Judá nútsa'gaquië' ladjagaquië',
enca' ladjagaquië' bönni' lo quégaquië' xzí'ini xi'sóë' Zabulón, en Neftalí.

28 Bulu'íi lahui yöl-la' huáca quiu', Dios.
Bulu'íi lahui yöl-la' huáca quiu', Dios, tu' chibenu' zían le gulácalen netu'.

29 Tu' dë yudo' quiu' lu yödzö Jerusalén,
bönni' ta'nná bë'ë ila'ché'ë ni' le ilunnë' quiu'.

30 Buzé le bach bönachi yödzö na' náçagaca ca böa' guixi',
enca' bönachi yugu' yödzö náçagaca ca yugu' bëdxi tsözxön len xzí'iniguequi.

Tu'libi bönachi yechi' tu' ta'zé ladxí'gaca dumí.
Bësilási nupa na' ta'yaza ladxi' röjaca gudil-la.

31 Bönni' gubáz quégaca bönachi Egipto ila'dxinë' lo'.

Bönni' Etiopía ila'chisa ná'agaquië' lo', Dios.

32 ¡Guli'gul-la queë' Dios, bönachi yúgu'të yödzö!
¡Guli'gul-la yöl-la' ba queë' Xanru'!

33 Rö'ë yehua' yubá xitsá'tërö, le zoa caz dza ni'te.
Buli'yútsöca', ru'ë zidzaj didza', en naca chi'ë ca
guziú' rinnë.

34 ¡Guli'gún zxönë' Dios!

Yöl-la' nayëpisë queë' rusubaga' bönachi Israel.
Yöl-la' huáca zxön queë' nalá' lúzxiba xitsá'.

35 Rubániru' ca nacu' Li', Dios, lu lataj lá'ayi quiu'.
Runnu' quégaca bönachi quiu' yöl-la' nal-la, en yöl-
la' huáca.

Náquië' Dios quégaca bönachi Israel.
¡Yöl-la' ba Lë' Xanru' Dios!

69

1 Busölá neda', Xana' Dios,
tu' raca quia' tsca nabága'a nisa ga ridxintë
ruchicja' nisa.

2 Raca quia' tsca ruhuötja' ga rë' lu guna', en biti'
zoa ga gaca uliba'.

Zoa' ca tu lu nisa zila, en chizóa uchicja' nisa.

3 Rudú ládxa'a tu' rulidza' nu gácalen neda', ate' da'
lubá'a.

Chirichul-la guiöj lahua' tu' ruyúa' ga guídu'
dusöló' neda'.

4 Nayántërö ca guitsa' icja' nupa biti' ta'lé'e neda'
dxi'a,

en biti' bi nuna' quéguequi.

Nál-lagaca nupa ta'díl-lalen neda', en tē'ëni iluti
neda',

en biti' bi nuna' quéguequi.

Tunë' bayúdx ubi'a dumí le cabí gulana'.

⁵ Nöz quézinu' Li', Dios, yöl-la' canöz quia',
en bití' nagachi' lo' Li' dul-la' nuna'.

⁶ Bití' gu'u lataj nupa tu'zxöni ladxi' Li' ulu'tuí'i ni'a
quia' neda',

Xana' Dios nayëpisëtëru'.

Bití' gu'u lataj nupa tun Li' zxön ila'gá'ana cá'asö
ni'a quia',

Dios quégaca bönachi Israel.

⁷ Tu' nadxí'ida' Li' tu'lidza ditjë' neda',
en que lë ni na' rutuí'ida'.

⁸ Naca' ca tu bönni' zi'tu' lógacabi' bi'i böcha'a,
en ca tu bönni' zi'tu' lógaquië' di'a dza quia'.

⁹ Tu' ruí'i ládxa'a yudo' quiu' régui rilá
ládxi'da'ahua'.

Naca ca tu'lidza ditaj neda' nupa tu'lidza ditaj Li'.

¹⁰ Ruzötaj cuina', en runa' gubasa,
en que lë ni na' tu'didza' yudxi neda'.

¹¹ Rácu'a' lari' cá'asö ca run nu ribödxi yechi',
ate' tu'titaj neda'.

¹² Ta'nnë' quia' yugu' la' nöza,
ate' nupa nazúdxigaca tul-la ca naca quia',

¹³ pero neda' ulidza' Li', Xan.

Bubí'i didza', Dios, cate' idxín dza raza ládxu'u Li'
tu' nadxí'ide'enu' neda',
en tu' guzxí' lu no'o usóló' neda'.

¹⁴ Guléaj neda' para cabí huötja' lu le naca ca guna'.

Ben ga ulá' lu ná'agaca nupa ta'díl-lalen neda',
en lu le naca ca nisa zila le chizóa ibaga' neda'.

¹⁵ Bití' gu'u lataj ibaga' neda' lë na'.

Bití' gu'u lataj uchicja' lu le naca ca nísado',
enca' cabí huötja' tu lu yeru ba.

¹⁶ Bubí'i didza', Xan, tu' nacu' dxi'i ladxi',

en tu' ruhuéchi' ládXu'u neda', gudá quia'.

17 Biti' ucachi' cuinu' lahua' neda', huen dxin quiu'.

¡Rö'a bö'niga! ¡Gudáchi gúcalen neda'!

18 ¡Gudá ga zoa' dusöló' neda'!

¡Ben ga ulá' lu ná'agaca nupa ta'díl-lalen neda'!

19 Nöz quézinu' Li' ca tu'didza' yudxi neda',
en ca tu'lidza ditaj neda', en tu'cá'ana neda' cá'asö.
Rilé'e quézinu' yúgu'të nupa bití' ta'lé'e neda' dxi'a.

20 Rudú ládxa'a tu' tu'didza' yudxi neda', en bití' bi
gaca guna'.

Gulöza' nu huéchi' ladxi' neda', pero cuntú nu
guzóa.

Gú'unida' nu huë tsahui' neda', pero cuntú nu
bidzöli.

21 Cate' guduna' bulu'gahuë' neda' tu le silá',
en cate' gubidxa' nisa, bulu'gui'jë' neda' nupe zi.

22 Ben ga huöáca laní quégaquië' ca tu le sön
légaquië',
en ben ga huöáca le tu'zi'ë xibé ca tu le gun ga
ila'chixi ila'níguinë'.

23 Ben ga ichul-la guiöj lógaquië' para cabirö
ila'lé'enë'.

Ben ga ila'zéchutica'sö cúdzu'gaquië' zxañ yua'
nuá'gaquië'.

24 Busubaga' légaquië' lu yöl-la' rilé quiu',
en bë' quégaquië' yöl-la' ridzá'a quiu'.

25 Ben ga cuntú nu soa ládzagaquië',
en ga bíti'rö nu soa lu yu'u lídxigaquië'.

26 Ta'zóa régu'ë nupa na' benu' léguequi xigua'.

Tu'siyönnë' ca ta'guí'i ta'zaca' nupa na' nunu'
léguequi huë'.

27 Buzúaj lu guichi yugu' dul-la' tunë',
en biti' gu'u légaquië' lataj ila'déli'në' yöl-la' rusölá
quiu'.

28 Busulu lágaquië' nazúajgaca lu guichi quégaca
nupa nabángaca.

Biti' gu'u légaquië' lataj ila'bábalenë' nupa nácgaca
tsahui'.

29 Neda' riguí'i rizáca'a, en rudú ládxa'a.
Guchisa neda', Dios, en busölá neda'.

30 ¡Cu'a-në' yöl-la' ba Dios len tu le gul-la'!
¡Guna' Lë' zxön, en guía'-në': "Xclenu"!

31 Chaza ládxe'ë Xanru' Dios lë ni
ca raza ládxe'ë-ba' böa'-bëdxi rútia'-ba' lahuë',
o ca raza ládxe'ë-ba' tuba' bëdxi zxön chinagúlaba'.

32 Nupa ta'guí'i ta'zaca' ila'lé'eni lë ni, en ulu'dzeja.
Ila'dipa ládxi'gaca nupa tu'guilaj Dios.

33 Ruzé naguë' Xanru' Dios nupa ta'yadzaj
ta'yudxi,
en biti' ral-la ládxe'ë bönachi queë' nadzúngaca.

34 ¡Guli'cu'ë yöl-la' ba Dios, libí'ili' yehua' yubá, en
luyú ni,
enca' nísado', en yúgu'të le nacua' tu tu lataj na'!

35 Usölá cazë' Dios bönachi Sión,
en uchisë' yugu' yödzö quégaca zxí'ini xi'sóë' Judá.
Ila'cuá' bönachi queë' ga na', ate' guequi quéguequi
luyú na'.

36 Zxí'ini xi'sóagaquië' huen xichinë' ila'zí'ibi' luyú
na',

ate' ila'cuá'tica'sö ni' nupa nadxí'igaca Lë'.

70

¹ ¡Busölä neda', Dios!

¡Gudáchi gácalenu' neda', Xan!

² Ben ga ulu'tuí'i, en ila'bö' böniga nupa na' té'ëni
iluti neda'.

Ben ga ulu'huécja, en ulu'gá'ana cá'asö nupa na'
té'ëni gaca bi gaca quia'.

³ Ben ga ulu'huécja lu yöl-la' rutuí'i quéguequi
nupa na' tu'titaj neda', ta'nná: "Ja, ja."

⁴ Ben ga ulu'dzeja, en ulu'zí' xibó' yúgu'të nupa
tu'guilaj Li'.

Ben ga iluí'itica'sö didza' nupa ta'dxí'i yöl-la' rusölä
quiú', ila'nná:

"¡Zxöntëro náquië' Dios!"

⁵ Neda' nacuídi'da', en biti' bi gaca guna'.

¡Gudáchi gácalenu' neda', Dios!

Nacu' Nu rácalen neda', en Nu rusölä neda'.

¡Biti' ca' tsenu' guídu' quia', Xan!

71

¹ Nuzóa casu' neda' dxi'a tsáhui'do' ga na' zu', Xan.

¡Biti' gu'u lataj utuí'ida'!

² ¡Tu' nacu' tsahui' gúcalen neda', en busölä neda'!

¡Buzë nagu' neda', en busölä neda'!

³ Nacu' le uzóa neda' tsutsu,
en le gun chi'i neda' ga gaca ucachi' cuina'.

Chigunná bé'enu' nu usölä neda' tu' nacu' Nu
ruzóa neda' tsutsu,

en Nu run chi'i neda'.

⁴ Dios quia', busölä neda' lu na' nu ruá' dö',
en lu na' nu ridá'baga' Li', en run dzatsa.

⁵ Tuzu' Li' runa' löza, Xan.

Ruzxöni ládxa'a Li' ga gudéla'të naca' bí'ido'.

⁶ Ruzxöni ládxa'a Li' ga gudéla'të gulja',

tu' guzóalen cazu' neda' cate' ni' buzóanu xiná'a
neda'.

¡Cú'utica'sa' Li' yöl-la' ba!

⁷ Zián nupa tu'bani ca naca quia',

tu' run chi'i cazu' Li' neda'.

⁸ ¡Rigú'utica'sa' Li' yöl-la' ba,

en tu dza tu dza rulu'a lahui yöl-la' ba quiu'!

⁹ ¡Biti' usán no'o neda' na'a, ni naca' bönni' gula!

¡Biti' ucá'anu' neda' na'a cate' ni rudú ládxa'a!

¹⁰ Tuí'i didza' nupa biti' ta'lé'e neda' dxi'a ca gaca
bi ilún quia',

ate' tun tuz xtídza'gaca nupa tē'ëni iluti neda'.

¹¹ Ta'nná: "¡Nusán nē'ë Dios lē'!

¡Guli'dá sönru'-nē' tu' cuntu nu zoa gácalen lē'!"

¹² ¡Dios, biti' su' zi'tu' ga ni zoa'!

¡Dios quia', gudáchi gácalenu' neda'!

¹³ Ben ga ulu'tuí'i, en ila'niti nupa tē'ëni iluti neda'.

Ben ga ulu'tuí'inē', en ila'bö'ë böniga bönni' tē'ënē'
ilu'ë dö' quia'.

¹⁴ ¡Neda' gúntica'sa' löza Li',

en cú'utica'sa' Li' yöl-la' ba!

¹⁵ Idú dza usiyönda' bönachi nacu' tsahui',

en rusöló' yúgu'të bönachi.

Biti' nözda' bal-laxi luzuí busöló' neda'.

¹⁶ ¡Gu'a didza' ca nácagaca le zxön benu' Li', Xana'
Dios!

¡Usiyönda' bönachi tuzu' Li' nacu' tsahui'!

17 Dios, rusédinu' neda' ga gudéla'tè ni' naca' bí'ido',
ate' ga ridxintè na'a dza ruá'a didza' ca nácagaca le
zxön nunu'.

18 Na'a naca' bönni' gula, en chinagucha'.

¡Biti' usán no'o neda', Dios!

Benna neda' lataj usiyönda' yugu' zxí'ini xsoa' ca
naca yöl-la' huáca quiu',
ate' quíxjöi'ida' nupa ilalaj ca naca yöl-la' nál-la
quiu'.

19 ¡Le tsahui' nacu', Dios, ridxintè lúzxiba!

¡Nunu' Li' yugu' le zxöntërö!

¡Cúnturö nu zoa nu naca ca nacu' Li', Dios!

20 Gusöl-la' cazu' quia' yugu' le guca quia' le gulún
neda' zi',

pero ruúnu' neda' tsutsu,

en le yúbölö uchisu' neda' para cabí gátia'.

21 Gunu' ga tsépisea',

en huë tsahú'u neda' le yúbölö.

22 ¡Le nácate cu'a Li' yöl-la' ba, en gul-la' tu bihuël-la,
Dios!

¡Gul-la' ca runu' ca rnno', en nacu' Nu naca lá'ayi
lógaca bönachi Israel!

23 ¡Lu yöl-la' rudzeja quia' cödxi'a cate' gul-la' quiu',
en idú ládxa'a gul-la' tu' busöló' neda'!

24 ¡Idú dza gu'a didza' ca nacu' tsahui'!

¡Tu'tuí'i, en ta'bö' baguí'i nupa gulë'ëni iluá' dö
quia'!

72

1 Dios, buzéajni'inè' bönni' rinná bē'ë

para gaca uchi'a usöröë' ca ruchí'a rusöröu' Li'.

Ben ga ilácagacabi' tsahui' zxi'iné' ca nacu' Li' tsahui'.

² Bě'ě lataj uchi'a usöröë' quégaca bönachi quiu' ca naca le naca tsahui', enca' quégaca bönachi quiu' ta'guí'i ta'zaca'.

³ Ben ga ila'cuá' dxi'a tsáhui'do' bönachi quiu' yugu' lu guí'a, en ilácagaca tsahui' yugu' lu guí'ado'.

⁴ Bě'ě lataj ubéajě' tsahui' nupa ta'guí'i ta'zaca' ladaj bönachi quiu', en usölě' yugu' zxi'inigaca nupa ta'yadzaj ta'yudxi, en ucul-lě' nu ribía no léguequi.

⁵ Ben ga iladxi bönachi quiu' Li' tsanni ni' soa gubidza, enca' tsanni ni' soa beo' ga idxintě dza udxi.

⁶ Ben ga gáquiě' bönni' rinná bě'ě ca nisa guióǰ ribixi lu guíxi'do', en ca yugu' guióǰ gúpa'do' tu'subisa luyú.

⁷ Ben ga gaca dxi'a quégaca nupa nácagaca dxi'a yugu' dza inná bě'ě lě', en ila'cuá' dxi'a tsáhui'do' ga idxintě bíti'rö soa beo'.

⁸ Ben ga inná bě'ě idapa la'a yödzölió, ga naguela' ra' yegu Eufrates ga idxintě idútě luyú.

⁹ Ben ga ulu'zechu zxi'bigaca lahuě' lě' nupa nacuá' luyú bidxi, en iladxi lě' nupa ta'díl-lalen lě'.

¹⁰ Ben ga ila'dxině' lahuě' bönni' ta'nná bě'ě luyú Tarsis en yugu' lu yödzö, nuá'gaquiě' yugu' le ulu'nödzjě' queě'. Bönni' ta'nná bě'ě luyú Sabá, en luyú Seba ilá'dxině' bi ulu'nödzjě' queě'.

11 Ben ga ulu'zechu zxíbigaquië' lahuë' yúgu'të
bönni' ta'nná bē'ë,
en ilúngaca xichinë' bönachi yúgu'të yödzo.

12 Usölé' nu riyadzaj riyudxi cate' ulidza lē',
enca' nu riguí'i rizaca', en nu bití' zoa nu gácalen
nu ná'.

13 Huéchi' ládxe'ë nupa nácgaca yechi', en nupa
ta'yadzaj ta'yudxi,
en gun chí'ë yöl-la' na'bán quégaca nupa nácgaca
yechi'.

14 Usölé' léguequi lu ná'agaca nupa tun léguequi zi',
en lu ná'agaca nupa tuá' dö',
en güi'i ládxe'ë léguequi cate' nu guë'ëni guti
léguequi.

15 Soë' ibanë', ate' iluá'gaca bönachi queë' oro que
lu xiyúgaca bönachi Sabá.

Ben ga ulu'lidza Dios bönachi, ila'nábitica'sö Li'
gácalenu' lē'.

Ben ga ulu'lidza lē' dxi'a tsáhui'do' idú dza.

16 Ben ga unödzejada' zxoá' luyú queë', enca' yugu'
lu guí'ado',

le unödzej yödxi yana' xiyúë' ca run guí'a Líbano.

Ben ga ila'yán nupa nacuá' ladzë' ca rö'ö guíxi'do'
lu xiyúë'.

17 Ben ga tsöjnégaca le lē' ga idxintë dza udxi.

Ben ga gaca yöl-la' ba que lē' tsanni ni' soa gubidza.

Ben ga ila'nabi bönachi Li' yúgu'të yödzo

gunu' ga gaca dxi'a quéguequi ca benu' queë' lē'.

Ben ga ila'gú'u lē' yöl-la' ba bönachi yúgu'të yödzo.

18 ¡Yöl-la' ba Xanru' Dios, Dios quégaca bönachi
Israel!

¡Tuzë' Lē' runë' le túngaca ga rubániru'!

19 ¡Yöl-la' ba Lë' le naca lachi ga idxintë dza udxi!
¡Rizé ládxi'ru' ilí idútë yödzölió le naca beni' queë'!

¡Ca' gaca! ¡Ön, ca' gaca!

20 Chibudxi le rinábida'-në' Dios neda', David,
zxí'inë' Isaí.

73

1 Le nácatë runë' Dios ga raca dxi'a quégaca bönachi
Israel,

nupa na' naca dxi'a tsahui' ládxi'do'guequi.

2 Ia'láti'sö guchixi guníguida'.

Ia'láti'sö tsöjdöda' tsölá'alö,

3 tu' buzé'eda' nupa tun ba zxön cuínguequi,
en tu'dëda' yöl-la' tsahui' quégaca nupa tuá'dö'.

4 Biti' ca' téquinë' zi' bönni' tu'ë dö' na'.

Nácagaquië' tsutsu, en nacu'ë dxi'a.

5 Biti' ta'guí'i ta'záquë'ë ca ta'guí'i ta'zaca' ia'zíca'rö
bönachi.

Biti' ca' raca quégaquië' ca raca quégaca bönachi
yúbölö.

6 Naca yöl-la' run ba zxön cuini quégaquië'

ca tu le néquini oro dxía ícjagaquië'.

Yöl-la' rutsatsa quégaquië' naca ca zxágaquië'
nácugaquië'.

7 Tu'zi'ë xibé le ta'dödi bë'ë t'ë'aj tahuë',

en ta'zá' ládxi'gaquië' quégaca le zían le ila'déli'në'.

8 Tu'titjë' ia'zíca'rö bönachi,

en tu'ë didza' lu yöl-la' run ba zxön cuini
quégaquië'.

Tun ba zxön cuíngaquei',

en t'ë'në' ila'bía nahuë' ia'zíca'rö bönachi.

9 Ta'nnë' queë' Dios zoë' yehua' yubá,

en tu'didza' yudxë' nupa nacuá' yödzölió.

¹⁰ Que lë ni na' ta'dá' bönachi queë' Dios légaquië',
en ta'yéajlë' didza' tu'ë.

¹¹ Ta'nnë': "Biti' ca' nözinë' Dios,
en biti' ilé'e lë ni Nu na' zoa xitsá'alö."

¹² Caní nácagaca nupa tuá' dö'.

Dëda' yöl-la' tsahui' quéguequi, en ta'zí'tica'sö
ia'lati'.

¹³ ¿Naru' nítisö ben chi'i cuina' para gaca' dxi'a
en para cabí ibága'a dul-la'?

¹⁴ Dios, benu' ga gudí'i guzxáca'a idú dza.
Yugu' zila benu' neda' zi'.

¹⁵ La'tu' bë'a didza' ca nácagaca lë ni
guzxí' yé'eda' bönachi quiu'.

¹⁶ Que lë ni na' bë' ládxa'a tséajni'ida' lë ni,
sal-la' gúcada' böniga

¹⁷ ga bidxintë dza guyu'a yudo' quiu'
en guyéajni'ida' ca gaca quégaca nupa tuá' dö'.

¹⁸ Le nácate nuzú' léguequi ga ta'chixi ta'nigui,
en runu' ga ila'niti tsaz.

¹⁹ La' ila'nítitë,
en ila'yaza ga udxi quéguequi.

²⁰ Nácagaca ca tu le rinetu' yëla le ridödi que cate'
ritö yu.

Cate' chasu', Xan, la' udöditeu' léguequi tsölá'alö.

²¹ Cate' yöjdín icja' le nácagaca ca tu le silá',
en guzá' ládxa'a yugu' le gúquida' zi',

²² guca' tu' canöz, en biti' bi guyéajni'ida'.
Guca' ca tuba' böa' guixi' lo' Li'.

²³ Zóatica'sa' lo' Li',
ate' rizön cazu' neda'.

²⁴ Rigú'u yöl-lu'u neda' le rugú'u neda' nöza quiu',

en ga údxitë uzi'u neda', en gunu' neda' bal.

²⁵ ¿Núzxirö zoa yehua' yubá nu gácalen neda'?
¡Tuzu' Li'!

Tu' rácalenu' neda' cúnturö nu zoa yödzölió nu
riquinda'.

²⁶ Ricuidí' le naca', en rudú ládxa'a.
Le ruzóa tsutsu ládxi'da'ahua',
en le ruzí'tica'sa' xibé naca cazu' Li', Xan.

²⁷ Le nácatë ila'niti nupa tu'cá'ana Li'.
Usunítu' yúgu'të nupa tu'zóa Li' tsólá'alö.

²⁸ Raca dxi'a quia' cate' ribiga' ga zu' Li', Dios.

¡Naca cazu' Li', Xana' Dios, Nu run chi'i neda'
para ulu'a lahui yúgu'të le nun cazu'!

74

¹ Dios, ¿naru' tsaz nusán ládxi'u netu'?
¿Riléde'enu' netu', bö'cu' zxila' queë cazu'?

² Yöjné netu', bönachi tu'dubi quiu', nupa böá'u
cazu' dza ni'te,
nupa böá'u cazu' para gácatu' bönachi queë cazu'.
Yöjné guí'a Sión, ga ni guzóa cazu' Li'.

³ Gudá tödu' ga ni naguinnajdërö yödzö lá'ayi quiu'.
Bulu'sunítidërö nupa gula'dá'baga' Li'
yúgu'të le gula'cuá' lataj lá'ayi quiu'.

⁴ Tu'tsatsa nupa na' gula'dá'baga' Li'
idú gásibi'ilö ga ni budúbitu' quiu'.
Nucúa'gaquië' ni le naca bé'gaca
nuxícjagaquië' yödzö lá'ayi quiu'.

⁵ Nalá' lahui yödzö ni ca nalá' tu guí'a cate' nu
gulú'u le bidín,
en nurixi nu na' yugu' yaga gula'cuá' lu guí'a na'.

⁶ Bulu'zxuzxjë' le nácagaca lachi lu yödzö ni len yugu' guié huága quégaquië', en yugu' yaga zidzaj.

⁷ Bulu'zégui'ë idútë lataj lá'ayi quiu'.

Nucá'anagaquië' cá'asö lataj ga benru' bal Lo'.

⁸ Lu icja ládxi'do'gaquië' gula'né': "Nuxícjadërötu' bönachi ni."

Idútë lu xiyutu' bulu'zégui'ë yúgu'të yu'u ga na' budúbitu' lo'.

⁹ Bítirö caz rilé'etu' yugu' le bulu'subán ládxi'tu' gulísatu' lu xiyutu'.

Bítirö zoa nu bönni' ru'ë didza' uláz quiu'.

Bítirö zóalen netu' nu bönni' nözinë' gáca'xte caz gaca caní queëtu'.

¹⁰ Dios, ¿gáca'xte caz ulu'lidza ditaj netu' nupa ta'díl-lalen netu'?

¿Gáca'xte caz ulu'cá'ana ditaj Lo' nupa ta'dá'baga' Li'?

¹¹ ¿Naru' cabí gácalenu' netu'?

¿Bizx que nucáchu'u yöl-la' huáca zxön quiu'?

¹² Rinná be'e quézinu' netu' Li', Dios, dza ni'te quez, en rusölá casu' bönachi idútë yödzölió.

¹³ Len yöl-la' huáca zxön quiu' bubéaj casu' choplö nísado'.

Gulá'a casu' ícjagacaba' böa' zxön nacuá'aba' nísado'.

¹⁴ Bzxuzxja casu' ícjagacaba' böa' sínia' lëba' Levi-atán.

Ben casu' ga guláguba' yugu' böa' guixi' xipéla'ba' böa' sínia' na'.

¹⁵ Gusalaj casu' yugu' beaj nisa, en gapa rálajda' nisa.

Busubidxi casu' yugu' yegu nisa gula'yúdzutica'sö nisa.

16 Nequi queë casu' lahui' dza, en nequi ca' quiu'
chi'î dzõ'ölö.

Ben casu' Li' bení', enca' gubidza.

17 Naguixaj casu' Li' yúgu'të buzá' nacuá' yödzölió.
Nun casu' Li' beo' la, en beo' ziaga.

18 Yöjné læ ni, Dios. Nupa ta'dá'baga' Li'
nucá'anagaca ditaj Lo',

ate' nupa nácgaca canöz nucá'anagaca cá'asö Lo'.

19 Biti' usán no'o nupa nadxí'inu' lu ná'agaca nupa
nácagaca ca yugu' böa' guixi' sínia'.

Biti' gal-la ládXu'u tsaz nupa néquiguequi quiu', en
ta'guí'i ta'zaca'.

20 Yöjné didza' dzaga na' núnlenu' netu',
tu' nacuá' nupa tuti bönachi gapa naca chul-la lu
xiyutu'.

21 Biti' gu'u lataj ulu'gá'ana cá'asö nupa nácgaca
bayechi'.

Ben ga ila'gú'u Li' yöl-la' ba nupa ta'guí'i ta'zaca',
en ta'yadzaj ta'yudxi.

22 ¡Guyasa, Dios, en ben ca rnna xtídzu'u!

¡Ruzě nagu' ca rulidza ditjě' Li' bönni' canöz idú
dza!

23 Biti' gal-la ládXu'u didza' zi' tuí'i nupa ta'dá'baga'
Li'.

Yöl-la' dzatsa tun nupa tu'cá'ana Li' cá'asö
riyöntica'sö.

75

1 ¡Rětu' Li': "Xclenu', Dios"!

¡Rětu' Li': "Xclenu",

tu' zóatica'su' gal-la' ga zóatu'!

¡Tuí'i didza' bönachi ca nácgaca le zxön nunu'!

2 Rnnë' Dios: "Nuzóa' dza cate' uchi'a usöröa' bönachi.

Uchi'a usörö caza' léguequi ca naca le nácatë.

3 Tu'suniti yödzölió, en nupa nacuá' ni',
pero tsaz nuzóa caza' le."

4 Gudxa' nupa tun ba zxön cuínguequi, gunnía':
"Biti' gun ba zxön cuinli'",
en gudxa' nupa tuá' dö': "Biti' huë tsahui' cuinli'.

5 Biti' huë tsahui' cuinli',
en biti' gü'ili' didza' lu yöl-la' run ba zxön cuinli'."

6 Calëga ga rilén gubidza, en calëga ga ribía gu-
bidza,
en calëga la' guixi' ga dë lataj irúaj le huë tsahui'
bönachi,

7 pero uchi'a usörö cazë' Dios bönachi.

Uzötjë' tuë bönni', en uchisë' ia'tué'.

8 Nuá' cazë' Xanru' lu në'ë tu zxiga' yudzu xisa le
ribía lubá uva le ribixi rilëbi.

Chinugútsi'dërë' le, ate' rigu'ë le para ilë'aj le nupa
tuá' dö' yödzölió ni,
ate' ilë'jadërö le silá' que.

9 Neda' usiyöntica'sa' bönachi lë ni,
en gul-la' yöl-la' ba queë' Dios queë' Jacob.

10 Ugúë' yöl-la' unná bë' quégaca nupa tuá' dö'.
Quíxjë' tsaz yöl-la' unná bë' quégaca nupa nácacaga
tsahui'.

76

1 Zxí'ini xi'sóë' Judá núnbë'gaquië' Dios.

Nayëpisë le lë' ladaj bönachi Israel.

2 Zoa caz lataj lá'ayi queë' lu yödzö Jerusalem,
ate' nazí'i le Sión lataj ga na' zoa cazë'.

3 Ni' guditsjè' yugu' yaga lahui tuchi' zoa guí' láhuiguequi,
 enca' yugu' guié la, en yugu' le ta'díl-lalen bönachi
 lu gudil-la.

4 ¡Yöl-la' ba Li', Dios!
 ¡Nayëpisëtëru' ca yugu' guí'a zxön!

5 Buxicju' bönni' nál-lagaquië'.
 Gudödi yëla guiöj lógaquië' bönni' röjáquië' gudil-la,
 en biti' guca ila'chisa ná'agaquië'.

6 Cate' Li', Dios queë' Jacob, gudíl-lalen casu'
 légaquië'
 gulátiba' böa', ate' gulati ca' nupa dxíagaca légacaba'.

7 Li' caz ral-la' gádxitu',
 tu' cabí gaca nu soa lo' cate' ilenu'.

8 Ga zu' Li' yehua' yubá gunnó' uchi'a usöröu'
 bönachi.

Ní'irö guladxi nupa nacuá' lu yu, en gula'cuá'
 dxisö,

9 cate' guzuínë' Dios para uchi'a usöröë' quégaca
 bönachi,

para usölë' nupa nácagaca nöxaj ladxi' yödzölió ni.

10 Sal-la' ta'lédé'e bönachi, gaca yöl-la' ba queë' Lë'.
 Uzi'ë xibégaca nupa ulu'gá'ana ládjaguequi.

11 Guli'sí' lu ná'ali' bi gunli' lahuë' Xanru' Dios,
 en guli'gún ca na' innali'.

Yúgu'të nupa nacuá' ga na' zoë' ral-la' bi ulu'nödzej
 queë',

tu' náquië' Nu ral-la' gádxiru'.

12 Ubéaj cazë' bö' nácagaca caz nupa nadéli'gaca
 lataj lo.

Bönni' ta'nná bē'ë luyú ni tádxinē' Lē'.

77

¹ Rulidza'-nē' Dios, en ruá'a zidzaj didza'.

Rulidza'-nē' Dios, ate' riyönnē' chí'a.

² Cate' bi guca quia' bulidza'-nē' Dios.

Chí'i dzö'ölö guchisa na'a lahuë', en bití' busana'
rulidza'-nē'.

Bití' guca nu huë tsahui' neda'.

³ Cate' röjneda'-nē' Dios, rö'a böniga.

Cate' rinnē ládxa'a, ní'irö rudú ládxa'a.

⁴ Bubéaj cazu' yëla guiöj lahua'.

Tu' ribö'a böniga bití' gaca gu'a didza'.

⁵ Chiguzá' ládxa'a ca guca dza ni'te,

ca guca yugu' iz chigula'dödi.

⁶ Tsöjneda' le bulá' chí'i dzö'ölö,

en tsöjsá' ládxa'a ca naca que, ate' rinábini cuina':

⁷ ¿Naru' tsaz nusán Xanru' neda'?

¿Naru' cabirö uzá' ládxe'ë quia'?

⁸ ¿Naru' cabirö gáquië' dxi'i ladxi'?

¿Naru' cabirö tsöjnenë' le guxzí' lu nē'ë gunë'?

⁹ ¿Naru' nál-la ládxe'ë Dios tu' cabirö ruzá' ládxe'ë
queéru'?

¿Naru' bíti'rö huéchi' ládxe'ë rē'u tu' rilenë'?

¹⁰ Ní'irö gudxi cuina': Raca caní quia' tu' risëbida'
ládxa'a,

en que lē ni na' réquida' nadzá' yöl-la' unná bē'
queë' Dios nayëpisë'.

¹¹ Tsöjneda' yugu' le nun cazu' Li', Xantu'.

Tsöjneda' yugu' yöl-la' huáca benu' dza ni'te.

¹² Sa' ládxa'a ca nácagaca le nunu',

en cuéqui icja' ca nácagaca le runu'.

¹³ Naca lá'ayi ca run cazu' Li', Dios.

Cúnturö nu zoa naca dios ca nacu' Li', Dios queétu'.

¹⁴ Naca cazu' Li' Dios, runu' yugu' yöl-la' huáca
zxön.

Bulú'u lahui yöl-la' huáca quiu' lógaca bönachi
yúgu'të yödzö.

¹⁵ Len yöl-la' huáca zxön quiu' busöló' bönachi
quiu',

nupa nácagaca xzí'ini xi'sóagaquië' Jacob, en José.

¹⁶ Bila'lé'e yugu' nísado' Li', Dios.

Bila'lé'e yugu' nísado' Li', en gula'bö' böniga.

Gula'zxízilë'e yugu' nísado'.

¹⁷ Bulu'lalaj böaj lúzxiba nisa.

Lúzxiba xitsá' gunnëda' guziú'.

Guyëpi yösa ca yugu' yaga lahui tuchi'.

¹⁸ Lu bö' budunu' biyón guziú' quiu' gunnëda'.

Yösa gula'yëpi bulu'zení luyú.

Gudódida' budó' xzu', en guzxizi luyú.

¹⁹ Bilá' lahui nöza quiu' gatsaj láhui'lö nísado',

ate' guzóa nöza ga gudödu' gatsaj láhui'lö nisa zila.

Biti' nalá' lahui na'a ga na' bulibu'.

²⁰ Guchë' cazu' bönachi quiu' ca runë' bönni'
richë'ë-ba' bö'cu' zxila' huë'ënido'.

Guchë'u léguequi lu ná'agaquië' Moisés, en Aarón.

78

¹ Buli'zë nágali' le uzéajni'ida' libí'ili', bönachi quia'.

Buli'zë nágali' didza' gu'a.

² Usalja' ruá'a, en ucúdzu'a didza'.

Gu'a didza' tu le nagachi' dza ni'te quez,

³ tu didza' chibiyönru', en núnbë'ëru',

le gulë' xuz xtó'oru' rë'u.

- 4 Biti' ucáchi'ru' didza' na' lógacabi' xzí'iniru'.
 Usiyönru' yugu' xzí'ini xi'sóaru' yöl-la' ba queë'
 Xanru',
 ca naca yöl-la' huáca queë', en yugu' le zxön benë'.
- 5 Gudixjë' tu didza' naca bë' queë' Jacob,
 en nuzóë' le rinná bë'ë quégaca bönachi Israel,
 le gunná bé'enë' yugu' xuz xtó'oru'.
 Ulu'zéajni'inë' xzí'inigaquië' ca naca,
 6 para ilúnbë'gacabi' le, bi'i si' zá'gacabi', enca' bi'i
 si' iláljabi',
 para ulu'lu'í'ibi' ca' xzí'inigacabi' ca naca lë na'
 gunná bë'ë Dios.
- 7 Ulu'zxöni ládxi'gacabi' Dios,
 en biti' gal-la ládxi'gacabi' yugu' le nunë' Dios.
 Ilunbi' ca nácagaca le gunná bë'ë,
 8 en biti' ilácagacabi' ca guláquië' xuz xtó'ogacabi'.
 Guláquië' zidzaj ladxi' tu' gula'dá'baguë'ë xtídzë'ë
 Dios,
 en biti' guláquië' nōxaj ladxi',
 ate' lu icja ládxi'do'gaquië' biti' gula'yéajlë'ë Dios.
- 9 Yugu' xzí'ini xi'sóë' Efraín guluá'gaquië' yaga
 uxiti',
 pero bulu'zxúnnejë' lu gudil-la.
- 10 Biti' gula'dá'gaquië' didza' dzaga Dios bénlenë'
 légaquië',
 en biti' gulunë' ca naca le gunná bé'enë' légaquië'.
- 11 Gulal-la ládxi'gaquië' yugu' le benë' Dios,
 en yugu' yöl-la' huáca zxön benë' lógaquië'.
- 12 Benë' Dios le gulún ga bulu'bájinë' xuz
 xtó'ogaquië'
 luyú Egipto, en luyú Zoán.
- 13 Gusaljë' nísado', en benë' ga gula'dödë' gatsaj
 láhui'lö nísado' na'.

Benë' ga guca nísado' na' ca yugu' gu'ado' tsölá'a huéaj.

14 Buluí'inë' légaquië' nōza lahui' dza, bugunë' dxin tu böaj,
ate' chi'i dzö'ölö bugunë' dxin tu böaj ruzení' ca guí'.

15 Bulë'ë tu guiöj ga naca la' guixi' ga dë lataj,
en bë'ë le gulë'ajë' le guca ca tu nísado'.

16 Gulë'ajë' nisa yegu le gulén lu guiöjto'o.

Benë' ga birúaj nisa ca tu yegu zxön lu guiöjto'o na'.

17 La' níisö gulunë' dul-la' lahuë' Lë',
en gula'dá'baguë'ë Dios nayépisëtë're' la' guixi' na'.

18 Lu icja ládxi'do'gaquië' gula'zi' bë'ë Dios quégaquië',
cate' gula'nábinë' Lë' ugahuë' légaquië' ca gula'zësö ládxi'gaquië'.

19 Ní'irö gula'nnë' queë' Dios, gula'nnë':

“¿Naru' huáca cu'ë Dios le gáguru' la' guixi' ni ga dë lataj?

20 Buli'yútsöca', bë'ë guiöjto'o, ate' birúajda' nisa,
le guca ca nisa yegu gubó'o zxön.

¿Naru' huáca gunnë' ca' queëru' yöta gáguru'?

¿Naru' gaca ugahuë' bönachi queë' le naca bëla'?”

21 Biyönnë' Xanru' Dios didza' ni, en guléde'enë',
ate' gulén tu guí' le buzegui zían zxí'ini xi'sóë Jacob,

tu' guléde'enë' bönachi Israel,

22 tu' cabí gula'yéajlë'ë Dios,

en biti' bulu'zxöni ládxi'gaquië' Lë' usölë' légaquië'.

23 Gunná bé'enë' Lë' yugu' böaj lúzxiba,
en gusaljë' yehua' yubá.

24 Gusöl-lë'ë yöta maná le ilahuë',

en bugahuë' légaquië' la' huagu que yehua' yubá.

²⁵ Gulahuë' bönni' ni' yöta tahuë' gubáz que yehua' yubá.

Gusöl-lë'ë guizxi yu le ilahuë'.

²⁶ Benë' ga guyecja bö' birúaj ga rilén gubidza, ate' len yöl-la' huáca queë' gunná bé'enë' bö' recja le birúaj tsölá'alö ga ridödi gubidza beo' ziaga.

²⁷ Benë' ga böxaj bëla' ca bëchtö yu ládjalö ga na' nacu'ë,

le naca böa' zoa xíligacaba' gurö'öba' ca yuzxi dë tu ra' yegu zxön.

²⁸ Benë' ga böxjagacaba' gatsaj láhui'lö ga na' nacu'ë,

en ládjagaca yugu' yu'u guídido' quégaquië'.

²⁹ Ca' guca, gulahuë', en bulu'huöläj gula'dzé'enë', tu' bë'ë quégaquië' le gula'zësö ládxi'gaquië'.

³⁰ Zí'alö ca budxi bulu'huöläj gula'dzé'enë', tsanni ni' yu'u ruá'agaquië' le tahuë',

³¹ gulénë' Dios légaquië',

en bëtië' bál-lagaquië', bönni' nál-latërögaquië' ládjagaquië',

en bucul-lë' bönni' Israel nayëpisëtërögaquië'.

³² Sal-la' guca caní, gulunrë' dul-la',

en biti' gula'yéajlë'ë Lë' ni'a quégaca le zxön benë'.

³³ Que lë ni na' benë' ga böáca nítisö dxin gulunë', ate' lu yöl-la' radxi gula'zöé' yugu' lu iz quégaquië'.

³⁴ Cate' bëtië' ziángaqië', ní'rö bulu'lidzë' Lë'.

Bulu'bí'i ládxi'gaquië', en yöjtá'gaquië' Dios.

³⁵ Ní'rö yöjnéguëquinë' náquië' Dios Nu run chi'i légaquië',

en náquië' Dios nayëpisëtërë' Nu böá'uö légaquië'.

³⁶ Gula'zì' yé'enë' Lë' len didza' gulu'ë,

tu' gulu'ë diza' biti' nácatë lahuë' Lë' len
ruá'agaquië'.

37 Biti' gudá'gaquië' Lë' idú ládxi'gaquië',
en biti' gulunë' ca rnna didza' dzaga na' bénlenë'
légaquië'.

38 Tu' buéchi' ládxi'ë Dios légaquië',
buniti lahuë' ca naca xigua' gulunë', en biti'
busunítië' légaquië'.

Bubequi lahuë' quégaquië', en bítirö gulénë'
légaquië',

en biti' benë' ca sa'yéaj yöl-la' ridzá'a queë'.

39 Ca' guca, yöjnenë' nácaquië' bönáchisö.

Nácaquië' ca tu bö' recja le ridödisö, en biti'
rudxín.

40 Zián luzuí gula'dá'baguë'ë Lë' ga na' naca la'
guixi',

en bulu'suhuí'inë' Lë' lu yu bidxi na'.

41 Zián luzuí gula'zí' bë'ë Dios,

en gulunë' zi' Dios Lá'ayi quégaca bönachi Israel.

42 Biti' yöjnéguquinë' yöl-la' huáca zxön queë',

le bulu'e lahui dza ni' böá'uë' légaquië'

lu ná'agaca nupa biti' bila'lé'e légaquië' dxi'a,

43 cate' ni' benë' le gulaca bë' luyú Egipto,

en benë' yugu' yöl-la' huáca queë' luyú Zoán,

44 cate' benë' ga böáca nisa rön yugu' lu yegu luyú
Egipto,

enca' nisa yugu' lu beaj quégaquië' para cabí guca
ilë'ajë' le.

45 Gusöl-lë'ë ládjagaquië' bötsugayu guizxi yu,

böa' gula'guídxiba' légaquië'.

Gusöl-lë'ë ca' riu bulu'sunítiba' le nequi quégaquië'.

46 Budödë' le naz nuzóagaquië' lu ruá'agacaba'
böchi' zu,
ate' guláguba' böchi' zu na' le rö'ö yugu' la' yëla
quégaquië'.

47 Busunítië' yugu' lubá uva quégaquië' len nisa
guiöj yöla sunna na',
en busunítië' yugu' yaga higo quégaquië' len bögui'.

48 Bëtië'-ba' böa'-bëdxi quégaquië' len nisa guiöj
yöla sunna na',
en lu yösa gula'yëpi.

49 Lu yöl-la' rilé queë' gusöl-lë'ë quégaquië' yugu' lë
ni,
en lu yöl-la' ridzá'a queë' busaca' zi'ë légaquië',
en gusöl-lë'ë quégaquië' gubáz que yehua' yubá
para bulu'sunítië' légaquië'.

50 Biti' bubequi lahuë' quégaquië' para cabirö lenë'
légaquië',
en biti' buniti lahuë' légaquië' para cabí ilátië'.
Budödë' légaquië' lu yöl-la' guti,

51 en bëtië' yúgu'tëbi' bi'i bönni' lo quégaquië' bönni'
Egipto,
yugu' bi'i bönni' lo quégaquië' xzí'ini xi'sóë' Ham.

52 Guchë'ë bönachi queë' ca yugu' bö'cu' xzíla'do',
en bulu'inë' légaquië' nöza la' guixi' ga dë lataj.

53 Guchë'ë légaquië' lu në'ë para cabí bi iládxinë',
pero gubaga' nísado' nupa biti' bila'lé'e légaquië'
dxi'a.

54 Ca' guca, guchë'ë légaquië' ga zoa luyú lá'ayi
queë',
luyú ni bidéli'në' uláz quégaquië' len yöl-la' huáca
queë'.

55 Bulágui'ë bönachi izá'a luyú ni lógaca bönachi
queë',

en burixë' que queëgaquië' xiyúgaquië' ga ila'cu'ë,
 en benë' ga gula'cu'ë bönachi Israel yugu' lu yu'u
 guídido'.

56 Le yúbölö gula'zí' bë'ë Lë', en gula'dá'baguë'ë
 Dios nayëpisëtë'rë',

en biti' gulunë' yugu' le gunná bé'enë' légaquië'.

57 Bulu'huõa ládxi'gaquië', en bulu'cá'anë' Lë' ca
 gulunë' xuz xtó'gaquië'.

Gula'dödë' tsóla'aló ca run tu yaga lahui tuchi' biti'
 nácatë li.

58 Gulún lenë' Lë' tu' gulunë' xilátjagaca budó' guió'j
 budó' yaga yugu' lu gu'a,

en gulunë' ga budúli'në' légaquië' ni'a quégaca
 budó' na'.

59 Cate' bilé'enë' lë ni Dios, guléde'enë',
 en budí'inë' bönachi Israel.

60 Ní'irö bucá'anë' xilatjë' lu yödzö Siló,
 ga na' guzóa yu'u lá'ayi queë' ládjagaquië' bönni' ni'.

61 Bë'ë lataj gula'ché'ë bönni' zi'tu' guí'ina lá'ayi
 queë',

guí'ina na' bulu'í' lahui yöl-la' zxön queë'.

62 Budödë' bönachi queë' lu ná'agaca nupa bëtigaca
 léguequi,

63 en gúquinë' zi' nupa nácgaca quez queë'.

Buzegui tu guí' zxön yugu' bi'i bönni' quégaquië',
 ate' cuntu nu bugá'ana nu ulu'tsaga na'lenbi'
 yugu' bi'i nigula ra'bando'.

64 Yugu' bixúz quégaquië' gulátie' lu guíë tuchi',
 ate' biti' guca ila'bódxinu nigula uzëbi quégaquië'.

65 Ní'irö gúquië' Xanru' ca tu bönni' rubanë' lu yöl-
 la' rasi.

Gúquië' ca bönni' rejë' gudil-la gudödi bë'ë gu'ë xisi
 lubá uva nál-la.

66 Bulágui'ë yugu' bönni' gula'díl-lalenë' bönachi queë',

en tsárido'os burixë' légaquië'.

67 Lësca' budödë' tsölá'alö yugu' xzí'ini xi'sóë' José, en biti' guröë' yugu' xzí'ini xi'sóë' Efraín.

68 Guröë' yugu' xzí'ini xi'sóë' Judá, en yödzö Sión le nadxí'i quézinë' Lë'.

69 Ni' benë' tu lataj lá'ayi queë' le naca ca tu guí'a xzön,

le zoa tsutsu ca yödzölió ni nuzóë' tsaz.

70 Guröë' ca' David, huen dxin queë', en bubéajë' lë' ga na' zoë' ruyúë'-ba' yugu' bö'cu' xzí'ila'do'.

71 Bubéajë' lë' ga na' rapa chi'ë-ba' yugu' bö'cu' xzí'ila' guná',

nacuá'aba' böa' hué'ënido' quégacaba',

para gáquië' nu uyú bönachi queë', yugu' xzí'ini xi'sóë' Jacob,

en bönachi Israel, nupa na' nácagaca quez queë'.

72 Ca' guca, idú ládxë'ë buyúë' David bönachi na', en lu yöl-la' rácada' queë' guchë'ë légaquië' lu në'ë.

79

1 Dios, nacué' bönachi izá'a lu xiyúgaca bönachi quiu'.

Nucá'anagaca cá'asö yudo' lá'ayi quiu', en nusunítigaca yödzö Jerusalén.

2 Bulu'cá'anë' bönachi quiu' nátigaca luyú para iláguba' bíchulab léguequi,

en bëla' rön quégaca huen xichinu' ga iláguba' böa' guixi' le.

3 Bulu'laljë' xichöngaca bönachi quiu' ca nisa iduté lu yödzö Jerusalén,

ate' cuntu nu bugá'ana nu ucache' léguequi.

⁴ Bönachi yugu' dzaga luyú queëtu' tu'titaj netu'.
Tu'zxidxë', en tu'didza' yudxi netu'.

⁵ ¿Naru' tsaz ilenu' netu', Xan?

¿Naru' sóatica'sö yöl-la' rilé quiu' ca tu guí' ruzegui netu'?

⁶ Gulégaca bönachi yugu' yödzö zi'tu' biti' tun Li' bal, enca' bönachi biti' tu'lidza Li'.

⁷ Bétigaca bönachi quiu' nácagaca zxí'ini xi'sóë' Jacob,
en nusunítigaca xiyutu' ga zoa cazu' Li'.

⁸ Biti' gunu' netu' xiguia' tu' nözi dul-la' gulunë' xuz xtó'otu'.

Buéchi' ladxi' netu' na'a, tu' rudú ládxi'tu'.

⁹ Gúcalen netu', Dios, Nu rusölá netu', para guntu' bal Lo'.

Busölá netu', en buniti lo netu' ca naca dul-la' nabága'tu' para idxí'itu' Lo'.

¹⁰ ¿Bizx que ta'nabi bönachi yugu' yödzö izá'a netu', ta'nná: "Gázxitë zoa Dios queéli"?

Bë' lataj ilé'etu', en ben ga gaca bë' lógaca yúgu'të bönachi rizí' lo' nupa tu'lalaj xichöngaca huen xichinu'.

¹¹ Buzé nagu' ca ta'nnë ládxi'gaca nupa nadzúngaca.

Len yöl-la' huáca zxön quiu' busölá nupa na' narugu quéguequi ilátigaca,

¹² en bubí'i quégaca bönachi yugu' dzaga yödzö queëtu'

ia'gadxi cö'lö ca' tsca naca didza' zi' gula'nnë quiu' Li', Xan.

13 Netu', bönachi quiu', enca' bö'cu' zxila' ruyú
cazu' Li',
guïética'stu' Li': "Xclenu",
en cú'utica'stu' Li' yöl-la' ba na'a dza, en dza si'
zaca.

80

1 Ruzě nagu' netu', Dios, Nu rapa chi'i bönachi
Israel.

Nacu' Nu ruyú yugu' zxí'ini xi'sóë' José ca nu ruyú
yugu' bö'cu' zxila'.

Buzení' queëtu', Li' na' rö'u rinná bë'u ga nacué'
nupa nál-lágacatëro quiu' lëgaca querubín.

2 Buluí'i yöl-la' huáca quiu' lógaca zxí'ini
xi'sóagaquië' Efraín, en Benjamín, en
Manasés.

Gudá queëtu', en busölá netu'.

3 Ben ga huécjatu' quiu' Li', Dios.

Buluí'i netu' nadxí'inu' netu', ate' ulatu'.

4 Xantu' Dios quéguequi ni'a no'o guizxi yu,
¿gáca'xte caz ilenu' netu', en biti' yönnu' le rulidztu'
Li'?

5 Rugagu' netu' nisa ribödxi queëtu',
en rugui'ju' netu' sizxöni nisa ribödxi.

6 Nunu' ga bönachi dzaga yödzö queëtu' tu'zxidxi
queëtu',
ate' nupa biti' ta'lé'e netu' dxi'a tu'titaj netu'.

7 Ben ga huécjatu' quiu' Li', Dios quégaca ni'a no'o
guizxi yu.

Buluí'i netu' nadxí'inu' netu', ate' ulatu'.

8 Guléaju' tu lubá uva le nácatu' netu' luyú Egipto.
 Bulagu' bönachi izá'a yugu' lu yödzo luyú ni, en
 budó'o lubá na' ni.

9 Buchi'u lataj ga guzxön lubá na'.
 Benu' ga ben luí ga rè', ate' bulí idútè luyú ni.

10 Gulú'u zxul-la lubá na' yúgu'tè lu guí'ado',
 ate' ni'a në'e gula'baga' yugu' guí'a zxön.

11 Gula'tunna ni'a në'e ga bidxintè ra' nísado',
 enca' ga bidxintè ra' yegu Eufrates.

12 ¿Bizx que buquínnaju' yugu' lè'aj gulún chi'i lubá
 na',
 en ru'u lataj nupa ta'dödisö ta'bán le ribía lubá uva
 na'?

13 Tu'líbigacaba' cuchi guixi' le,
 ate' táguba'böa' guixi' le.

14 Buécja queétu', Dios quégaca ni'a no'o guizxi yu.
 Ga ni' zu' yehua' yubá buyú ca raca que lubá quiu',
 en busölá netu'.

15 Gudá dusöló' lubá ni budá' cazu',
 le naca ca tu lubá hué'ëni buxön cazu' Li'.

16 Nupa biti' ta'lé'e netu' dxi'a gula'chugu ni'a në'e
 lubá na', en bulu'quela' le guí'.
 Buyú ca tun, en lu yöl-la' rilé quiu' busuniti
 léguequi.

17 Gúcalen bönni' na' gurö cazu' quiu',
 netu', bönachi na' nuzóa cazu' tsaz quiu'.

18 Caní gaca, bíti'rö ucá'anatu' Li'.
 Bunna queétu' yöl-la' na'bán, ate' uzxöni ládxi'tu'
 Lo'.

19 Ben ga huécjatu' quiu' Li', Dios quégaca ni'a no'o
 guizxi yu.

Bulu'í netu' nadxí'ínu' netu', ate' ulatu'.

81

¹ Lu yöl-la' rudzeja queéli' guli'gul-la queë' Dios.
Lë' náquië' yöl-la' nál-la queéli'.

Lu yöl-la' rudzeja queéli' guli'cödxí'a lahuë' Dios
queë' Jacob.

² Guli'gul-la tu le gúl-lali', cápa'li' lë'e guídido'.
Guli'quinnaj lë'egaca bihuël-la.

³ Guli'cödxí luzu chivo cate' zoa beo' huë'ëni,
en cate' zoa beo' nál-la, en cate' raca laní.

⁴ Lë ni naca tu xibá quégaca bönachi Israel,
le naca tu le gunná bé'enë' Xanru' Dios zxi'ini
xi'sóë' Jacob.

⁵ Gudixjë' le para gaca tu le gun ba nalí queë' lógaca
zxi'ini xi'sóë' José,
le gudixjë' cate' gudödë' luyú Egipto,
ga ni' biyönda' didza' izá'a bití' guyéajni'ida'.

⁶ Rnnë' Dios: "Gudúa' yua' zxoá ya'zxi'cagaquië',
en bucuíta' le nuá'gaquië' le bulu'subaga' légaquië'
nupa bití' bila'lé'e légaquië' dxi'a.

⁷ Bulídzali' neda' cate' bi guca queéli', ate' busölá'
libí'ili'.

Bubi'a didza' cate' bi gunábili' neda', ni' nucachi'
cuína' tu lu böaj gasaj.

Guzxí' bë'a libí'ili' ga zoa nisa na' lë Meriba.

⁸ Bulí'zé nágali', libí'ili', bönachi quia', ate' uxösa'
libí'ili'.

Raca ládxa'a uzé nágali' neda', bönachi Israel.

⁹ Bití' ral-la' soa tu dios izá'a ga na' zóali',
en bití' gunlí' zxi'ön tu dios quégaca bönachi zi'tu'.

¹⁰ Neda', Xanlí', naca' Dios queéli'.

Guléaja' libí'ili' luyú Egipto.

Guli'salaj ruá'ali', ate' cu'a ruá'ali' le gáguli'.

¹¹ Biti' bulu'zě nágagaca bönachi quia' chi'a.

Biti' gulún bönachi Israel ca rna xtídza'a.

¹² Que lě ni na' busán ládxa'a léguequi
para gulún ca sa'yéaj yöl-la' ridá'baga' quéguequi,
en para gulún ca gula'za'sö ládxi'gaca.

¹³ Guzá' ládxa'a ulu'zě nágagaca bönachi quia'
xtídza'a,
para ilún bönachi Israel ca rě'enda' neda'.

¹⁴ La'tu' ilún caní, uxicja caza' nupa bití' ta'lé'e
léguequi dxi'a,
en tíl-lalena' nupa ta'díl-lalen léguequi.

¹⁵ Ulu'luí'i cuínguequi nupa bití' ta'lé'e neda' dxi'a,
ca nupa tun ca rna xtídza'a,
pero tsaz guna' léguequi xigua'.

¹⁶ Lěsca' uguhua' libí'ili', bönachi quia', zxa' xtila
dxí'ado',
en guna' ga huölej idzé'eli' le zxixi que buz, le irúaj
lě'e guiöj."

82

¹ Zuíně' Dios ladaj nupa tu'dubi queě' ni' yehua'
yubá.

Ruchi'a rusöröě' nupa ta'nná bě'.

² Rnně': "¿Gáca'xte caz uchi'a usöröli' quégaca
bönachi
lu yöl-la' bití' naca tsahui' queěli'?

Caní naca tu' rubéajli' tsahui' nupa tuá' dö'.

³ Buli'béaj tsahui' nupa ta'cuidi', en yugu' bi'i uzěbi.
Guli'gún le naca tsahui' quégaca nupa ta'guí'i
ta'zaca',

en quégaca nupa ta'yadzaj ta'yudxi.

⁴ Buli'sölá nupa ta'cuidi', en nupa nácagaca yechi'.

Buli'sölá léguequi lu ná'agaca nupa tuá' dö'.

⁵ Biti' nöziguequi, en bití' ta'yéajni'i.

Ta'dá ga chul-la.

Rixxizi xilibi yödzölió."

⁶ Rnna caza' neda': "Nácali' ca yugu' dios.

Nácali' yúgu'téli' xzí'iné' Dios nayépisëtèrè',

⁷ pero gátili' ca tati bönachi,

en ibíxili' lu gudil-la ca ta'bixi xzí'iné' bönni' lo."

⁸ Guyasa, Dios, en buchi'a busörö quégaca bönachi
yödzölió ni,

tu' nácacaca queë cazu' yúgu'tè yödzö bönachi.

83

¹ Biti' ugá'anu' dxisö, Dios.

Biti' su' dxisö, Dios, en bití' usayaj ru'u,

² tu' tu'tsatsa nupa ta'dá'baga' Li',

ate' nupa bití' ta'lé'e Li' dxi'a tun ba xzön
cuínguequi.

³ Tun tuz xtídza'guequi bi ilún quégaca bönachi
queë cazu',

en tu'pá yugu' le ilún quégaca nupa nadxí'i
quézinu', ta'nná:

⁴ "Guli'dá, usunítiru' léguequi para cabirö ilaca tu
yödzö bönachi,

en para cúnturö nu tsöjné bönachi Israel."

⁵ Núngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

⁶ Yugu' bönni' Edom, en yugu' bönni' Ismael,

en yugu' bönni' Moab, en yugu' bönni' Agar,

⁷ en yugu' bönni' Gebal, en yugu' bönni' Amón, en
yugu' bönni' Amalec,

en yugu' bönni' Filisteo, en yugu' bönni' Tiro,

8 enca' yugu' bönni' Asiria núngaquië' légaquië'
tsözxön.

Rácalengaquië' yugu' bönni' xzí'ini xi'sóë' Lot.

9 Ben quégaquië' ca benu' quégaca bönachi Madián,
nupa na' busunítu' dërö,

en ca na' benu' queë' Sísara, en ca na' benu' queë'
Jabín ra' yegu Cisión,

10 nupa na' busunítu' lu yödzö Endor,
ate' gulaca ca xiqué'ëba' bëdxi luyú ni'.

11 Ben quégaquië' bönni' lo quéguequi
ca benu' quégaquië' Oreb, en Zeb,
en ben quégaquië' bönni' ta'nná bé'enë' léguequi
ca benu' quégaquië' Zeba, en Zalmuna,

12 nupa na' gula'nná: "Ilequi queëru'
yugu' lataj gapa na' gulequi queë' Dios."

13 Dios quia', ben ga ilácagaquië' ca bëchtö yu le
riché' bö',

en ca bëbu zxe café le ruá' bö' budunu'.

14 Ca run tu guí' zxön, ruzegui' yugu' yaga zxön,
o ca run tu guí', ruzegui' tu guí'a zxön,

15 gusí regu' léguequi tu lu bö' budunu',
en ben gadxi léguequi tu lu nisa guiöjsiu' zili.

16 Ben ga ulu'tuí'i
para ulu'guilaj Li', Xan.

17 Ben ga ulu'tuí'i, en ila'bö' tsaz böniga.
Ben ga ulu'gá'ana cá'asö, en tsaz ila'niti,

18 para iléquibe'e nayépisëtëru' tuzu' Li' idútë
yödzölió

en ulu'zóa zxíbiguequi lo', Xantu' Dios.

84

1 ¡Bica' lachi gapa zoa cazu' Li', Dios!

¡Nacu' Xángaca ni'a no'o guizxi yu!

² Rizě ládxa'a soa' lu yu'u lidxu', Xana' Dios.
Lu yöl-la' rudzeja quia' idú ládxa'a rul-la' quiu' Li',
Dios ban.

³ Bidzöliba' biguínni chulí' lataj ga nuzóaba' lídxiba',
en bidzöliba' xiguichi guziú' ga budxíaba'
xicá'aba',
ga na' rigú'uba' biguínido' queéba',
gala' ga dē lu bucugu quiu' Li', Xángaca ni'a no'o
guizxi yu.

Nacu' Nu rinná be'e neda', en nacu' ca' Dios quia'.

⁴ ¡Bica' ba nupa ta'yaza lu yu'u lidxu'!
¡Ta'gú'utica'sö Li' yöl-la' ba!

⁵ ¡Bica' ba bönni' nápagaquië' yöl-la' nál-la le nequi
queë cazu',
en ta'zě ládxi'gaquië' ila'yu'ë nöza le ridxín yödzö
Sión!

⁶ Cate' ta'dödë' lu yu bidxi tunë' ga ruhuöáca gapa
ralaj nisa beaj.

Tun ga rizí' xibé yu bidxi na' yugu' nisa guiöj
ta'dxín bayön.

⁷ Lu yöl-la' huáca quégaquië' röjáquië', en tu'zírönë'
yöl-la' huáca.

Ta'dxinë' yúgu'tëgaquië' lo' Li', Dios, lu yödzö Sión.

⁸ Ruzé nagu' le rulidza' Li', Dios, Xángaca ni'a no'o
guizxi yu.

Ruzé nagu' neda', Dios queë' Jacob.

⁹ Buyúë' bönni' rinná bé'enë' netu', Dios.

Buyúë' bönni' na' nabö cazu'.

¹⁰ Nácarö dxi'a soa' tu dza lu yu'u lidxu' ca le soa'
idú chi gayuá' dza ga yúbölö.

Cõa' zí'alõ gaca' huen dxin ga nu riyaza yu'u lidxë'
 Dios
 ca le soa caza' tu yu'u zxõn ga biti' zoa Dios.

11 Náquië' Xanru' Dios ca gubidza, en le rusubín
 rë'u.
 Xanru' caz runnë' queëru' yõl-la' ruzá' ladxi' queë',
 en yõl-la' zxõn queë'.
 Biti' ugüë' nitú le naca dxi'a gapa nacuá' nupa tun
 le naca tsahui'.

12 ¡Li', Xángaca ni'a no'o guizxi yu,
 bica' ba bönni' ruzxõni lãdxë'ë Li'!

85

1 Buzá' lãdxu'u quégaca bõnachi quiu', Xantu' Dios.
 Buchë'u Li' zxi'ini xi'sóë' Jacob gula'dzunë'.
 2 Buniti lo' bõnachi quiu' ca naca xiguia' gula'baga'.
 Bucáchu'u yugu' dul-la' gulúngaca.
 3 Buzóa dxíu' yõl-la' rilé quiu'.
 Bugú' yõl-la' ridzá'a quiu'.
 4 Buzóa netu' xilátjatu' le yúbölö, Dios, Nu rusölá
 netu',
 en bíti'rö lenu' netu'.
 5 ¿Naru' tsaz ilenu' netu'?
 ¿Naru' tsaz ilenu' yugu' zxi'ini xsoatu'?
 6 ¿Naru' cabí usubanu' lãdxi'tu' le yúbölö,
 para udzeja lãdxi'lentu' Li' netu', bõnachi quiu'?
 7 Lu yõl-la' dxi'i ladxi' quiu' gúcalen netu',
 en busölá netu', Xan.
 8 Uzë naga' didza' gu'ë Xanru' Dios.
 Le guié' bõnachi queë' gun ga gaca dxi'a quéguequi,
 nupa na' nácgaca quez queë',

pero run bayúdx biti' ulu'huõa ládxi'gaca.

⁹ Le nácatë chizóë' usölë' nupa tun Lé' bal,
para soa yöl-la' ba queë' luyú queëtu'.

¹⁰ Dzágagaca yöl-la' dxi'i ladxi', en le naca idútë li.
Tagu zxixi luzë'eguequi nu naca tsahui', en nu
ribõza dxi'a tsáhui'do'.

¹¹ Luyú caz rilén le naca idútë li,
ate' yehua' yubá rirúaj le naca tsahui'.

¹² Le nácatë Xanru' unödzejë' queëru' le naca dxi'a,
ate' xiyuru' unödzej le uláparu'.

¹³ Le naca tsahui' röjnöru lahuë' Xanru',
en gun ga soa nõza gáti'tës ga ulibë'.

86

¹ Ruzé nagu', Xana' Dios, en rubí'u didza',
tu' zoa nu rusaca' zi' neda', ate' riyadzaj riyúdxida'.

² Ben chí'i bö' naca caza', Dios, tu' naca' quiu' Li'.
Busölá neda', huen dxin quiu', Dios quia', tu'
ruzxöni ládxa'a Li'.

³ Buzá' ladxi' quia', Xan,
tu' rulidza' Li' idú dza.

⁴ Ben ga udzeja ládxa'a neda', huen dxin quiu',
tu' rigu'a lu no'o bö' naca caza', Xan.

⁵ Nacu' dxi'a, Xan, en chizú' uniti lo' bönachi quiu'.
Nadxí'ítica'su' yúgu'të nupa tu'lidza Li'.

⁶ Ruzé nagu' le rulidza' Li', Xan,
en ruí'i ládxa'u gunu' yugu' le inábida' lo'.

⁷ Cate' bi gaca quia' ulidza' Li',
tu' ubí'i casu' didza' bi gunu' quia'.

⁸ Cúnturö nu zoa ládjagaca dios nu naca ca nacu' Li',
Xan,
en biti' zoa ia'tú nu run ca nácgaca le runu' Li'.

9 Ila'dxín bönachi yúgu'të yödzö naguixju' Li', Xana' Dios,

en ila'yéaj ládxi'gaca Li', en ilún zxön Lo'.

10 Nayépisëtërösu' Li', en tuzu' Li' runu' yugu' yölla' huáca zxön.

Tuzu' Li' nacu' Dios.

11 Busëdi neda' ca naca le rë'ënu' guna', Xan.

Guna' ca naca le naca idütë li naguixju' Li'.

Ben ga gádxida' Lo' idú ládxa'a.

12 Idú ládxa'a guía' Li': "Xclenu'", Xana' Dios,

en guna' zxön Lo' yugu' iz si' zaca.

13 Nadxí'ide'enu' neda',

en chibusöló' bö' naca caza' lu lataj chul-la ga nacuá' nupa chinátigaca.

14 Dios quia', nupa ta'dá'bagá' neda' ta'díl-lalen neda',

ate' yugu' bönni' zidzaj ladxi' tē'ēnē' ilútiē' neda',

yugu' bönni' na' biti' tunē' Li' bal.

15 Nacu' Dios ruhuéchi' ládxi'u netu', Xan, en ruzá' ládxi'u queētu'.

Ridzenu' para ilenu' netu', en nadxí'ide'enu' netu', en runu' ca rnna xtídzu'u.

16 Buyú neda', en buzá' ladxi' quia'.

Butipa ládxa'a neda', huen dxin quiu',

en busölá neda', zxi'ininu nigula huen dxin quiu'.

17 Bulu'i neda' tu le gaca bē' gaca dxi'a quia',

para ila'lé'e le nupa biti' ta'lé'e neda' dxi'a.

Ulu'tuí'i, tu' gúcalenu' neda',

en buē tsahú'u neda', Xan.

87

1 Nuzóē' Dios xilibi zō'ō que yödzö queē' lu guía' lá'ayi.

² Nadxí'irönë' Xanru' lataj ga na' tu'chi'a tu'sörö
bönachi Sión
ca nadxí'inë' ia'zíca'rö lataj gapa nacuá' bönachi
Israel.

³ Zián le lachi ta'nná bönachi ca naca
yödz na' nequi queë' Dios.

⁴ Cate' ulidza' bönachi núnbë'gaca neda', Dios,
ulidza' bönachi nníta'gaca Egipto, en Babilonia.
Ca naca quégaca bönachi Filistea, en Tiro, en
Etiopía

innía' nabábagaca yödzö lá'ayi na'.

⁵ Cate' gu'a didza' que yödzö Sión innía':
Bönachi ni, en bönachi izá'a ni nabábagaca le,
ate' neda', Dios nayépisëtëre', uzóa' tsutsu yödzö
na'.

⁶ Cate' ulabë' Xanru' nupa nácgaca queë' innë':
"Bönni' ni nababë' yödzö quia'."

⁷ Ní'irö ilu'i didza' nupa tul-la, en nupa tu'cödxí
gui, ila'ná:
"Ruzí'itu' xibé tuzi yödzö ni."

88

¹ Xana' Dios, Nu rusölá neda',
rulidza' Li' rëla, en te dza.

² Bë' lataj idxín lo' le rulidza' Li'.
Ruzé nagu' le rinaba yúdxida' Li'.

³ Ruúbi ruguí'i ládxi'da'ahua',
en chizóa tsöjtsázia' lataj chul-la.

⁴ Chinabábalena' nupa chinátigaca.
Naca' ca tu bönni' nudú dërö ládxi'ë,

⁵ en nagá'anë' cá'asö ladaj nupa chinátigaca,
en ca nupa dëgaca yeru ba,

nupa na' bíti'rö röjnenu',
en nusán no'o léguequi.

⁶ Nuzú' neda' tu lu yeru zila,
ga naca chul-la, en le nácada' zila.

⁷ Rilenu' neda',
en rusaca' zi'u neda' tu lu nísado' quiu'.

⁸ Nucuásu' yúgu'tē nupa núnbē'a.
Nunu' neda' ca tu le ta'guti bönachi.
Nadzuna', en biti' gaca irúaja'.

⁹ Tu' rigu'í rizáca'a nudú guiój lahua'.
Tu dza tu dza rulidza' Li', Xan.
Richisa na'a zaca' ga na' zu'.

¹⁰ ¿Naru' guntso' yugu' yöl-la' huáca zxön
para gácalenu' nupa chinátigaca?

¿Naru' ulu'yasa nupa yú'ugaca lataj chul-la,
en ila'gú'u Li' yöl-la' ba?

¹¹ ¿Naru' ulu'lu'í lahui yöl-la' dxi'i ladxi' quiu'
nupa nagáchi'gaca yeru ba?

¿Naru' ulu'lu'í lahui nupa yú'ugaca lataj chul-la
ca runu' ca rnna xtídzu'u?

¹² ¿Naru' gaca bē' le zxön runu' ga na' naca chul-la?
¿Naru' gaca bē' nacu' tsahui' ga na' cuntu nu bi
röjné?

¹³ Rulidza' Li' neda' para gácalenu' neda',
ate' yugu' zila ridxín lo' le rinábida' Li'.

¹⁴ ¿Bízx que nusán ládXu'u neda', Xan?
¿Bízx que rucachi' lo' lahua' neda'?

¹⁵ Rigu'í rizáca'a, en chizóa gátia' ga gudela' naca'
bí'ido'.

Réquida' zi' tu' ruxösu' neda', en rudú ládxa'a.

¹⁶ Nabága'a neda' yöl-la' rilé quiu',

ate' chizóa usuniti neda' le ruxösu' neda'.

¹⁷ Idú dza naca quia' ca nabaga' neda' nisa.

Nagú'ugaca neda' lé'ajlö yugu' nisa.

¹⁸ Nucuéasu' ga zoa' nu nadxí'i neda', enca' luzá'a.

Zóalensö le naca chul-la neda'.

89

¹ Gúl-latica'sa' ca naca yöl-la' dxi'i ladxi' quiu', Xan.
Usiyönda' zxí'ini xsoatu' ca runu' ca rnna xtídz'u.

² Gunnía': "Sóatica'sö yöl-la' dxi'i ladxi' quiu'.

Tsaz naca bë' yehua' yubá ca runu' ca rnna
xtídz'u."

³ Rnnë' Dios: "Naguixja' tsaz didza' dzaga núnlena'
nupa nabó caza' quia'.

Bena' tsutsu xtídz'a' ca guna' queë' David, huen
dxin quia'.

⁴ Gunnía': Ucuá'a tsaz zxí'ini xi'sú'.

Guna' ga sóatica'sö nu inná bë' uláz quiu'."

⁵ Nupa nacuéa' yehua' yubá quiu' ila'gú'u yöl-la' ba
le nunu' le tun ga rubánitu', Xan.

Ga nudúbigaca nupa nácgaca quez quiu' ila'gú'u
yöl-la' ba ca runu' ca rnna xtídz'u.

⁶ ¿Nuzxi caz zoa ni' yehua' yubá naca ca nacu' Li',
Xan?

¿Nuzxi caz zoa ladaj nupa nayëpisëgaca naca ca
nacu' Li', Xan?

⁷ Nupa nácgaca lá'ayi tun Li' bal, Dios.

Ral-la' gúnröru' Li' bal ca tun nupa nacuéa'len Li'.

⁸ Dios, Xángaca ni'a no'o guizxi yu, ¿nuzxi caz naca
ca nacu' Li', Xantu' nayëpisëtërou'?

Naca bë' rúntica'su' ca rnna xtídz'u.

⁹ Rinná be'e quëzinu' le riyasa ridxía que nísado'.

Cate' riyasa ridxía nísado', ruzóa cazu' le dxisö.

10 Busniti cazu' bönachi Egipto, ate' gulaca ca nupa chinátigaca.

Bësilásiu' léguequi len no'o nál-la.

11 Nequi quiu' yehua' yubá,

en nequi ca' quiu' luyú ni, tu' nuzóa cazu' léguequi.

12 Naguixaj cazu' le dë tsölá'a ga za' bö' ziaga,

en le dë tsölá'a ga ridödi gubidza beo' ziaga.

Lu yöl-la' rudzeja quéguequi ta'bödxi'a guí'a Tabor, en guí'a Hermón cate' ta'yöni Lo'.

13 ¡Nál-latërö naca no'o!

¡Nápatërö no'o yöl-la' huáca!

¡Nayëpisëtërö no'o ibëla!

14 Le naca dxi'a, en le naca tsahui' tun tsutsu le rinná bë'u.

Nacuá'len Li' yöl-la' dxi'i ladxi', en le naca idútë li.

15 Bica' bágaca nupa ta'yöni didza' que yöl-la' rudzeja.

Ta'dá lu bení' que lo', Xantu' Dios.

16 Idú dza tu'dzeja tu' zóalen Lo' léguequi,

en tu' zóalen léguequi le naca tsahui' quiu', le nayëpisëtërö.

17 Naca cazu' Li' yöl-la' zxön que yöl-la' huáca quéguequi,

en tu' ruzá' ládxu'u queétu' nazxönda' yöl-la' nál-la queétu'.

18 Nequi queë' Xanru' le run chi'i rë'u,

ate' néquinë' queë' Dios bönni' rinná bé'enë' rë'u.

Dios na' náquië' lá'ayi ladaj bönachi Israel.

- 19 Dza ni'te bé'lenu' nupa néquiguequi quiu' didza' lu yugu' le bulu'ínu' léguequi, gunnó': "Gúcalena' tu nu nayépisëtë'rö. Nuchisa' tu nu gurö caza' quia' ladaj bö'nachi.
- 20 Budzö'lida'-në' David, huen dxin quia'. Gulu'a-në' le za le naca lá'ayi quia'.
- 21 Len na' caza' naguixja' lë', ate' len na'a ca' utipa' ládxë'ë.
- 22 Biti' si' ye'e lë' nu rilé lë', en biti' usaca' zi' lë' nu ruá' dö'.
- 23 Uquínna'ja' lahuë' nupa ta'díl-lalen lë', en gu'a nupa biti' ta'lé'e lë' dxi'a.
- 24 Sóalena' lë' lu yöl-la' run ca rnna xtídza'a, en lu yöl-la' dxi'i ladxi' quia', ate' tu' ulidzë' La', uxöna' yöl-la' nál-la queë'.
- 25 Guna' ga inná bë'ë ga naguela' ra' nísado', ga idxintë ra' yegu Eufrates.
- 26 Ulidzë' neda', innë': Li' nacu' Xuza', en Dios quia', enca' Nu run chi'i neda', en Nu rusölá neda'.
- 27 Gun caza' neda' ga gáquië' ca bi'i lo queë caza', ate' tsépisëtë'rë' ca yugu' bönni' ta'nná bë'ë yödzölió.
- 28 Lu yöl-la' dxi'i ladxi' quia' gun chí'ítica'sa' lë', en uzóa' tsaz queë' didza' dzaga quia'.
- 29 Ucuá'a tsaz zxi'ini xi'sóë', ate' sóatica'sö lataj ga inná bë'ë, tsca soa yehua' yubá.
- 30 Channö ulu'cá'anë' zxi'ini xi'sóë' xibá quia', en cabí ilunë' ca naca le buchí'a busöröa',
- 31 en channö ila'guitsjë' xibá que le gunná bë'a, en cabí ilunë' ca nácagaca le gunná bé'eda' légaquië',

32 ní'irö guna' légaquië' xigua' ca sa'yéaj le ta'dödi
bë' tunë',

en gu'a léguequi ca naca xigua' nabága'gaquië'.

33 Pero biti' ugúa' queë' yöl-la' dxi'i ladxi' quia',
en biti' usana' guna' ca rnna le guzxi' lu na'a guna'.

34 Biti' ucá'ana' cá'asö didza' dzaga nuna',
en biti' utsá'a didza' bë'a.

35 Tu le nuzóa' tsutsu, en nuna' ba nalí que le naca
lá'ayi quia'.

Biti' ca' si' yé'eda' David.

36 Gunnía' ila'cuá'tica'së' zxi'ini xi'sóë',
en ga rö'ë rinná bë'ë sóatica'sö lahua' ca gubidza.

37 Naguixja' le tsaz ca nuzóa' tsaz beo',
ate' nacuá'tica'sö lúzxiba le tun ba nalí."

38 Pero nuzú' tsölá'alö, en nusán ládxi'u,
en riléde'enu' nupa na' gurö cazu' quiu'.

39 Nuzú' tsölá'alö didza' dzaga bénlenu' huen dxin
quiu'.

Nuzötju' luyú yöl-la' unná bë' queë'.

40 Nuquínnaju' zö'ö gulún chi'i lë',
en nusunítu' yugu' lataj tsutsu queë'.

41 Yúgu'të nupa ta'dödisö ta'bán le nequi queë',
ate' bönni' dzaga yu'u queë' tu'cá'ana lë' cá'asö.

42 Nuchisu' nupa ta'dá'baga' lë',
en runu' ga tu'dzeja nupa biti' ta'lé'e lë' dxi'a.

43 Runu' ga biti' sequi' idéli'në' lu gudil-la,
ate' cuntu nu sequi' ucul-lë' lu gudil-la na'.

44 Bugú' yöl-la' lachi queë',
en nuzötju' yöl-la' unná bë' queë' lu yu.

45 Benu' ga chinagulë' sal-la' ni zoë' iz cuidi',
en nunu' ga rutuí'inë'.

- 46 ¿Gáca'xte caz gunu' caní, Xan?
 ¿Naru' tsaz nucachi' lo'?
 ¿Naru' gácatíca'sö yöl-la' rilé quiu' ca tu guí
 réguide'e?
- 47 Yöjné nabábasö iz soa' ibana',
 en tu chí'isö nacuá' bönachi yödzölió ni.
- 48 ¿Nuzxi caz bönni' gaca sóaticá'së' ibanë', en cabí
 gátië'?
 ¿Naru' huáca usölá cuin cazë' lu yöl-la' unná bë' que
 lataj chul-la'?
- 49 ¿Gázxité zoa yöl-la' dxi'i ladxi' quiu' guzóa zí'alö,
 Xan,
 lë na' buzú' tsutsu xtídzu'u gunu' queë' David,
 len yöl-la' run ca rnna xtídzu'u?
- 50 Yöjné ca tu'cá'ana cá'asö netu', huen dxin quiu',
 Xan,
 enca' ca tu'cá'ana neda' cá'asö bönachi zían yödzö
 izá'a.
- 51 Tu'cá'ana neda' cá'asö nupa biti' ta'lé'e Li' dxi'a,
 Xan.
 Tu'cá'ana cá'asö yugu' le runa' neda', bönni' gurö
 cazu' quiu'.

- 52 ¡Yöl-la' ba Xanru' Dios iz si' zaca!
 ¡Ca' gaca! ¡Ön, ca' gaca!

90

- 1 Naca cazu' Li', Xan, ca yu'u lidxa'.
 2 Zí'atëlö ca gulata' yugu' guí'a, o ca guta' yödzölió,
 ga naguela' cate' gusí lo ga idxintë dza udxi, tsaz
 naca cazu' Dios.
 3 Runu' ga tu'huóaca bönachi bëchtö yu cate' rnno':
 "Guli'huóaca le néquinili', bönachi."
 4 Quiu' Li' chi gayuá' iz nácagaca

ca dza neje le chigudödi que,
o ca tu chí'isö chi'i dzó'ölö.

⁵ Bugacu' bönachi ca tu lu yegu gubó'o, ate' gúcagaca
ca tu yëla rineru'.

Cate' naca zila zéaj naca ca tu guíxi'do' rilentë luyú.

⁶ Cate' naca lahui' dza rizxõn, en rö' ni'a në'e,
pero cate' chiral-la, ricuadi', en ridödi que.

⁷ Rinítitu' tu' rilenu' netu',
ate' tu' ridzó'o ruúbi ruguí'itu'.

⁸ Nuzú' lo' xigua' nabága'tu',
en nubéaju' lu bení' quiu' dul-la' yu'u ládxi'do'otu'.

⁹ Tu' riléde'enu' netu' ridödi quégaca dza queëtu',
ate' chibú'u iz queëtu' ca tu le rinné ládxi'tu'.

¹⁰ Tsónnalalaj yu' chi ízisö zóatu' nabantu',
o channö nál-latu', huazóatu' idú tápalalaj iz,
pero runtu' dxin bayudxi, en ruhuí'initu' yugu' iz
na',

tu' ridödité quéguequi iz na', ate' uzá'atu'.

¹¹ ¿Nuzxi caz réajni'i tsca naca yöl-la' rilé quiu'?

¿Nuzxi caz nözi ca naca tsöbi yu'u nu na' rilenu'?

¹² Que læ ni na' busëdi netu' para guéquibe'etu' tsca
gácagaca iz zóatu',

para gácatu' bönachi ta'yéajni'i lo' Li'.

¹³ ¿Gáca'xte caz biti' huéchi' ládxi'u netu', Xan?

Buéchi' ladxi' netu', yugu' huen dxin quiu'.

¹⁴ Tu zila tu zila buluí'i netu' ca naca yöl-la' dxi'i
ladxi' quiu',

para gúl-latu' lu yöl-la' rudzeja queëtu', en uzí'itu'
xibé yugu' dza na'.

¹⁵ Ben ga udzėjatu' tsca chigulaca dza busaca' zi'u
netu',

en tsca gulaca iz biti' guca dxi'a queëtu'.

16 Buluí'i netu', yugu' huen dxin quiu', ca naca le
nunu',
en buluí'i xzí'initu' ca naca yöl-la' zxön quiu'.

17 ¡Buzá' ladxi' queétu', Xantu' Dios,
en ben ga irúaj dxi'a dxin runtu'!
¡Ön, ben ga gaca dxi'a lo' dxin runtu'!

91

1 Nu bönni' ruzxöni ládxe'ë Dios para gun chi'ë lë',
en rizi'ë Dios Nu napa idútë yöl-la' huáca, para
gácalenë' lë',

2 gaca guië' Xanru': "Nacu' Nu run chi'i neda', en
Nu ruzóa neda' tsutsu.
Nacu' Dios quia', ate' ruzxöni ládxa'a Li'."

3 Usölá cazë' Dios Li' lu du yalaj que nu rizön
bönnachi,
en lu yödzöhué' le rusuniti.

4 Usubáguë'ë li' ca rusubága'ba' böra yugu' börado'
queëba',
ate' gaca chi'u lu në'ë ca raca quégacaba' börado'
znan xílaba' yöjede.

Le run chi'i rë'u, en le ruzóa rë'u tsutsu naca yöl-la'
run ca rnna xtídzë'ë cheë'.

5 Biti' gádxinu' le run gadxi bönnachi chi'i dzö'ölö,
en bití' gádxinu' yaga lahui tuchi' tu'së bönnachi
lahui' dza,

6 en bití' gádxinu' yödzöhué' le rilén ga naca chul-la,
en bití' gádxinu' le naca xihui' le ruti bönnachi lahui'
dza.

7 Ilátigaca chi gayuá' bönnachi cuitu' li',
en ia'chí cö' chi gayuá' cuitu' ibëla,
pero bití' bi gaca quiu' li'.

8 Le nácatë yú iná'asu',

en ilé'enu' le rubí'i quégaca nupa tuá' dö'.
 9 Tu' nuzú'-në' Xanru' Nu run chi'i li',
 nuzú'-në' Dios nayépisëtèrè' Nu gácalen li',
 10 bití' bi gaca quiu' le cabí naca dxi'a,
 en nitú le naché' yödzöhué' bití' tsu'u lidxu',
 11 tu' cu'u cazé' Dios li' lu ná'agaquië' gubáz lá'ayi
 queë',
 para ilún chi'ë li' gátí'tës ga ridó'.
 12 Lu ná'agaquië' ila'chë'ë li',
 para cabí tsöjchégu'u guiöj.
 13 Uléaj ulibu' bédxi guixi', en bëla sínia'.
 Usunu' lè'e labu' bédxi guíxi'do', en bëla xitsiní'.
 14 Rnnë' Dios: "Nadxi'inë' neda', ate' que lë ni na'
 usölá' lë'.
 Uzóa'-në' tsaz xitsá'tërö tu' núnbë'ë La'.
 15 Ulidzë' neda', ate' ubí'a didza'.
 Sóalena' lë' cate' bi gaca queë'.
 Usölá' lë', en guna' lë' bal.
 16 Uzánda'a dza soë' ibanë',
 en uluí'ida'-në' ca gaca usölá' lë'."

92

1 ¡Bica' tsahui' naca rigú'utu' Li' yöl-la' ba, Xan,
 en rúl-latu' le tun Li' bal, Dios nayépisëtèrè',
 2 en rusiyöntu' bönachi yugu' zila ca ruhuéchi'
 ládxu'u netu',
 en ruluí'itu' lahui yugu' dzö' ca runu' ca rnna
 xtídzu'u!
 3 Rúl-latu' len yugu' bihuël-la,
 en rúl-latu' yugu' le lachi ca tul-la.
 4 Le zxön nunu' Li', Xan, run ga rudzéjatu',
 ate' ruzi'tu' xibé le núngaca lu no'ö.
 5 Bica' zxön nácgaca le nunu' Li', Xan.

Zxöntëro le rizá' ládXu'u gunu'.

⁶ Zoa tu le cabí gaca inözinë' bönni' nazxí icjë',
en biti' gaca tséjni'inë' bönni' canöz le.

⁷ Nupa nucá'anagaca Dios ila'yán ca ta'yán
guíxi'do',
en ulu'zì' xibé le tun nupa tuá' dö', pero ila'niti
tsaz,

⁸ tu' nayëpsëtëru' Li' tsaz, Xan.

⁹ Naca bë' le gaca quégaca nupa biti' ta'lé'e Li' dxi'a,
Xan.

Naca bë' ila'niti nupa biti' ta'lé'e Li' dxi'a.

Ulu'gá'ana cá'asö yúgu'të nupa tuá' dö'.

¹⁰ Nunu' ga nácatëra' nal-la ca nácaba' bëdxi.

Nagú'u neda' le za le run ga rudzëjada'.

¹¹ Ilé'e quézida' cate' uxicju' nupa biti' ta'lé'e Li'
dxi'a,

en yönda' cate' ila'bödxi yechi' nupa tuá' dö', nupa
na' ta'díl-lalen neda'.

¹² Ila'yán nupa nácagaca tsahui' ca ta'yán yaga zina'
ca'.

Ila'zxón ca ta'zxón yaga rő' gaca lu guí'a Líbano.

¹³ Nácagaca ca yaga nudá'gacu' ra' yu'u lidxu', Xan,
le ta'zxón lu lö'a lataj quiu', Dios queëtu'.

¹⁴ Cate' ni' yú'ugaca iz zían ila'bía le zxixi
quëguequi.

Ilácagaca tsutsu, en ila'cuá'tica'sö ya'a.

¹⁵ Caní gaca para gaca bë' náquië' tsahui' Xanru',
Nu run chi'i neda'.

Biti' bi zóalen Lë' le cabí naca tsahui'.

93

¹ ¡Rinná bë'ë Xanru'!

¡Nácuë' yöl-la' ba zxón queë'!

¡Nácuë' zxë' Xanru', en núguië' lë'ë yöl-la' unná bë'!

¡Nuzóë' tsutsu yödzölió, ate' biti' utá cuini!

² ¡Tsaz nuzú' tsutsu ga rö'u rinná bë'u, Xan,
en zóatica'su' Li'!

³ Riyasa ridxía nisa yugu' lu nísado', Xan.

Riyasa ridxía nisa, en ru'u bö que.

Riyasa ridxía nisa yugu' lu nísado', en yugu' lu
yegu.

⁴ Xanru' Dios yehua' yubá nápatërë' yöl-la' unná bë'
ca bö ru'u lu nísado' le riyön ca guziú' rinnë,
enca' ca le riyasa ridxía nisa lu nísado'.

⁵ Tsaz naguixju' xibá quiu', Xan,
ate' idú lá'ayi naca ga zoa cazu' Li'.
Caní zóatica'sö na'a dza, en dza si' zaca.

94

¹ Nacu' Dios, Xan, Nu ruzí' lëbi bönachi.

Buluí'i cuinu', Dios, Nu ruzí' lëbi.

² Ruchi'a rusöró cazu' yúgu'të bönachi.

Guzë, ate' len yöl-la' huáca zxön quiu' bubí'i
quégaca nupa tun ba zxön cuínguequi.

³ ¿Gáca'xte caz ulu'zí' xibé nupa tu'cá'ana Li', Xan?

¿Gáca'xte caz ulu'zí' xibé?

⁴ ¿Gáca'xte caz ilún ba zxön cuínguequi, en iluí'i
didza' zi'?

¿Gáca'xte caz ilún ba zxön cuínguequi ní'a que dö'
tuá'gaca?

⁵ Tu'sunítië' nupa néquiguequi quiu', Xan.

Tu'saca' zi'ë nupa néquiguequi quez quiu'.

⁶ Tútigaquië' nigula uzëbi, enca' yugu' bi'i uzëbido',
en tunë' le naca xihui' ladaj bönachi zi'tu'.

⁷ Ta'nnë': "Biti' ilé'enë' Xángaqueië' rë'u,

en biti' ru'i ládxe'ë Dios queë' Jacob lë ni."

⁸ Guli'tséajni'i, bönachi biti' nözguequi,
ate' libí'ili', bönachi catún bal, ¿bátaxi tséajni'ili'?

⁹ Benë' Dios guídi nágaru'. ¿Naru' cabí riyõn
quézinë'?

Benë' Dios guiõj loru'. ¿Naru' cabí rilé'e quézinë'?

¹⁰ Ruzéajni'i quézinë' Dios bönachi yúgu'të yõdzõ.

¿Naru' cabí gunë' léguequi xigua'?

Ruchiza cazë' icja ládxi'do'oru' yõl-la' réajni'i.

¿Naru' cabí réquibe'enë' bi runlí'?

¹¹ Nöz quézinë' Xanru' yugu' le ta'zá' ládxi'gaca
bönachi.

Nózinë' canõz naca le ta'zá' ládxi'gaca.

¹² Bica' ba bönni' na' ruzéajni'i quézinu'-në', Xan,
en rusedi quézinu'-në' ca naca xibá naguixju' Lí'.

¹³ Gunu' ga uzí' ládxe'ë cate' bi gaca queë',
ga idxinrõ dza tsú'ugaca yeru ba nupa tuá' dö'.

¹⁴ Biti' usán në'ë Xanru' bönachi queë',
en biti' ucá'anë' nupa néquiguequi quez queë'.

¹⁵ Ca naca le naca tsahui' uchi'a usörõë' rë'u le
yúbölõ,

ate' ulu'zí' xibé nupa nácagaca tsahui'.

¹⁶ ¿Nuzxi caz tíl-lalen nupa tuti bönachi para gácalen
neda'?

¿Nuzxi caz gácalen neda' cate' nacuá' nupa tuá' dö'
quia'?

¹⁷ La'tu' cabí gúcalenë' Xanru' neda',
la' yõjtsú'utea' lataj chul-la que yõl-la' guti.

¹⁸ Gunnía': "Chizóa' ibixa",
ate' lu yõl-la' dxi'i ládxi' quiu' guzxõnu' neda', Xan.

- 19 Cate' ruúbi ruguí'i ládxi'da'ahua',
 ruhué tsahú'u neda', en runu' ga rudzédada'.
- 20 Biti' ca' gunu' tsözxön nupa tu'chi'a tu'sörö netu'
 ca naca le cabí naca tsahui',
 nupa na' tu'béaj tsahui' le cabí naca tsahui'.
- 21 Tu'dubë' tsözxön para ilútië' nupa nácagaca
 tsahui',
 en ta'chúguië' quégaca nupa bití' bi nabága'gaca
 ilátigaca,
- 22 pero run chi'i cazë' Xanru' Dios neda'.
 Nuzóë' neda' tsutsu, ate' ruzxöni ládxa'a lë'.
- 23 Ubi'ë quégaquië' ca naca dö' tu'ë,
 en usunítië' légaquië' tu' nözi xigua'
 nabága'gaquië'.
 Usunítië' dërö Xanru' Dios légaquië'.

95

- 1 Guli'dá, gúl-laru' queë' Xanru' lu yöl-la' rudzeja
 queëru'.
 Lu yöl-la' rudzeja queëru' cödxí'aru' que Nu na'
 naca ca tu guiójtó'o ga nuláru'.
- 2 Uyéajru' lahuë', en guiëru'-në': "Xclenu'."
 Lu yöl-la' rudzeja queëru' cödxí'aru' lahuë', gúl-
 laru' yugu' salmo.
- 3 Xanru' Dios náquië' Dios nayëpisëtërë'.
 Nápatërë' yöl-la' unná bë' ca yúgu'të dios izá'a.
- 4 Lu na' cazë' yu'u le dë ga rë' zxan luyú,
 ate' néquiguequi ca' queë' guí'a sibi.
- 5 Nequi queë' nísado', tu' nun cazë' le,
 en len ná'asë' benë' luyú bidxi.
- 6 Guli'dá, gunru'-në' zxön, en uzóa zxíbiru' lahuë'.
 Uzóa zxíbiru' lahuë' Xanru' Nu ben rë'u.

- 7 Naca cazë' Lë' Dios queëru',
ate' nácaru' bönachi rugagu cazë', en ca bö'cu' zxila'
richë' cazë'-ba' lu në'ë.
Rnna cazë' Dios: "Na'a, channö ré'ënili' yönili'
chi'a,
- 8 bitì' gunli' zidzaj icja ládxi'do'oli' ca gulunë' xuz
xtó'oli' lataj na' lë Meriba,
en calëga ca gulunë' la' guixi' ga dë lataj lë Masa,
- 9 cate' ni' gula'zì' bë'ë xuz xtó'oli' neda'.
Gula'zì' bë'ë neda' sal-la' bila'lé'enë' yugu' le
bena'."
- 10 Idú choá' iz gúquida' zì' bönachi gula'cuá' dza ni',
ate' gunniá': "Ta'chixi ta'níguinë' lu icja
ládxi'do'gaquië',
en bitì' nözguequinë' le ré'ënda' ilunë'."
- 11 Que lë ni na' lu yöl-la' rilé quia' bena' tsutsu
xtídza'a,
gunniá': "Bitì' ca' ila'yázië' ga ulu'zì' ládxe'ë tsözxön
len neda'."

96

- 1 ¡Guli'gul-la queë' Xanru' tu le cubi!
¡Guli'gul-la queë' Xanru', yúgu'tëli' zóali' yödzölió!
- 2 ¡Guli'gul-la queë' Xanru'! ¡Guli'gún zxön lë!
- Tu dza tu dza buli'siyön bönachi didza' dxi'a ca
rusölë' rë'u.
- 3 Buli'siyön bönachi yúgu'të yödzö yöl-la' ba queë'.
Buli'siyön yúgu'të bönachi le nácacaca zxön nunë'.
- 4 Zxöntëro náquië' Xanru', ate' runda' bayúdx
cú'uru'-në' yöl-la' ba.
- Ral-la' gádxitëru' Lë' ca tadxi bönachi izá'a dios
quéguequi.

⁵ Yugu' dios quégaca bönachi izá'a nácagacasö budó'
guiöj budó' yaga,

pero Xanru' Dios nunë' lúzxiba xitsá'.

⁶ Nacuá' yöl-la' bení', en yöl-la' ba lahuë' Lë'.

Nacuá' yöl-la' huáca, en yöl-la' lachi ga zoa cazë'.

⁷ ¡Guli'cu'ë Xanru' yöl-la' ba, bönachi yúgu'të yödzö!

¡Guli'cu'ë yöl-la' ba, en yöl-la' huáca!

⁸ ¡Guli'cu'ë Xanru' yöl-la' ba ni'a que Lë'!

¡Guli'guá' le unödzjali', en guli'dá lahuë'!

⁹ ¡Guli'gún Lë' zxön, náculi' le naca ba'a!

¡Guli'zxizi lahuë', bönachi idútë yödzölió!

¹⁰ Guli'nná lógaca bönachi yúgu'të yödzö: "Rinná
bë'ë Xanru'.

Naguijé' tsaz luyú, ate' biti' utá cuini.

Ca naca le naca tsahui' uchi'a usöröë' quégaca
yúgu'të bönachi."

¹¹ Ral-la' udzeja lúzxiba, en ulu'zí' xibé luyú.

Ral-la' cödxi'a nísado', en ila'bödxi yúgu'të le nacué'
lu nísado'.

¹² Ral-la' udzeja guixi' caz, en yúgu'të le nacué' la'
guixi'.

Lu yöl-la' rudzeja quéguequi ilúl-la yaga

¹³ lahuë' Xanru', tu' si' ulé'.

Guídë' duchi'a dusöröë' nupa nacué' yödzölió.

Ca naca le naca tsahui' uchi'a usöröë' quégaca
yúgu'të bönachi,

enca' quégaca bönachi yúgu'të yödzö para ilunë' ca
rlna xtídzë'ë.

97

- ¹ ¡Rinná bē' cazē' Xanru' Dios!
 ¡Ral-la' ulu'dzeja bönachi idútē yödzölió!
 Buli'sí' xibé', libí'ili' zóali' yúgu'tē yödzö izá'a.
- ² Ró'gaca böaj, en le chul-la idú gásibi'ilö ga na' zoë'.
 Le naca dxi'a, en le naca tsahui' tu'zóa tsutsu le
 rinná bē'ë.
- ³ Rinöru tu guí' zxön lahuë',
 le uzegui' nupa ta'dá'baga' Lë'.
- ⁴ Tu'zení' le ta'yëpi yösa yödzölió.
 Rilé'e luyú lë ni, en rizzizi.
- ⁵ Tu'úna' guí'ado' ca ruún bidxina' buz lahuë'
 Xanru'.
 Náquië' Xani idútē yödzölió.
- ⁶ Lúzxiba xitsá' naca bē' náquië' tsahui',
 ate' ta'lé'e bönachi yúgu'tē yödzö yöl-la' zxön queë'.
- ⁷ Tu'tuí' yúgu'tē nupa tun zxön budó' guiöj budó'
 yaga,
 nupa na' tun ba zxön cuínguequi ni'a quégaca budó'
 quéguequi na'.
 Ulu'gá'ana cá'asö yúgu'tē dios quégaca bönachi
 izá'a lahuë' Xanru'.
- ⁸ Bila'yöni bönachi Sión, en bulu'dzeja,
 enca' yugu' xzí'ini xi'sóë' Judá.
 Tu'dzéjanë' ca ruchi'a rusöröu' netu', Xan.
- ⁹ Nayépisëtëro casu' Li', Xan, ca yúgu'tē nupa
 nacua' yödzölió.
 Nayépisëtëro casu' Li' ca yúgu'tē dios quégaca
 bönachi izá'a.
- ¹⁰ Núlöli' nadxí'ili'-në' Xanru', guli'guequi zi' le
 naca dö'.
 Run chi'i cazē' bö' nácagaca caz nupa néquiguequi
 queë'.

Rusölë' léguequi lu ná'agaca nupa tuá' dö'.

¹¹ Ruzení'tica'sö beni' queë' nupa ná'agaca tsahui',
ate' tu'zí' xibë' nupa ná'agaca dxi'a.

¹² ¡Buli'sí' xibë' Xanru' núlöli' nácali' tsahui'!
¡Buli'subán ládxi'li' ca nunë' Dios Lá'ayi, en
guli'cu'ë yöl-la' ba!

98

¹ ¡Guli'gul-la queë' Xanru' tu le cubi,
tu' nunë' le tun ga rubániru'!

Len yöl-la' unná bë' zxön queë', en yöl-la' huáca
lá'ayi queë' nadéli'në' lu gudil-la.

² Nunë' Xanru' ga naca bë' le nadéli'në'.

Nulu'inë' bönachi yúgu'të yödzö náquië' tsahui'.

³ Len yöl-la' dxi'i ladxi' queë', en yöl-la' li ladxi'
queë'

benë' ca rna xtídzë' le guzxi' lu në'ë gunë'
quegaca bönachi Israel.

Bila'lé'e bönachi idútë yödzölió ca busölë' rë'u Dios
queëru'.

⁴ ¡Lu yöl-la' rudzeja queëli' guli'gul-la queë' Xanru',
yúgu'tëli' zóali' yödzölió!

¡Idú ládxi'li' guli'cu'ë yöl-la' ba, en guli'gul-la queë'
le naca lá'ayi!

⁵ ¡Guli'gul-la queë' Xanru' yugu' salmo, en
guli'quinnaj yugu' bihuël-la!

¡Guli'quinnaj lé'egaca arpa, en guli'gul-la yöl-la' ba
queë'!

⁶ ¡Guli'cödxí lúzugacaba' chivo, en lúzugacaba' bëdxi'
lahuë' Xanru' Dios, Nu rinná bë'!

7 ¡Buli'lidza zidzaj, nísado', en yúgu'të le nacuá' nisa
na!
¡Guli'gul-la yödzölió, en yúgu'të nupa nacuá' ni!
8 ¡Guli'capa' ná'ali', yugu' yegu,
ate' lu yöl-la' rudzeja queéli' guli'gul-la lahuë'
Xanru', libí'ili', guí'ado',
9 tu' zë'ë duchi'a dusöröë' quégaca bönachi yödzölió!

Ca naca le naca tsahui' uchi'a usöröë' quéguequi,
en ca naca le naca dxi'a tsahui' inná bé'enë' yúgu'të
bönachi.

99

1 ¡Rinná bë'ë Xanru' Dios! Ta'zxizi yúgu'të bönachi.

Rö'ë rinná bë'ë ladaj nupa nápagacatëro yöl-la'
huáca,
légaca Querubín, ate' rizxizi luyú.

2 Nayëpisëtëre' Xanru' lu yödzö Sión,
ate' rinná bé'enë' bönachi yúgu'të yödzö izá'a.

3 Ral-la' ila'gú'u Lë' yöl-la' ba yúgu'të bönachi,
tu' caní sa'yéaj, en le run ga runru' Lë' bal.

¡Lá'ayi náquië' Lë'!

4 Nadxí'i quézinu' le naca tsahui', Li', Bönni' unná
bë' nayëpisë.

Tsaz naguixju' le naca dxi'a tsáhui'do',
en nuzú' quégaquië' zxí'ini xi'sóë' Jacob le naca
tsahui', en le naca idútë li.

5 ¡Guli'gún zxönë' Xanru' Dios!
Buli'zechu zxíbili' lahuë' Lë' ga rö'ë rinná bë'ë.
¡Lá'ayi náquië' Lë'!

⁶ Guláquië' Moisés, en Aarón bixúz queë',
ate' benë' Samuel tsözxön nupa gula'yéaj
ládxi'gaca Lë'.

Bulu'lidzë' Xanru', ate' bubí'i cazë' didza'.

⁷ Tu lu böaj bé'lenë' légaquië' didza'.

Gulunë' ca ta'nná bë' xibá queë', en yugu' le gunná
bé'enë' légaquië'.

⁸ Bubi'u didza' lógaca bönachi quiu', Xantu' Dios.
Bulu'ínu' légaquië' nacu' Dios, en runiti lo' bönachi,
pero rubi'u quégaquië' ca sa'yéaj dö' tu'ë.

⁹ ¡Guli'gún zxönë' Xanru' Dios!

¡Buli'zechu zxíbili' lahui' lo guí'a lá'ayi ga zoa cazë',
tu' náquië' lá'ayi Xanru' Dios!

100

¹ ¡Lu yöl-la' rudzeja queëli' guli'gul-la queë' Xanru',
libí'ili' zóali' idútë yödzölió!

² ¡Lu yöl-la' rudzeja queëli' guli'cu'ë yöl-la' ba
Xanru'!

¡Guli'dá lahuë' Lë', en lu yöl-la' rudzeja queëli'
guli'gul-la queë'!

³ ¡Guli'tsöjné Xanru', náquië' Dios!

Buzá' cazë' rë'u, en calëga rácasö queëru' zóaru'.
Nácaru' bönachi queë', en nácaru' ca bö'cu' xzila'
queë'.

⁴ Guli'tsaza zaca' ra' yu'u queë', guiëli'-në':
“Xclenu'.”

Guli'tsaza gapa naca lö'a queë', cú'uli'-në' yöl-la'
ba.

Guli'guië': “Xclenu'”, en guli'gunë' zxön.

⁵ ¡Náquië' dxi'a tsahui' Xanru' Dios, ate' zóatica'sö
 yöl-la' dxi'i ladxi' queë'!
 ¡Zóatica'sö yöl-la' run ca rnna xtídzë'ë queë'!

101

¹ ¡Gul-la' ca runu' ca rnna xtídzu'u, en ca nacu'
 tsahui'!
 ¡Gul-la' yöl-la' ba quiu' Li', Xan!

² Gü'i ládxa'a guna' le naca idú dxi'a.

¿Bátaxi huécju' quia' neda'?

Lu yu'u lidxa' guna' le naca idú ladxi'.

³ Biti' gu'a lataj sóalen neda' nitú le naca xihui'.

Biti' rilé'eda' dxi'a le tun nupa tu'cá'ana Li'.

Biti' ca' guna' léguequi tsözxön.

⁴ Biti' ca' gaca' chopá ladxi'.

Biti' ca' guna' le naca dö'.

⁵ Usunítia' dërö nu bönni' rinnë' que luzë'ë
 balándo'os.

Biti' ca' guá' ilena' nu run ba zxön cuini.

⁶ Uyúa' dxi'a tsáhui'do' nupa tun ca rnna
 xtídza'guequi luyú ni, para ila'cuá'len neda'.

Nu bití' bi xigua' nabaga' huáca gun xichina'.

⁷ Biti' ca' tsöjsóa lidxa' nu rizi' yë'.

Biti' gu'a lataj ugá'ana lahua' nu ru'i didza' le cabí
 naca.

⁸ Yugu' zila usunítia' yúgu'të nupa tuá' dö' luyú ni,
 para ucuíta' lu yödzo queë' Xanru' yúgu'të nupa
 tuti bönachi.

102

¹ ¡Buzë' nagu' le rulidza' Li', Xan!

¡Bë' lataj idxín lo' le rinaba yúdxida' Li'!

2 Biti' ucache' cuinu' lahua' cate' bi rusaca' zi' neda'.
 Buzě nagu' neda', en gudáchi ubi'u didza' cate' rulidza' Li'.

3 Yöl-la' na'bán quia' ruúlu ca dzön,
 ate' régui rilá lu dxita lu bin quia' ca tu guí'.

4 Rudú ládxa'a ca raca que guixi' nabadxi,
 en bíti'rö rizě ládxa'a bi gahua'.

5 Tu' rinnëda' ládxa'a nadxítalë'a.

6 Naca' ca tuba' biguínni zóaba' luyú bidxi,
 o ca tuba' cuturú dxíaba' tu lu yu'u nadachi.

7 Nabéaj yëla guiöj lahua',
 ate' naca' ca tuba' biguínido' dxíaba' túziba' ícjo'o yu'u.

8 Yugu' dza nupa biti' ta'lé'e neda' dxi'a tu'didza' yudxi neda'.

Nupa tu'titaj neda' tu'gún dxin la' cate' nu tu'dxía dö'.

9 Naca le rahua' ca dödo'sö,
 en nutsi' nisa ribödxá' le rë'ja'.

10 Caní raca quia' tu' rilenu' neda', en réquinu' neda' zi'.

Gulisu' neda', en gurú'unu' neda' tsölá'alö.

11 Naca yöl-la' na'bán quia' ca tu zxul-la rilá' cate' ribía gubidza,
 en rudú quia' ca raca que guixi' ricuádi.

12 ¡Li', Xan, zóatica'su',
 en zóaléntica'sö Lo' bönachi!

13 ¡Chasu', en huéchi' ládXu'u bönachi yödzo Sión!

¡ChibidXín dza gü'i ládXu'u léguequil!

¡Ön, chibidXín dza na'!

14 Netu', huen dxin quiu', nadxí'itu' yugu' guióǵ
nacuá' lu zö'ö run chí'i yödzö Sión,
en ruí'i ládxi'tu' ga ridxinté bëchtö rö'ö la' nöza que.

15 Bönachi yugu' yödzö izá'a iladxi Lë' Xanru',
ate' nupa ta'nná bë' yödzölió iladxi yöl-la' zxon
queë'.

16 ¡Nuchisë' Xanru' caz yödzö Sión,
ate' ulu'í'i lahuë' ni' lu yöl-la' zxon queë'!

17 Riyönnë' le tu'lidza Lë' nupa ta'yadzaj ta'yudxi.
Biti' ca' uzóë' tsölá'alö le tu'lidza yudxi Lë'.

18 Buli'zúaj lë ni lu guichi para ulu'laba zxi'ini
xi'sóali' le,
ate' nupa si' ilalaj ila'gú'u Xanru' yöl-la' ba.

19 Ga ni' ribözë' Xanru' xitsá' lu lataj lá'ayi queë',
ga ni' zoë' Xanru' yehua' yubá, ruzé naguë'.

20 Riyönnë' le ta'nnë' ladxi' nupa nadzúngaca,
en usanë' nupa narugu quéguequi ilátigaca.

21 Soa nu usiyöni bönachi yödzö Sión ca naca Lë'
Xanru',

ate' ila'gú'u Lë' yöl-la' ba lu yödzö Jerusalén,

22 cate' ulu'dubi tsözxön bönachi yugu' yödzö izá'a,
en bönachi yugu' luyú,

ate' tsözxön ila'gú'u yöl-la' ba Xanru'.

23 Benë' Xanru' ga gucuídi'da' la' nöza,
en nunë' ga soa' nabábasö dza.

24 Gunnía': Dios quia', biti' gútiu' neda'
cate' ni zoa' gatsaj iza ral-la' soa' ibana'.
Zóatica'sö casu' Li'.

25 Dza ni'te gudixju' yödzölió,
ate' len na' casu' benu' lúzxiba.

26 Huadödi quéguequi, pero Li', tsaz idi'u.
 Ilexu' yúgu'téguequi ca riyexu' lari',
 en ca tu lari' utubu' léguequi, en utsó'o léguequi.
 27 Li', biti' ca' utsá' cuinu', en biti' ca' guexu'.
 28 Zxí'inigaca huen dxin quiu' ila'böza dxi'a
 tsáhui'do',
 ate' ucú'u tsutsu zxí'ini xi'sóagaquië' lo'.

103

1 ¡Bil-la yöl-la' ba queë' Xanru', li', bö' naca caza',
 ate' idútë le naca', bil-la yöl-la' ba que Lë' lá'ayi!
 2 ¡Bil-la yöl-la' ba queë' Xanru', li', bö' naca caza',
 en biti' gal-la ládxi'u yúgu'të le ruzi'u xibë'!
 3 Runiti lo cazë' neda' ca naca yúgu'të dul-la'
 nabága'a,
 en rugüë' yúgu'të xihuë'a.
 4 Ruhuóá'uë' neda' lu lataj chul-la,
 en ruzá' ládxi'ë quia' yöl-la' dxi'i ladxi', en yöl-la'
 ruhuéchi' ladxi'.
 5 Rigu'ë xinöza' yugu' le naca dxi'a,
 lë na' run ga ruhuóáca' ca tu bönni' zoë' iz cuidi'
 queë',
 ca na' raca queëba' bisía'.
 6 Runë' yugu' le naca dxi'a,
 en ruchi'a rusöröë' quégaca yúgu'të nupa zoa nu
 rusaca' léguequi zí'.
 7 Buzéajni'inë' Moisés yugu' le gun cazë' Lë',
 en buluí'inë' bönachi Israel yugu' le zxön runë'.
 8 Xanru' ruhuéchi' ladxi' cazë' bönachi, en ruzá'
 ládxi'ë quéguequi.
 Biti' rilétenë', pero nadxí'itiqui'sinë' léguequi.
 9 Biti' ruzétiqui'sinë' rë'u le bach,

en biti' rilétiqui'sinë'.

¹⁰ Biti' runë' rë'u xigua' ca sa'yéaj dö' nuá'aru',
en biti' rubi'ë queëru' ca naca le xihui' nabága'ru'.

¹¹ Naca caní tu' ca na' naca xitsá'tërö lúzxiba ca
luyú ni,

la' canísö naca zxön ca nadxí'inë' Xanru' nupa
tadxi Lë'.

¹² Tsca nácatërö zi'tu' ga rilén gubidza ga ridxintë
ga ribía,

la' canísö rucuitë' yugu' le ta'bága'ru' Lë'.

¹³ Ca na' ruhuéchi' ládxë'ë xúzgaca cázabi' yugu'
zxí'inë',

la' canísö ruhuéchi' ládxë'ë Xanru' nupa tadxi Lë'.

¹⁴ Caní runë' tu' nözinë' le nácaru'.

Röjnenë' néquiniru' bëchtö yu.

¹⁵ Tsca nácacaca dza zóaru' nabanru',
nácagaca ca raca que xiyija guíxi'do'.

¹⁶ Cate' recaj bö', ruúlu runítisö xiyija na',
en biti' naca bë' ga na' guzóa.

¹⁷ Xanru', tsaz nadxí'inë' nupa tadxi Lë',
en runë' quégaca zxí'iniguequi le naca dxi'a.

¹⁸ Caní runë' quégaca nupa tun ca rnna xtídzë'ë,
en quégaca nupa tun ca rinná bë' xibá queë'.

¹⁹ Naguixjë' Xanru' xilatjë' yehua' yubá ga na' rö'ë
rinná bë'ë.

Rinná bé'enë' yúgu'të le dë.

²⁰ ¡Guli'cu'ë yöl-la' ba Xanru', libí'ili', gubáz lá'ayi
queë',

nápatëröli' yöl-la' huáca zxön, en runli' ca rnna
xtídzë'ë,

libí'ili' na' runli' ca rnna didza' ru'ë!

²¹ ¡Guli'cu'ë yöl-la' ba Xanru', libí'ili' nácali' ni'a në'ë
guizxi yu,

libí'ili', huen dxin queë' na', runli' ca r'ë'ni
 quézinë' Lë'!

22 ¡Guli'cu'ë yöl-la' ba Xanru', yúgu'tëli' na' nucu'ë
 libí'ili',

libí'ili' zóali' yúgu'të lataj ga na' rinná bë'ë Lë'!
 ¡Bil-la yöl-la' ba queë' Xanru', li', bö' naca caza'!

104

1 ¡Gulu'ë yöl-la' ba Xanru', li', bö' naca caza'!

¡Nayëpisëtëru' Li', Xana' Dios!

¡Zxo' nacu' naca yöl-la' zxön, en yöl-la' ba!

2 ¡Nusubaga' cuinu' bení' ca zxo' nacu' cazu',
 ate' naguixaj cazu' lúzxiba ca tu lari' zxön!

3 Naguixju' xilataj lidxu' lahui nisa dë xitsá'alö.
 Dxía cazu' lu böaj ca tu lu carreta, en ridó' lu bö'ös.

4 Rugunu' dxin bö' raca ca tu gubáz quiu',
 enca' yugu' guí' ca huen dxin quiu'.

5 Nuzú' tsutsu luyú ni lu xilibi,
 en bití' ca' gaca nu utsá' xilataj.

6 Gudixju' nisa zxön luyú ni ca tu lari' nabaga' le,
 ate' yöjbaga' nísado' na' yugu' guí'a.

7 Buzenu' le bach nisa na', ate' burúaj,
 en cate' biyön chi'u, bayúdx buzzunnaj nisa na'.

8 Gurén yugu' lu guí'a, en bötaj ga naca ra' yegu,
 ga bidxintë yöjsóa ga nupó'o que nisa na'.

9 Gudixju' buzá' que nísado' ga bití' gaca tódi.
 Bítí'rö caz tseajbaga' nisa na' luyú bidxi.

10 Runu' ga ralaj beaj yugu' l'e e guí'ado',
 enca' ga ta'dódi yegu ga rö'ögaca röga'.

11 Yudzu yugu' yegu na' nisa t'ë'ajba' böa' guixi',
 le rugúa yöl-la' ribídx quégacaba' burro ta'dásiba' la'
 guixi'.

12 Yugu' ra' yegu rō'ögaca yaga ga tu'dxiába'
biguínido' xcá'agacaba',
en túl-laba' yugu' lu ni'a ně'eguequi.

13 Rigú'u nisa guiōj quiu' yugu' lu guí'a,
en runu' ga tu'huöla tu'dzé'e yugu' le dzö'ö luyú.

14 Runu' ga rizxōn yö le táguba' böa' bēdx,
en yugu' cuan guixi' tu'gún dxin bōnachi,
le ilagu ni'a que le nudó'o luyú,

15 en xisi uva le run ga tudzeja lādxi'guequi,
en za olivo le ta'gú'u láhuiguequi lu yöl-la' ruzi' xibé
quéguequi,
en yōta le nabániguequi.

16 Tu'zi' xibé nisa guiōj yaga cedro dzö'ö lu guí'a
Líbano,
yugu' yaga na' budó'o, Xantu'.

17 Ni' tu'dxiába' biguínni xcá'agacaba',
ate' tunba' biyúz lídxigacaba' ni'.

18 Nunu' Li' yugu' guí'a sibi ga dzö'öba' bdxina'
guixi',
enca' yugu' zxan bulóaj gapa tapa chi'i cuíngacaba'
bizzidxu'.

19 Benu' beo' le naca bē' yugu' beo' que iz,
ate' ribía gubidza ga ral-la' cuía.

20 Benu' chi'i dzö'ölö, en cate' naca chul-la
ta'rúajba' ta'daba' böa' guixi'.

21 Ta'bōdxi'aba' bēdxi guíxi'do', ta'zóa régu'ba' le
ila'zōnba'.
Tu'guílajba' le nuzóë' Dios iláguba'.

22 Cate' rilén gubidza tu'dxinba' lídxigacaba',
en rōjōxagacaba' yugu' lu zxan bulóaj quégacaba'.

23 Ní'irö ta'rúaj bōnachi sōjaca huen dxin,
en tun caz dxin ga ridxintē ribía gubidza.

24 Xan, ziántērö yugu' le nunu' Li'.

Len yöl-la' réajni'i zxön quiu' nunu' yúgu'të.
 Nalí luyú yödzölió ni yugu' le dxi'a nunu'.

²⁵ Ni' zoa nisa nácatërö zxön,
 ga na' nacuá'aba' böa' guizxi yu,
 böa' cuidi', enca' böa' zxön.

²⁶ Ni' ta'dödi barco zxön,
 enca' böa' zxön læba' leviatán, böa' na' nuzóa cazu'.

²⁷ Yúgu'tëba' ta'bözaba' Li',
 cate' idxinrö ugagu' lézacaba'.

²⁸ Rugagu' lézacaba', ate' táguba'.
 Runödzu' le iláguba', ate' tu'huölej ta'dzé'eba'.

²⁹ Cate' ruhuecju' quiu', tádxiba',
 en cate' ruzi'u bö' quiu', tátiba',
 en ruhuóaca yu le néquinigacaba'.

³⁰ Cate' rigú'u lézacaba' bö', nabángacaba'.
 Rucubu' yúgu'të le nacuá' yödzölió.

³¹ ¡Ral-la' gácatica'sö yöl-la' ba queë' Xanru'!
 ¡Ral-la' ila'yaza ládxi'tica'sö bönachi le nun cazë' Lë'!

³² Ruyúë' Xanru' luyú, ate' rizxizi.
 Riganë' yugu' guí'a, ate' rirúaj dzön.

³³ ¡Gul-la' queë' Xanru' yúgu'të dza soa' ibana'!
 ¡Gul-la' yöl-la' ba queë' Dios tsanni ni zoa' nabana'!

³⁴ ¡Zxixi naca le rizá' ládxa'a ca naca queë'!
 ¡Udzéjalenda'-në' Xanru'!

³⁵ Ila'nítië' bönni' dul-la' nacu'ë yödzölió ni,
 en bíti'rö ila'cuá' nupa tuá' dö'.

¡Gulú'u yöl-la' ba Xanru', li', bö' naca caza'!
 ¡Yöl-la' ba Lë' Xanru'!

105

- ¹ ¡Guli'guié' Xanru' Dios: "Xclenu"!
 ¡Buli'lidzë' Lë'!
 ¡Buli'siyõn bõnachi ca nácagaca le benë'!
² ¡Guli'gul-la queë'! ¡Guli'gul-la yõl-la' ba queë'!
 ¡Guli'güí' didza' ca nácagaca le zxõn nunë'!
³ ¡Buli'sí' xibé Lë' lá'ayi!
 Ral-la' ulu'dzeja ladxi' yúgu'të nupa ta'guilaj
 Xanru'.
⁴ Guli'guiljë' Xanru', enca' yõl-la' huáca queë'.
 Guli'güí' ládxi'tica'sõ idxinli' lahuë'.
- ⁵ Guli'tsõjné le nácagaca zxõn benë' Lë',
 lë na' tun ga rubániru', enca' ca nácagaca didza' bë'ë
 cate' buchi'a busöröë' bõnachi,
⁶ libí'ili', zxí'ini xi'sóë' Abraham, huen dxin queë'
 Dios,
 en libí'ili', zxí'ini xi'sóë' Jacob, nácali' nupa gurõ
 cazë' queë'.
- ⁷ Lë' náquië' Xanru' Dios.
 Idütë yõdzõlió naca bë' ca buchi'a busöröë' bõnachi.
- ⁸ Röjnétiqúi'sinë' didza' dzaga nunë',
 didza' na' gunná bë'ë ila'zí' lu ná'agaquië' chi
 gayuá' cõ' zxí'ini xi'sóë' Abraham,
- ⁹ didza' dzaga na' bénlenë' Abraham,
 le naca didza' na' benë' tsutsu Dios ca gunë' queë'
 Isaac.
- ¹⁰ Ní'irõ benë' tsutsu didza' na' lahuë' Jacob,
 le naca tu le rinná bé'enë' lë' gunë',
 para gaca quégaca bõnachi Israel tu didza' dzaga le
 zoa tsaz.
- ¹¹ Gunnë': "Gonna' queëli' xiyúgaca bõnachi
 Canaán,
 le guequi tsaz queëli', en quégaca zxí'ini xi'sóali'."

- 12 Caní gunnë' Dios cate' ni' gula'cu'ë nabábagaquië'
bönni' Israel.
Tu chópasë' guláquië', en guláquië' bönni' zi'tu' luyú.
- 13 Gula'dë' tu ia'tú yödzo izá'a.
Bulu'zë'ë tu ga nu gunná bë', en bila'dxínë' ga
nacuá' bönachi izá'a,
- 14 pero biti' bë'ë lataj Dios nu usaca' zi' bönachi
queë' na',
en buzenë' le bach bönni' gula'nná bë'ë para
gulácalenë' bönachi queë'.
- 15 Gunnë': "Biti' bi gunli' quégaca bönachi nabö
caza' quia',
en biti' bi dö' guá'ali' quégaquië' bönni' tu'ë didza'
uláz quia'."
- 16 Benë' ga guyú'u gubín yödzölió,
en benë' ga biyadzaj yöta ilahuë'.
- 17 Gusöl-lë'ë tubi' bi'i bönni', bi'i bidxinbi' ni' zí'alö
ca légaquië',
tu' gulúti'ë-bi' José para gácabi' bi'i nadó'o.
- 18 Gulúgui'ë bönni' Egipto ní'abi' len du guié,
en bulu'dë'ë yen ná'abi' bregui' guié,
- 19 ga bidxintë dza budxín xtídzë'ë Xanru',
tu' guzxí' bë'ë Xanru' Dios José na'.
- 20 Ní'irö gusöl-lë'ë bönni' gunná bë'ë luyú Egipto
nu busán-bi'.
Bönni' na' gunná bé'enë' yödzö izá'a zían busölë'-
bi'.
- 21 Benë' ga gúcabi' xan yu'u queë',
ate' guta' lu ná'abi' yúgu'të le dë queë' bönni' na'
rinná bë'ë.
- 22 Guta' lu ná'abi' gulú'ubi' lidxi guié bönni' ta'nná
bë'ë tsca rë'ëni quézibi',
para busédibi' bönni' gula queë' yöl-la' réajni'i.

- 23 Ní'irö bila'dxín ca' bönachi Israel luyú Egipto.
Caní guca, guzóë' Jacob lu xiyúgaca zxí'ini xi'sóë'
Ham.
- 24 Benë' Dios ga gula'yántërö bönachi queë' luyú ni',
ate' guláquië' ziántërë' ca nupa gula'díl-lalen
légaquië'.
- 25 Benë' Dios ga gulunë' zi' bönni' Egipto bönachi
queë'.
- Lu yöl-la' banís quégaquië' gula'zí' yé'enë' nupa na'
nácagaca huen dxin queë' Lë'.
- 26 Ní'irö gusöl-lë'ë Moisés, huen dxin queë',
lógaquië',
enca' Aarón, bönni' na' nabö cazë' Lë'.
- 27 Gulunë' chopë' ni' zían yöl-la' huáca zxön queë'
Dios lógaca bönachi Egipto na'.
- Gulunë' zían yöl-la' huáca que yehua' yubá lu
xiyúgaca zxí'ini xi'sóë' Ham.
- 28 Gusöl-lë'ë Dios le naca chul-la, ate' böáca chul-la
lahui' dza,
en bití' guca ila'dá'baguë'ë xtídzë'ë.
- 29 Benë' ga nisa yegu nacuá' lu yegu quégaquië'
böáca rön,
en benë' ga gulátiba' böla dzö'öba' yugu' yegu na'.
- 30 Gula'yanba' riu lu xiyúgaquië',
ga bidxintë gula'yázaba' yu'u lidxë' bönni' rinná
bé'enë' légaquië'.
- 31 Bë'ë didza' Dios, ate' gulátsjaba' bõtsugayu guizxi
yu,
en gulátsjaba' ca' bö'iyudo' idútë lu xiyúgaquië'.
- 32 Benë' ga gurö'ö guiöj bögui' yöla sunna uláz que
nisa guiöj,
ate' böxaj ca' guí' lu xiyúgaquië'.

33 Guditsjē' yugu' lubá uva quégaquiē', en yugu' yaga higo,
en busunítiē' yaga rō'gaca lu xiyúgaquiē'.

34 Bē'ē didza', ate' bila'dxinba' bōchi'zu guizxi yu,
enca' bōchi'zu hué'enido', cuntu nu gaca ulaba légacaba',

35 ate' guláguba' idútē guixi' cuan rō'ō lu xiyúgaquiē',
en guláguba' ca' idútē le naz nudá'agaquiē' lu xiyúgaquiē'.

36 Benē' ga gulátibi' yúgu'tēbi' bi'i bōnni' lo idútē lu xiyúgaquiē'.

Bi'i lo na' quégaquiē' bōnni' nál-la.

37 Ní'irō bubéajē' Dios yugu' bōnni' Israel luyú na',
nuá'agaquiē' dumí plata, en oro,
ate' cuntu nu yōjchegu' nu nutsa' légaquiē'.

38 Bulu'dzeja bōnachi Egipto cate' bulu'z'é bōnni' Israel lu xiyúgaquiē',
ate' guladxi gula'dzöbi tu' nōziguequinē' bōnni' Israel na'.

39 Gusöl-lē'ē Dios tu böaj le gulú'u bōnachi queē' zzul-la,
ate' chi'i dzö'ölö gusöl-lē'ē guí' le buzení quégaquiē'.

40 Gula'nábinē' Lē', ate' gusöl-lē'ē bōra guíxi'do' zían le ilahuē',
en benē' ga bulu'huólaj gula'dzé'enē' yōta que yehua' yubá.

41 Bulu'ē lahui tu guiójtō'o, ate' gulalaj nisa yégudo'.

Gudödi nisa na' luyú bidxi ni' ca tu nisa yegu gubó'o.

42 Caní benē' Dios tu' yōjnenē' didza' lá'ayi queē',

le guzxi' lu nē'ē gunē' queē' Abraham, huen dxin queē'.

43 Bubéajë' bönachi queē' lu yöl-la' rudzeja quéguequi,

ate' lu yöl-la' rudzeja quéguequi gula'bödxi'a bönachi gurō cazë' queē'.

44 Bunödzejë' xiyúgaca bönachi yugu' yödzö izá'a quégaquië'.

Bulu'zi'ë xibé le ilá' luyú ni'a que dxin gulún bönachi izá'a na'.

45 Caní benë' Dios para ilunë' ca rnna le gunná bé'enë' légaquië' ilunë',

en ilunë' ca rinná bē' xibá gudixjē' Lē'.

¡Guli'cu'ë yöl-la' ba Xanru'!

106

1 ¡Guli'cu'ë yöl-la' ba Xanru'!

¡Guli'guië' Xanru': "Xclenu'" tu' náquië' idú dxi'a!

¡Zóatica'sö yöl-la' dxi'i ladxi' queë'!

2 ¿Nuzxi caz gaca quixjö' ca nácagaca le zxön nunë' Xanru',

en ulu'i lahui ca naca yöl-la' ba queë'?

3 ¡Bica' ba nupa tun le naca tsahui',

nupa na' túntica'sö le naca dxi'a!

4 Yöjné neda', Xan, cate' ruzá' ládxi'u quégaca bönachi quiu'.

Buzá' ladxi' quia' yöl-la' rusölá quiu',

5 para gaca ilé'eda' gata' yöl-la' tsahui' quégaca nupa narō cazu' quiu',

en para gaca udzéalenda' bönachi quiu' cate'
tu'dzeja,

en para gaca uzí'lena' xibé nupa néquiguequi quiu'.

⁶ Nuntu' dul-la' ca gulunë' xuz xtó'otu'.

Biá'atu' dö', en bentu' le naca xihui'.

⁷ Cate' gula'cu'ë xuz xtó'otu' luyú Egipto,

biti' gula'yéajni'inë' le nácgaca zxön benu'.

Biti' yöjnéguequinë' yugu' le benu' quégaquië' lu yöl-
la' dxi'i ladxi' quiu',

pero gula'dá'baguë'ë xtídz'u cate' gula'cu'ë ra'
nísado' lë Nísado' Xiná.

⁸ Busölë' Xanru' Dios légaquië' para gaca bë' runë'
ca rnna xtídzë'ë,

en para ulu'e lahui yöl-la' huáca zxön queë'.

⁹ Caní guca, buzenë' le bach Nísado' Xiná na', ate'
la' gubídxitë.

Guchë'ë légaquië' ga rë'do' lu nísado' na',

ate' gula'dé' lu yu bidxi ga na' gurö'ö nisa.

¹⁰ Caní guca, busölë' légaquië' lu na' nu na' benë'
légaquië' zi',

en buá'uë' légaquië' lu na' nu na' gudíl-lalen
légaquië'.

¹¹ Ní'irö gubaga' nísado' na' nupa gula'sí regu'
légaquië'.

Cuntu nu bugá'ana nu bidzaga léguequi.

¹² Ní'irö gula'yéajlë' bönachi queë' xtídzë'ë,

ate' gulul-la yöl-la' ba queë'.

¹³ Pero la' gulál-latë ládxi'gaquië' yugu' le benë'.

Biti' gula'nábinë' Lë' uluí'inë' légaquië' le ral-la'
ilunë'.

¹⁴ Zián le gula'zë ládxe'ë cate' ni' gula'cu'ë la' guixi'
ga dë lataj,

en gula'zì' bē'ē Dios la' guixi' na'.

15 Ní'irō bē'ē Dios quégaquiē' le gula'nábinē' Lē',
pero gusōl-lē'ē quégaquiē' tu yōdzōhuē' le bēti
ziángaquie'.

16 Cate' bulu'zxé'enē' Moisés ga ni' gula'cu'ē
tsōzxōn,
en bulu'zxé'enē' ca' Aarón, bönni' nubéajē' Xanru'
quez queē',

17 la' ná'asō guyalaj luyú, en bucachi' Datán.
Bucachi' ca' nupa gulún tsōzxōn Abiram.

18 Gulaj tu guí' zxōn ga na' nudúbigaquiē',
en buzegui' nupa na' guluá' dö'.

19 Lu guí'a Horeb gulunē' tu bēdxido' néquiniba'
oro,
en gula'yéaj lādxē'ē budó' oro na'.

20 Caní guca bulu' cá'anē' Dios nayēpisētērē',
para gula'yéaj lādxē'ē budó' oro le naca ca tu bēdxi
ráguba' guixi'.

21 Gulal-la lādxē'ē Dios Nu busólá légaquiē'.
Lē' benē' zían le zxōn le gulácalen légaquiē' luyú
Egipto.

22 Benē' zían le tun ga rubániru' lu xiyúgaca zxí'ini
xi'sóē' Ham,
en zían le tun ga rádxiru' Lē' le benē' ra' Nísado'
Xiná.

23 Que lē ni na' gunnē' Dios usunítiē' légaquiē', ate'
la' cá'asō gunē'
la'tu' cabí guzuínē' Moisés, bönni' rō queē', lahuē'
Lē',
en buzóa dxíē' yōl-la' rilé queē' para cabí usunítiē'
légaquiē'.

24 Ní'irō biti' gulē'enē' ila'yáziē' luyú dxi'a na' dē
lógaquiē'

tu' cabí gula'yéajlë'ë xtídzë'ë Dios.

²⁵ Gula'nnë zi'ë queë' Dios gapa naca lu yu'u guídi
quégaquië',

en bití' bulu'zë náguië' chí'ë Xanru'.

²⁶ Que lë ni na' benë' tsutsu Dios xtídzë'ë le bé'lenë'
légaquië',

gunné' gunë' ga ilátië' ga na' naca la' guixi' ga dë
lataj.

²⁷ Gunnë' gunë' ga ilasi lásië' xzí'ini xi'sóagaquië'
ladaj zían yödzo izá'a,

en gúsië' légaquië' gapa nacuá' bönachi zi'tu'.

²⁸ Ní'irö bulu'dödi cúngaquië' lu na' budó' guië lë
Baal-peor,

en gulahuë' xipëla'gacaba' böa' guixi' gulútië'-ba'
para gulunë' zxön yugu' dios nati.

²⁹ Ca' guca, gulún lenë' Dios ni'a que le gulunë',
ate' gulén tu yödzöhuë' zxön ládjagaquië'.

³⁰ Ní'irö guzuínë' Finees, en benë' le raza ládxë'ë
Dios,

ate' guzóa dxi yödzöhuë' zxön na'.

³¹ Buzóë' Dios queë' Finees na' náquië' tsahui' ni'a
que

lë na' benë' le nuzóë' tsaz ca naca queë'.

³² Lësca' gulún lenë' Dios ga na' zoa nisa lë Meriba,
ate' Dios gulënë' Moisés tu' nözi lë na' gulunë'

³³ tu' gula'dá'baguë'ë xtídxë'ë Bö' Lá'ayi queë',
ate' Moisés, lu yöl-la' ridzá'a queë', gunné lizë'.

³⁴ Bití' bulu'sunítië' bönachi tuá' dö' gula'cuá' lu yu
ni,

ca na' gunná bé'enë' Xanru' légaquië' ilunë'.

³⁵ Gulunë' léguequi tsözxön

en bila'zëdë' ilunë' ca gulún bönachi na',

36 ate' gula'yéaj ládxe'ë budó' guiöj budó' yaga
 quéguequi,

le guca quégaquië' ca tu du yalaj le guzxön légaquië'.

37 Gulútië'-bi' xzí'inigaquië' lógaca bö' xihui',

yugu' bi'i bönni', en nigúlado',

38 en bulu'laljë' xichöngaca nupa biti' bi
 nabága'gaca

tu' bulu'laljë' xichöngacabi' bi'i bönni' quégaquië',
 en bi'i nigula quégaquië',

yugu' bi'i na' gulútië'-bi' lógaca budó' guiöj budó'
 yaga nacua' luyú Canaán,

ate' gúcada' xihui' luyú ni tu' nözi rön na' bulu'laljë'.

39 Ca' guca, guláquië' xihui' ni'a que le gulunë'.

Guláquië' ca tu nigula udá dzaga tu' bulu'cá'anë'
 Dios quégaquië'.

40 Que læ ni na' guléde'enë' Xanru' Dios bönachi
 queë',

en biti' bilé'enë' dxi'a nupa na' néquiguequi queë'.

41 Ní'irö budödë' légaquië' lu ná'agaca bönachi zían
 yödzö izá'a,

ate' nupa bulu'dí'i légaquië' gula'nná be'e légaquië'.

42 Nupa na' biti' bila'lé'e légaquië' dxi'a gulunda'
 légaquië' dxin,

en bulu'zxicaj légaquië' lu yöl-la' unná bë'
 quéguequi.

43 Zían luzuí gú'unë' Dios usölë' légaquië',

pero gula'dá'baguë'ë le ré'ënë' ilunë',

ate' guzxöntëro xigua' nabága'gaquië'.

44 Bilé'enë' Dios yöl-la' bayechi' quégaquië'

en biyönnë' ta'bödxi yechë'ë.

45 Yöjnenë' didza' dzaga núnlenë' légaquië',

ate' bubequi lahuë' quégaquië' tu' nazxöntëro yöl-
la' dxi'i ladxi' queë'.

46 Benë' Dios ga bulu'huéchi' ladxi' légaquië'
nupa na' gula'chë' légaquië' nadzúngaquië'.

47 ¡Busölá netu', Xantu' Dios!
Guléaj netu' ladjagaca yödzö izá'a
para guíëtu' Li: "Xclenu" ni'a que Lo' lá'ayi,
en lu yöl-la' rudzeja zxön queëtu' cú'utu' Li' yöl-la'
ba.

48 ¡Yöl-la' ba Lë' Xanru', Dios quégaca bönachi Israel
na'a dza, en yúgu'të dza si' zaca!
Ral-la' ila'nná yúgu'të bönachi: "¡Ca' gaca!
¡Guli'cu'ë yöl-la' ba Xanru' Dios!"

107

1 ¡Guli'guíë' Xanru': "Xclenu" tu' náquië' dxi'a,
en tu' zóatica'sö yöl-la' dxi'i ladxi' queë'!

2 Ral-la' ila'nná caní nupa na' buá'uë' Xanru',
nupa na' buá'uë' lu ná'agaca nupa gulún léguequi
zi',

3 en nubéajë' léguequi zían lu yödzö izá'a,
saca' ga rilén gubidza, en saca' ga ribía,
saca' ga za' bö' ziaga, en saca' ga ridödi gubidza
beo' ziaga.

4 Bal-lë' gula'dë' nanítigaquië' la' guixi' ga dë lataj,
en ga ni' bití' zoa nöza.

Bití' guca ulu'dzölinë' tu yödzö ga gaca tsöjcu'ë.

5 Gula'dunë', en gula'bidxë' nisa,
en gudú ladxí'gaquië'.

6 Ní'irö lu lë na' raca quégaquië' bulu'lidzë' Xanru',

ate' busölë' légaquië' lu zían le gula'guíi
gula'záquë'ë.

7 Guchë'ë légaquië' tu la' nöza tsahui',
en guchë'ë légaquië' tu lu yödzo ga tsöjcu'ë.

8 Ral-la' ilë' Xanru': "Xclenu" tu' nadxí'inë'
légaquië',
en tu' benë' yugu' le zxön, gúcalenë' légaquië'.

9 Rugui'jë' nupa ta'bidxi ladxi',
en rugahuë' nupa ta'dún le nácagaca dxi'a queë'.

10 Bal-lë' gula'cu'ë ga chul-la, en ga zoa bönadxi
ilátië'.
Gula'dzunë' yugu' lu du guíë, en gula'guíi
gula'záquë'ë

11 tu' gula'dá'baguë'ë xtídzë'ë Xanru' Dios,
en bulu'zóë' tsólá'alö le rigu'ë icja ládxi'do'gaquië'.

12 Tu' gulunë' bayúdx dxin, gudú ládxi'gaquië'.
Gula'dzö'ë lu yu zxan yua' nuá'agaquië',
ate' cuntu nu zoa gácalen légaquië'.

13 Ní'irö lu lë na' raca quégaquië' bulu'lidzë' Xanru',
ate' busölë' légaquië' lu zían le gula'guíi
gula'záquë'ë.

14 Bubéajë' légaquië' ga na' gula'cu'ë ga chul-la,
en ga guzóa bönadxi ilátië',
ate' guditsjë' yugu' du guíë núga'gaquië'.

15 Ral-la' ilë' Xanru': "Xclenu" tu' nadxí'inë'
légaquië',
en tu' benë' yugu' le zxön, gúcalenë' légaquië'.

16 Ruquínnajë' le tá'baga' gapa nu riyaza lidxi guié
le néquiniguequi guié bronce,
en ruzxuzxjë' yugu' vara néquiniguequi guié.

17 Bal-lë' gula'guí'i gula'záquë'ë tu' gula'dá'baguë'ë
Dios,
en tu' nözi dö' gulu'ë.

18 Gula'gúti'në' bíti'tës la' huagu,
en gula'zóa ilátië'.

19 Ní'irö lu lë na' raca quégaquië' bulu'lidzë' Xanru',
ate' busölë' légaquië' lu zían le gula'guí'i
gula'záquë'ë.

20 Gusöl-lë'ë quégaquië' xtídzë'ë, en bunë' légaquië',
en busölë' légaquië' lu yöl-la' guti.

21 Ral-la' ilë' Xanru': "Xclenu" tu' nadxí'inë'
légaquië',
en tu' benë' yugu' le zxön, gúcalenë' légaquië'.

22 Ral-la' ilë' Dios: "Xclenu", en bi ulu'nödzejë'
queë',
en lu yöl-la' rudzeja quégaquië' ilul-lë' ca nácagaca
le nunë'.

23 Bal-lë' gula'dödë' lahui nísado' yugu' lu barco
zxön,
en gulunë' dxin yugu' lu nísado'.

24 Bila'lé'enë' yugu' le nunë' Xanru',
en yugu' le zxön nucu'ë lu nísado'.

25 Bë'ësë' didza', ate' guyecja bö' budunu',
ate' guyasa gudxía nísado'.

26 Gula'yasa barco ca tu lu guí'ado' nisa,
en la' bótjatë ga rö'ö röga' lu nisa na'.

Tu' guzóale'e bönadxi ilátië' gudú ládxi'gaquië'.

27 Gula'zxízië', en yöjchëgu'gaquië' ca bönni'
ta'zúdxinë',
ate' nítisö guca yöl-la' rácada' quégaquië'.

28 Ní'irö lu lë na' raca quégaquië' bulu'lidzë' Xanru',
ate' busölë' légaquië' lu zían le gula'guíi
gula'záquë'ë.

29 Benë' Dios ga guzóa dxisö bö' budunu' na' recja,
ate' guzóa dxi le rasa ridxía lu nísado'.

30 Bulu'dzéjanë' tu' guzóa dxi lu nísado',
en tu' guchë'ë Dios légaquië' dxi'a tsáhui'do' ga na'
söjáquië'.

31 Ral-la' ilë' Xanru': "Xclenu" tu' nadxí'inë'
légaquië',
en tu' benë' yugu' le zxön, gúcalenë' légaquië'.

32 Ral-la' ulu'lu'ë lahui yöl-la' zxön queë' ga
nudúbigaca bönachi queë',
en ila'gu'ë Lë' yöl-la' ba ga nudúbigaquië' bönni' gula
tu'chi'a tu'söröë'.

33 Runë' Xanru' Dios ga tu'huíi dërö yugu' yegu,
enca' yugu' beaj nisa.

34 Ga naca yu ya'a runë' ga ruhuöáca yu bidxi,
ni'a que le xihui' nabága'gaca nupa nacué' ni'.

35 Ga naca yu bidxi runë' ga ruhuöáca yu nabisa,
ate' ralaj nisa ga bití' bi nisa guzóa.

36 Ní' ru'ë lataj ila'cuá' nupa ta'dún
para ilunë' ni' yödzö ga ila'cu'ë.

37 Tazë' yugu' le tazë', en tu'dë'ë yugu' lubá uva,
yugu' le ta'bía yödxí yana'.

38 Runë' Xanru' ga raca dxi'a quégaquië',
 en ga ta'cuá'bi' zíanbi' bi'i quégaquië',
 en runë' ga ta'yanba' böa' bëdxi quégaquië'.

39 Cate' yugu' bönni' unná bë' zi'tu' tu'zxicjë'
 bönachi queë',
 en tu'zötjë' léguequi,
 en tu'saca' zi'ë léguequi, en tu'ë dö' quéguequi,

40 rucá'anë' Dios bönni' na' dë lu ná'agaquië' cá'asö,
 en runë' ga ta'dë' la' guixi' ga dë lataj, en tu luyú
 bidxi.

41 Rusölë' yugu' bönni' yechi' lu le ta'guí'i ta'záquë'ë,
 en runë' ga ta'yanbi' zxí'inigaquië' ca ta'yanba'
 bö'cu' zxíla'do'.

42 Ta'lé'e lë ni nupa nácgaca tsahui', en tu'dzeja,
 pero biti' bi ta'nná nupa tuá' dö'.

43 Nupa ta'yéajni'i ral-la' sa' ládxi'gaca ca nácgaca
 lë ni,
 ate' iléquibe'e náquië' Xanru' Dios dxi'i ladxi'.

108

1 ¡Chinabá'a quia', Dios!

¡Gul-la' quiu'! ¡Ön, idú ládxa'a gul-la' yöl-la' ba quiu'!

2 ¡Guli'bán, libí'ili' riguínali' bihuël-la!

¡Gúl-laru' cate' ni' ritó yu!

3 ¡Guía' Li': "Xclenu" Xan, ládjagaca bönachi yugu'
 yödzö izá'a!

¡Gul-la' yöl-la' ba quiu' lógaca yúgu'të bönachi!

4 ¡Zxöntëro naca yöl-la' dxi'i ladxi' quiu', le ridxintë
 lúzxiba xitsá'!

5 Buluí'i lahui lúzxiba yöl-la' zxön quiu', Dios,

ate' lahui yödzölió ni buluí'i lahui yöl-la' bení
 quiu',
 6 para usöló' netu', bönachi quiu', nupa nadxí'inu'.
 Len yöl-la' huáca zxon quiu' busölá netu', en bubí'i
 didza'.

7 Lu lataj lá'ayi queë' bë'ë didza' Dios, gunné':
 "Uzi'a xibé, en quísia' xiyúgaca bönachi Siquem,
 en urixa' luyú dë cuiti yegu Sucot.
 8 Nequi quia' xiyúgaca bönachi Galaad,
 enca' xiyúgaca zxi'ini xi'sóë' Manasés.
 Naca ca tu le rusubín icja' xiyúgaca zxi'ini xi'sóë'
 Efraín.
 Naca ga rinná bë'a xiyúgaca zxi'ini xi'sóë' Judá.
 9 Naca ca tu ga riguibí na'a xiyúgaca bönachi Moab,
 ate' lu xiyúgaca bönachi Edom chú'una' löla'.
 Cödxí'a tu' uxicja' bönachi Filistea."

10 ¿Nuzxi caz gaca iché' neda' lu yödzö
 dë zö'ö idú gásibi'ilö le run chi'i yödzö na'?
 ¿Nuzxi caz gaca iché' neda' lu xiyúgaca bönachi
 Edom?

11 ¿Naru' cabí nusán ladxu'u netu', Dios?
 ¿Naru' cabí tséajlenu' bönni' queétu' röjáquië' gudil-
 la?

12 Gúcalen netu' cate' tíl-lalentu' nupa dutíl-lalen
 netu',
 tu' naca dáduşö gácalen netu' nu naca bönáchisö.

13 Len yöl-la' huáca queë' Dios idéli'ru'
 tu' uxicja cazë' Lë' nupa ta'díl-lalen rë'u.

109

1 Rigú'a Li' yöl-la' ba, Xana' Dios.

Biti' su' dxisö,

² tu' ta'nná quia' nupa tuá' dö', en ta'zí' yë'.

Lu yöl-la' rizi' yë' quéguequi tuí'i didza' le tu'zegui' neda'.

³ Nagú'ugaca neda' lë'ajlö,

en lu yöl-la' biti' rilé'e neda' dxi'a tu'ítica'sö didza'.

⁴ Sal-la' nadxi'ida' léguequi, tu'zegui' neda' didza', pero neda' rulidza' Li'.

⁵ Bena' quéguequi le naca dxi'a, pero bulu'bí'i quia' le naca dö'.

Nadxi'ida' léguequi, pero biti' ta'lé'e neda' dxi'a.

⁶ Buzóa tu bönni' huía' dö'

para uchi'a usöröë' que nu na' biti' rilé'e neda' dxi'a.

Ben ga soa gagu nu uzegui' nu na' didza'.

⁷ Cate' nu uchi'a usörö bönni' na', biti' gu'u lataj urúajë' dxi'a.

Buyú le rinábinë' Li' tsca naca dul-la' nabáguë'ë.

⁸ Ben ga ilaca nabábasö dza soë' ibanë'.

Ben ga tsu'u nu yúbölö uláz queë'.

⁹ Ben ga ilácabi' zxi'inë' bi'i uzëbi,

en ga gácanu nigula queë' nigula uzëbi.

¹⁰ Ben ga ila'dásöbi' zxi'inë' ila'nábibi' nu bi unödzej quégacabi'.

Ben ga ila'guíjabi' le ilágubi' zi'tu' ga zoa lídxigacabi' le nadachi.

¹¹ Ben ga ugúa nu bi benna lë' tu chí'isö idútë le dë queë',

en ben ga ila'banë' bönni' zi'tu' le rulá' dxin runë'.

¹² Ben ga biti' soa nu huéchi' ladxi' lë',

en biti' soa nu uzá' ladxi' quégacabi' zxi'inë' nácagacabi' bi'i uzëbi.

¹³ Ben ga udxí' quégaca zxi'ini xi'sóë',

en ga idxín dza bíti'rö soa nu si' la ca guzxi'í lë'.

14 Yöjnética'sö le xihui' gula'báguë'ë xuz xtá'ahuë',

Xan,

en bití' gal-la ládxi'u dul-la' bennu xinë'ë.

15 Ben ga ila'cuá'tica'sö dul-la' na' lo' Li', Xan,

para cabirö nu soa yödzölió nu tsöjné lë'.

16 Bití' buéchi' ládxië'ë luzë'ë,

pero gudxiá nahuë' nupa gula'guí'i gula'zaca',

en nupa gula'yadzaj gula'yudxi,

enca' nupa gula'sëbi ladxi', ate' bëtië' léguequi.

17 Bidxi'inë' le rudxiá luzë'ë dö'.

Ben ga ulu'bí'i ca' queë'.

Bití' raza ládxië'ë gaca dxi'a que luzë'ë.

Ben ga bití' gaca dxi'a queë'.

18 Gulaca ca zxë' nácuë' didza' xihui' bë'ë,

ate' gula'yaza le nayá' nabanë' ca nisa,

en gula'yú'u ca' dxita queë' ca le za.

19 Ben ga ilaca queë' ca tu lari' rixóa cúdzë'ë,

en ca xipanë' rúgui'ë lë'ë.

20 Bubí'i caní quégaca nupa tu'zegui' neda' didza',

Xan,

enca' quégaca nupa tuí'i didza' zi' que bö' naca

caza'.

21 Li', Xana' Dios, ben quia' le naca dxi'a

para gaca bë' runu' ca rnna xtídz'u.

Tu' naca dxi'a yöl-la' dxi'i ladxi' quiu', busölá neda'.

22 Rigui' rizáca'a, en riyadzaj riyúdxida',

en raca zi' ládxi'da'ahua'.

23 Ridódi quia' ca raca que tu zxul-la cate' ribía

gubidza.

Naca' ca tuba' böchi'zu, richë' bö' recja lëba'.

24 Ta'cuidi' zxiba' tu' runa' gubasa.

Nadxita', en bíti'rö rö'ö za lu bëla' rön quia'.

²⁵ Nupa biti' ta'lé'e neda' dxi'a tu'titaj neda'.

Cate' ta'lé'e neda', tu'tá ícjaguequi.

²⁶ Gúcalen neda', Xana' Dios.

Lu yöl-la' dxi'i ladxi' quiu' busölá neda'.

²⁷ Ben ga iléquibe'e rácalen cazu' neda'.

Nun cazu' Li' lë ni, Xan.

²⁸ Tu'dxía neda' dö', pero Li', ben ga gaca dxi'a quia'.

Cate' ila'yasë', ulu'tuí'inë',

pero udzëjada' neda', huen dxin quiu'.

²⁹ Ben ga ulu'gá'ana cá'asö nupa tu'zegui' neda' didza',

en ben ga gaca yöl-la' rutuí'i quéguequi ca tu lari' nabaga' léguequi.

³⁰ Len ruá' cuina', zían luzuí guía'-në' Xanru': "Xclenu",

en ladaj bönachi zían cu'a Lë' yöl-la' ba,

³¹ tu' zuinë' cuita lë'e ibëla nu riyadzaj riyudxi

para usölë' nu na' lu ná'agaca nupa tu'siúdxí bö' naca caz nu na'.

110

¹ Xanru' Dios gudxë' Xana': "Gurö'i cuita lë'a ibëla cate' gunra' ga ulu'zechu zxíbigaca lo' nupa biti' ta'lé'e Li' dxi'a."

² Ga zoë' yödzo Sión gusöl-lë'ë Xanru' yöl-la' unná bë' quiu',

gunné': "Gunná be'e nupa biti' ta'lé'e Li' dxi'a.

³ Ulu'dödi cuínguequi lu no'o bönachi quiu'

cate' si'u yöl-la' unná bë' quiu'

tu' napu' yöl-la' lachi que le naca lá'ayi."

Ila'cuá' bi'i bönni' ga zu' ca ribó'ö buzén zílado'.

4 Runë' tsutsu xtídzë'ë Xanru', en biti' utsë'ë le,
rnnë':
"Tsaz nacu' bixúz ca na' gúquië' Melquisedec
bixúz."

5 Zoa cazë' Xanru' cuita lë'u ibëla.
Ucul-lë' bönni' ta'nná bë'ë cate' idxín dza usiúdxë'
luyú.

6 Uchi'a usöröë' quégaca bönachi yúgu'të yödzö
izá'a,
ate' ilí yödzölió len bëla' rön quéguequi.
Uzötjë' nupa ta'nná bë' zían lu yödzö izá'a.

7 Guí'jë' nisa beaj ra' nōza,
en ni'a que lë ni huóaca ládxë'ë.

111

1 jGuli'cu'ë yöl-la' ba Xanru'!
Idú ládxa'a rea'-në' Xanru': "Xclenu'."
Runa' caní tsazxón len bönni' tsahui' zían ga na'
nudúbigaca bönachi queë'.

2 Zxón náacagaca le nunë' Xanru'.
Yúgu'të nupa ta'yaza ládxi'gaca lë na' benë' tu'sëda
ca náacagaca.

3 Idútë dxi'a náacagaca, en nayëpisëtërögaca le nunë'
Lë',
ate' idiá'tica'sö le naca tsahui' queë'.

4 Chinunë' ga tsöjneru' yugu' le benë', le tun ga
rubániru'.

Náquië' Xanru' dxi'i ladxi', en ruí'i ládxë'ë rë'u.

5 Rugahuë' nupa tadxi Lë'.
Röjnética'së' didza' dzaga núnlenë' bönachi queë'.

6 Buzéajni'inë' bönachi queë' ca naca yöl-la' huáca
quégaca le nunë',
le benë' ga gula'déli'në' xiyúgaca bönachi izá'a.

⁷ Tsahui', en idütë li nácagaca le núngaca lu në'ë.
Nácagaca tsutsu yúgu'të xibá gunná bē'ë.

⁸ Rucuá'tica'sē' tsutsu xibá queë',
en rusudxinē' léguequi lu le naca idütë li, en le naca
tsahui'.

⁹ Gusól-lē'ë Nu buá'uó bönachi queë'.
Tsaz nuzóë' didza' dzaga nunē'.
Lá'ayi, en ba'a ladxi' naca Lē'.

¹⁰ Lu yöl-la' radxi queëru' Lē' risíloru' ridéli'ru' yöl-
la' réajni'i.
Yúgu'të nupa tun ca ta'nná bē' xibá queë' nápagaca
yöl-la' réajni'i.
Ila'cuá'tica'sö nupa ila'gú'u Lē' yöl-la' ba.

112

¹ ¡Guli'cu'ë yöl-la' ba Xanru'!
¡Bica' ba bönni' na' rádxinē' Xanru',
bönni' na' raza ládxe'ë runē' ca gunná bē'ë Dios!

² Tsépiségaca xzí'ini xi'sóë' bönni' na' yödzülió ni.
Gáquië' bica' ba bönni' na' runē' le naca dxi'a.

³ Lu yu'u lidxë' gata' yöl-la' tsahui',
ate' idía'tica'sö le naca tsahui' runē'.

⁴ Gulén bení' ga ridē' bönni' tsahui' ga na' naca
chul-la.
Ruzá' ládxe'ë que luzé'ë, en ruí'i ládxe'ë lē', en runē'
le naca dxi'a.

⁵ Gaca dxi'a queë' bönni' ruzá' ládxe'ë que luzé'ë,
en runnē' que tu chí'isö le riyadzaj que.
Urúajë' dxi'a cate' nu uchi'a usörö queë'.

⁶ Catu caz gaca nu utsá' bönni' na',
ate' sóatica'sö nu tsöjné lē'.

⁷ Biti' gádxinē' cate' nu usiyöni lē' le cabí raca dxi'a.

Ridipa ládxë'ë tu' ruzxöni ládxë'ë Xanru' Dios.

⁸ Dios rutipë' ládxë'ë, ate' biti' gádxinë'
cate' idxinrö dza ilé'enë' nuhuõtjagaca nupa ta'díl-
lalen lë'.

⁹ Idú ládxë'ë runödzjë' quégaca bönachi yechi'.

Idía'tica'sö le naca dxi'a runë'.

Dios uchisë' lë' ga tsëpisë'.

¹⁰ Ila'lé'e lë ni nupa tuá' dö', en ila'bö' baguí'isö.

Ilagu zxe láyi'gaca, en ila'niti cuínguequi.

Tsaz initi le ta'zë ládxi'gaca nupa tuá' dö'.

113

¹ ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' huen dxin queë' Xanru'!

¡Guli'cú'u yöl-la' ba Lë' Xanru'!

² ¡Cú'uru' yöl-la' ba Lë' Xanru',

cate' risí lo na'a, en yugu' iz si' zaca!

³ ¡Ga naguela' ga rilén gubidza ga ridxintë ga ribía,
cú'uru' yöl-la' ba Lë' Xanru'!

⁴ ¡Nayëpisëtërë' Xanru' Dios ca yúgu'të yödzö izá'a!

¡Nazxöntërö yöl-la' zxön queë' ca naca lúzxiba!

⁵ ¿Nuzxi caz zoa naca ca náquië' Xanru' Dios?

Rö'ë rinná bë'ë ga na' nayëpisëtërë'.

⁶ Ruzötaj cuinë' para uyúë'

le dë lúzxiba, en le dë luyú ni.

⁷ Ruchisë' nupa nácacagaca yechi', rubéajë' léguequi lu
bëchtö yu.

Ruchisë' nupa ta'yadzaj, rubéajë' léguequi lu dö
bëbu.

⁸ Runë' ga ta'bö'len nupa ta'nná bë'.

Ta'bö'len nupa ta'nná be'e bönachi queë'.

⁹ Runë' ga zóanu nigula huödx yu'u lídxinu.

Rudzeja ládxi'nu tu' runë' ga nacuá'abi' zxi'ininu.

¡Guli'cu'ë yöl-la' ba Xanru'!

114

¹ Cate' bila'rúaj bönachi Israel luyú Egipto
bila'rúajë' zxi'ini xi'sóë' Judá ladaj nupa tu'i didza'
izá'a.

² Zxi'ini xi'sóë' Judá guláquië' ca lidxë' Xanru' Dios,
ate' gulaca bönachi Israel nupa rinná bé'enë' Dios.

³ Lahuë' Dios bubiga' nísado',
ate' bubí'i nisa yegu Jordán.

⁴ Gula'xiti' guí'a zxön ca yugu' bö'cu' zxila' biguiú',
ate' gula'xiti' ca' guí'ado' ca yugu' bö'cu' zxíla'do'.

⁵ ¿Bi raca quiu', nísado', tu' rubigu'?

¿Bi raca quiu', yegu Jordán, tu' rubí'i nisa quiu'?

⁶ ¿Bi raca queéli', guí'a zxön, tu' rixíti'li' ca yugu'
bö'cu' zxila' biguiú'?

¿Bi raca queéli', guí'ado', tu' rixíti'li' ca yugu' bö'cu'
zxíla'do'?

⁷ Guzxizi lahuë' Xanru', yödzölió.

Guxxizi lahuë' Dios queë' Jacob.

⁸ Benë' Dios ga gulaj nisa tu' lë'e guiöjto'o,
en benë' ga böáca le guca guiöj jara tu' ga rilén nisa.

115

¹ Calëga queëtu', Xan, calëga queëtu',
pero que lo' gaca yöl-la' ba
tu' nacu' dxi'i ladxi', en le naca idútë li.

² ¿Bizx que ta'nná bönachi yugu' yödzö izá'a:
“Gazxi caz zoë' Dios quégaquië”?

³ Zoë' Dios queëru' yehua' yubá.

Runë' le raza ládxë'ë gunë'.

⁴ Néquiguequini plata, en oro budó' quégaca bönachi
izá'a na',

yugu' le núngaca lu ni'a lu na' bönachi.

⁵ Nacuá' ruí'iguequi, pero bití' gaca iluí'i didza'.

Nacuá' guiøj lógaca, pero bití' gaca ila'lé'e.

⁶ Nacuá' náagaca, pero bití' gaca ila'yöni.

Nacuá' zxíniguequi, pero bití' gaca ila'lë'e.

⁷ Nacuá' ná'agaca, pero bití' bi gaca ila'gán.

Nacuá' ní'agaca, pero bití' gaca ila'zá'.

Bití' gaca ilún bö lubá'agaca.

⁸ Nupa tun budó' guiøj budó' yaga ilaca ca nácagaca
budó' na',

núti'tës nu ruzxöni ladxi' budó' guiøj budó' yaga.

⁹ Libí'ili', bönachi Israel, buli'zxöni ládxë'ë Xanru'
Dios.

Rácalen cazë' libí'ili', en rapa chi'ë libí'ili'.

¹⁰ Libí'ili', zxí'ini xi'sóë' Aarón, buli'zxöni ládxë'ë
Xanru' Dios.

Rácalen cazë' libí'ili', en rapa chi'ë libí'ili'.

¹¹ Libí'ili' na' rádxili'-në' Dios, buli'zxöni ládxë'ë
Xanru' Dios.

Rácalen cazë' libí'ili', en rapa chi'ë libí'ili'.

¹² Xanru' Dios ruí'i ládxë'ë rë'u, en gunë' ga gaca
dxi'a queëru'.

Gunë' ga gaca dxi'a quégaca bönachi Israel.

Gunë' ga gaca dxi'a quégaca zxí'ini xi'sóë' Aarón.

¹³ Gunë' ga gaca dxi'a quégaca nupa tadxi Lë',
nupa na' nácagaca cá'asö, en nupa na'
nayëpisëgaca.

¹⁴ Gunë' Xanru' Dios ga tsan le nequi queëli',

lë na' nequi queëli', en le nequi quégaca zxi'inili'.

¹⁵ Raca ládxa'a gunë' Xanru' ga gaca dxi'a queëli'.
Náquië' Nu ben lúzxiba, en luyú ni.

¹⁶ Nequi queë' Xanru' Dios lúzxiba xitsá',
pero nudödë' lu ná'agaca bönachi luyú ni.

¹⁷ Nupa chinátigaca biti' gaca ila'gú'u Xanru' yöl-la'
ba,
en calëga nupa nacuá' dxisö lataj chul-la que yöl-la'
guti.

¹⁸ ¡Cú'uru' yöl-la' ba Xanru' Dios
na'a dza, en yúgu'të dza si' zaca!

¡Guli'cu'ë Xanru' yöl-la' ba!

116

¹ Nadxí'ida'-në' Xanru' Dios, tu' riyönnë'
le rulidza' Lë', en le rinábida'-në'.

² Ruzë naguë' chi'a.

Que lë ni na' ulidza' Lë' tsanni ni zoa' nabana'.

³ Guzóa bönadxi quia' gátia',
en guyu'a tsöbi que lataj chul-la que yöl-la' guti,
ate' gusëbi ládxa'a, en buí'inide'eda' ládxa'a.

⁴ Ní'irö bulidza'-në' Xanru' Dios, gunnía':
"Ráta'yua' lo', Xan, usöló' neda'."

⁵ Xanru' Dios ruzá' ládxe'ë queëru', en náquië'
tsahui'.

Dios queëru' ruí'i ládxe'ë rë'u.

⁶ Rapa chi'ë Xanru' nupa nácagaca do' ladxi'.
Bulu'xicja bönachi neda', ate' busölë' neda'.

⁷ Buzí' ladxi' bö' naca caza',
tu' runë' Xanru' Dios ga raza dxi'a quia'.

8 Busöló' bö' naca caza', Xan, lu yöl-la' guti.
 Benu' ga buí'i nisa ribödxi guiöj lahua',
 en ga bíti'rö cuílagaca ni'a.

9 Ta'a lahuë' Xanru' Dios
 ga nacua' nupa nabángaca.

10 Guyéajlë'a Lë' cate' gunnía':

“Zoa le rusaca' neda' zi.”

11 Lu yöl-la' rö' böniga quia' gunnía':

“Ta'zí' yë' yúgu'të bönachi.”

12 ¿Bizxi caz gu'a-në' Xanru' Dios
 ni'a que yugu' le runë' le ruzi'a xibé?

13 Si' lu na'a yöl-la' rusölá queë' Xanru',
 en ulidza'-në' Xanru' Dios.

14 Unödza' queë' Xanru' le guzxi' lu na'a unödza'.
 Raca ládxa'a gaca guna' caní lógaca yúgu'të bönachi
 queë'.

15 Rúndë'ë Xanru' bal
 yöl-la' guti quégaca nupa néquiquequi quez queë'.

16 Le nácatë naca' huen dxin quiu', Xan.
 Naca' huen dxin quiu', enca' zxi'ininu nigula huen
 dxin quiu'.

Busedxu' le biröli neda'.

17 Cu'a lo' le unödza' quiu', en guía' Li': “Xclenu”,
 en ulidza' Li', Xan.

18 Unödza' queë' Xanru' le guzxi' lu na'a unödza'.
 Raca ládxa'a gaca guna' caní lógaca yúgu'të bönachi
 queë'.

19 Ga zoa lö'a que yu'u lidxë' Xanru',
lu yödzö Jerusalén guna' caní.

¡Guli'cu'ë yöl-la' ba Xanru' Dios!

117

1 ¡Guli'cu'ë yöl-la' ba Xanru' Dios, libí'ili', bönachi
yúgu'të yödzö izá'a!

¡Guli'cu'ë yöl-la' ba yúgu'tëli',

2 tu' buxönë' queëru' yöl-la' dxi'i ladxi' queë',
en zóatica'sö le naca idú ladxi' queë'!

¡Yöl-la' ba Lë'!

118

1 ¡Guli'guíë' Xanru': "Xclenu'", tu' náquië' dxi'a!
¡Zóatica'sö yöl-la' dxi'i ladxi' queë'!

2 Ral-la' ila'nná bönachi Israel:
"¡Zóatica'sö yöl-la' dxi'i ladxi' queë'!"

3 Ral-la' ila'nná xzí'ini xi'sóë' Aarón:
"¡Zóatica'sö yöl-la' dxi'i ladxi' queë'!"

4 Ral-la' ila'nná nupa tadxi Xanru' Dios:
"¡Zóatica'sö yöl-la' dxi'i ladxi' queë'!"

5 Cate' gudí'i guzxáca'a bulidza'-në' Xanru',
ate' bubí'ë didza', en busölé' neda'.

6 Zoë' Xanru' cuita' neda', ate' bití' bi gádxida'.
¿Bizxi caz gaca ilún bönachi quia'?

7 Zoë' Xanru' cuita' neda' ladaj nupa tácalen neda'.
Que lë ni na' idéli'da' láhuigaca nupa bití' ta'lé'e
neda' dxi'a.

8 Nácarö dxi'a uzxöni ládxa'a-në' Xanru',

en biti' uzxöni ládxa'a nu naca bönáchisö.

⁹ Nácáro dxi'a uzxöni ládxa'a-në' Xanru',
en biti' uzxöni ládxa'a nupa ta'nná bë'.

¹⁰ Bönachi yúgu'të yödzö izá'a gula'gú'u neda'
lé'ajlö.

Len yöl-la' huáca queë' Xanru' buxicja' léguequi.

¹¹ Gula'gu'ë neda' lé'ajlö. Ön, gula'gu'ë neda'
lé'ajlö,

pero len yöl-la' huáca queë' Xanru' buxicja'
léguequi.

¹² Gula'gu'ë neda' lé'ajlö ca yugu' buzú' rön,
pero gula'nítië' ca tu lu guí' guixi' yötsi' bidx.

Len yöl-la' huáca queë' Xanru' buxicja' léguequi.

¹³ Bulu'dxíguë'ë neda' ga bidxintë guzóa tsöjtsö'a,
pero gúcalenë' Xanru' neda'.

¹⁴ Naca cazë' Xanru' yöl-la' huáca quia', en le rul-la'.
Naca cazë' yöl-la' rusölä quia'.

¹⁵ Lu yu'u lídxigaca nupa nácagaca tsahui'
ru'u bö que nupa ta'bödxi'a lu yöl-la' rudzeja
quéguequi tu' nulágaca.

¡Runda' dxin në'ë ibëla Xanru'!

¹⁶ ¡Nayëpisëtë'rö në'ë ibëla Xanru'!

¡Runda' dxin në'ë ibëla Xanru'!

¹⁷ Biti' ca' gátia', pero soa' ibana',
ate' usiyönda' bönachi le nunë' Xanru'.

¹⁸ Xanru' béndë'ë neda' xiguia',
pero biti' budödë' neda' lu yöl-la' guti.

¹⁹ Guli'salaj quia' ga ta'yazë' bönni' tsahui'.

Tsu'a ni', en guía'-në' Xanru': "Xclenu'."

²⁰ Naca lataj ni ga riyaza cazë' Xanru' Dios.

Ila'yazë' ni bönni' tsahui'.

²¹ ¡Guía' Li': "Xclenu'" Xan, tu' bubiu didza' quia',
en tu' nacu' Nu rusölá neda'!

²² Zoa tu guiöj bulu'zöë' tsölá'alö bönni' tu'cu'ë zö'ö.
Na'a naca guiöj na' guiöj len squin zö'ö.

²³ Benë' Xanru' Dios ga naca caní.

Naca tu le run ga rubániru'.

²⁴ Dza ni naca dza nunë' Xanru' Dios.

Udzéjaru', en uzí'iru' xibé.

²⁵ Ráta'yutu' lo', Xan, usöló' netu'.

Ráta'yutu' lo', Xan, gunu' ga gaca dxi'a queëtu'.

²⁶ Bica' ba bönni' na' zë'ë uláz queë' Xanru'.

Guntu' Li' zxön lu yu'u lidxë' Xanru'.

²⁷ Dios náquië' Xanru', ate' bennë' queëru' bení'.

Buli'nödzej queë' Dios yugu' bëdxi renni'
uzéguiru'-ba' lahuë' lu bucugu queë'.

²⁸ Naca cazu' Li' Dios quia', ate guía' Li': "Xclenu'."

Naca cazu' Li' Dios quia', ate' guna' Li' zxön.

²⁹ ¡Guli'-guië' Xanru' Dios: "Xclenu'" tu' náquië'
dxi'a!

¡Zóatica'sö yöl-la' dxi'i ladxi' queë'!

119

Le run le gunná bé'enë' Xanru' rë'u

- 1 ¡Bica' ba nupa nácagaca idú dxi'a tsáhui'do',
nupa na' tun ca rnna xibá naguixjé' Xanru'!
- 2 ¡Bica' ba nupa tun ca nácagaca le benē' ba nalí,
en idú ládxi'gaca ta'zě ladxi' Lē'!
- 3 Biti' bi le cabí naca tsahui' tun,
pero tun ca nácagaca le nulu'ě lahui.
- 4 Nuzú' queētu' xibá quiu', Xan,
para idú ládxi'tu' guntu' ca ta'nná.
- 5 Raca ládxa'a gúntica'sa' ca ral-la' guna',
en guna' yugu' le gunná bē'u.
- 6 Ní'irö bití' ca' utuí'ida'
channö gapa chí'a yugu' le gunná bē'u.
- 7 Lu yöl-la' ba'a ladxi' quia' guía' Li': "Xclenu"
cate' chinazi'a le buchí'a busöróu' le naca tsahui'.
- 8 Guna' ca ta'nná le gunná bē'u.
Biti' usán no'o neda' tsaz.

Ral-la' gunru' ca gunné' Dios

- 9 ¿Nacxi gaca gunbi' tu bi'i bönni' ga ugá'ana tsahui'
ládxi'do'obi?
Ral-la' gunbi' ca rnna xtídzu'u.
- 10 Idú ládxa'a rizě ládxa'a Li', Xan.
Biti' gu'u lataj ucá'ana' yugu' le gunná bē'u.
- 11 Lu icja ládxi'da'ahua' runa' ca rnna xtídzu'u,
para cabí guna' dul-la' lo' Li'.
- 12 ¡Bica' xibó', Xan!
Busedi neda' yugu' le gunná bē'u.
- 13 Len ruá' cuina' ru'a didza'
ca nácagaca yúgu'tě le rusedi quézinu' netu'.
- 14 Rudzėjada' ca nácagaca le nunu' ba nalí
ca nu rudzeja tu' dē yöl-la' tsahui' que.
- 15 Sa' ládxa'a ca nácagaca xibá quiu'
en güi' ládxa'a yugu' le nulú'u lahui.
- 16 Udzėjada' ca nácagaca le gunná bē'u.

Biti' gal-la ládxa'a xtídz'u.

Rudzéjade' eru' runru' le rnna cazé' Dios

17 Ben ga gaca dxi'a quia' neda', huen dxin quiu',
Xan,

para soa' ibana', en guna' ca rnna xtídz'u.

18 Gusalaj guiöj lahua' para gaca ilé'eda'
le tun ga rubánitu' nazúajgaca lu xibá naguixju' Li'.

19 Zoa' yödzülió ca tu bönni' ridasö.

Biti' ucachu'u yugu' xibá nunu' ga bití' gaca ilé'eda'
léguequi.

20 Yúgu'tè dza ruhuí'ini ládxa'a tu' rizé ládxa'a
yugu' le nusédinu' netu' ca ral-la' guntu'.

21 Ruzenu' le bach nupa tun ba zxön cuínguequi, en
nupa nudxíagaca dö',

nupa na' tu' zóa tsölä'alö yugu' xibá gunná bë'u.

22 Biti' gu'u lataj nu guequi neda' zi' o nu ucá'ana
neda' cá'asö,

tu' runa' ca ta'nná le nunu' ba nalí.

23 Sal-la' ta'bö' nupa ta'nná bë', en ta'nné quia',
rizá' ládxa'a neda', huen dxin quiu', ca nácgaca le
gunná bë'u.

24 Raza ládxa'a yugu' le nunu' ba nalí.

Nácgaca le tu' zéajni'i neda'.

Idú ládxi'ru' gunru' ca gunná cazé' Dios

25 Nadinni lu yu bö' naca caza'.

Busubán ládxa'a, ugunu' dxin xtídz'u.

26 Buluí'ida' Li' yugu' le nuna', ate' bubí'u didza'.

Busedi neda' yugu' le gunná bë'u.

27 Buzéajni'i neda' ca nácgaca xibá quiu',
ate' sa' ládxa'a ca nácgaca le nunu', le tun ga
rubánitu'.

28 Ribödxi bö' naca caza' tu' risébida' ládxa'a.

Butipa ládxa'a, ugunu' dxin xtídz'u.

²⁹ Ben ga bití' guna' le cabí sa'yéaj,
en buzá' ladxi' quia' xibá naguixju' Li'.

³⁰ Guróa' le naca idútë li para guna' ca rnna.
Nuzóa' lahua' yugu' le nusédinu' netu'.

³¹ Nazí' lu na'a yugu' le nunu' liná' lo.
Bití' gu'u lataj bí gun ga utuí'ida', Xan.

³² Guna' ca ta'nná xibá gunná bē'u,
tu' rutipa cazu' ládxa'a.

Rě'ëniru' tséajni'iru' xtídzě'ë Dios

³³ Busedi neda', Xan, ca ta'nná le gunná bē'u,
ate' gun chí'a léguequi ga idxinrö dza udxi.

³⁴ Benna quia' yöl-la' réajni'i para gun chí'a xibá
quiu',

en para idú ládxa'a guna' ca ta'nná.

³⁵ Ben ga guna' ca ta'nná le gunná bē'u,
tu' raza ládxa'a guna' ca ta'nná xibá na'.

³⁶ Ben ga gü'i ládxa'a yugu' le nunu' ba nalí,
para cabí gü'i ládxa'a yöl-la' ruhuidi'.

³⁷ Buchi'a guiöj lahua' para cabí uyúa' le cabí
nazaca'.

Butipa ládxa'a para guna' le uluí'inu' netu'.

³⁸ Ben tsutsu didza' bē'lenu' neda', huen dxin
quiu',

para gádxida' Li'.

³⁹ Bucuita ga zoa' nu rudidza' yudxi neda', lë na'
rádxida'

tu' nácagaca dxi'a tsahui' le nusédinu' netu' ca
guntu'.

⁴⁰ Buyútsöca', rizě ládxa'a yugu' xibá quiu'.

Busubán ládxa'a, ugunu' dxin le tsahui' quiu'.

Ruzxöni ládxi'ru' xtídzě'ë Dios

41 Lu yöl-la' dxi'i ladxi' quiu' buyú neda', Xan,
en busölá neda' ca rnna xtídz'u' gunu'.

42 Ubi'a didza' bi guía' nu run ga rutuí'ida', innía':
"Ruzxöni ládxa'a xtídz'u'", Xan.

43 Biti' ucuítu' tsaz didza' idútë li lu ru'a
tu' runa' löza yugu' le nusédinu' netu'.

44 Gúntica'sa' ca ta'nná xibá naguixju' Li'
yúgu'të dza, en yúgu'të iz si' zaca.

45 Lu yöl-la' rusölá quiu' soa' ibana'
tu' bë' ládxa'a guna' ca ta'nná bë' xibá quiu'.

46 Gu'a didza' que le nunu' ba nalí lógaquië' bönni'
ta'nná bë'ë
en biti' ca' utuí'ida'.

47 Tsaza ládxa'a yugu' xibá gunná bë'u,
yugu' lë na' nadxí'ida'.

48 Guna' ca' ca ta'nná xibá nunu', lë na' së ládxa'a,
en sa' ládxa'a ca nácagaca le gunná bë'u.

Zóatica'sö xtídzë'ë Dios

49 Yöjné didza' na' bë'lenu' neda', huen dxin quiu',
tu' benu' ga runa' löza le.

50 Didza' na' ruhuë tsahui' neda' cate' riguí'i
rizáca'a,
tu' tu'subán ládxa'a didza' bë'u.

51 Tu'títjalë'e neda' nupa tun ba zxön cuínguequi,
pero biti' ca' usana' xibá naguixju' Li'.

52 Röjneda' yugu' le busédinu' netu' dza ni'te, Xan,
ate' lë na' ruhuë tsahui' neda'.

53 Lu yöl-la' ridzá'a quia' rō'a böniga ni'a quégaca
nupa tuá' dö',
nupa na' tu'cá'ana xibá naguixju' Li'.

54 Rul-la' ca nácagaca le gunná bë'u.

Zoa' ni ca tu bönni' ridë' zi'tu'.

55 Chi'i dzö'ölö röjneda' Lo', Xan,

en run chi'a xibá naguixju' Li'.

⁵⁶ Nacuá'len neda' le ruzi'a xibé
ate' runa' ca rnna yugu' xibá quiu'.

Raza ládxi'ru' xtídžě'ë Dios

⁵⁷ Nacu' Li', Xan, le ruzi'a xibé.

Chigunnía' guna' ca rnna xtídžu'u.

⁵⁸ Idú ládxa'a inábida' Li' sóalenu' neda'.

Buéchi' ladxi' neda' ca rnna xtídžu'u gunu'.

⁵⁹ Guzá' ládxa'a ca nácagaca le runa',

ate' bubí'i ládxa'a para guna' ca rnna le nunu' liná'
lo.

⁶⁰ Bénda'a bayúdx, en biti' gudzedá'

para guna' ca rinná bē' xibá quiu'.

⁶¹ Bönachi zían bönachi tuá' dö' gula'gú'u neda'
lě'ajlö,

pero biti' gul-la ládxa'a xibá naguixju' Li'.

⁶² Gulahuéla riyasa', en rigu'a Li' yöl-la' ba
tu' nácagaca tsahui' yugu' le nusédinu' netu'.

⁶³ Runa' tsözxön nupa tadxi Li',

enca' nupa tun ca rnna xibá quiu'.

⁶⁴ Ridxín idútě yödžölió yöl-la' dxi'i ladxi' quiu',
Xan.

Busedi neda' yugu' le gunná bē'u.

Naca le saca' le gunná cazě' Dios

⁶⁵ Benu' quia' neda', huen dxin quiu', le naca dxi'a,
ca rnna xtídžu'u gunu', Xan.

⁶⁶ Busedi neda' yöl-la' réajni'i idú, en yöl-la' raca
yenni',

tu' réajlě'a yugu' xibá gunná bē'u.

⁶⁷ Zí'alö cate' buzötju' neda' gudá' nanitia',

pero na'a runa' ca rnna xtídžu'u.

⁶⁸ Idú dxi'a tsahui' nacu', en runu' le naca dxi'a.

Busedi neda' yugu' le gunná bē'u.

69 Nupa tun ba zxön cuínguequi ta'zí' yë' ca naca quia',

pero idú ládxa'a guna' ca rnna xibá quiu'.

70 Chul-la niti naca icja ládxi'do'guequi, pero raza ládxa'a neda' xibá naguixju' Li'.

71 Naca dxi'a buzötju' neda' para bizédida' yugu' le gunná bë'u.

72 Nácagacarö dxi'a quia' xibá rinná bë'u ca nácagaca gayuá' gayuá'sö dumí oro, en plata.

Naca tsahui' le gunná cazë' Dios

73 Len no'o benu' neda', en buzú' neda'.

Buzéajni'i neda' para gúnbë'a xibá gunná bë'u.

74 Nupa tadxi Li' ila'lé'e neda', en ulu'dzeja ládxi'guequi,

tu' runa' löza xtídzu'u.

75 Nözda' naca tsahui' ca ruchí'a rusöröu' quia' neda', Xan,

ate' lu yöl-la' li ladxí' quiu' busaca' zi'u neda'.

76 Na'a, lu yöl-la' dxi'i ladxí' quiu' buë tsahui' neda', ca rnna didza' chibë'lenu' neda', huen dxin quiu'.

77 Gudá duhuechi' ládxi'u neda' para soa' ibana', tu' raza ládxa'a xibá naguixju' Li'.

78 Ben ga ulu'tuí'i nupa tun ba zxön cuínguequi, tu' gula'nné quia', en biti' bi bena' quéguequi, pero neda' sa' ládxa'a ca naca xibá quiu'.

79 Ral-la' udxín quia' nupa tadxi Li', nupa na' núnbë'gaca le nunu' ba nalí.

80 Ben ga udxín ca rnna le gunná bë'u, para cabí utuí'ida'.

Runë' Dios ca rnna xtídzë'ë

81 Rudú ládxa'a tu' riböza' yöl-la' rusölá quiu', pero runa' löza xtídzu'u.

82 Chirequi ichul-la lahua' tu' rizēda' lādxa'a
xtídzu'u,

rnnía': "¿Bátaxi huē tsaú'u neda'?"

83 Caní raca tu' naxú'unida' ca tu buzudi guídi nal-
la' lahui guí',

pero catu caz gal-la lādxa'a yugu' le gunná bē'u.

84 ¿Bál-laxi dza soa' ibana' neda', huen dxin quiu'?

¿Bátaxi usiúdxu' nupa ta'bía no neda'?

85 Nupa tun ba zxon cuínguequi gula'chõ'õna tu
yeru ga tsöjbixa',

nupa na' bití' tun ca rnna xibá naguixju' Li'.

86 Idútē li nácagaca yúgu'tē xibá gunná bē'u.

Lu yöl-la' rizí' yē' quéguequi ta'bía no neda'.

¡Gúcalen neda'!

87 Gula'zóa ulu'sunítiē' neda' lu yödzölió ni,

pero bití' busán na'a xibá quiu'.

88 Lu yöl-la' dxi'i ladxi' quiu' busubán lādxa'a,

para gapa chí'a le nunu' ba nalí len ruá' cuinu'.

Réajlë'ëru' xtídzë'ë Xanru'

89 Rulidza' Li', Xan.

Tsaz naguixju' xtídzu'u yehua' yubá.

90 Gunu' ca rnna xtídzu'u quégaca bönachi na'a dza,
en yúgu'tē dza si' zaca.

Gudixaj cazu' yödzölió, ate' idía'tica'sö.

91 Ni'a que le gunná bē'u nacuá' caz yúgu'tē ga
ridxintē na'a dza,

tu' tun xichinu' yúgu'tē lē na'.

92 La'tu' cabí raza lādxa'a xibá naguixju' Li',
chigunítia' lu le busaca' zi' neda'.

93 Catu caz gal-la lādxa'a yugu' xibá quiu',

tu' busubanu' lādxa'a ni'a quéguequi.

94 Néquida' quiu'.

¡Busölá neda', tu' ruí'i ládxa'a xibá quiu'!

⁹⁵ Nupa tuá' dö' ta'bö' nisi neda' para ulu'suniti neda',

pero neda' güí'i ládxa'a le nunu' ba nalí.

⁹⁶ Chibilé'eda' ruúdxí que yúgu'të le naca idútë yödzölió ni,

pero catu caz udxi que le gunná bë'u guntu'.

Nadxí'iru' xtídzë'ë Xanru'

⁹⁷ Nadxí'ide'eda' xibá naguixju' Li'.

Idú dza rizá' ládxa'a ca naca que.

⁹⁸ Réajni'iröda' ca nupa ta'dá'baga' neda'

tu' ruí'i ládxa'a yugu' le gunná bë'u, en tu' dá'tica'sa' léguequi.

⁹⁹ Réquibe'eröda' ca yúgu'të nupa tu'sedi neda',

tu' rizá' ládxa'a le nunu' ba nalí.

¹⁰⁰ Réajni'iröda' ca yugu' bönni' gula,

tu' rapa chi'a xibá quiu'.

¹⁰¹ Gudapa chi'i cuina' para cabí guna' le cabí naca tsahui',

en para guna' ca rnna xtídzü'u.

¹⁰² Biti' ca' nucá'ana' yugu' le nusédinu' netu',

le nusedi quézinu' neda'.

¹⁰³ Bica' zxixi náçagaca xtídzü'u.

Ön, náçagacarö zxixi ca le zxixi que buz.

¹⁰⁴ Tu'zéajni'i xibá quiu' neda'.

Que læ ni na' réquida' zi' yúgu'të le cabí naca.

Xtídzë'ë Dios ruzení' lu icja ládximo'oru'

¹⁰⁵ Ca tu bení' naca xtídzü'u ga ridá',

en le ruzení' nöza ga ral-la' töda'.

¹⁰⁶ Guzxí' lu na'a bi guna', en nuna' tsutsu xtídzä'a.

Gapa chi'a le nusédinu' netu' le naca tsahui'.

¹⁰⁷ Zoa le rusaca' zi' neda'.

Busubán ládxa'a, Xan, ugunu' dxin xtídz'u.

108 Guzxi' yöl-la' ba rigu'a Li' len ru'a, Xan, en buzéajni'i neda' yugu' le nusédinu' netu'.

109 Zóatica'sö bönadxi gátia', pero biti' ral-la ládxa'a xibá naguixju' Li'.

110 Nupa tuá' dö' bulu'zě tu du yalaj le sön neda', pero biti' buca'ana' xibá quiu'.

111 Tsaz nazi' lu na'a le nunu' ba nalí, ate' run ga rudzeja ládxa'a.

112 Ruí'i ládxa'a gúntica'sa' ca ta'nná le gunná bē'u. Guna' caní ga idxintē dza udxí.

Nagá'anaru' dxi'a ni'a que xtídzě'ē Dios

113 Réquida' zi' nupa nácagaca chopá ladxi', pero nadxí'ida' xibá naguixju' Li'.

114 Nacu' ca tu ga rucachi' cuina', en le run chi'i neda'.

Runa' löza xtídz'u.

115 Gulí'cuíta ga zoa', libí'ili' ruá'ali' dö', tu' guna' ca ta'nná le gunná bē'ē Xana' Dios.

116 Buzóa neda' tsutsu, ugunu' dxin xtídz'u, ate' soa' ibana'.

Biti' gu'u lataj utuí'ida' ca naca le runa' löza.

117 Buzóa neda' tsutsu, ate' ulá', en güí'tica'sa' ládxa'a le gunná bē'u.

118 Nusán no'o yúgu'tē nupa nusángaca le gunná bē'u,

tu' naca yöl-la' sina' quéguequi le cabí nazaca'.

119 Ugú' nupa tuá' dö' luyú ni ca nu rugúa bēbu.

Que lē ni na' nadxí'ida' le nunu' ba nalí.

120 Rizzizi idütē le nayá' nabana' tu' rádxida' Li', en rádxida' le gaca cate' usiúdxu' bönachi.

Ral-la' gunru' ca rnna xtídzě'ē Dios

121 Bena' le naca tsahui', en le naca li.
Biti' usán no'o neda' lu ná'agaca nupa tu'saca' zi'
neda'.

122 Nacu' quia' neda', huen dxin quiu', le naca bë'
gaca dxi'a quia'.

Biti' gu'u lataj ulu'saca' zi' neda' nupa tun ba zxön
cuínguequi.

123 Richí guiöj lahua' tu' riböza' yöl-la' rusölá quiu',
enca' didza' tsahui' quiu'.

124 Lu yöl-la' dxi'i ladxi' quiu' ben quia' neda', huen
dxin quiu',

ca rë'ëni quézinu' gunu'.

Busedi neda' yugu' le gunná bë'u.

125 Naca' huen dxin quiu'.

Benna quia' yöl-la' réajni'i para gaca gúnbë'a le
nunu' ba nalí.

126 Chibídxín dza bí gunu', Xan,
tu' gula'guítsjë' xibá naguixju' Li'.

127 Que lë ni na' nadxí'iröda' xibá naguixju' Li' ca
nadxí'ida' oro.

ïÖn, ca oro banéquini,

128 en réquida' nácagacarö dxi'a xibá quiu' ca yúgu'të
le dë!

Biti' rilé'eda' dxi'a yúgu'të le cabí naca.

Raca ládxi'ru' gunru' ca rnna xtídzë'ë Dios

129 Run ga rubánida' le nunu' ba nalí.

Que lë ni na' bö' naca caza' nazí' lu në'e le.

130 Cate' nalá' lahui xtídz'u, ruzen' queëtu'.

Run ga ta'yéajni'i nupa nácagaca nöxaj ladxi'.

131 Gusalja' ru'a, en gunné ládxa'a,

tu' guzé ládxa'a xibá gunná bë'u.

132 Buyú neda', en buzá' ladxi' quia',

ca run cazu' quégaca nupa ta'dxí'i Li'.

133 Buzóa neda' tsutsu para guna' ca rnna xtídz'u.
Biti' gu'u lataj le naca xihui' inná be'e neda'.

134 Buá'u neda' lu na' nu rusaca' zi' neda',
para gaca guna' ca naca xibá quiu'.

135 Ben ga gaca bë' nazí' lu no'o neda', huen dxin
quiu',

en busedi neda' yugu' le gunná bë'u.

136 Raca nisa ribödxi guiój lahua' ca tu yegu gubó'o,
tu' cabí tun bönachi ca rinná bë' xibá quiu'.

Idutë li naca le rnna cazë' Xanru'

137 Nacu' Li' tsahui', Xan.

Dxi'a tsahui' naca le ruchi'a rusöröu' queetu'.

138 Nugú'u lu na'tu' le nunu' ba nalí.

Naca tsahui', en tsaz zoa.

139 Tu' riböza' le naca quiu' run ga régui rilá
ládxi'da'ahua',

ate' gulal-la ladxi' xtídz'u nupa ta'dá'baga' neda'.

140 Idú dxi'a tsahui' naca xtídz'u.

Que lé ni na' neda', huen dxin quiu', nadxí'ida' le.

141 Nöxaj ladxi' naca', ate' tu'cá'ana bönachi neda'
cá'asö,

pero bití' ral-la ládxa'a le gunná bë'u.

142 Zóatica'sö le naca tsahui' quiu',
en idútë li naca xibá naguixju' Li'.

143 Ba bidxín le raca quia', en le rusaca' zi' neda',
pero raza ládxa'a xibá gunná bë'u.

144 Nácatica'sö tsahui' le nunu' ba nalí.

Buzéajni'i neda' para soa' ibana'.

Ral-la' ulaba ládxi'ru' le gunná cazë' Dios

145 Idú ládxa'a rulidza' Li'.

Bubí'i didza', Xan, ate' guna' ca naca le gunná bë'u.

146 Rulídzatica'sa' Li'.

Busölá neda', ate' guna' ca naca le nunu' ba nalí.

147 Riyasa' zí'alö ca ritö yu zila, en rulidza' Li' para gácalenu' neda'.

Riböza' yugu' didza' gu'u.

148 Chi'i dzö'ölö rubéaja' yëla guiöj lahua', para ulaba ládxa'a ca naca xtídzu'u.

149 Lu yöl-la' dxi'i ladxi' quiu' buzé nagu' chi'a.

Busubán ládxa'a, Xan, ca naca le nusédinu' netu'.

150 Ta'biga' nupa tuá' dö' ga zoa' para ila'bia no neda'.

Nucá'anagaca xibá naguixju' Li'.

151 Zu' gala' ga zoa', Xan, ate' idútë li naca le gunná bë'u.

152 Dza ni'te quez núnbë'a le nunu' ba nalí, en nözda' tsaz nuzú' le.

Le gunná cazë' Dios run rë'u tsahui'

153 Buyú le rusaca' zi' neda', en busölá neda', tu' cabí ral-la ládxa'a xibá naguixju' Li'.

154 Bubí'i didza' uláz quia', en buá'u neda'.

Busubán ládxa'a ca naca xtídzu'u.

155 Zi'tu' zoa yöl-la' rusölá ga nacué' nupa tuá' dö', tu' cabí tuí'i ládxi'gaca le gunná bë'u.

156 Zxöntërö naca yöl-la' ruhuéchi' ladxi' quiu', Xan.

Busubán ládxa'a ca naca le nusédinu' netu'.

157 Ziángaca nupa ta'bia no neda', en ta'dá'baga' neda',

pero bití' nucá'ana' le nunu' ba nalí.

158 Bití' rilé'eda' dxi'a nupa nucá'anagaca Li', en bití' tun ca rnna xtídzu'u.

159 Buyú ca nadxí'ida' xibá quiu', Xan.

Lu yöl-la' dxi'i ladxi' quiu' busubán ládxa'a.

160 Idútë li nácagaca yúgu'të xtídzu'u,

en tsaz nacuá' yúgu'të le nusédinu' netu' le nácgaca tsahui'.

Ral-la' udödi cuinru' lu në'ë Dios

161 Ta'bía no neda' nupa ta'nná bë', en biti' bi bena' quéguequi,

pero runa' bal xtídz'u lu icja ládxi'da'ahua'.

162 Rudzéjalenda' xtídz'u,

ca rudzeja nu rudzöli tu yöl-la' tsahui' zxön.

163 Réquida' zi', en biti' rilé'eda' dxi'a le cabí nácatë, pero nadxí'ida' xibá naguixju' Li'.

164 Gadxi luzuí tu dza rigu'a Li' yöl-la' ba, ni'a que le nusédinu' netu', le naca tsahui'.

165 Ta'böza dxi'a tsáhu'i'do' nupa nadxí'igaca xibá naguixju' Li',

en biti' bi run ga röjchégu'gaca.

166 Runa' löza yöl-la' rusölá quiu', Xan,

en runa' ca rnna xibá nunu'.

167 Yugu' le nunu' ba nalí tun chi'i bö' naca caza', ate' nadxí'ide'eda' léguequi.

168 Runa' ca ta'nná xibá quiu', en yugu' le nunu' ba nalí

tu' rilé'e quézinu' yúgu'të le runa'.

Rudzéjalenu' xtídzë'ë Dios

169 Ruzë nagu' le rulidza' Li', Xan.

Ruzéajni'i neda' ca rnna xtídz'u.

170 Ruzë nagu' le rinábida' Li',

en busölá neda' ca rnna xtídz'u gunu'.

171 Bë' neda' lataj cu'a Li' yöl-la' ba,

tu' rusédinu' neda' le gunná bë'u.

172 Bë' lataj gul-la lúdx'a ca naca xtídz'u,

tu' nácgaca tsahui' yúgu'të xibá nunu'.

173 Guzóatë gácalenu' neda',

tu' naböa' xibá quiu'.

¹⁷⁴ Rizé ládxa'a yöl-la' rusölä quiu', Xan,
en raza ládxa'a xibá naguixju' Li'.

¹⁷⁵ Bë' lataj soa ibán bö' naca caza' para cu'a Li' yöl-
la' ba,

en ben ga gácalen neda' le nusédinu' netu'.

¹⁷⁶ Ridöda' tsölä'alö ca tuba' bö'cu' zxila' nanítiba'.
Gudá dudilju' neda', huen dxin quiu', tu' cabí ral-
la ládxa'a xibá nunu'.

120

¹ Cate' gudí'i guzxáca'a bulidza'-në' Xanru',
ate' Lë' bubí'ë didza'.

² Busölä bö' naca caza', Xan, lu na' nu rizí' yë',
en lu na' nu bití' run ca gunná caz.

³ ¿Bizxi gunë' quiu' Dios, en bizxi ubi'ë quiu', li' na'
rizí' yë'u?

⁴ Ichizë' li' yugu' yaga lahui tuchi' que nu reaj
gudil-la,

en cu'ë icju' bo' yalaj que ya' yörido'.

⁵ Bica' bayechi' neda' tu' zóasa' yödzö Mesec,
en zoa' tu lu yu'u guídi quégaca bönachi Cedar.

⁶ Xidzélë'ë chiguzóa bö' naca caza'
len nupa tu'suniti yöl-la' riböza dxi'a tsáhui'do'.

⁷ Ré'ënda' cöza' dxi'a tsáhui'do', pero cate' ruá'a
didza'

të'ënnë' ila'díl-lalen neda'.

121

¹ Uchisa icja' uyúa' le raca yugu' lu guía.

¿Gazxi za' le gácalen neda'?

² Le gácalen neda' za' lu në'ë Xanru'.

Lë' benë' lúzxiba, en luyú.

³ Bití' gu'ë lataj cuilu' ga ridó'.

Biti' ca' gasi Nu na' run chi'i li'.

⁴ Buyútsöca', biti' ridödi yëla guiöj lahuë',
en biti' rásië', Lë' na' rapa chi'ë bönachi Israel.

⁵ Run chi'ë Xanru' Dios li'.

Zoë' Xanru' Dios cuitu' ibëla, rigu'ë li' zxul-la.

⁶ Biti' uzegui' gubidza li' lahui' dza,
en biti' bi gun beo' quiu' chi'i dzö'ölö.

⁷ Gun chi'ë Xanru' Dios li' ga rizó'o, en ga rudxinu',
dza ni zóaru' na'a, en yugu' dza si' zaca.

⁸ Xanru' Dios gun chi'ë li' ga rizó'o, en ga rudxinu',
dza ni zóaru' na'a, en yugu' dza si' zaca.

122

¹ Budzėjada' cate' gulë bönachi neda', gula'nná:
“Uyeajru' yu'u lidxë' Xanru' Dios.”

² Na'a zuíru' ni
ga nu riyaza yödzö Jerusalén.

³ Dxi'ado' gulunë' yödzö Jerusalén,
ate' naca lachi, en tuz ca röjlözgaca yu'u zxön que.

⁴ Ta'yaza yugu' cö' bönachi queë' Xanru' ga ni
ca na' nusédinë' Dios bönachi Israel,
para ila'gú'u yöl-la' ba Xanru' Dios.

⁵ Ta'bö' nupa tu'chi'a tu'sörö queëru' ga ni,
ga ta'bö' ta'nná bë' zxi'ini xi'söë' David.

⁶ Guli'nábinë' Dios gunë' ga gaca dxi'a que
Jerusalén,
en ga ulu'zí' xibé nupa ta'dxi'i yödzö ni yöl-la'
tsahui'.

⁷ Dios gunë' ga ila'böza dxi'a tsáhui'do' nupa nacuá'
yödzö ni,
en ga ulu'zí' xibé nupa ta'nná bë' yöl-la' tsahui'.

⁸ Tu' nadxí'ida' yugu' böcha'a, en yugu' böchi'
luzá'a,

rnnía': "Gaca yöl-la' riböza dxi ladxi' lu yödzö ni."
⁹Tu' nadxí'ida' lidxë' Xanru' Dios,
 rinábida'-në' gunë' ga gaca dxi'a que yödzö ni.

123

¹Uchisa lahua' uyúa' ga zu' Li',
 rö'u rinná bë'u yehua' yubá ni'.
²Ca runë' bönni' nadó'o, ruyúë' bi ulu'ë xanë',
 ate' ruyubi' bi'i nigula nadó'o bi ulú'unu nigula
 xanbi',
 lësca' caní ruyuru' rë'u bi ulu'ë Xanru' Dios,
 ga idxinrö dza uzá' ládxe'ë queëru'.
³Buzá' ladxi' queëtu', Xan. Buzá' ladxi' queëtu',
 tu' nacuá' nupa tu'cá'ana netu' cá'asö.
⁴Rudú ládxi'tu' tu' tu'titaj netu' nupa tu'zì' xibé
 yúgu'të le dë,
 en tu' tu'cá'ana netu' cá'asö nupa tun ba zxön
 cuínguequi.

124

¹"La'tu' cabí gúcalenë' Xanru' rë'u",
 ral-la' ila'nná bönnachi Israel:
²"La'tu' cabí gúcalenë' Xanru' rë'u
 cate' nupa biti' ta'lé'e rë'u dxi'a gula'díl-lalen rë'u,
³la' gulútité rë'u
 tu' gula'léde'e rë'u.
⁴Guca queëru' ca la' usubága'të rë'u nisa,
 en la' uchícatëru' lu nisa na'.
⁵La' uchícatëru' tu lu nisa zila."
⁶¡Bica' lá'ayi Xanru' Dios
 tu' cabí bi'ë lataj nupa biti' ta'lé'e rë'u dxi'a
 ulu'suniti rë'u!

⁷ Bularu' ca rulaba' biguinnido' tu lu le zön lëba'.
Naröza' du yalaj, ate' nuláru'.

⁸ Le rácalen rë'u za' lu në'ë Xanru' Dios.
Lë' benë' lúzxiba, en lu yu.

125

¹ Nupa tu'zxöni ládxi'gaca Xanru' Dios nácagaca ca
guí'a Sión,
tu' cabí bi gaca utá guí'a na', pero tsaz zoa caz.

² Ca rǒ'gaca guí'a idú gásibi'ilö yödzö Jerusalén,
la' canísö zoë' Xanru' Dios idú gásibi'ilö bönachi
queë',

na'a dza, en yúgu'të dza si' zaca.

³ Biti' ral-la' ila'nná bë' nupa tuá' dö' lu xiyúgaca
bönachi tsahui',
para cabí iún ga ilu'ë dö' bönni' tsahui' na'.

⁴ Xan, ben ga gaca dxi'a quégaca nupa nácagaca
dxi'a,
en quégaca nupa idú ládxi'gaca tun ca rnna
xtídz'u.

⁵ Nupa tu'dödi cuínguequi lu le cabí nácatë,
ben léguequi xigua' tsözxön len nupa tuá' dö'.
Ben ga ila'cuá' bönachi Israel dxi'a tsáhui'do'.

126

¹ Cate' Xanru' Dios buchë'ë bönachi yödzö Sión
nupa gula'dzún zì'tu', gúquiru' yélasö rineru'.

² Ní'irö idú ládxi'ru' buzxídxiru',
en lu yöl-la' rudzeja queëru' gurödxi'aru'.
Ní'irö guluí'i didza' bönachi yugu' yödzö izá'a,
gula'nná:

“Dios, Xángaquië', benë' le nácagaca zxön, gúcalenë'
légaquië'.”

³ Xanru' Dios benë' le nácagaca zxön, gúcalenë' rë'u, ate' ruzí'iru' xibë'.

⁴ Buchë' netu', irúajtu' ga ni nadzuntu', Xan, para gácatu' ca nisa rudxín lu yegu nuhuí'igaca.

⁵ Lu yöl-la' rudzeja ila'bödxi'a cate' ila'lapa nupa lu yöl-la' ribödxi quéguequi röjözagaca.

⁶ Nu bönni' lu yöl-la' ribödxi rizë'ë, nu'ë bínnedo' röjözë', lu yöl-la' rudzeja cödxi'ë cate' udxinë', nu'ë le nula-pë'.

127

¹ Channö cabí runë' tsutsu Xanru' Dios tu yu'u, nítisö tunë' dxin bönni' tunë' yu'u na'.

Channö cabí run chí'ë Xanru' Dios tu yödzö, nítisö ruyúë' bönni' na' yu'u lu në'ë yödzö na'.

² Nítisö naca rubanu' zílado', en röjöxu' cate' chigúl-lada',

en ragu' le guzxi'u ni'a que le busaca' zi' cuinu', tu' runnë' Xanru' Dios que nu nadxí'inë' cate' ni' rasi nu na'.

³ Buli'yú, nácagacabi' zxí'iniru' le runnë' Xanru' Dios queëru',

ate' bí'ido' tu'cuá'anu nigula queëru' nácagacabi' le rubi'ë Xanru' Dios queëru'.

⁴ Ca nácagaca yaga lahui' tuchi' lu na' nu bönni' rejë' gudil-la

nácagacabi' zxí'inë' bönni' zoë' iz cuidi' queë'.

⁵ Bica' ba bönni' nacuá'abi' queë' ziántëro'bi'.

Biti' ca' utuí'inë' cate' ru'ë didza' láhui'gaquië' bönni' tu'chí'a tu'söröë' queë', en lógaca nupa ta'díl-lalen lë'.

128

¹ Bica' ba yúgu'të nupa tadxi Xanru' Dios,
nupa na' tun ca rë'ëni quëzinë' Lë'.

² Cate' gagu' le gata' quiu' ni'a que dxin nun cazu',
uzi'u xibé lë na', en gaca dxi'a quiu'.

³ Gácanu nigula quiu' ca tu lubá uva dxía ga naca
lö'a lidxu',
ate' ilácabi' zxí'ínu' ca yugu' yaga olívodo' ta'bö'öbi'
ga ni' ráguli'.

⁴ Buli'yútsöca', caní gáquië' bica' ba
bönni' na' rádxinë' Xanru' Dios.

⁵ Xanru' Dios zoë' Sión gunë' ga gaca dxi'a quiu',
en gu'ë li' lataj ilé'enu' le dxi'a gaca que yödö
Jerusalén
yúgu'të dza su' ibanu'.

⁶ Dios gu'ë li' lataj ilé'enu' yugu' zxí'ini xi'sú',
en gunë' ga ila'böza dxi'a tsáhui'do' bönachi Israel.

129

¹ “Zian luzuí gula'bía no netu' ga gudela' nácatu'
ra'bando”,

huáca ila'nná bönachi Israel:

² “Zian luzuí gula'bía no netu' ga gudela' nácatu'
ra'bando’,

pero biti' gula'deli' ulu'xicja netu'.

³ Guca tsca bulu'gá'ana-ba' bëdxi lu bëla' cúdzu'tu',
en gulún tunna ga gudödi xiyágaba' bëdxi
quëgaquië'.”

⁴ Tsahui' náquië' Xanru' Dios.

Chinachúguë' du quégaca nupa tuá' dö' le
gulúgui'ni netu'.

⁵ Ben ga ulu'tuí'i, en ulu'huécja guz cúdzu'lö

yúgu'tè nupa biti' ta'lé'e dxi'a netu', bönachi Sión.
⁶ Ben ga ilácagaca ca guíxi'do' da' ícjo'olö yu'u,
 le ribídxitè cate' ni' naca hué'ënido'.
⁷ Biti' gaca ulí nē'e nu tsöjchugu le,
 en biti' gaca nu gachi tsölén guizxi que,
⁸ en biti' ta'nná nupa ta'dödi ni':
 “Rinábitu'-nē' Xanru' Dios gunē' ga gaca dxi'a
 quiu'.
 Lu Lē' Xanru' rinábitu' Lē' gunē' ga gaca dxi'a
 quiu'.”

130

¹ Ga ni nőtjada' rulidza' Li', Xan.
² Ruzé nagu' chi'a, Xana' Dios.
 Ruzéda' nagu' le rinábida' Li'.
³ La' nnaru' tsöjnenu' xiguia' nabága'gaca bönachi,
 çnuzxi caz urúaj tsahui' lo', Xan?
⁴ Runiti lo cazu' netu', Xan,
 para guntu' Li' bal.
⁵ Runa' löza Li', Xana' Dios. Run löza bö' naca caza'
 Li',
 ate' runa' löza gaca ca rnna xtídzu'u.
⁶ Bö' naca caza' runrö löza Li', Xan,
 ca tunē' bönni' tapa chi'ē yödzö chi'i dzö'ölö
 ta'bözē' itö yu zila,
 ca tunē' löza itö yu zila yugu' bönni' na'.
⁷ Guli'gún löza Xanru' Dios, libí'ili', bönachi Israel,
 tu' náquiē' dxi'i ladxi' Xanru',
 en ruhuá'uē' bönachi Israel.
⁸ Xanru' Dios huóá'uē' bönachi Israel
 lu yúgu'tè xiguia' nabága'gaca.

131

¹ Biti' run ba zxön cuina', Xan, en biti' rigú'u cuina' yöl-la' ba,
en biti' ulapa' na'a le nácgaca zxön, en le nácgaca böniga.

² Idú ládxa'a nuzóa cuina' nöxaj, en zoa' dxisö.
Ca runbi' bi'i hué'ëni ruzí' ládxi'bi' cuítanu xiná'abi',
ca' riböza bö' naca caza' lu icja ládxi'da'ahua'.

³ ¡Libí'ili', bönachi Israel, guli'gunë' löza Xanru' Dios ga naguela' na'a dza, en yúgu'të dza si' zaca!

132

¹ Rinábida' Li', Xan, uláz queë' David tsöjnénu' yúgu'të le gudí'i guzxáque'ë,

² en ca benë' tsutsu xtídzë'ë, Xan, en guzxí' lu në'ë bi'gunë' lo',
nacu' Nu nál-latërö láhuigaquië' zxí'ini xi'sóë' Jacob, gunnë':

³ “Biti' ca' tsu'a lidxa',
en biti' gáta'a le ráti'da',

⁴ en biti' gu'a lataj tödi yëla guiöj lahua',
en biti' utsudi' lahua',

⁵ ga idxinrö dza ucöza' tu lataj ga soë' Xanru' Dios, le gaca yu'u lidxi Nu na' nál-latërö láhuigaquië' zxí'ini xi'sóë' Jacob.”

⁶ Biyönitu' didza' que guí'ina lá'ayi queë' Dios cate' ni' zóatu' Efrata,
ate' budzölitu' le lu xiyúë' Jaar.

⁷ Uyéajru' ga na' zoa cazë' Xanru' Dios.
Tseaj ládxi'ru'-në' ga naca xilibi ni'ë.

⁸ Gudödi, Xan, ga na' soa cazu' Li'.

Gudá tsözxön len guí'ina lá'ayi que yöl-la' zxön quiu'.

⁹ Ben ga sóalen le naca tsahui' yugu' bixúz quiu' ca tu lari' ta'xóë' cúdzu'gaquië'.
Ben ga ilúl-la bönachi quiu' lu yöl-la' rudzeja quéguequi.

¹⁰ Uláz queë' David, huen dxin quiu', rinábida' Li' cabí ucá'anu' bönni' na' gurö cazu' Li'.

¹¹ Xanru' Dios benë' tsutsu xtídzë'ë bi gunë' queë' David,
le naca idútë li, ate' Lë' biti' unítië' xtídzë'ë na',
gunné':

“Uzóa' tuë' zxí'ini xi'sú' xilatju' ga inná bë'ëbi'.

¹² Channö ilunbi' zxí'ini xi'sú' ca rnna didza' dzaga quia',
en le nuna' ba nalí para uzéajni'ida' légacabi',
ila'nná bë'ëbi' ga rö'u rinná bë'u yúgu'të dza si' zaca.”

¹³ Xanru' Dios nabö cazë' queë' yödzö Sión.
Raca ladxë'ë gaca Sión ga soa cazë' Lë'.

¹⁴ Rnnë': “Nácatíca'sö lataj ni ga soa caza' neda'.
Soa' ni tu' raca ladxá'a soa' ni.

¹⁵ Guna' ga gátada' le ilágugaca bönachi ni,
en guna' ga ulu'huölej ila'dzé'e yöta xtila
nupa ta'yadzaj ta'yudxi lu yödzö ni.

¹⁶ Guna' ga sóalen yöl-la' rusölá yugu' bixúz quia'
ca tu lari' ila'xóa cúdzu'gaquië',
ate' ilúl-la bönachi quia' lu yöl-la' rudzeja quéguequi.

¹⁷ Guna' ni ga ilá' lahui yöl-la' unná bë' queë' David.
Guna' ga sóaticá'sö nu inná bë' xilatjë' bönni' na'
nabö caza'.

18 Guna' ga sóalen nupa bití' ta'lé'e lè' dxi'a yöl-la' rutuí'i
ca tu lari' ilácuguequi, pero tsëpi yösa bení' le dxía icjë'."

133

1 Buli'yútsöca': ¡Bica' dxi'a tsahui' naca cate' nupa nácagaca böchi' luzë'e ta'böza lu yöl-la' tuz quéguequi!

2 Naca ca le za ta'gú'u ícjaguequi bönachi, le ridzún lu guitsa' láhuiguequi, en bidzún lu guitsa' lúzxuë' Aarón, le bidzún ga ridxintë lu yeni zxë'.

3 Naca ca buzén le ridinni lu guí'a Hermón, en ca le ribö'a lu guí'a Sión, tu' gunná bë'ë Xanru' gaca dxi'a queëru' lu guí'a na', en gata' yöl-la' na'bán idú queëru'.

134

1 ¡Buli'yútsöca'!

¡Guli'cu'ë Xanru' Dios yöl-la' ba, yúgu'tëli' runli' xichinë' Xanru',

yúgu'tëli' na' zóali' yu'u lidxë' Xanru' chi'i dzö'ölö!

2 ¡Guli'chisa ná'ali' ga zóali' lataj lá'ayi queë', en guli'nná dxi'a queë'!

3 Xanru' Dios, zoa cazë' yödzö Sión, gunë' ga gaca dxi'a queëli'.

Naca cazë' Nu ben yehua' yubá, en yödzölió ni.

135

1 ¡Guli'cu'ë yöl-la' ba Xanru' Dios!

¡Guli'cú'u yöl-la' ba La la'ayi queë' Xanru' Dios!

¡Guli'cu'ë yöl-la' ba, libí'ili' runli' xichinë' Xanru',

- 2 libí'ili' na' zuúli' yu'u lidxë' Xanru',
ga na' zóali' ló'a que yu'u lidxë' Dios queëru'!
- 3 ¡Guli'cu'ë yöl-la' ba Xanru' Dios tu' náquië' dxi'a!
¡Guli'gul-la yöl-la' ba que La la'ayi queë', tu' naca
lachi!
- 4 Nabö cazë' Xanru' zxi'ini xi'sóë' Jacob para ilaca
quez queë'.
- Guröë' bönachi Israel para ilequi queë'.
- 5 Nözda' nayëpisë' Xanru' Dios.
Nayëpisëtëre' ca yugu' dios quégaca bönachi izá'a.
- 6 Run cazë' Xanru' ca riyaza ladxi' cazë' yehua'
yubá ni',
en luyú ni, en lu nísado', en zxan lu yu.
- 7 Runë' ga rö' böaj gáti'tës luyú ni,
en runë' ga rëpi yösa cate' ralaj guiöj.
Rubéajë' bö' recja ga rapa chi'ë le nequi queë'.
- 8 Bëtië' yugu' bi'i bönni' zí'alö quégaca bönachi
Egipto,
zxi'inigaca bönachi, en böa' huë'ënido' quégacaba'
böa' guixi'.
- 9 Benë' yugu' yöl-la' huáca zxön le gulaca bë' luyú
Egipto,
yugu' lë na' gulaca queë' Faraón, en quégaca huen
xichinë'.
- 10 Busunítië' Dios bönachi zían yödzö izá'a,
en bëtië' bönni' lo ta'nná bë'ë.
- 11 Bëtië' Sehón, bönni' gunná bé'enë' bönachi
Amorroo,
en Og, bönni' gunná bé'enë' bönachi Basán,
en bönni' gula'nná bé'enë' bönachi yödzö nacuá'
luyú Canaán.
- 12 Budödë' xiyúgaquië' bönni' na'

lu ná'agaquië' bönni' Israel, bönnachi queë cazë'.

¹³ Tsaz zoa caz Lo', Xan.

Ila'cuá'tica'sö nupa tsöjnégaca Li', Xan,

¹⁴ tu' uchi'a usöröu' bönnachi queu', Xantu' Dios,
en huéchi' ládXu'u nupa tun xichinu'.

¹⁵ Budó' quégaca bönnachi yugu' yödZö izá'a
néquiniguequi
plata, en oro, yugu' le núngaca lu ni'a lu ná'agaca
bönnachi.

¹⁶ Zóagaca ruí'iguequi, pero biti' bi didza' tu'i.

Zóagaca guiöj lóguequi, pero biti' bi ta'lé'e.

¹⁷ Zóagaca náagaca, pero biti' bi ta'yöni,
en biti' ta'guela' bö' ruí'igaca.

¹⁸ Nupa tun léguequi ilaca ca náagaca budó' na',
en caní ilaca yúgu'të nupa tu'zxöni ladxi' léguequi.

¹⁹ Libí'ili', bönnachi Israel, guli'guíë' Xanru' náquië'
dxi'a.

Libí'ili', zxi'ini xi'sóë' Aarón, guli'guíë' Xanru'
náquië' dxi'a.

²⁰ Libí'ili', zxi'ini xi'sóë' Leví, guli'guíë' Xanru'
náquië' dxi'a.

Libí'ili', núlöli' rádxili'-në' Xanru', guli'guíë' Xanru'
náquië' dxi'a.

²¹ Núlöli' zóali' yödZö Sión ral-la' guiéli'-në' Xanru'
náquië' dxi'a,
tu' zoa cazë' Xanru' Dios yödZö Jesusalén.

¡Guli'cu'ë yöl-la' ba Xanru'!

136

¹ ¡Xclenë' Xanru' Dios tu' náquië' dxi'a!

Zóatica'sö yöl-la' dxi'i ladxi' queë'.

² ¡Xclenë' Dios nayëpisëtëre' ca yugu' dios izá'a!

Zóatica'sö yöl-la' dxi'i ladxi' queë'.

³ ¡Xclenë' Xanru', nayëpisëtëre' ca yugu' xángaca
bönachi!

Zóatica'sö yöl-la' dxi'i ladxi' queë'.

⁴ ¡Xclenë' Dios, tuzë' Lë' runë' yugu' yöl-la' huáca
zxön!

Zóatica'sö yöl-la' dxi'i ladxi' queë'.

⁵ ¡Xclenë' Dios, len yöl-la' rácada' queë' benë' lúzxiba!

Zóatica'sö yöl-la' dxi'i ladxi' queë'.

⁶ ¡Xclenë' Dios, gudixjë' luyú láhuilö nísado'!

Zóatica'sö yöl-la' dxi'i ladxi' queë'.

⁷ ¡Xclenë' Dios, benë' gubidza, en beo'!

Zóatica'sö yöl-la' dxi'i ladxi' queë'.

⁸ ¡Benë' Dios gubidza para tsení' lahui' dza!

Zóatica'sö yöl-la' dxi'i ladxi' queë'.

⁹ ¡Benë' Dios beo', en yugu' bôlaj para ulu'zení' chi'i
dzö'ölö!

Zóatica'sö yöl-la' dxi'i ladxi' queë'.

¹⁰ ¡Xclenë' Dios, bëtië' yugu' bi'i bönni' lo quégaca
bönachi Egipto!

Zóatica'sö yöl-la' dxi'i ladxi' queë'.

¹¹ ¡Bubéajë' bönachi Israel ladaj bönachi Egipto na'!

Zóatica'sö yöl-la' dxi'i ladxi' queë'.

¹² ¡Len yöl-la' huáca zxön queë', en lu yöl-la' nadxí'i
queë' benë' caní!

Zóatica'sö yöl-la' dxi'i ladxi' queë'.

¹³ ¡Xclenë' Dios, bubéajë' choplö Nísado' Xiná!

Zóatica'sö yöl-la' dxi'i ladxi' queë'.

¹⁴ ¡Benë' ga gula'dödi bönachi Israel gatsaj láhui'lö
nísado' na'!

Zóatica'sö yöl-la' dxi'i ladxi' queë'.

- 15 ¡Lu nísado' na' busunítië' Faraón, en bönni' queë'
röjáquië' gudil-la!
Zóatica'sö yöl-la' dxi'i ladxi' queë'.
- 16 ¡Xclenë' Dios, guchë'ë bönachi queë' la' guixi' ga
ni' naca yu bidxi!
Zóatica'sö yöl-la' dxi'i ladxi' queë'.
- 17 ¡Xclenë' Dios, bëtië' bönni' gula'nná bë'ë,
guláquië' nal-la!
Zóatica'sö yöl-la' dxi'i ladxi' queë'.
- 18 ¡Bëtië' bönni' gula'nná bë'ë, dëda' lu ná'agaquië'
yöl-la' unná bë'!
Zóatica'sö yöl-la' dxi'i ladxi' queë'.
- 19 ¡Bëtië' Sehón, bönni' gunná bé'enë' bönachi
Amorroo!
Zóatica'sö yöl-la' dxi'i ladxi' queë'.
- 20 ¡Bëtië' Og, bönni' gunná bé'enë' bönachi Basán!
Zóatica'sö yöl-la' dxi'i ladxi' queë'.
- 21 ¡Budödë' xiyúgaquië' lu ná'agaca bönachi queë'!
Zóatica'sö yöl-la' dxi'i ladxi' queë'.
- 22 ¡Budödë' le lu ná'agaca bönachi Israel, bönachi tun
xichinë'!
Zóatica'sö yöl-la' dxi'i ladxi' queë'.
- 23 ¡Yöjnenë' rë'u cate' ni' bugá'anaru' cá'asö!
Zóatica'sö yöl-la' dxi'i ladxi' queë'.
- 24 ¡Busölë' rë'u lu ná'agaca nupa gula'díl-lalen rë'u!
Zóatica'sö yöl-la' dxi'i ladxi' queë'.
- 25 ¡Rugahuë' yúgu'të bönachi!
Zóatica'sö yöl-la' dxi'i ladxi' queë'.
- 26 ¡Xclenë' Dios, zoa cazë' yehua' yubá!
Zóatica'sö yöl-la' dxi'i ladxi' queë'.

137

1 Ra' yegu nacuá' lu yu Babilonia gurö'ötu',

en gurödxí yéchi'tu', cate' yöjnetu' yödzo Sión.

² Lu yaga rő'gaca yugu' ra' yegu ni'
bugála'tu' yugu' le rúl-lalentu'.

³ Caní bentu' tu' gula'nabi yudxi nupa gulachě'
netu' nadzuntu' ni' gúl-latu'.

Nupa bulu'saca' zi' netu' gula'naba queėtu' yöl-la'
ruzxidxi, gula'nná:

“Guli'gul-la queėtu' tu le rul-la que yödzo Sión.”

⁴ ¿Nacxi caz gaca gúl-latu' le rul-la queė' Xanru'
ga ni nadzuntu' tu lu yödzo izá'a?

⁵ Channö gal-la ládxa'a yödzo Jerusalén,
rinábida'-ně' Dios ugúe' yöl-la' raca que na'a ibëla.

⁶ Rinábida'-ně' guně' ga ta' lúdx'a'a chichja'
channö cabí tsöjneda' ladza',

en channö cabí huí' zxonra' yödzo Jerusalén ca
ia'tú le ruzi'ida' xibé.

⁷ Yöjné le guluně' xzí'ini xi'sóe' Edom, Xan,

le guluně' dza busiúdxu' yödzo Jerusalén,

ca na' gula'nně': “Guli'quinnaj dëra.

Guli'quinnaj dëra ga idxintë xilibi zö'ö yödzo na'.”

⁸ Libí'ili', bönachi Babilonia, libí'ili' rusunítili',
bica' ba nu ubí'i queéli' ca na' benli' queėtu'.

⁹ Bica' ba nu quela' yugu' bí'ido' queéli'

en uzxuzxaj légacabí' yugu' lu guiój.

138

¹ Idú ládxa'a guía' Li', “Xclenu” Xan.

Gul-la' yöl-la' ba quiu' lógaca le tun zxon bönachi
yugu' yödzo izá'a.

² Uzóa zxiba' saca' yudo' lá'ayi quiu', en guía' Li',
“Xclenu”

ni'a que Lo', tu' nacu' dxi'i ladxi', en runu' ca rnna
didza' bē'u,
tu' benu' ca naca lu xtídu'u, en lu le naca ca nazí'i
lo.

³ La' dza ná'asö cate' bulidza' Li', bubí'u didza'.
Tu' butipu' ládxa'a, guca' rugu ladxi'.

⁴ Yúgu'tē bönni' ta'nná bē'ē ilé' Li': "Xclenu" Xan,
cate' ila'yönnē' didza' ru'u.

⁵ Ilul-lē' ca nácagaca le runē' Xanru' Dios,
tu' nácatērö zxön yöl-la' ba queē' Xanru'.

⁶ Sal-la' nayēpisētērē' Xanru' Dios
ru'i ládxe'ē nupa nácagaca cá'asö,
pero zi'tu' zí'tu'sö ruyúē' nupa tun ba zxön
cuínguequi.

⁷ Sal-la' ridá' ga zoa bönadxi quia', Li' utipa cazu'
ládxa'a.
Tíl-lalen cazu' nupa ta'díl-lalen neda',
ate' len yöl-la' huáca quiu' usöló' neda'.

⁸ Xanru' gun cazē' quia' ca chinuzóa cazē' gunē'.

Zóatica'sö yöl-la' dxi'i ladxi' quiu', Xan.
Biti' usán no'o le nun cazu' len na' cuinu'.

139

¹ Ruyú cazu' le yu'u icja ládxi'da'ahua', Xan, en
nunbē' cazu' neda'.

² Nöz quézinu' cate' ribö'a, en cate' riyasa'.
Nözinu' le rizá' ládxa'a ni' zu' zi'tu'.

³ Ruyú cazu' neda' cate' bi runa', en cate' rasia',
en nözinu' yúgu'tē le runa'.

⁴ Zí'atëlö ca bi didza' ru'a,
chi nöz quézinu' bi innía', Xan.

⁵ Rōjnōru cazu' lahua', en za' cazu' cūdzá'a,
en naxóatica'sō no'o neda'.

⁶ Run ga rubánida' tu' nōz quézinu' Li'.
Biti' séqui'da' tséajni'ida' ca naca.

⁷ ¿Naru' huáca tseja' ga biti' idxín Bö' quiu'?
¿Naru' huáca izxúnnaja' ga biti' zoa cazu' Li'?

⁸ La'tu' huabena' lúzxiba, ni' soa cazu' Li',
en la'tu' huōtja' lataj chul-la, ni' zoa cazu' ca'.

⁹ La'tu' uyija' ga rilén gubidza,
o la'tu' huadōda' ia'tsölá'alō nísado',

¹⁰ ni' caz ichē'u neda',
ate' len no'o ibēla sōn cazu' neda'.

¹¹ La'tu' inniá': "Úcachi' neda' le naca chul-la",
en la'tu' huōáca chul-la bení' zóalen neda',

¹² biti' gaca chul-la lo' Li' lē na' naca chul-la quia',
pero chi'i dzō'ölō gaca quiu' ca lahui' dza.

Tuz ca nácagaca lo' Li' le naca chul-la, en le naca
lahui' dza.

¹³ Nun cazu' Li' le zoa icja ládxi'da'ahua'.

Benu' ga guyá' lē'ēnu xiná'a le naca caza'.

¹⁴ Guía' Li': "Xclenu" tu' run ga rubánida' ca nun
cazu' neda',

ate' rádxida' Li' tu' tun le nunu' ga rubánida',
ate' bö' naca caza' nōzi caz naca caní.

¹⁵ Biti' bigachi' lo' le naca caza' cate' ni' si' galja',
cate' ni' yu'a lē'ēnu xiná'a.

¹⁶ Bilé'e quézinu' neda' cate' ni' si' galja',
tu' chinuzúajgaca lu guichi quiu'

yugu' dza ral-la' soa' ibana',
sal-la' biti' ridxini nitú dza na'.

¹⁷ Nazáca'tērōgaca quia' le rizá' ládxi'u, Dios.
Ziántērō nácagaca lē na' rizá' ládxi'u.

¹⁸ La'tu' huáca nu ulaba léguequi,

ilácagaca ziántërö ca nácagaca guiöj yuzxi.
Cate' rubana', ni' zóalena' Li'.

¹⁹ Raca ládxa'a usunítu' nupa tuá' dö', Dios.

Que lë ni na', guli'cuíta ga zoa', núlöli' rútili'
bönachi.

²⁰ Tuí'i didza' zi' ca nacu' Li', Dios,
ate' nupa ta'dá'baga' Li' ta'nnë liz que Lo'.

²¹ ¿Naru' cabí rileda' nupa ta'lé Li', Xan?

¿Naru' cabí ruzóa' tsölá'alö nupa ta'dá'baga' Li'?

²² Idú ládxa'a bití' rilé'eda' léguequi dxi'a.
Nuzóa' léguequi ca nupa ta'díl-lalen neda'.

²³ Buyú neda', Dios, en gúquibe'e le zoa icja
ládxi'da'ahua'.

Guzxí' bé' neda', en gúquibe'e le rizá' ládxa'a.

²⁴ Buyú channö zóalen neda' le naca dö',
en buluí'i neda' nöza tsahui' quiu' zóatica'sö.

140

¹ Busölá neda', Xan, lu ná'agaca nupa tuá' dö'.
Ben chí'i neda' para cabí bi ilunë' bönni' zi' quia'.

² Ta'zá' ládxe'ë le nácagaca xihui' ilunë',
en tunë' ga ila'díl-lalen bönachi luzé'eguequi.

³ Didza' tu'ë tun ga nácagaca lúdxí'gaquië' ca yugu'
bëla sínia'.

Yu'u ruá'agaquië' le nachë' yöl-la' guti ca le dxía lu
láyi'ba' bëla na'.

⁴ Ben chí'i neda', Xan, para cabí bi ilunë' bönni' tu'ë
dö' quia'.

Ben chí'i neda' para cabí bi ilunë' bönni' zidzaj
quia',

bönni' na' té'ënë' ilunë' ga ichixi iníguida'.

5 Nupa tun ba zxön cuínguequi nucáchi'gaca le sön neda',
 enca' du yalaj iröli neda'.
 Nucáchi'gaca du yalaj ga ral-la' töda'.
 Nucózagaca le ila'zön neda'.

6 Gudxa'-në' Xanru': "Nacu' Dios quia'.
 Ruzě nagu', Xan, yugu' le rinábida' Li'.

7 Xana' Dios, naca cazu' Nu rusölá neda' len yöl-la' huáca quiu'.

Ben chi'i cazu' icja' cate' ni' zoa' lu gudil-la.

8 Biti' gu'u lataj, Xan, gaca quia' le rě'eně' guně' bönni' ru'ě dö'.

Biti' gu'u lě' lataj idéli'ně' le rizá' ládxě'ě, para cabí tsépisě'.

9 Nacuá' nupa nagú'ugaca neda' lě'ajlö.

Busubaga' ícjagaquiě' dö' té'eně' ilu'ě quia'.

10 Ben ga ila'bixaj bo' yalaj lahui ícjagaquiě'.

Bě' lataj tsöjtsázagaquiě' tu lu guí' zxön,
 en yugu' lu yeru zila ga bití' ila'zéqui'ně' ulu'rúajě'.

11 Biti' gu'u lataj soě' bönni' rizi' yě'ě luyú ni.

Ben ga udxín queě' bönni' zidzaj dö' ru'ě."

12 Nözda' guně' Xanru' ga ulu'rúaj tsahui' nupa ta'guí'i ta'zaca',

en uchi'a usöröě' quégaca bönachi yechi'.

13 Le nácatě ilě Li': "Xclenu'" nupa nácgaca tsahui' tu' tu'lidza Lo'.

Ila'cuá' ga zoa cazu' Li' nupa nácgaca dxi'a.

141

1 Rulidza' Li', Xan. Gudáchi ga zoa'.

Ruzě nagu' chi'a cate' rulidza' Li'.

² Buyú le rulidza' Li' ca dzön yalaj le ridxín lo',
en cate' richisa na'a, buzí' le ca tu böa'do' uzégui'a-
ba' lo'.

³ Ben chí'i ruá'a, Xan,
en gudapa chí'i guídi ruá'a para cabí gu'a didza' zi'.

⁴ Biti' gu'u lataj gaca ládxa'a le cabí nácatë,
para cabí guna' le naca xihui'
len yugu' bönni' tutië' bönachi.

Biti' gu'u lataj guna' léguequi tsözxön.

⁵ Bë' lataj gu'ë neda' bönni' tsahui' lu yöl-la' nadxí'i
queë'

para uzéajni'inë' neda'.

Le gunë' gaca quia' ca le za cu'ë icja'.

Biti' gu'u lataj tá'baga' icja' le ilún nupa tuá' dö'.

Rinábida' Li' uzagu' xinözguequi.

⁶ Ila'ládzugaquië' bönni' lo quéguequi lë'e guí'a
guiöj,

ate' iléquibe'e gulaca dxi'a didza' bë'a.

⁷ Ca raca cate' nu rugá'ana-ba' bëdxi, en rulá'a yu,
ca' gaca que dxita yú'ugaquië',

le gulásilasi ra' ba que xilátjagaca nupa nátigaca.

⁸ Richisa lahua' ruyúa' ga zu' Li', Xantu' Dios.

Rucachi' cuina' ga na' zu'. Biti' usán no'o neda'.

⁹ Ben ga bití' tsöjbixa' lu le sön neda', lë na'
nucáchi'gaca,

en ga bití' tsöjtsaza' lu du yalaj nucözagaca nupa
tuá' dö'.

¹⁰ Bë' lataj ila'yaza la' cuíngacasö lu du yalaj
bulu'cachí' nupa tuá' dö',

pero benna lataj tódisa' neda' ga na' nagachi' du
yalaj na'.

142

¹ Rulidza' -në' Xanru', ru'a zidzaj didza'.
 Ráta'yua' lahuë' Xanru' uzá' ládxe'ë quia'.
² Rudöda' lahuë' yöl-la' rinaba yudxi quia',
 en rusiyönda' Lë' le rácagaca quia'.

³ Cate' budú ládxa'a,
 gunözi quézinu' Li' le guca quia'.
 La' nöza ga ridá' neda'
 bulu'cachi' le sön neda'.

⁴ Buyú cuita' ibëla
 tu' cuntu nu zoa nu ruí'i ladxi' neda'.
 Biti' bi zoa le gácalen neda'.

Cuntu nu run chi'i bö' naca caza'.

⁵ Gurödxí'a lo' Li', Xan, gunnía':
 Run chi'i cazu' neda' Li',
 en naca cazu' Nu rácalen neda' ladaj nupa
 nabángaca.

⁶ Ruzé nagu' le rulidza' Li',
 tu' nagá'ana' cá'asö.
 Busölá neda' lu ná'agaca nupa ta'zóa regu' neda',
 tu' nácatërögaca nál-la ca neda'.

⁷ Guléaj bö' naca caza' lu yu'u lidxi guié,
 para gaca guía' Li': "Xclenu" tu' rulidza' Lo'.
 Nupa náacagaca tsahui' ulu'dubi idú gásibi'ilö ga
 zoa',
 tu' gunnu' sizxöni quia' le riquinda'.

143

¹ Ruzé nagu' le rulidza' Li', Xan.
 Ruzé nagu' le rinabi yúdxida' Li'.
 Tu' runu' ca rnna didza' bë'u, en nacu' tsahui'
 gunnú'

² bití' ichë'u neda' lo' ga uchi'a usöröu' quia', huen
dxin quiu'.

Cuntu nu zoa naca tsahui' lo' Li'.

³ Nu bití' rilé'e neda' dxi'a zoa regu' bö' naca caza'.
Nuzötjé' yöl-la' na'bán quia' lu yu.

Bené' ga zoa' lataj naca chul-la ca raca quégaca
nupa gulati dza ni'te.

⁴ Que lë ni na' rudú ládxa'a, en rö'a böniga.

⁵ Röneda' dza chigula'dödi.

Rizá' ládxa'a ca nácagaca le benu' Li'.

Ribequi icja' ca nácagaca le nun no'o.

⁶ Richisa na'a zaca' ga zu' Li'.

Rizé ládxa'a Li' ca tu luyú bidxi rizé ladxi' nisa
guiöj.

⁷ Bubi'të didza', Xan, tu' rudú ládxa'a.

Bití' ucachi' lo' lahua' neda',

para cabí gaca' ca tu bönni' ru'ë lataj chul-la ga
nacuá' nupa nátigaca.

⁸ Ben ga yönda' yugu' zila ca naca yöl-la' dxi'i ladxi'
quiu',

tu' ruzxöni ládxa'a Li'.

Busëdi neda' ca ral-la' guna',

tu' ruchisa' lo' Li' bö' naca caza'.

⁹ Busölá neda', Xan, lu ná'agaca nupa bití' ta'lé'e
neda' dxi'a.

Nacu' Nu ruzóa neda' tsutsu.

¹⁰ Busedi neda' para guna' ca rë'ënu' Li',

tu' naca cazu' Li' Dios quia'.

Bë' lataj iché' Bö' Lá'ayi quiu' neda' lu nöza tsahui'.

¹¹ Butipa ládxa'a, Xan, para gaca yöl-la' ba que Lo'.

Tu' nacu' tsahui' busölá neda' lu le raca quia'.

¹² Lu yöl-la' dxi'i ladxi' quiu' guchugu quégaca nupa
bití' ta'lé'e neda' dxi'a.

Busuniti yúgu'të nupa tu'saca' zi' bö' naca caza',

tu' naca' huen dxin quiu'.

144

¹ ¡Yöl-la' ba Lë', Xanru' Dios!

¡Náquië' ca tu guióǰ ga zoa' tsutsu!

Rutipë' na'a para gaca tseja' gudil-la,

en rutipë' ca' xibón na'a para gaca tíl-lalena' bönni'
nácagaquië' nál-la.

² Naca cazë' Xanru' yöl-la' dxi'i ladxi' quia',

enca' ca tu ga zoa' tsutsu lu gudil-la.

Rusölë' neda', en náquië' ca tu ga zoa' tsaz.

Náquië' ca tu le run chi'i neda' lu gudil-la, ate'
rucachi' cuina' ga na' zoë'.

Runë' ga tun nupa rinná bé'eda' ca rnna didza'
ru'a.

³ ¿Bíxatë caz náquië' bönni' tu' runu' lë' ba lá'ana,
Xan?

¿Bíxatë caz náquië' bönni' tu' ruí'i ladxi' cazu' lë'?

⁴ Naca cazë' bönni' na' ca tu bö'do' recja,

ate' yugu' dza zoë' nabanë' nácagacasö ca tu zxul-la
le rigú'u tu böaj ridödisö.

⁵ Buzötaj lúxriba, en bdinne ni, Xan.

Gudán yugu' guí'a, ate' irúaj dzön lë'eguequi.

⁶ Ben ga tsëpi yösa quiu', en bësilasi léguequi.

Busë yugu' yaga lahui tuchi', en ben ga ila'bö'
baguí'isö.

⁷ Bulí no'o ga na' zu' xitsá'alö.

Busölá neda', en guléaj neda' lu ná'agaca bönachi
zi'tu',

le gaca ca rubéaju' neda' lu nisa zila.

⁸ Ta'zí' yë' bönachi na',

ate' le cabí nácatë naca yöl-la' unná bë' quéguequi.

9 ¡Gul-la' quiu' Li', Dios, tu le cubi!
 ¡Gul-la' quiu' yöl-la' ba, en quínnia' bihuël-la nuá' chi
 du que!

10 Rusölá cazu' bönni' ta'nná bē'ë.
 Busöló' David, huen dxin quiu', lu guíë tuchi' queë'
 bönni' ru'ë dö'.

11 Gúcalen neda', en busölá neda' lu ná'agaca
 bönachi zi'tu'.

Ta'zí' yē' bönachi na',
 ate' le cabí nácatē naca yöl-la' unná bē' quéguequi.

12 Ben ga ilácabi' bi'i bönni' queëtu' ni yu'ugacabi'
 iz cuidi'
 ca yugu' yaga nazxóngaca,
 en ben ga ilácabi' bi'i nigula queëtu'
 ca náagaca ya'zxén que tu yu'u nazaca'.

13 Ben ga ilígaca yu'u queëtu' zxoa' za utúbitu',
 en ben ga iláljaba' gayuá' gayuá'aba' chíbodo',
 en bö'cu' zxíla'do' ga nucuá'atu'-ba'.

14 Ben ga ulu'cuá'aba' böa' huě'ënido' quégaca böa'
 guixi' queëtu',
 en ga biti' bi gaca quégacaba' bēdxi zxön, en
 bēdxido' ca'.
 Biti' gu'u lataj soa nu cōdxi yechi' la' nōza que
 lādzatu'.

15 ¡Bica' bágaca bönachi raca caní quéguequi!
 ¡Bica' bágaca bönachi na' Xanru' Dios náquiē' Dios
 quéguequi!

145

1 ¡Guna' Li' zxön, Dios!

- ¡Nacu' Nu rinná be'e neda!
 ¡Gádxitica'sa' Lo', Xana' Dios!
² ¡Tu dza tu dza cu'a Li' yöl-la' zxön,
 en cú'utica'sa' Lo' yöl-la' ba!
³ ¡Nayépisëtêrê' Xanru' Dios, ate' cú'uru'-nê' yöl-la'
 ba!
 ¡Biti' ca' gaca gúnbê'ëru' ca naca yöl-la' zxön queë'!
⁴ Yúgu'tê bönachi ila'gú'u yöl-la' ba le nun cazu' Li',
 para ulu'siyön zxí'inigaca,
 en ulu'luí'i lahui le nácagaca zxön benu'.
⁵ Sa' ládxa'a ca naca yöl-la' zxön que yöl-la' unná bê'
 quiu',
 en ca nácagaca yöl-la' huáca zxön runu'.
⁶ Iluí'i didza' yúgu'tê bönachi ca naca yöl-la' zxön
 quégaca yöl-la' huáca runu'.
 Üsiyönda' bönachi ca naca yöl-la' zxön quiu'.
⁷ Idú ládxi'gaca iluí'i didza' cate' tsöjnégaca yöl-la'
 dxi'i ladxi' zxön quiu'.
 Lu yöl-la' rudzeja quéguequi ila'bödxí'a tu' nacu'
 tsahuí'.
⁸ Xanru' Dios ruzá' ládxi'ë queëru', en ruhuéchi'
 ládxi'ë rë'u.
 Biti' ilética'sê', ate' zxöntêrö naca yöl-la' dxi'i ladxi'
 queë'.
⁹ Runê' Xanru' Dios le naca dxi'a quégaca yúgu'tê
 bönachi,
 en ruhuéchi' ládxi'ë yúgu'tê le nunê'.
¹⁰ Yúgu'tê le nunu' ilé Li': "Xclenu'" Xan,
 ate' nupa néquiguequi quez quiu' ilún Li' zxön.
¹¹ Iluí'i didza' ca naca yöl-la' zxön que le rinná bê'u,
 en ulu'luí'i lahui yöl-la' zxön quiu',

12 para ulu'siyõn bõnachi ca nácagaca le zxõn runu',
en ca naca yõl-la' zxõn que le rinná bẽ'u le
nayẽpisõtẽrõ.

13 ¡Zóatica'sõ le rinná bẽ'u,
ate' idía'tica'sõ yõl-la' unná bẽ' quiu'!
¡Lu le naca idú ladxi' queẽ' runẽ' Dios ca rnnágaca
yúgu'tẽ didza' ru'ẽ,
en lu yõl-la' dxi'i ladxi' queẽ' runẽ' yúgu'tẽ le runẽ'!

14 ¡Rõjzõnẽ' Xanru' yúgu'tẽ nupa rõjtsõ'õgaca,
en ruchisẽ' yúgu'tẽ nupa ndínnegaca!

15 ¡Yúgu'tẽ bõnachi tu'yú Li', Xan,
ate' runõdzju' le ilágugaca cate' ridxín dza que!

16 ¡Rusalaj cazu' no'o
en rugagu' yúgu'tẽ le nacuá' nabángaca!

17 Náquiẽ' tsahui' Xanru' Dios ca naca yúgu'tẽ le
runẽ'
en náquiẽ' ca' dxi'i ladxi'.

18 Zoẽ' Xanru' gala' ga nacuá' yúgu'tẽ nupa tu'lidza
Lẽ',
nupa na' tu'lidza Lẽ' idú ládxi'guequi.

19 Gunnẽ' le ta'zẽ ládxi'gaca quégaca nupa tadxi Lẽ'.
Riyõnnẽ' cate' tu'lidza Lẽ', en rusõlẽ' léguequi.

20 Run chi'i cazẽ' Xanru' yúgu'tẽ nupa nadxí'igaca
Lẽ',
pero usunítĩẽ' nupa tuá' dõ'.

21 Len ru'a cuina' cu'a-nẽ' Xanru' yõl-la' ba,
ate' yúgu'tẽ bõnachi ilúntica'sõ Lẽ' zxõn.

146

1 ¡Guli'cu'ẽ yõl-la' ba Xanru'!

¡Li', bõ' naca caza', gulu'ẽ yõl-la' ba Xanru'!

² ¡Cu'a-në' Xana' yöl-la' ba tsanni ni zoa' nabana'!
 ¡Gul-la' yöl-la' ba queë' Dios quia' tsanni ni zoa bö'
 naca caza'!

³ Biti' uzxöni ládxi'li' bönni' ta'nná bē'ë,
 en calëga bönni' tati cazë', bönni' bití' ca' gaca
 ulu'sölë' rë'u.

⁴ Rurúaj bö' yu'ë nu bönni', ate' ruhuöáquië' yu.
 La' dza ná'asö riniti le rizá' ládxi'ë gunë'.

⁵ Bica' ba bönni' rácalenë' Dios queë' Jacob lë',
 bönni' na' runë' löza Xanru' Dios.

⁶ Nunë' Xanru' Dios lúzxiba, en luyú ni,
 enca' nísado', en yúgu'të le nacua' yugu' lataj na'.
 Rúntica'së' Lë' ca rna didza' bē'ë,

⁷ en ruchi'a rusöröë' nupa zoa nu rusaca' zi'
 léguequi.

Rugagu cazë' nupa ta'dún.

Rusanë' Xanru' Dios nupa nadzúngaca.

⁸ Rusaljë' Xanru' Dios guiöj lógaca nupa nácacaca lo
 chul-la.

Ruchisë' Xanru' Dios nupa nadzö'ögaca.

Nadxi'inë' Xanru' Dios nupa nácacaca tsahui'.

⁹ Rapa chi'ë Xanru' Dios yugu' bönni' zi'tu'.

Rácalenë'-bi' yugu' bi'i uzëbi, enca' yugu' nigula
 uzëbi,

pero ruzaguë' xinözguequi nupa tuá' dö'.

¹⁰ Inná bē'tica'së' Xanru' Dios.

Náquië' Dios queëli', bönachi Sión.

¡Guli'cu'ë yöl-la' ba Xanru'!

147

¹ ¡Guli'cu'ë yöl-la' ba Xanru'!

¡Tshui' naca gúl-laru' yöl-la' ba queë' Dios queëru'!
 ¡Naca lachi, en le ral-la' gunru', cú'uru'-në' yöl-la'
 ba!

² Runë' Xanru' Dios ga rizxõn yödzö Jerusalén.
 Rutubë' bönni' Israel násilasigaquië'.

³ Ruúnë' bönni' nácagaquië' yechi' ladxi',
 en rudë'ë lari' ga dxíagaquië' huë'.

⁴ Rulabë' tsca nacuá' böläj lúzxiba.
 Nucü'ë lágacaba' tu tuba' yúgu'të böläj na'.

⁵ Nayëpisëtërë' Xanru' Dios, en nál-latërë'.
 Ga rë'ë dzu réajni'inë' yúgu'të.

⁶ Xanru' Dios rácalenë' nupa ta'guí'i ta'zaca'.
 Ruzötjë' nupa tuá' dö' lu yu.

⁷ ¡Guli'gul-la queë' Xanru' Dios, guiëli'-në':
 "Xclenu"!
 ¡Guli'gul-la yöl-la' ba queë' Xanru', quínnili' lë'egaca
 bihuël-lado'!

⁸ Riguísië' yugu' böaj lúzxiba,
 en risól-lë'ë nisa guiõj luyú.
 Runë' ga rilén yö yugu' lu guí'ado'.

⁹ Rugahuë' yugu' böa' guíxi'do',
 enca' bóiquiajdo' ta'bõdxi'aba'.

¹⁰ Biti' raza ládxë'ë yöl-la' nál-la queëba' böa',
 en biti' ruzi'ë xibé yöl-la' nál-la queë' bönni'.

¹¹ Raza ládxë'ë Xanru' Dios nupa tadxi Lë',
 nupa na' tun löza yöl-la' dxi'i ladxi' queë'.

¹² ¡Guli'cu'ë yöl-la' ba Xanru', libí'ili' zóali' Jerusalén!
 ¡Guli'cu'ë yöl-la' ba Dios queëli', libí'ili' zóali' Sión!

- 13 Bucu'ë tsutsu le tu'baga' gapa nu riyaza yödzo
queëli',
en runë' ga raca dxi'a quégaca zxi'inili' ga na' zóali'.
- 14 Runë' ga ribözali' dxi'a tsáhui'do',
en runë' ga ruhuölaj ridzé'eli' xzoa' xtila dxi'atëro.
- 15 Rinná bé'enë' yödzülió ni,
ate' xtídzë'ë ridödité gáti'tës.
- 16 Risöl-lë'ë guiöj bögui' ca zxila',
en riguísie' buzén ca dö.
- 17 Riguísie' bögui' ca yugu' guiöj ruaj.
¿Nuzxi caz gaca guá' ilén le naca ziaga queë'?
- 18 Risöl-lë'ë xtídzë'ë, ate' ruúna' bögui' na'.
Runë' ga recja bö', ate' ruhuóaca nisa.
- 19 Ru'ilenë' zxi'ini xi'sóë' Jacob didza',
en riguixjé' xibá queë' para ilún bönachi Israel ca
rnna.
- 20 Biti' benë' caní ni'a quégaca bönachi ia'tú yödzo
izá'a,
ate' bití' nözigaca ca nácagaca le gunná bë'ë.

¡Guli'cu'ë yöl-la' ba Xanru'!

148

- 1 ¡Guli'cu'ë yöl-la' ba Xanru'!
¡Guli'cu'ë yöl-la' ba, libí'ili' zóali' yehua' yubá!
¡Guli'cu'ë yöl-la' ba, libí'ili' zóali' xitsá'aló!
- 2 ¡Guli'cu'ë yöl-la' ba, libí'ili' gubáz lá'ayi queë'!
¡Guli'cu'ë yöl-la' ba, libí'ili' tscali' dá'ali' Lë'!
- 3 ¡Guli'cu'ë yöl-la' ba, libí'ili' gubidza, en beo'!
¡Guli'cu'ë yöl-la' ba, libí'ili' bölaj bení'!
- 4 ¡Guli'cu'ë yöl-la' ba, libí'ili' zóali' zzan lúzxiba!
¡Guli'cu'ë yöl-la' ba, libí'ili' nisa, zxóali' láhuilö
lúzxiba!

5 ¡Guli'cú'u yöl-la' ba La la'ayi queë' Xanru',
 yúgu'téli',
 tu' bë'ësë' didza', en canísö benë' libí'ili'!

6 Naguixjë' tsaz libí'ili'.
 Naguixjë' xtídzë'ë le catu caz tödi que.

7 ¡Guli'cu'ë yöl-la' ba Xanru' idútë yödzölió,
 en libí'ili' böa' ridali' lu nísado', en nísado' caz,
 8 en libí'ili' guí', en guiöj bögui' yöla sunna, bögui',
 en böaj,
 enca' li', bö' budunu', runu' ca rnaa xtídzë'ë,
 9 en libí'ili' yugu' guí'a, en yúgu'të guí'ado',
 en libí'ili' yaga dxíagaca le ta'bia, en yugu' yaga
 dxi'a,

10 en libí'ili' böa' guixi', en böa' bëdxi,
 böa' tá'ayöj lé'ëba' lu yu, en böa' zoa xíligacaba',
 11 enca' libí'ili' rinná bë'ëli' yödzölió, en bönachi
 yugu' yödzö izá'a,
 yugu' xzí'nigaquië' bönni' ta'nná bë'ë, en bönni'
 ruchi'a rusöröli' yödzölió,

12 enca' libí'ili' bi'i bönni', en bi'i nigúlado',
 yugu' bönni' xzön, en yugu' bí'ido'!

13 ¡Guli'cú'u yöl-la' ba La la'ayi queë' Xanru'
 tu' nayëpisëtë'rö tuzë' Lë'!
 ¡Nayëpisëtë'rö yöl-la' ba queë' ca luyú ni, en ca
 lúxiba xítsá'!

14 Nuchisë' tu le nuzóa tsutsu bönachi queë',
 le naca yöl-la' ba ta'gú'u Lë' nupa néquiguequi
 queë',
 yugu' xzí'ini xi'sóë' Israel, nupa na' nadxí'inë'.

¡Guli'cu'ë yöl-la' ba Xanru'!

149

- 1 ¡Guli'cu'ë yöl-la' ba Xanru'!
 ¡Guli'gul-la queë' Xanru' Dios tu le cubi,
 en guli'gul-la yöl-la' ba queë' ga nudúbigaca nupa
 néquiguequi quez queë'!
- 2 Ral-la' ulu'zí' xibě' Xanru' Dios bönachi Israel,
 tu' náquië' Nu ben léguequi.
 Ral-la' ulu'dzéjalen Dios nupa nacua' Sión,
 tu' náquië' Nu rinná be'e léguequi.
- 3 Ral-la' ila'gú'u yöl-la' ba La la'ayi queë',
 en lu yöl-la' rudzeja ulu'yá'a lahuë'.
 Ral-la' ilúl-la yöl-la' ba queë', ila'capa' lë'e guídi,
 en ila'quinni lë'egaca bihuél-lado',
- 4 tu' raza ládxë'ë Xanru' Dios bönachi queë'.
 Uchisë' nupa ta'guí'i ta'zaca', en usölë' léguequi.
- 5 Nupa néquiguequi quez queë' ral-la' ulu'dzeja
 ládxi'gaca lu bení' queë'.
 Lu yöl-la' rudzeja quéguequi ral-la' ilúl-la queë'
 cate' ni' dégaca lu le ráti'gaca.
- 6 Yöl-la' ba queë' Xanru' Dios ral-la' sóatica'sö
 ruí'iguequi,
 en tu guíë tuchi' natuchi' iropa la'a lu ná'agaca,
- 7 para ulu'zí' lëbi bönachi yugu' yödzö izá'a,
 en ilún xiguia' bönachi izá'a na',
- 8 para ilúguë'ë bregui' guíë ná'agaquië' bönni' ta'ná
 bé'enë' bönachi yödzö izá'a na',
 en ulu'cu'ë bregui' guíë yen ná'agaquië' bönni' lo
 quégaquië',
- 9 para ilunë' quéguequi ca nachuguë' Dios gaca
 quéguequi.
 Naca lë ni le run bal nupa néquiguequi quez queë'
 Dios.

¡Guli'cu'ë yöl-la' ba Xanru'!

150

¹ ¡Guli'cu'ë yöl-la' ba Xanru'!

¡Guli'cu'ë yöl-la' ba Dios lu lataj lá'ayi queë'!

¡Guli'cu'ë yöl-la' ba ga dëda' lataj queë'!

² ¡Guli'cu'ë yöl-la' ba ca nácgaca le zxön nunë'!

¡Guli'cu'ë yöl-la' ba ca naca yöl-la' zxön queë'!

³ ¡Guli'cu'ë yöl-la' ba, ucödxili' lúzugacaba' chivo!

¡Guli'cu'ë yöl-la' ba, quínnili' lë'egaca bihuël-la ca'!

⁴ ¡Guli'cu'ë yöl-la' ba, cápa'li' lë'e guídi, en uya'ali'!

¡Guli'cu'ë yöl-la' ba, quínnili' lë'egaca bihuël-la, en
ucödxili' gui!

⁵ ¡Guli'cu'ë yöl-la' ba, utíl-lali' guië lë'e luzë'e!

¡Guli'cu'ë yöl-la' ba, utíl-lali' guië zxön lë'e luzë'e!

⁶ ¡Guli'cu'ë yöl-la' ba Xanru', tscali' rizi'ili' bö'!

¡Guli'cu'ë yöl-la' ba Xanru'!

Didza' cubi rucá¹ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25